


4722/c

CONSIDERATIONES PATHOLOGICO - SEMEIOTICÆ,

De omnibus humani corporis functionibus,

QUÆ per partes successivas sub Thesium formâ propositæ
fuerunt per triennium Studii Medici in Universitate
Bisuntinâ, Auctore ac Præside N. F. ROUGNON,
Doctore Medico, in eâdem Universitate Professore
Regio, Scientiarum Academia Bisuntinensis necnon
Regiæ Societatis Medicæ Parisiorum Socio.

FASCICULUS I.



VESUNTIONE,

Typis J. F. COUCHÉ, Universitatis Regiæ Typographi.



M. DCC. LXXXVI.



D I L E C T I S
I N A L M A A C A D E M I A
A L U M N I S.

DUM curavi hanc Thesium Medicarum seriem redigere in fasciculos , servatis aliquot earum exemplaribus , minimè putavi commendabilem librum Orbi litterato additum iri ; sed vos habituros esse lectionum mearum textum paulò exactiorem quàm in scriptis publicè dictatis , in quibus calamo exarandis nonnullum tempus teritur vocali explanationi utiliùs consecrandum. In hoc Opere conatus sum prima vobis tradere præcepta , quæ ad naturæ ordinem accommodatiora mihi viderentur , simul & Hippocratis sententiis ac observatis confirmata. Si erraverim , dicent Magistri ; iisque lubens & gratus auscultando eximar à culpâ. Aliundè bonum est proprias Docentium opiniones argui , ut Tyrones ab errore avertantur. Si ad altioremedicinæ naturalis indaginem vos excitare valuerit noster in docendo labor , votorum plenè compos efficiar. Valete.




Digitized by the Internet Archive
in 2017 with funding from
Wellcome Library

https://archive.org/details/b28771229_0001


E R R A T A.

PAG. 14	lineâ	30 ,	flatulenta ,	lege flatulenta.
17		25	infignata ,	lege infignita.
18		26 ,	eofdem ,	lege eofdemque.
32		4 ,	vel ,	lege ver.
81		29 ,	perennatæ ,	lege perennantes.
106		3 ,	hæmoftafæ ,	lege hæmoftafiæ.
122		3 ,	formofitate ,	lege formofitate.
130		30 ,	hæc ,	lege hoc.
181		17 ,	nutricibus ,	lege nutritiis.
227		15 ,	agnofceret ,	lege agnofcet.
230		3 ,	criticous ,	lege criticus.
231		25 ,	aph. 1 ^o ,	lege aph. 10.
241		18 ,	ortufuo ,	lege ortu fuo.
247		20 ,	inferioris ,	lege superioris.
287		8 ,	aph. 56 ,	lege aph. 54.
290		7 ,	aph. 34 ,	lege aph. 36.
302		15 ,	appareat ,	lege apparuit.
328		30 ,	inc ,	lege hinc.
331		29 ,	parcendo internæ ,	lege parcendo faciei internæ.

Cætera emendabit benevolus Lector.



CONSIDERATIONES PATHOLOGICO-SEMEIOTICÆ, DE OMNIBUS HUMANI CORPORIS FUNCTIONIBUS.



P R O E M I U M.

TA constitutum fuit humanum corpus, ut, mediante
I sensu & irritabilitate quibus pollet, quandiū vivit homo
patefiant in illo phœnomena varia, varios ejus status
designantia, quæ signorum nomine vocari solent à Medicis.
Sic calor animalis est signum vitæ: sic dolor est signum alicujus
irritationis, &c.

Dùm homo vivit, & prætereà benè valet ac sanus est, signum
huic statui proprium habetur in libero exercitio functionum,
quæ dato individuo propriæ sunt. Sed, si homo vel levissimè
ægrotaverit, id est, si una illius pars aut functio levissimè per-
turbetur, tunc apparet signum aliquod, proprium ad desig-
nandam turbam illam, quia illius est effectus naturalis. Quod
signum, quàmvis reipsà sit quidpiam morboſi, non vocatur

nomine morbi, ob simplicitatem suam, sed nomine symptomatis, quo generaliter intelligitur quodvis accidens simplex, contingens in aliquâ functione contrâ tenorem illius. Ex. gr., dolor simplex in oculo est symptoma alicujus irritationis quæ huic parti infertur: quæ irritatio spectari quidem potest tanquàm aliquis morbus, sed quæ solo nomine symptomatis appellanda est, propter mali illius simplicitatem.

Quandò verò aliqua pars, aut functio aliqua, graviolem experitur læsionem, cujus occasione plura simul phœnomena seu symptomata turbatim accidunt, propter varias hujus partis aut functionis relationes: status ille nequit ampliùs appellari nomine simplicis symptomatis; sed vocari debet & est reipsâ *morbus formatus*; id est, morbus compositus ex symptomatibus plurimis, quorum simultaneo concursu formatur determinata quædam affectio morbofa notabilior. Sic peripneumonia est *morbus formatus*; nempe morbus in quo plura simul phœnomena constanter accidunt; scilicet dolor lateris gravativus, respiratio difficilis, tussis molesta, sputum sanguinolentum, febris acuta & pulsus mollis. His enim omnibus symptomatibus componitur & *formatur* peripneumonia; eaque symptomata ita fiunt, quia gravis adest determinata aliqua læsio pulmonum, quam esse inflammationem docuit observatio.

Sed quia dantur plurimi *morbi formati* valdè affines, quales sunt, ex. gr., pleuritis & peripneumonia; & cùm valdè intersit unum distinguere ab altero, dividenda sunt signa morborum formatorum in signa diagnostica, & in pathognomonica.

Diagnostica signa peripneumoniæ sunt ea signa superiùs relata, quorum omnium præsentia præcisè dignoscitur peripneumoniam adesse; pathognomonica verò ea sunt, quorum auxilio peripneumonia distinguitur ab aliquo alio formato

morbo, etiam valdè affini, qualis est pleuritis. Pathognomonica signa peripneumoniæ sunt 1º. dolor lateris gravativus, quia ille dolor è contrà pungitivus est in pleuritide. 2º. Sputum ab ipsis morbi initiis sanguinolentum, dùm illud sanguine duntaxat tinguatur quartâ circiter die pleuritidis. 3º. Pulsus mollis, qui durus è contrà deprehenditur in pleuritide. Rarò datur signum unicum pathognomonicum. Ideòque, in morbis plerisque, loco signi unius pathognomonici, ipsam observamus syndromem pathognomonicam; id est, ipsam signorum omnium priorum conjunctionem assiduam; veluti observari etiam liceret in ipsâmet peripneumoniâ, cujus nempè commemorata signa non alium morbum indicare possunt, præter peripneumoniam, si ea simul composita fuerint; dùm ea nequaquàm sunt signa peripneumoniæ, vel diagnostica, si per se singula spectentur, aut si plura eorum defint.

Cognitâ jam specie morbi per signa sua demonstrativa, adhuc interest distinguere à quânam causâ ille pendeat, utendo scilicèt signis illis quæ indicant causam morbi, tùm illis quæ saltem docent quid illa causa non sit. Ex: gr, ad hoc ut dignoscatur causa peripneumoniæ, utrùm nempè pendeat ab impactu in pulmonibus sanguine inflammatorio, vel ab infarctu pulmonum bilioso, aut atrabilioso, aut pituitoso, aut alterius alicujus naturæ, v. g., arthriticæ, &c. : attendere oportet, 1º. ad signa quæ indicant constitutionem inflammatoriam, vel biliosam, vel atrabiliosam, vel pituitosam individui ægroti; 2º. ad ea omnia quæ designant constitutionem tempestatis anni; 3º. demùm ad signa quæ ostendunt accidentalem quamdam idiosyncrasiam, seu constitutionem, v. gr., arthriticam, &c.

Sed si signa diagnostica causæ fuerint obscura, ideòque difficilius sit statuere quænam præcisè causa produxerit morbum;

tunc quærendum quænam causa non sit. Porro in casu peripneumonix suppositæ, jam primò indicaretur illius causam non esse biliosam, si fieret in individuo juniore, si in sene debili: tum si per hiemem talis morbus inciderit, dummodò non detur tempestatis constitutio extraordinaria; pariter indicaretur causam peripneumonix non esse pituitosam, si morbus hic contingerit juveni robusto, si per æstatem acciderit, & sic de cæteris. Adde etiam, quòd simili in casu non negligenda sint signa *anamnestica*, seu commemorativa, quæ inter demonstrativa signa collocantur à multis Medicis. Nam horum signorum ope, præterita corporis constitutio memoriâ repetitur; indèque, cæteris paribus circumstantiis existentibus, sæpissimè subministratur cognitio haud spernenda.

Cognito nunc morbo, cognitâque causâ illius, superest futuros ejusdem eventus prævidere, & illud obtinetur mediantibus signis prognosticis. Talia signa desumenda veniunt ex intensitate causarum, tum ex contrariis aut secundis circumstantiis, eaque triplicis sunt generis. Alia scilicèt dicuntur prognostica signa futuræ salutis, vel mortis: decretoria alia; quorum signorum fons uberrimus habetur in lucidâ observatione omnium symptomatum, factâ ad exemplum Hippocratis; minimè verò institutâ secundum varias præjudicatas opiniones. Sed, irritâ attentiori observatione, sciendum est quòd *morborum acutorum non omninò tutæ sint prædictiones, neque salutis, neque mortis*, sicut monetur, aph. 19. sect. 2.

Haud aliter, ut nobis videtur, medicè ratiocinandum est de symptomatibus morborum, de morbis ipsismet, ut & de eorum causis. Vanum omninò, scholasticisque dumtaxat quisquiliis dignum est, adhærere longis commentationibus circa morbos *simpliciter*, organicosve; tum circa morbos contingentes in figurâ,

numero , magnitudine , situ , superficie , qualitatibus , &c. Nec aliundè , ut opinor , ducenda est illa quæ in operibus Pathologicis ac Semeioticis plerùmque apparet futilis verborum inanum farrago , aut tædiosa puerilium dogmatum obscuritas.

His ergò præmissis , nunc considerandum , quænam sint signa sanitatis & morborum , respectu functionum omnium corporis animati , per partes singulas spectatarum , eum sequendo ordinem , qui nobis placuit in enarrandis humani corporis functionibus.

C O N S I D E R A T I O N E S P A T H O L O G I C O - S E M E I O T I C Æ.

C A P U T P R I M U M.

DE physica vitâ in se spectatâ.

PHYSICA vita, seu status ille corporis humani sensibilis & irritabilis, qui necessarius est ut mutuum commercium mentis & corporis duret quodammodò, aut saltem utcumque restitui queat, integer dignoscitur sequentibus signis. Nempè libero & æquali pulsu arteriarum, simul & illæsâ respiratione, illæsoque cerebro. His enim datur intelligere integram esse vitalem actionem cordis, pulmonumque & cerebri; adeoque concipitur sanguinem & spiritus optimè fluere per organa illa, horumque arterias, venas, nervos: id est, integras esse physicas dispositiones corporeas, in quibus physica vita consistit, hancque proindè actu tutam esse. Undè Medicus simplici hoc criterio valet rimari altiora vitæ fundamenta, & audacter pronuntiare de soliditate eorum; tandemque fit capax iis sustinendis

aut reparandis tuta & congrua præscribere media, si quædam labilia videantur.

Quoties enim accidit, ut ipsamet physica vita suas affectiones seu symptomata patiatur, imò & pertimescenda sit ruina illius, magis vel minus proxima! haud rarò siquidem observantur cordis palpitationes, aut intermissiones, aut variæ motûs ejus imminutiones, vel & accelerationes: nec rarò contingit cor ipsum vulnerari. Quoties etiam fit ut vita in varium discrimen adducatur ex parte pulmonum! quandò scilicèt contingit asthma, dyspnœa, orthopnœa, vel & apnœa, & catharrus suffocans; his enim de causis turbatur aut penè supprimitur vitalis trajectio sanguinis per pulmones.

Agemus de affectibus pertinentibus ad pulmones, ubi de respiratione. Hic dumtaxat indicabimus proprias ægritudines cordis, tùm ejus crepaturas & vulnera, incipiendo à vulneribus.

Præsumitur cor vulneratum esse, attendendo ad situm & penetrationem vulneris, contingente morte citatissimâ, scilicèt propter lethalem hæmorrhagiam ex cordis vulnere fluentem. Idem verò vulnus etiam præsumitur, sed multò quidem levius, si in casu vulneris in thoracem penetrantis & donati directione congruâ versûs cor, superveniat ingens vitæ defectio, quæ valeat suspendere hæmorrhagiam indè oriundam, imò & aliquandò feliciter favere cordis cicatrici. Non rarò enim repertæ sunt in corde cicatrices evidentes, necnon & quandòque repertum est cor vulneratum, in homine qui aliquandiù post vulnus inflictum supervixerat. Unde patet vulnera cordis non semper morte necessariâ terminari, quantumvis talia vulnera perquàm periculosa de factò censenda sint.

Quidam credunt Hippocratem spectasse cordis vulnera tanquàm certò lethalia, eò quòd, lib. 1. de morbis, scripserit

hominem mori vulnerato corde; tùm quia, aph. 18. sect. 6, vulnus cordis lethale declaravit. Quidquid verò sit de sententiâ illius in hanc rem, expressiùs scripsit Celsus, lib. 5. cap. 26. pag. 283. L. 18, *servari non posse, cui cor percussum est*: addendo ibid., nempè pag. 285. L. 27, *corde percusso maturam mortem sequi*. Cui opinioni assensus est Galenus, lib. 5. de locis affect., cap. 2, sed sub aliquâ conditione, quâ pensitatâ, videtur vulnera cordis meliùs ab illo æstimata fuisse, quàm à cæteris. Galenus equidem, loco citato, dixit *protinus hominem mori necesse esse*, vulnerato corde; sed postea subjunxit, *aliquot non solùm eâ die quâ vulnerati sunt, sed sequenti quoque nocte vivere potuisse*.

Non solùm Galeni effatum istud verum est, sed & non admodùm rara sunt exempla hominum qui aliquandiù vixerunt vulnerato corde, imò & qui persanati fuerunt. Videantur observata Morgagnii, ubi de sedibus & causis morborum, epistola 53. cap. 6, Senac, *traité du cœur*, Liv. 4. ch. 6. §. 1 & 2, tùm Vanswieten, commentaria in Boërrh. aph. 170. Quibus exemplis liceat mihi addere unam domesticam observationem, quæ hæc est. Labente hyeme 1782, vidi quemdam militem tormentis bellicis addictum, nomine Sainsoltz, è legione Tullensi, novos milites Vesuntione tunc conquirentem, qui obiit in nosocomio hujus urbis quartâ die morbi lateralis, & in quo sequentia observavimus. Nempè, tradito ejus cadavere ad faciendas injectiones in amphitheatro anatomico Universitatis Bisuntinæ, & aperto thorace ejus post refrigeratam ceram, reperta fuit in pericardio satis magna copia ceræ coloratæ, quæ per vulnus thalami dextri cordis fluxerat. Consideratis illicò tegumentis externis, visa fuit cicatrix recens in latere dextro, propè cartilagine mediarum costarum legitimarum; deindèque

factis variis inquisitionibus de vitâ hujus militis, sequentia didicimus & comprobavimus. Eum nempe hominem, duobus antea mensibus, gladio vulneratum fuisse, eumque posthâc languidum, tristem, & taciturnum mansisse in cubiculo communi per multos dies, ferè absquè cibo, & deindè ad munera consueta rediisse. Undè patuit quòd vulnus illud ventriculi dextri in hoc homine sanatum penitus fuisset, nisi, superveniente febre acutâ pleuriticâ, cordis motus vividiores facti superavissent resistantiam cicatricis incoeptæ, quâ indicabatur cordis vulnus quinque circiter lineas longum.

Quoad crepaturas cordis, sive contingant in uno thalamo, sive in altero, per ulcerationem exeso, aut aliquâ de causâ amplificato, attenuato, tandemque disrupto, mors illicò subsequitur; idemque eventus semper accidit, quandò vasa cordis coronaria, aliave præcordia ia majora similiter aperta fuerunt. Videantur observationes D. Morand, in actis Parisinis, anni 1732; quibus addenda est historia lugendi D. Levacher, mariti fororis prædicti D. Morand, cui, post subitanèam mortem, reperta fuerunt vasa cordis coronaria effracta. Hic autem à longo tempore conquerebatur de singulari dolore sub sterno, quàmvis de cætero sanus videretur.

Quoad reliqua physicæ vitæ symptomata, alia pendent ab imminuto, imò & suppresso motu cordis, qualis & asphyxia, syncope & leipothymia: alia pertinent ad ejusdem motûs augmenta: alia demùm sunt illius motûs intermissiones & palpitantes, de quibus nunc sigillatim.

Palpitatio cordis nihil aliud esse videtur præter violentam ac inordinatam ejus contractionem, unâ cum magnâ resistantiâ oblatâ sanguini in arterias propulso, quâ ratione percipitur arteriæ pulsatio fortior, eaque ultrâ solitum ordinem contin-

gens,

gens, corde ipso interim similem experiente concussione. Quæ pulsationes, si assiduæ fuerint per certum quoddam tempus, certò pendent ab aliquâ causâ topicâ, ideòque sæpè accersunt extraordinariam cordis dilatationem veluti aneurismaticam; si verò transitoriæ illæ fuerint, causam arguunt sympathicam omninò transitoriam.

Sed quæcumque fuerit palpitatio cordis, ea indicat inordinatum ac violentum impetum liquidi nervosi in villos cordis, qualis impetus creari potest à plurimis rebus. Talia sunt 1°. valida pathemata iræ, gaudii, terroris; 2°. motus corporis violenti, seu in cursu, seu in variis ludis gymnasticis; 3°. evigilatio præceps, cujus nempè occasione obruitur cor sanguine per venas celerius reduci; 4°. nimia cordis irritabilitas, qualis induci valet ratione stimuli alicujus topici aut sympathici. Topici scilicèt dicti, quandò fovetur ille à vermibus in pericardio conclusis, à sanguine ibidem extravasato, à phlogosi vel ulceratione cordis aut pericardii, à varicibus aneurismatibusve præcordialibus, ab ossibus cartilagineisve concretionibus vasorum præcordialium, & deniquè à polypis cordis: sympathici verò, quandò stimulatio cordis creatur ab infarctu hysterico, hypochondriaco, nephritico, hæmorrhoidali, vel & ab variis ductûs cibarii irritationibus.

Variarum causarum prædictarum diagnosi erui potest ex attentâ consideratione physiologicâ & pathologicâ partium affectarum: sed opus est magnâ accuratione, & cautè pronuncian- dum. Quoad prognosim autem, omnia magis clara sunt. Si cordis palpitationes transitoriæ fuerint, non aliud periculum agnoscunt quàm periculum causæ cognitæ, satisque facillè sanantur ut plurimum. Sed si fuerint habituales valdèque notabiles, eæ habendæ sunt insanabiles, sæpeque terminantur morte subitaneâ.

Pulsûs intermissio vocatur status ille pulsationis arteriæ digito interrogatæ, in quo deficit una aut altera solita pulsatio; sive defectus ille incidat ritu regulari, sive irregulari. Tale symptoma designat varias affectiones cordis, magis vel minùs periculosas; vel & quandòque salutares promittit eventus, nempè quandò materies critica molitur abire per cloacam intestinalem, aut hæmorrhoidalem, prout designatur ex tenore intermissionis, circà quem consulatur de Bordeu.

Quæcumque verò sit intermissio pulsûs cordis, cùm supponat inæqualem influxum liquidi nervosi in cor, seù potius stationariam ejus interceptionem; concipitur id fieri posse, 1°. propter inopiam hujus liquidi, tùm propter fatiscentem cordis irritabilitatem vitalem, sicut observatur in moribundis; 2°. propter aliqua vitia organica cordis, aut vasorum præcordialium; qualia sunt convulsio, polypus, inflammatio, concretiones ossææ aut cartilagineæ, aneurismata; 3°. propter sanguinis aliò dimoti revulsionem, aut ejus actuale deperditionem, quâ occasione fit sanguinis penuria in corde: sicut observatur tempore hemorrhagiæ majoris aut diuturnæ, tàm internæ, quàm externæ: aut post illam; 4°. deniquè, contingit etiam pulsûs intermissio imminente crisi per viam intestinalem, quæ dignoscitur eò quòd illa intermissio fiat post signa *pepasmî*, non solum absquè signis majoris debilitatis, sed & jamjam è contrà subtùs apparente *euphorîâ* aliquâ, seu levamine.

Quoad prognosim intermittentis pulsûs, facile est agnoscere quænam intermissio pulsûs lethalis sit; quænam symptomatica magis vel minùs periculosa; quænam demùm critica bona, aut lethalis.

Pulsus arteriarum non rarò evadit crebrior, vel absolutè, vel tantummodò respectivè: tuncque semper arguit celeriores

contractionem systolicam cordis, quæ similiter est vel absoluta, vel respectiva; absoluta nempe, in casu motûs sanguinis adaucti per motus corporeos, aut creati ab assumptis cardiacis, vel ab animi quodam pathemate fervidiori: respectiva verò, in casu febrium, tam inflammatoriarum, quàm humoralium; cujus augmenti proportionem judicatur febris gradus, seu intensitas, sicut fusiùs dicetur, ubi de signis ex sanguinis circulatione desumendis.

Quemadmodum autem pulsus arteriarum non rarò adaugetur, ita & sæpè minòr fit; imò & quandòque sic minuitur, ut omninò videatur deletus. Hoc observare est in asphyxiâ, tum in variis animi deliqui gradibus, qui tres agnoscuntur, *leipothymia* scilicet, *leipopsychia*, & *syncope*.

Leipothymia est ille status vitæ, in quo tam magna adest pulsûs imminutio, sicque vires protinùs debilitantur, ut corpus vix sustineri valeat; quod tamen fit, adhuc manente mente, nulloque sudore promanante.

In *Leipopsychiâ*, quæ est secundus gradus, debilitas pulsûs multò major est, & tandem patiens non solum deficit sensu sicut & motu: verum etiam linquitur animo, absquè quòd tamen sudor ullus frigidus adhuc prorumpat.

In *syncope* demùm, quæ est fortius ac periculosius deliquium animi, fit præceps virium lapsus, quem concomitatur pulsûs defectio integra, privatioque sensûs & motûs; & quem inseparabiliter consequitur frigiditas totius corporis, unà cum sudore frigido, qui & sudor syncopticus audit.

Tres illi affectus, ut facilè concipitur, differunt duntaxat quoad intensitatem & numerosiorem phænomenorum symptomaticorum syndromem. In *leipothymiâ* siquidem deficit solummodò facultas vitalis, dum in *leipopsychiâ* facultas animalis simul labefactari incipit, sicut notavit accuratus Gorraeus in definitionibus; quod malum majus adhuc fit in *syncope*.

Solent prædicti duo primi gradus oriri propter inanitiones quolibet; sed sæpè etiam fiunt propter sanguinis jacturas, non solum si eæ copiosæ fuerint; sed si longæ, etiamsi guttatim contingerent, factâ ad illas attentione. Accidunt etiam eadem symptomata, effectû sæviorum dolorum, ut & ideâ rei horridæ: tum ex rupto intrò abscessu, quâ nempe occasione contingit exsolutio, vel vomitus, vel animi deliquium, sicut notatur apud Hippocratem, aph. 8. sect. 7. Quinimò nascitur quandòque deliquium animi periculosissimum propter latens quoddam vitium propè cor, vel aliud viscus nobile; & hinc concipitur quare, ex aph. 41. sect. 2., *qui crebrò & vehementer citrà manifestam causam animo linquuntur, repente moriantur.* Quam prognosim jam pluries eventû confirmatam vidi.

Notatur quoque à Practicis, quòd *si profluvio muliebri convulsio & animi defectio supervenerit, malo sit*, ex aph. 56. sect. 5. Natura enim tunc non fatisceret ob evacuationem mulieribus adeò amicam, nisi excessiva foret, aut nisi procederet à causâ pessimâ. Utrumque autem sanè malum est, sicut omne id quod naturæ modum excedit, ex aph. 4. sect. 2.

Unam adhuc addemus notam ergà deliquium periculosum animi, quod contingit unâ cum aliis signis effœminatarum virium, apud eos qui potibus calidis abutuntur, de quo mentio habetur aph. 16. sect. 5, his verbis: *calidum, eò frequentius utentibus, has affert noxias, carniū effœminationem, nervorum impotentiam, mentis torporem, sanguinis profluvia, animi defectiones. Hæc quibus accidunt mors.* Quod ita quidè adventat, quia ubi, propter talem abusum, solida viscerum compages hucusquè degeneravit, sanguisque simul tantâ tenuitate aquosâ correptus fuit: natura ut & ars impares sunt tantis vitiis emendandis. Ideòque his vitiis perstantibus, vita necessariò suc-

cumbere debet; neque id mirum. Ex hâc autem Hippocratis observatione ergà assumptores potuum calidorum, sicut & eos qui calidis balneis abutuntur, apparet hasce consuetudines admodum familiares fuisse sub illius ævo. Sed si mala eadem nunc non oriantur tam frequenter, similem ob causam, saltem apud nos; nonnè heu! eadem omninò contingunt quandòque apud divites assiduo otio colliquescentes, præsertim si libido maturior & effrænata locum simul habuerit, ac præsertim manu stuprum.

Memorandum superest vitale symptoma omnium terribilius, quod asphyxia vocatur, etiam vernaculè. Est autem ille status vitæ in quo omnia ejus exteriora signa ita deleta sunt ad sensum spectatoris, & ita subitò: ut perfecta mortis imago videri videatur, præ cadaveroso livore & frigore, omnimodâque, tum pulsûs, tum respirationis carentiâ: & ut certissima mors indè accersatur, nisi præstò succuratur talia patientibus.

Jàm diù notum erat asphyxiam creari à submersione, à strangulatione, à frigore & calore summo, à doloribus icribusque vividioribus; tum ab hæmorrhagiis maximis, necnon & ab animi fervidioribus pathematis. Sed prætereà compertum est, formidatissimam hanc affectionem explodi sæpiùs ab omnigeno fluido aëriiformi haud respirabili, quale est gas inflammabile; tum gas cretaceum, quod antè alia vocatum fuit gas mephiticum; qualia etiam sunt alia effluvia gaseosa acida, necnon & alcalina dicta, tum hepatica; quibus deniquè addenda sunt effluvia perniciofa florum & fructuum, teste ingeniosissimo Ingen-Housz.

Lethalis effectus horum omnium vaporum in hoc consistit, quòd iis mediantibus aër atmosphericus non ampliùs respirabilis sit; adeò ut homines ab iis vaporibus affecti intereant, quasi forent conclusi sub campanâ Boylianâ, aut aquis submersi.

Videamus nunc quænam sint symptomata hujus mephitismi, prout procedit malum illud, & consideremus quid observetur in cadaveribus hominum ab illo miserè enecatorum, teste D. Harman.

1°. Nempè, ubi primùm mephiticus vapor incipit exercere vires suas suprà hominem, hic homo plerùmque vomitu corripitur, aut magnis & continuis nauzeis saltem angitur. Tùm respiratio ejus simul fit æquè laboriosa, ac solet esse in insultu asthmatis convulsivi; prætereaque torquetur gravi dolore capitis: ad quod manum ferè continuò admovet, quasi coactus.

2°. His in circumstantiis, si homo maneat expositus tali vaporì, ille brevi tempore prosternitur orbatus omni sensu & motu; convulsiones simul ingruunt; oculi protuberantes sunt & aperti; mandibula constringitur nullo medio dimovenda, eaque invincibiliter constricta manet.

3°. Demùm, progrediente asphyxiâ, facies tumida evadit & colorata; quandòque verò livida, non exceptis ipsismet labris. Abdomen meteorismo corripitur non valdè renitenti. Pulsus & respiratio silent omninò, ideòque datur omnimoda quies in thorace.

Si homini taliter syderato non illicò succuratur congruâ arte, conclamatum est de illo; brevique tempore post hanc mortem possunt jam observari singulares mutationes in cadavere ejus, quasi ille à pluribus diebus vitam amisisset. Nempè textus cellularis communis reperitur ampliatus, sicut contingit in pecoribus post insufflationem subcutaneam. Musculi, præsertim abdominales, præbent nigredinem mollitiemque, qualis à putrore summo oritur. Abdomine aperto, exploditur multus aër foetidissimus; prorumpunt cùm impetu ventriculus & intestina valdè statulenta; crassa intestina potissimùm turgent; tenuia verò, præ-

fertimque ileum , sphacelo ic̃ta apparent ; turgent vasa eorum sanguine aterrimo picem liquatam æmulante ; stagnat in cavit̃ate hypogastricâ multus sanguis grumofus , fluitans in fero benè multo ; hepar , lien , renes , uterus , nihil spectabile præbent ; sed in tractu cavitatis ventriculi , ut & tenuium intestinorum , videre est materiem , qualis in morbo nigro : in hisque cernitur forma & color veri botelli.

Quoad pectus , pulmones magis turgidi sunt quàm par est , & scatent maculis nigris ; iique singulas per incisiones evomunt liquorem multum , spumofum , sanguinolentumque. Bronchia obruta sunt humore viscoso , spumoso , glottidem operiente. Cor & auriculæ , ut & vasa præcordialia , scatent copioso sanguine grumoso.

Cerebro demùm considerato , inveniuntur ipsa cranii tegumenta sanguine atro referta , ut & ipsæmet diploës cellulæ. Dura mater cranium deferit omninò , exceptâ vicinitate sinûs longitudinalis. Hic ductus venosus crassus est lividusque , plenus tamen sanguine atro , sicut vasa abdominis. Cerebrum ipsum , justò tumidius , in suâ superficie imbutum est muco viscoso , & pingitur vasis nigris admodùm varicosis. Deindè , si substantia medullosa cerebri horisontaliter secta fuerit , ea præbet parvulas maculas nigras. Ventriculi pleni sunt fero crocei coloris , in quo innatat plexus choroideus ferè mutatus in mucum. Cerebellum tamen in statu suo ordinario deprehenditur. Omnes nervæ conjugationes faciliori negotio demonstrantur , quàm in aliò quolibet cadavere ; & , quod meritò annotatur à D. Harman , nervi olfactorii crassitudine , colore , ut & consistentiâ insignes sunt , scilicèt maximè rubri , pulposi , & multò crassiores quàm congruit foraminibus ossis cribrosi.

Quæ omnia prædicta celerrimæ putredinis phœnomena viden-

tur promanare ex intussuscepto mephitismo per absorbentes venulas, simul & ex retentâ illâ aurâ quæ à pulmonibus continuò exhalat, quâ solemne est aërem expiratum phlogisticari.

Si verò statim & congruenter tractetur asphycticus, qui infectus fuit à vapore carbonum; si nempè, sublatis omnibus ejus vestimentis, quantociùs in aprico perluatur irrequietâ frigidæ asper- sione suprâ faciem, (etiam per plures horas, si opus sit), tandem ille reviviscit; & hæc sunt signa resurgentis vitæ, secundum observata accurata Medici jam laudati.

Primum nempè signum vitale habetur in parvulis singultibus, constrictioneque & susurro levi narium. Multiplicatis postea singultibus, eodem momento adaugetur mandibulæ stricture. Quibus in circumstantiis, si perrexerint singultus, iiq; for- tiores evaserint, prout frigida affatim aspergitur; horum occa- sione eructantur ex ore materies spissæ, mucosæ, spumosæ: necnon & quandòque excitatur vomitus niger, veluti in morbo nigro Hippocratis; cui vomitui ferius ociùs succedit universalis horror, quo feliciter indicatur respiratio mox mox sensibilis evasura.

Factis jam his progressibus, redit vox cum respiratione, inter clamores nonnullos; sed tunc patiens ut plurimùm delirat rea- liter, illeque oculis apertis & protuberantibus nihil videt adhuc; manetque tale delirium, talisque cæcitas, pro majori impressione factâ per mephitismum. Rationis tandem usus, non à longè suc- cedit delirio huic momentaneo; illeque usus primò impenditur in declarando dolore circâ occiput, in lugendâ exultatione cordis ex quâ fluit pulsus intermittens: tùm deniquè, in justâ querelâ algoris maximi, omnia membra dispersi, & creantis horripilationes, velut in paroxismo febris intermittentis. Tunc duntaxat, minimè verò maturius, patiens tutò potest in lecto reponi

reponi. Calor, qui posthàc restituitur, plerùmque inducit soporem magis vel minùs notabilem, cui succedit tandem debilitas generalis, proportionata gradui asphyxiæ toleratæ.

Tunc, ut & sequenti die, juvat clismatibus uti, necnon potione aliquâ catharticâ; quorum ope brevì redit sanitas, nullo remanente vestigio tolerati mali. Sed quoad asphycticos submersos, non eadem est sors, sicut nec tractatio. Corpora eorum, valdè frigefacta per submersionem, non levantur ab impressionibus frigidi aëris, sicut nec aquæ frigidæ. Bonum è contrà, adhibere calorem lecti, unà cum aliis auxiliis, secundùm methodum D. Pia.

Aliud genus asphyxiæ singularis nuper innotuit; familiare destercoratoribus latrinarum, quod ab illis gallicè vocatur *le Plomb*, & cujus effectus morbosi, quoad plura, congruunt cum asphyxiis mephiticis; differunt verò quoad multa alia. In hoc affectu quidem patientes fiunt quoque asphyctici; sed, notante D. Hallé, asphyxia hæc differt ab asphyxiâ vulgari. 1º. Nempè asphyxia dicta *le Plomb*, contagiosa est. 2º. Ubi ea cuidam homini communicata fuit, producit symptomata diversa ab symptomatibus asphyxiæ *plumbagineæ* primigeniæ, sicut mox dicemus.

Stupendus ille affectus, dictus *le Plomb*, oritur sanè ab impeditâ respiratione, sed nascitur simul ab intussusceptione miasmatis alicujus teterrimi, quo sanguis hominis infecti conspurcatur illicò, & corrumpitur: ideòque brevi tempore fit capax emittere miasmata nova similia, foetore singulari insignata, simul & contagione mirabili.

Nondùm patuit quodnam sit miasma illud. Apparuit duntaxat illud non esse naturæ aëris cretacei, neque alcalini, neque hepatici, neque inflammabilis. Quodcumque verò sit, illud atmosphærâ levius est, non omninò inimicum combustionis, non

inflammabile; neque etiam foetens, nisi quando promanat ab homine affecto; nec corrigitur à vaporibus acidis. Prætereà illud visum est transgredi maximam laticis aquei copiam, nullâ toleratâ sui absorptione; illudque sæpè eructat ex loco antea innocuo, simodò sublevetur lapis latens inter vetusta stercora, aut si trans aquam latrinarum (*la Vanne* gallicè dictam) adigatur corpus quoddam, ad percontandam latentium materierum naturam.

Si tale miasma fuerit gas aliquod singulare, vel illud oritur ex aliorum combinatione, vel forsan non emanat aliundè quàm ex corporibus quæ putruerunt in loco coërcito. Docebunt observationes. Sed, donec meliora innotescant circa corpus illud, juvat tradere symptomata asphyxiæ *le plomb* dictæ, sive illius quæ primigenia est, sive illius quæ suscepta fuit per communicationem, adeòque secundaria vocari potest.

Nempe scripsit laudatus D. Hallé (1), semel se vidisse asphyxiam plumbagineam primigeniam, & hæc observata fuisse symptomata; hominem scilicet in ipso instanti invasionis semel vociferatum esse, eumque illicò asphyxiâ ictum fuisse; sed brevi posthac restitutum beneficio congruæ artis, & sequentia dein symptomata expertum fuisse. Nempè, ubi primùm miser ille incoëpit recipere animum, abdomen ejus intumuit, simul & os ipsi repletum est spumâ sanguinolentâ. Loquela, ut & respiratio, non nisi pedetentim redintegratæ fuerunt, prægressis vomitibus, alvinisque dejectionibus spontaneis. Alii verò qui plumbo asphyctico leniùs capti erant, experti sunt symptomata respirationis anhelosæ, quæ dissipata non fuerunt, nisi magnos post conatus, eosdem convulsivos.

Quod spectat asphyxiam plumbagineam secundariam, seu

(1) Recherches sur les effets du méphitisme, page 94.

communicatam, ea nascitur per intussusceptionem miasmatis peculiaris, quod exhalat ex ore hominis primitus tentati affectione plumbagineâ dictâ. Sed illud observari meretur, nempe quòd contagiosum miasma plumbagineum, promanans ex homine primitus infecto, referat singularem foetorem: etiamsi nullus omninò percipiatur odor peculiaris in loco asphyxiæ producendæ apto, antequàm homo aliquis priùs ibi plumbo infectus fuerit. Quinimò, ubi jam aliquis est plumbo imbutus, foetor ille dignoscitur, sicut D. Hallé didiscit à quodam præposito reliquis operariis, nomine Verville; quippequi monuerit percipi hunc odorem, paulò antequàm ipse corripere-
retur asphyxiâ plumbagineâ communicatâ: veluti miserâ suâ forte probaturus assertionem suam. Undè hic foetor hominis primitus infecti, manifestò indicat celerrimam alterationem, quæ creata fuit in ejus humoribus.

Symptomata autem convulsiva plumbi communicati, observante D. Hallé, loco citato, multò vividiora sunt quàm in primitivo plumbo. Nam ea exhibuerunt spasmos ad tetanum accedentes, necnon paroxismos haud absimiles ab epilepsiâ; quibus pacatis insultibus, datæ fuerunt aliquæ induciæ. Sed eadem symptomata manè sequenti recruderunt, quæ tunc fuerunt dissipata beneficio spontanei vomitûs materierum atrarum foetentiumque; huicque vomitui successerunt dolores, qui post quindecim dies remissionem obtinuerunt per supervenientem eruptionem macularum elevatarum, durarum, rubrarum, atque creantium terribiles pruritus; quâ eruptione percussâ post quinque hebdomadas, suborta fuit tussis violenta convulsivaque, notata insultibus stationariis, ad normam tussis ferinæ infantum. Hanc tussim comitabantur dolores atroces stomachi, interimque patiens experiebatur quamdam immobilitatem semper

simul perferendo vividum dolorem in brachio dextro , præprimisque in crure , & tibiâ ejusdem lateris. Synapismus solus attulit notabile solatium. Nihil proficiebant demulcentia internè adhibita , sicut nec narcotica ; quæ ultima tamen leviter allevaverunt post adhibitum synaspismum. Nihil quoque profuit usus sudoriferorum , neque acidorum ; imò nocuum fuit alcalinum volatile assumptum , itemque nocuus Mindereri spiritus. Vesicantia procul dubiò utilissima fuissent , si voluisset illis uti prædictus patiens ; qui propterea , ut notat D. Hallé , pluribus postea mensibus (nempè per hyemem sequentem) , laboravit anginâ tenaci , quam comitabantur maculæ rubræ , minùs quidem elevatæ , minùsque duræ , quàm eæ fuerant paulò post asphyxiam communicatam ; sed quæ apertè indicabant latentem adhuc portionem miasmatis plumbaginei suscepti. Undè & , tristi experienciâ suâ , idem homo adhuc probavit verum esse quod asseruerat ; nempè asphyxiam plumbagineam communicatam multò tenaciorem esse , atque difficiliorem curatu , quàm plumbaginea asphyxia primigenia.

Non sunt prædictæ dumtaxat duæ facies , sub quibus lues hæc tetra ludit mortales. Si crediderimus eidem Verville (multa autem fides habenda ingenioso observatori) , secundum eum dantur quinque species *plumbi* , variis suis signis distinctæ , quas refert D. Hallé , loc. cit. pag. 99 ; nisi forsan species illæ tantummodò pendeant à variâ patientium constitutione. Enimverò his adhuc addenda forsitan sexta species ; asphyxia videlicet *tarda* , qualis fuit illa quam passa est quædam mulier die 6 junii 1781 , dùm aderat sacris Officiis ; quæ nempe mulier die veneris proximè præcedenti adfuerat asphycticis , eaque jam tunc asphyctica facta fuerat propè januam Sancti Antonii ; nam , si verum esset eam reipsâ laborasse denuò ,

duobus diebus elapsis à primâ affectione : indè etiam dicere liceret, illam mulieris asphyxiam secundam, vocari posse *plumbum tardum*, cæteras verò *plumbum subitum*.

Longior jàm fortè videretur digressio nostra de variis asphyxiis vernaculè dictis *le plomb*, si jàm ab omnibus cognita forent observata D. Hallé, viri Medici Parisiensis, Regis jussu typis mandata hoc anno 1785 : & si quæstio agitata in favorem hominum vilioris subsellii, posset aliena esse à Philosophis humanæ sanitati tuendæ consecratis. Quapropter, mentionem adhuc faciemus de alio malo asphyxiis prædictis affini, quoad communem scaturiginem, quod à mundatoribus cloacarum vernaculè vocatur *la mitte*.

Ea affectio nihil aliud est quàm peculiaris oculorum inflammatio, necnon & quandòque excæcatio, quæ creatur ab aliquo miasmate acrí & pungente, ex latrinis sublimato. Sed ea secundùm operarios cloacales, nequaquàm dependet à plumbo, quandoquidem ferè in omnibus latrinis mitta contrahitur, dùm plumbum sævit dumtaxat in aliquibus.

De cætero, miasma mittam creans inodorum est omninò, & tamen volatile admodùm.

Trinam speciem mittæ agnoscunt prædicti operarii : mittam nempè humidam, seu fluentem, gallicè *mitte coulante* : mittam pinguem, *mitte grasse* dictam : deniquè mittam pinguem tardam, *mitte grasse tardive*.

Mitta humida stipatur tumore atque rubedine oculorum, unà cum effluvio laticis aquei, quo mediante, mitta brevì sanatur.

Mitta pinguis, seu sicca, notatur tumore, rubedineque multò majoribus, ex eòque tumore nullus latex effluit. Hujus affectûs dolores acuuntur à calore exteriori & lecti, tùm à vino, cibisque calefacientibus. Aër nocturnus in aprico respiratus

necessariò requiritur. Simulque patiens uti debet fotibus aquæ frigidaë , alimentisque & potibus frigidis. Porrò ubi , mediante sternutatorio (apud eos miseros usitato), mitta hæc sicca vertitur in humidam , notabile percipitur levamen. Secùs , patiens cæcutit per duos tresve dies , neque licet ipsi laborare. Verùm , ope sternutatorii , eo ipso contagionis die potest operari , servando tamen ruborem oculorum per diem unum aut alternum.

Mitta sicca tarda non in ipso opere nascitur , sed nocte tantùm subsequente. Incipit à dolore suprà frontem , quem vocant *le fronton* , cujus occasione homo affectus expergiscitur , ab hinc passurus mittam siccam , similem præcedenti.

Hæc omnia dicta sint in favorem miserorum hominum , quorum squalidis operis debemus puritatem nostrorum domiciliorum , aërisque quem respiramus. Imò , notandum quoque occurrit , quòd nempè ii homines vivant quidem immunes ab aliquot morbis cutaneis , sed quòd vita eorum sit mediâ parte brevior quàm in cæteris hominibus. Prætereà , si iidem morbis venereis fortè corripiantur , & in eo statu laborare perrexerint , notatur eorum malum intrâ quindecim dies ita exacerbari , ut insanabile evadat.

C A P U T S E C U N D U M.

DE Sanitate.

SANITAS in se spectata , & latè sumpta , videtur esse aliqua veluti generalis functio hominis , formata ex perfecto exercitio cæterarum omnium ejus functionum particularium , & quæ sæpenumerò labefactatur , adventante scilicèt aliquo morbo.

Enimverò , respectu variorum individuorum humanorum ,

idea sanitatis minùs latè patet. Ea tantummodò comprehendit liberum exercitium functionum dato cuilibet individuo propriarum, quod perindè labefactari potest, & cujus integritas perindè est spectanda tanquàm signum diagnosticum integerrimæ vitæ, respectu dati individui. Nonne enim luscus, cæcus, surdus, mutus & stolidus, aliundè potest esse æquè sanus, ac homo alter, qui in prædictis vitæ muneribus foret integer? Nonne & homo ambulatione orbis, valet esse æquè sanus aliundè, ac exquisitus saltator? Puer, æquè ac adultus? Eunuchus, æquè ac vir? Mulier gravida, æquè ac virgo? &c.? Sed sicut propria quorumvis sanitas suscipit magis & minùs, ita & in quibuscumque sanitatis absentia, evadit morbi præsentia.

Consequenter, ubi quædam functio propria cuidam individuo jam non exercetur ritè, aut ubi aboletur, tunc adest morbus magis vel minùs extensus; qui, ut suprà monuimus, dignoscitur ab aliis morbis, beneficio symptomatum seu signorum suorum simul incidentium: accidentium scilicèt occasione hujus functionis læsæ, vel abolitæ.

Sed, quemadmodùm Medicus debet morbos præsentés dignoscere, eorum referare causas, eorundemque prælagire eventus, ad hoc ut ipsis ritè mederi valeat; ita & officium Medicì postulat morbos adventuros prævidere, ad ipsis occurrendum. Prius autem officium adimplebitur ex consideratione pathologico-femeioticâ, quam suscepimus. Obtinebitur alterum, ex plurimis cognitionibus mox indicandis; nempe 1º. ex cognitâ constitutione annorum, tempestatum, imò & dierum ipsorummet; 2º. ex actuali sanitate individuorum; 3º. ex eorundem ætate & sexu; 4º. ex ipsis prægressis morbis; 5º. demùm, ex ipso statu hominis à morbo convalescentis: quæ singula singulis articulis nunc sunt exponenda.

ARTICULUS PRIMUS.

*COGNITIONES medicæ inferendæ ex constitutionibus annorum ,
tempestatum , & ipsorummet dierum.*

VARIAS constitutiones annorum , tempestatumque & dierum , valdè efficaces esse ad morbos varios producendos , aggravandos , mutandos , imò & fugandos , certum est. Nam latere nequit , quantum viventia corpora ab illis afficiantur.

Facile quidem est indicare illas tempestates plurimùm posse suprà homines , mediante suo calore aut frigore , siccitateque aut humiditate ; prout illæ qualitates vario modo combinantur , prout aliæ aliis prædominantur ; tùm prout illæ regnant unà cum ventis austrinis , aquilonaribusve , aut sine illis , vel iis propemodùm silentibus. Enimverò , ut docetur aph. 1. sect. 3 , *tempestatum anni mutationes potissimùm morbos pariunt , & in ipsis anni tempestatibus magnæ mutationes , aut frigoris , aut caloris , aliaque pro ratione ad hunc modum.* Id est , mutationes ipsæ magnæ in flatu ventorum , necnon in ratione vivendi , ut & respectu variarum ætatum , & regionum.

Plura consideranda occurrunt circà hanc quæstionem 1^o. Nempè venti ; 2^o. constitutiones regulares tempestatum ; 3^o. earumdem constitutiones irregulares ; 4^o. constitutiones dierum ; 5^o. deniquè , constitutiones annuæ , aliæque constitutiones extensæ. Quæ omnia totidem paragraphis nunc breviter perpendenda sunt.

§. I.

EFFECTUS ventorum in humana corpora.

CONSIDERANDAM esse ventorum actionem commendat Hippocrates multis in locis , præsertimque initio libri de aëre , aquis & locis ; videturque illos ab eo duntaxat distinctos fuisse in austrinos

austrinos & in boreales. Saltèm ii sub illo tantùm respectu celebrati fuerunt aph. 5 , sect. 3 , ubi exponuntur eorum qualitates & effectus his verbis: *Austri auditionis hebetudinem, visionis caliginem, capitis gravitatem inducunt, corpus torpidum & languidum reddunt. Cùm sic invaluerit tempestas, ista in morbis patiuntur. Sin aquilonia fuerit, tussēs, faucium asperitates, alvi duræ, urinæ difficultates, horrores, laterum & pectoris dolores fiunt. Cùm sic invaluerit, talia expectato* (1). Quæ quidem ita fieri concipiuntur, eò quòd australes venti in genere sint humidi, minùs frigidi, parùmque electrici: dùm boreales, è contrà, sicciores existunt, frigidiores, electrico igne ditiores. Undè sequitur organa relaxari, & humores fieri vapidiores effectu austri: dùm è contrà, boreas solida strictiora reddit, humoresque orbat superfluo fero. Nam præsertim attendere convenit, quòd athmosphæra constanter minùs electrica sit, dùm eam perflant venti austrini; & quòd illa sit magis electrica, quandò utitur flatu ventorum borealium. His adde, quòd longè diversa sit eorum ventorum actio suprà loca & Urbes 1º. prout iis omnibus vicissim & liberimè perflare licet; 2º. prout veniunt è locis humidis, aut aridis, aut frondosis; 3º. prout absque obstaculo transeunt ab ipsâmet infernâ athmosphêrâ, aut supernam duntaxat ejus regionem averruncant; 4º. demùm, prout ii vario modo reflectuntur. Maximum fanè meditationis & observationis argumentum pro Meteorologistis.

Prætereà, attendendum est, quòd venti omnes multùm conducant ad emendationem aëris athmosphærici, quatenùs motu suo capaces sint dissipare ac destruere quemcumque impurum aërem.

(1) Hic aphorismus iisdem ferè verbis conscriptus legitur, lib. de humoribus.

Undè intelligitur tempestates nimis tranquillæ min⁹s salubres esse, præsertimque hyemem; quia hæc non fuitur beneficio vegetantium, quorum actio tunc ventis supplenda foret

§. II.

CONSTITUTIONES tempestatum regulares.

SICUT Hippocrates ingeniosissimus notavit, ex tempestatum anni constitutiones regulares dicendæ sunt, quæ magis congruunt votis naturæ vegetativæ adimplendis. Hoc autem fit, quandò hyems frigida est & humida: ver calidum & humidum: æstas calida & sicca: autumnus siccus & frigidus. Quarum tempestatum durationes nequaquàm æstimari debent secundum vulgare Calendarium, sicut multi volunt; sed computandæ sunt secundum mentem hujus Medici. Secus enim, obscura fiunt, imò & inutilia, quæcumque ab eo prolata fuerunt circa illas.

Effectus earum tempestatum tales sunt. Hyems nempe corpora densat & humores, eosque ad centrum pellit, simul & homines ad majorem quietem, majori obscuritate suâ invitat; fortèque & aère suo min⁹s vitali, exercet vim quamdam soporiferam. Undè, ut docetur aph. 15, sect. 1, *Ventres hyeme & vere naturâ calidissimi, somnique longissimi. His igitur temporibus copiosissima cibaria exhibenda: siquidem plurimum inest calidi innati, ideòque copiosiore indigent alimento; quod indicant ætates & athletæ.* Cùm hæc ita sint, hyems capax est gignere plurimam copiam sanguinis densioris, aut pituitosâ humiditate onerati, secundum variam hominum ætatem, aut temperiem accidentalem.

Itemque valet ver proventum sanguinis facere; sed prætereà naturam animalem permovet, quasi vegetantum more; pu-

riori aëre quàm hyems fruitur; vimque centrifugam corporum adauget.

Æstas verò, favore ficci caloris sui, ut & vegetationis, meliorem aëris respirabilis qualitatem facit, majorem perspirationem fovet, celeriolemque invehit animalisatorum humorum finem; adeoque bilem copiosioreni gignit, ipsi conciliando varium causticitatis gradum, pro majori suâ electricitate.

Autumnus demùm, bilem quoque fovet nonnihil, utpotè qui sub suâ initio fati affinis sit æstati. Sed, subsequente ejus frigore valdè electrico, exsiccat bilem æstivam, eamque atram reddit; tandemque eodem frigore, majore atque majori evadente, non nihil accedit ad qualitates hyernas. Quibus de causis fit, ut *per autumnum morbi acutissimi & exitiosissimi magnâ ex parte contingant; ver autem saluberrimum sit & minimè exitiale*, sicut habetur aph. 9, sect. 3; & ut *autumnus tabidis malus*, ex aph. 10. sect. ejusdem. Quæ prædicta omnia producta tempestatum, sic de cætero intelligenda tamen sunt in ordine regulari, ut tempestas una posterior, sit aliqualis antidotus prioris.

Quia verò, per quascumque tempestates, homines debent ab illis affici pro earum peculiari dispositione, dùm prætereà iidem afficiuntur ratione variarum intemperantiarum suarum, aut aliorum variorum accidentium: *morbi quidem omnis generis in quibusvis anni temporibus oriuntur, sed nonnulli tamen quibusdam temporibus magis fiunt & exacerbantur*, sicut notatum est aph. 19, sect. 3. Cùm enim data constitutio tempestatum, generali suâ actione, plures numero homines disponat ad talem affectionem sibi affinem, quàm qui possunt reperiri in aliâ accidentali dispositione: nonnulli morbi numerosi præsertim fiunt effectu talis vel talis constitutionis; dùm varii alii morbi miscellanei nihilominus accidunt eodem tempore, secundum peculiare

hominum quorundam dispositiones omninò peregrinas constitutionibus tempestatum ; aut propter causas quasdam accidentales. Sic, ex gr., quocùmque in tempore morbi aliqui sporadici oriuntur propter ingluviem, aut frigus incautè susceptum, habitationemve pravam ; tùm propter quietem immodicam, minoremve, &c.

Propterea, quandò regulares sunt anni tempestates, solent morbi populares aliquem ordinem sequi, redeundo, ut & abeundo, variis anni tempestatibus ; imò nulli fermè forsan regnarent, aut saltèm illi omninò regulariter redirent, abirentque haud difficulter quodam tempore solito, si tempestates anni forent valdè regulares, nec unquàm notatæ magnis anomaliis.

Nusquàm hominum felicitas hucusquè accessit in regionibus nostris temperatis. Sed, pro incredibili accuratione strenui Hippocratis, generali Medicorum gratiâ digni, constanter apparet observatoribus, morbos magis familiares quatuor anni tempestatibus, eum affectare ordinem qui indicatur aph. 20, 21, 22 & 23. sect. 3, si modò attendatur ad computum Hippocraticum, cujus neglectu omnia fiunt incerta ; mihi que videtur prætereà, caput præprimis graviter laborare autumno, ut & initio hyemis, pectus reliquo hyeme & vere, æstate abdomen : huncque ordinem satis constanter servari.

Nempè, ut observatum est aphorismis suprà dictis, scilicèt 20, 21, 22, & 23, sect. 3, *vere mania, melancholia, epilepsia, sanguinis profusiones ; angina, gravedines, raucitates, tusses, lepræ, impetigines, vitiligines, & pustulæ ulcerosæ plurimæ, & tubercula, & articulorum dolores.*

Æstate autem, horum nonnulli, ac febres continuæ, & ardentes, & tertianæ plurimæ : vomitiones etiam & alvi profluvia, ophtalmiæ, aurium dolores, oris exulcerationes, genitalium putredines, & sudamina.

Autumno verò , æstivorum plurimi , atque etiam quartanæ febres & erraticæ , lienes , hydropes , tabes , urinæ stillicidia , lenteria & dysenteria , coxendicum dolores , angina , asthmata , volvuli , comitiales , furores & melancholia .

Hyeme verò pleuritides , peripneumonia , gravedines , raucitates , tusses , dolores pectorum , laterum , lumborum & capitis ; vertigines & apoplexia .

Quod attinet ad prognosim morborum qui , ut mox dictum est , solent accidere in regularibus constitutionibus tempestatum anni , & quoad certitudinem ordinis sub quo eos redire quotannis diximus , sic sancitum est aph. 8. sect. 3 : *In temporibus bene & ordine constitutis , cum tempesta tempestive redduntur , morbi constantes & judicatu faciles sunt . In male verò constitutis , inconstantes quidem , & judicatu difficiles .*

Enimverò attendere oportet , dari tamen insignes differentias inter morbosa producta duarum earumdem tempestatum quæ fuerunt apparenter similes , quales forent , ex. gr. , duæ æstates similiter calidæ & siccæ , secundum nostros Meteorologistas . Nam , in iis tempestatibus apparenter similibus , non semper accidunt iidem omninò morbi . Exemplo sint dysenteria , quæ mox permultæ prodibunt post æstatem , mox ferè nullæ . Hæc differentia mihi videtur pendere ab influxu alicujus causæ , quam ipse oculatissimus non detexit Hippocrates . Fortèque causa hæc abdita nihil aliud est , quàm varius influxus ignis electrici . Sed , quidquid sit de illâ nostrâ conjecturâ , quæ in posteris forsan comprobabitur per usum accuratum electrometri : jam videamus saltèm , quid sit intelligendum per tempestates malè constitutas , seu irregulares .

CONSTITUTIONES tempestatum irregulares, & earundem effectus.

IRREGULARES sunt appellandæ tempestates anni, quandò eæ non utuntur meteoris sibi congruis, sed contrariis; tùm quandò prætereà tempesta prior subsequeus, pariter alterata est. Quandò, ex. gr., hyemi irregulariter constitutæ subsequitur ver irregulariter quoque constitutum, tunc dicitur hyems irregularis, ut & ver, & sic porrò. Quæ diversæ irregularium tempestatum considerationes nunc explanandæ sunt.

HYEMIS & veris irregularis constitutio.

QUOD autem ad anni tempora (irregularia) (a) attinet, ut docetur, aph. 11. sect. 3, siquidem hyems sicca & aquilonia, ver autem pluviosum & austrinum, febres acutas, & ophtalmias, & dysenterias, æstate fieri necesse est, maxime mulieribus & viris naturâ humidis.

Tunc enim corpora humana per hybernium frigus siccum & electricum siccata & constricta, facillimè combibunt madorem

(a) Sanè videtur aliquid omissum fuisse à Librariis in hoc aphorismo. Nonne enim Hippocrates, aph. 19, sect. 3, apertè denunciavit morbos variorum anni temporum? Quidni & iterùm egisset de anni temporibus alio in loco, nisi sub diverso respectu? Dùm igitur, aph. 19 & quatuor sequentibus, agat de morbis tempestatum regularium, luculenter apparet eum locutum esse de morbis tempestatum irregularium in aphorismo 11º. Sed mihi apparet prætereà, eum aphorismum numero undecimo perperam sanè collocatum fuisse à primis Librariis, qui sparsa laceris ejus libris scripta primitus collegerunt. Quinimò probabile est, omissum fuisse verbum *irregularia*; quo restituto, sicut restituere tentavi, aphorismus longè doctior & accuratior evadit, necnon & longè clarior.

subsequentis veris pluviosi, simul & australis, illaque eodem madore obruuntur; quod fit præsertim, si nativa constitutio individui sit laxa & humida, qualis esse solet in mulieribus & cæteris individuis naturâ humidis: idemque pariter dicendum de hominibus accidentali laxitate gaudentibus. In iis porrò omnibus, non mirum est moveri humores ita accumulatos, ubi supervenit calor æstivus; imò attendenti etiam patebit, quòd iidem humores debeant præsertim æstate moveri in systemate venæ cavæ, quandòquidem ibi ipsissima residet officina bilis, quæ sanè quidem multò magis activa est per æstatem. Quòd si æstas non solum subitò incaluerit illo tempore, sed & si ea fuerit valdè tonitruosa: tunc profectò prædictæ febres, ut & dysenterix, multò frequentiores erunt, simul & multò graviores.

Prædictam eorum malorum aitiologiam sequenti modo expositam legere est, lib. de aëre, aquis & locis, sect. III. Foës. pag. 69. lin. 45 & seq. repetitis antea verbis aphorismi mox citati:

» Ubi enim, ab imbribus vernis & ab austro terra humectata
 » fuerit, & plenior æstus derepentè supervenerit, tùm à terrâ
 » madidâ & calidâ existente, tùm à sole adurente, ardorem
 » conduplicari necesse est. Neque
 » enim ubi ver tale extiterit, fieri potest, quin corpus &
 » caro nimio humore diffluant, ita ut omnibus, ac maximè
 » pituitosis acutissimæ febres immineant. Mulieribus verò &
 » naturis maximè humidis, intestinorum difficultates contingere
 » par est. Ac siquidem, sub caniculæ exortum aqua & hyberna
 » tempestas supervenerit, etesiæque (1) spiraverint, quietis spes
 » est, autumnumque salubrem fore. Alioquì periculum est nè
 » pueri & mulieres moriantur, minimè verò senes. Aut nè qui

(1) *Vent de nord-est.*

» evaserint, in quartanas incidant, & ex quartanis in aquam
» inter cutem.

Postquàm Hippocrates retulit effectus hyemis siccae & borealis, cui succedit vel pluviosum & austrinum, exponit effectus hyemis pluviosae, austrinae ac tranquillae, cui succedit ver siccum, ac ventis borealibus perflatum.

At si hyems austrina & pluvia, & placida fuerit, inquit, aph. 12. sect. 3; ver autem siccum & aquilonium mulieres quidem quibus partus vere imminet, ex quavis causâ abortiunt. Quæ verò pepererint, imbecillos & morbosos infantes edunt, ita ut vel statim intereant, vel invalidi & valetudinarii vivant. Cæteris autem mortalibus dysenteriae & ophtalmiae aridae, oriuntur: senioribus verò catharri brevè interficientes. Quod & multò longiori sermone docetur, lib. de aëre, aquis & locis, sect. III. Foëf. pag. 70. lin. 8 & seq. Hyems enim pluviosa, austrina, & agitatione congruâ ventorum carens, præsertim fovet atmosphæram humidam, impuram, minùs electricam quàm par est. Consequenter, viventia corpora, (ea præsertim quæ laxæ naturæ sunt, ut mulieres), replentur humoribus aqueis, pituitosis, malè animalisatis; prætereàque solidorum compages summoperè relaxata, evadit valdè iners. Undè fit, ut apud prægnantes uterus obruatur similibus humoribus, & ut foetus iis succis nutriti, debiles ipsi sint & invalidi. Foetus autem sic constitutos molliùs adhærere ad uterum nonnisi naturale est; eâque ratione, eos levi de causâ separari ab utero, & abortum fieri, par est. Quod malum præsertim evenire debet accedente tunc vere boreali & sicco, ut mihi apparet, eò quòd vasa uteri & placentæ laxa & humore copioso turgida, nequeant perferre hanc strictionem citò accidentem, & naturæ suæ adeò oppositam, quæ à vere boreali & sicco inducitur. Nam imminutis hoc pacto
diametris

diametris vasorum quibus adfertur nutritia foetus materies, deest ipsi sufficiens alimonia; ideoque foetus radices necessario tabescunt. Debilitantur & foetus, ex eo quod non solum humores parciales ipsis subministrentur ob viae stricturam; sed & quia ii humores aliunde sunt pessime elaborati.

Porro foetus sic nutriti, & nascentes his in circumstantiis, retinent solidorum constitutionem gracilem nativam, una cum pravâ humorum idiosyncrasiâ; hæcque faciunt ut ii imbecilli vivant, aut facile pereant post nativitatem suam; quia scilicet constitutio hæc prava solidorum emendari ab iis nequit, sicut nec humorum aquosa temperies corrigi. Verum, si nascerentur ii infantes per æstatem quæ subsequitur prædictam hyemis & veris constitutionem, tunc ii in arvo materno emendati antea fuissent, una cum matre; sicque instaurati nascerentur felicius, & essent vivaciores.

De cætero, facile intelligitur etiam, quare similis constitutio hyemis pluviosa, australis & placida, cui succedit ver siccum & boreale, tantoperè noceat senibus? & quare præsertim creet in eis catharros lethalissimos? Nam, cum generaliter loquendo, *raucedines & gravedines in valde senibus non coquantur*, sicut monetur aph. 40. sect. 2; ii catharri erunt à fortiori exitiales, qui oriuntur in hominibus jam naturâ suâ minimè perspirantibus, qui prætereà duas successivè patiuntur tempestates huic affectioni contrarias. Nonne talia adæquatè opponuntur catharralis humoris concoctioni?

Nec difficilius concipitur quare apud biliosos contingant ophtalmiæ, ut & dysenteriæ, tempore verno; hoc nempe fit ratione frigoris humores ad centrum pellentis: tunc quia bilis acer valet afficere oculos, ob affinitatem suam cum lippitudine.

Undè quoque intelligitur, quare *lippientem alvi profluvio corripere bonum*? sicut docetur aph. 17. sect. 6.

IRREGULARIS constitutio æstatis & autumnæ.

QUÆNAM phænomena sanitatis exspectanda sint ex æstate quæ, contrà ordinem suum solitum, sicca est & borealis, cui succedit autumnus pluvialis & austrinus, proindèque etiam constitutus irregulariter? docetur aph. 13. sect. 3, his verbis: *Si verò æstas sicca & aquilonia, autumnus verò pluvius & austrinus fuerit, capitis dolores hyeme oriuntur, & tusses, & raucitates, & gravedines, nonnullis etiam & tabes.*

In constitutione enim siccâ & boreali æstatis, adeòque minùs calidâ, valdè electricâ, & plurimùm desiccante: humores in propriâ suâ mixtione veluti arescunt, præsertimque bilis, quæ naturâ suâ oleosa est, & suâ spontè aquam respuit; iique omnes prætereà majorem aliundè acrimoniam suscipiunt, propter retentam quandòque perspirationem, occasione borealis auræ facilè stringentis fibras à præcedenti calore relaxatas.

Tunc, succedente autumnæ pluvioso & australi, nedùm potiùs ille sit siccus & borealis, humores per æstatem præcedentem fabricati, facilè onerantur sero quo carent, haud secùs ac spongia sicca; indèque nascitur pituita biliosa valdè acer, capiti infensissima, ut & pulmonibus. Hâc ratione, dùm adventat hyems, humores iidem aggrediuntur caput & pectus; ideòque nascuntur peripneumoniæ, aut pleuritides spurix, raucedines, necnon & tabes apud quosdam; tum etiam cephalalgix graves. Quinimò, (ex eo quòd, sub finem autumnæ similiter constituti, sæpè, post toleratos dolores capitis, accidunt apoplexiæ fortissimæ mortem subitissimam inferentes), miror quòd D. Bosquillon, sicut alii multi,

ex citato aphorismo expunxerit *sphacelismum cerebri*, ab eâ constitutione oriundum. Nam, (ut notat Foësius in œconomiâ Hippocraticâ, ad verbum *tò sphacelus*), vox illa, secundum Hippocratem, significat syderationem seu corruptionem cerebri, à quâcumque causâ inductam; quandòquidem ille utitur eâ expressione pluribus in locis, sicut præsertim spectabile est libro de aëre, aquis & locis, sect. III. Foës. pag. 70, lin. 33, ubi aphorismus prædictus habetur conscriptus ut sequitur: *At si æstas sicca & aquilonia fuerit, autumnus verò pluvius & austrinus, sub hyemem capitis dolores & cerebri syderationes (Græcis sphacelismi), fieri par est, ac præterea rauedines, gravedines, & tusses, & nonnullis quoque tabes.*

Quemadmodum verò æstas borealis & sicca, quæ præcedit autumnum pluvium & australem, valet peculiare producere morbos: ita & suos invehit æstas, in quâ auster & pluvix dominantur, cui autumnus similiter austrinus & pluviosus succedit. Enimverò, constitutio hæc irregularis, quæ tamen satis frequenter observatur, omissa fuit in aphorismis. Sed non dubito id factum fuisse errore Librariorum; hancque omissionem prætervideri à plerisque Lectoribus, præ negligentia & oscitantia quæ ut plurimum admittuntur in lectione scriptorum hujus Medici; constitutio enim illa irregularis sequenti sermone descripta habetur, post alias constitutiones irregulares, lib. de aëre, aquis & locis, sect. III. Foës. pag. 70, lin. 29 & seq. *Si verò æstas pluviosa sit & austrina, & autumnus similiter, morbosam esse hyemem necesse est, iisque qui pituitâ abundant, & quadragesimum annum excefferunt, febres ardentes contingere æquum est, biliosis verò morbos laterales, & pulmonum inflammationes.*

Simili equidem æstatis constitutione laxantur fibræ, humoresque nimis serosi remanent & fiunt magis proni ad putredinem,

sicut faci'è concipitur. His porrò malis à tali æstate procreatis autumnus profectò occurreret, si foret siccus & frigidus. Sed cum, è contrà, humidus ille sit & austri is, proindèque electrico igne æquè pauper ac prægressa æstas, & cùm incongruenter refrigeratus sit: nedùm arceat putrorem imminentem ab æstate prægreisâ, eum potius fovet, aut pravam saltem invehit humorum viscositatem. Consequenter non mirum, si tunc temporis, adventante hyeme tradantur morbi in textu prædicto recensiti, secundùm varias individuorum naturas, quæ ad eos contrahendos disponunt; nempe morbi pituitosi, pituitosis: febres validæ, ab atrabiliari & pituitoso humore oriundæ, hominibus quadragesimum ætatis annum transgressis: & demùm, morbi pectoris inflammatorii biliosi, hominibus biliosæ temperiei mediam ætatem agentibus, sicut præfagiendum esse docetur loco mox citato. Similia autem, per hyemem anni 1784, apprimè experti sumus, in plerisque hujus Provinciæ locis:

Irregularis quoque æstas sola observatur; quandòque enim illa veri similis est. Tunc in febribus copiosi sudores expectandi sunt, ex aph. 6. sect. 3; quia nempe, ob minorem hujus tempestatis calorem majori humiditati adjunctum, fit major proventus humiditatis serosæ in humoribus nostris.

IRREGULARIS constitutio solius autumnii.

IN constitutionibus regularibus, post ætatem siccam & calidam si sequatur autumnus regularis quoque, qui scilicet subfrigidus sit & siccus, tunc contingit mutatio utilis corpori humano. Talis enim autumnus valet juvare, 1^o. in quantum pars flava sanguinis jam minùs exaltatur propter minorem calorem; 2^o. quia pars humida ciborum non tam facilè dissipatur tunc temporis, propter frigus externum. Idcirco autumnus naturaliter debet temperare acrimoniam bilis, adeoque exercere vim quamdam antidotariam, respectu effectuum generalium ætatis præcedentis.

Si verò aquilonius sit & sine pluviis autumnus , secundum aph. 14, sect. 3 ; (id est , si autumnus sit frigidior simul & siccior) , viris quidem qui natura sunt humidi , & mulieribus proderit : reliquis autem ophtalmiæ erunt siccæ , & febres acutæ , & longæ , nonnullis etiam melancholiæ .

Quæ sententia , de constitutione irregulari autumnii , repetita & sequenti modo explicata legitur lib. de aëre , aquis & locis , sect. III. Foëf. , pag. 70 , lin. 35 & seq. « Quòd si aquilonius & » siccus fuerit autumnus , ac neque sub canem , neque sub arcturum pluviosus , pituitosis quidem , præcipuè naturâ humidis » & mulieribus maximè confert ; biliosis verò hoc est maximè » adversum. Admodùm enim resiccantur ; iisque lippitudines » aridæ contingunt , & febres acutæ ac diuturnæ , quibusdam » etiam melancholiæ. In bile namque quidquid est humidissimum » & aquosissimum consumitur , quod verò crassissimum & acerrimum remanet , quod in sanguine eâdem quoque ratione accidit , » undè ii morbi illis contingunt. Pituitosis verò hæc omnia auxilio sunt. Resiccantur enim , & ad hyemem perveniunt , ab » aliis temporibus invicem succedentibus resiccati.

Sed ad concipiendum quid præcisè intelligendum sit de autumno boreali qui pluviis omninò destituitur ; tum quare & quomodò ille noceat ? attendere oportet , quòd tempestas quælibet quæ dicitur sicca , designet solummodò tempestatem unam in quâ siccitas duntaxat prædominetur : minimè verò tempestatem quæ pluviis omninò careat , sicut in aphorismo mox citato dicitur autumnum iis caruisse. Consequenter , autumnus borealis & carens pluviis , nequaquam dici debet autumnus siccus & frigidus : sed autumnus siccior , qui simul est frigidior in fine , siccior autem & calidior sub initiis.

His præmissis , conceptaque allati aphorismi explicatione ,

facile resolvitur ratio cur autumnus aquilonaris & siccior , (qui nempè simul est calidior sub suis initiis , & frigidior in fine) , faveat mulieribus & aliis individuis naturâ suâ humidis & laxis. Nec obscuriùs intelligitur quare , è contrâ , ille autumnus noceat individuis biliosis , atrabiliosive : nempè quia individua hæc jam ficciora sunt , & quia atrabiliaris acrimonia eorum adhuc acuitur. Hinc autem facile scaturiunt melancholiæ , tum ophtalmiæ siccæ , ut & febres acutæ , simul & longæ ; quæ mala idcirco contingunt apud robustiores homines , constitutione siccâ & biliosâ donatos.

§. IV.

CONSTITUTIONES QUOTIDIANÆ.

NOTARI etiam merentur quædam determinatæ dierum constitutiones , quæ valdè dissimiles sunt à præcedentibus & subsequentibus diebus , præsertim quoad flatum ventorum , ut & quoad frigus & calorem. Quoniam enim corpora tunc per certum tempus experiuntur subitam actionem ventorum oppositorum , aut actionem caloris subitò succedentis frigori : ea corpora necessariò accipiunt exindè mutationem valdè notabilem.

Solemne siquidem est apud observatores , non solum quòd morbi inexpectati sæpè nascantur hæc occasione : verum etiam quòd eadem de causâ peculiare incidant mutationes in ipsismet morbis actu existentibus. Sæpè enim videre est contingere , ex gr. , pleuritidem verè inflammatoriam in die unâ valdè aquilonari æstivâ ; sicut quoque videtur tunc fieri multò agiliores homines , qui tamen , diebus austrinis præcedentibus , languidissimi erant : & vice versâ , &c. Quæ omnia quotidianarum constitutionum phænomena hoc modo comprehenduntur aph. 17. sect. 3 : *Quotidianæ autem constitutiones aquilonariæ corpora densant , valen-*

tiora , expeditiora , colorationa , & melius audientia reddunt , sed & alvos exsiccant , oculosque mordent ; & si in pectore dolor aliquis prius extiterit , magis dolent ægri. Austrinæ autem corpora exsolvunt & humectant , auditum obtundunt , caput gravant , vertigines oculis movent , corporibus difficilem motionem inducunt , & alvos humectant.

Aliquandò etiam , non solùm intrà durationem ipsam diei unius , accidit satìs magna , eaque & multiplex mutatio caloris & frigoris ; sed & talis anomalia quandòque dominatur per unam tempestatem integram , quæ ideò multùm valet quoque ad producendos morbos : non solùm sporadicos , sed & populares. Nam constitutio hujus tempestatis ideò degenerat in constitutionem irregularem sui generis , quæ gignit morbos proprios illi tempestati ad quam magis accedit. Propterea , *per anni tempestates , quandò eodem die modò calor , modò frigus fit , autumnales morbos expectato* , ex aph. 4. sect. 3 ; quia nimirùm homines afficiuntur ab illâ dierum irregularitate dominante per quamdam tempestatem , perindè ac illi afficerentur ab autumno , ad quem prædicta dierum constitutio magis accedit.

Quod dictum est de prædictis dierum constitutionibus singularibus , pariter annotandum foret de varietatibus singularibus eorum quoad electricitatem athmospheræ. Hanc enim de die in diem toto cœlo quandòque mutari certum est ; sed desunt sufficientes observationes. Ideòque , donec illæ habeantur , saltem reminiscendum , constitutionem dierum borealium multò magis electricam esse , quàm australium.

§. V.

CONSTITUTIONES annuæ , aliæque constitutiones extensæ.

CONSIDERARI etiam debent constitutiones annorum , quatenus ipsæ sunt regulares , aut irregulares. Regulares , inquam ,

quandò annorum tempestates regulares sunt ; irregulares verò ,
quandò anni constant tempestatibus irregularibus.

Regulares annorum constitutiones eos potissimùm morbos
creabunt, qui referuntur aph. 20. 21. 22 & 23. sect. 3. Sed
irregulares, pro suâ singulari specie, inducunt varios affectus ;
in quantùm indè adducitur vitiosa aliqua constitutio hominum ,
prout ii naturaliter disponuntur ad illam: aut prout ad eandem
jam antea inclinarunt per aliquod accidens.

Porro, ad æstimandam constitutionem anni irregularem, &
ad prævidendos effectus ejusdem, consulantur ea quæ in hunc
sensum scripta sunt, lib. de aëre, aquis & locis, sect. III.
Foëf. pag. 69. lin. 36 & seq. « De annis autem, hoc modo
» consideratione adhibitâ quis statuât qualisnam annus futurus
» sit, numnè salubris, aut morbosus? Siquidem secundum
» rationem in syderum ortu & occasu signa appareant, si per
» autumnum pluat, & hyems sit moderata, neque admodum
» blanda, neque præter modum frigida, & vere ac æstate
» aquæ tempestivæ eveniant, sic annum saluberrimum esse
» consentaneum est.

Sed quotiès accidit, ut mutetur ille ordo! quotiès annus sit
in toto siccior, aut humidior! Hanc potissimùm anni anoma-
liam incusamus, quia videtur aberrationem illam præprimis
celebratam fuisse ab Hippocrate ipso, saltèm quantùm nobis
conjicere licet ex iis quæ ad nos pervenerunt in sectione tertiâ
aphorismorum. Dicit enim, aph. 15. hujus sectionis: *ex anni
autem constitutionibus, in totum, siccitates assiduis imbris sunt
salubriores, minùsque lethales.* Quæ medica assertio apertè indi-
catur, in eo quòd longè periculosiores & numerosiores sint ii
morbi qui per imbres assiduos exoriuntur, quàm qui per
siccitates. Nam, ex aph. 16 ejusdem sectionis, *per assiduos
imbres*

*imbres morbi quidem magnâ ex parte oriuntur; cum febres longæ ,
tùm alvi fluxiones , putredines , epilepsiæ , apoplexiæ & anginæ ,
Per siccitates autem tabitudines , ophtalmiæ , arthritides , urinæ
stillicidia , & dysenterix.*

Denique , datur etiam quandòque constitutio extensa , nempè
ubi aliqua constitutio tempestatis prorogatur in tempestatem sub-
sequentem. Tunc autem iidem morbi grassantur per similes illas
tempestates successivas , sicut docetur aph. 7. sect. 7 , his verbis :
*Per siccitates , febres acutæ fiunt. Et siquidem annus magnâ ex parte
talis extiterit , qualem constitutionem effecerit , tales ut plurimum
quoque morbos expectare oportet.* Quinimò , iidem quoque morbi
regnarent per duos annos successivos , si isti fortè similes forent
inter se ; prætereaque notatur , ex aph. 6 , sect. 7 , sudores in
febris copiosos expectandos esse , quandò constitutio verna
ipsammet occupat æstatem , sicut jam traditum est , pag. 36.

A R T I C U L U S II.

SIGNA inferenda ex actuali sanitate individuorum.

REM utilem fieri tandem posse nocivam , nemo negabit ;
nec Medicus attentus diffitebitur , creari morbos varios ab ipsâ
sanitate quandò illa provecta est ad summum gradum , nisi
quædam cautela adhibeatur.

Sanitatis perfectæ pericula exponit Hippocrates , aph. 3.
sect. 1 , ibi statuendo , quòd cum non liceat optimo corporis
habitu in melius augeri , sicut nec stare in eodem statu , neces-
sarium sit ipsi tunc ruere in deterius , nisi solvatur illicò perfectus
ille habitus , ad hoc ut vitæ vires impendi rursùm valeant in
corpore reficiendo.

Si verò immineant morbi ab ipsâmet sanitate perfectiore , ut

videtur exemplo athletarum , de quibus mox : à fortiori imminebunt hominibus tantum apparenter fanis. Sed dicere ac præſagire quænam ægritudines pertimeſcendæ ſint variis individuïs , hoc pendet ex cognitione variarum conſtitutionum in ſingulis hominibus ſpectatarum.

Cùm enim quiſque homo ſanus ſit ſuo modo , pro variâ ſuâ habitudine ſeu temperie propriâ , quiſque etiam ſuo modo ſit ægrotans ; adeò ut unus ægrotet per actionem communium cauſarum , à quibus curaretur alter : aut quibus irritis , unus tertius ſaltèm benè valeret. Undè patet ratio cur morbi populares non omnibus ſimul hominibus pariter accidant ; & cur , dùm viget aliquis morbus popularis , nihilominùs quoque appareant hinc indè varii morbi ſporadici , ſeu miſcellanei. Conſequenter conſiderandæ ſunt communes conſtitutiones hominum varias ætates agentium ; ad hoc ut prævideatur quibus morbis ii affici poſſint , necnè. Sed facilè concipitur , ſermonem hunc nequaquàm pertinere ad morbos illos qui pendent ab aliquibus circumſtantiis accidentalibus , qualia ſunt intemperantia , lapſus , içtus , vulnus , &c. Loquimur duntaxat de morbis , qui varios homines infeſtant efficaciâ variarum tempeſtatum , regionumque , & vivendi rationum.

Quicumque autem futurus morbus fuerit , generale quoddam habetur indicium quo renunciatur eum jam proximè imminere , imò & forſan eum jam aliquatenùs inceptum eſſe. Quod ſignum conſiſtit in quodam ſenſu gravitatis corporis , ſeu laſſitudinis , qualis percipitur poſt magnas fatigationes. *Laſſitudines ſpontè obortæ morbos denunciant* , ut fertur aph. 5. ſect. 2. Quin etiam prævideri poteſt aliundè , quænam corporis pars præſertim afficienda ſit. Nam , ex aph. 33. ſect. 4 , *ſi pars quædam antè morbum laboraverit , in eam ſe morbus obſirmit* ; & prætereà ,

sequentibus signis sæpè designatur pars jam affecta : *quâ parte corporis sudor inest, ibi morbum esse significatur*, inquit Hipp. aph. 38. sect. 4 ; aphorismo proximè sequenti addendo ; & *quâ corporis parte calor inest, aut frigus, ibi morbus est*.

Quoniam verò hîc præsertim considerata sint signa quæ præbentur ab actuali sanitate hominum, præcipuè annotanda sunt illa quæ pendent ex vario statu eorum habituali quoad humores & quoad solida ; seu, quod idem est, à variâ temperie eorum. Non enim omnes homines sibi similes sunt, etiâ in eâdem ætate, tùm quoad sensum, tùm quoad irritabilitatem, tùm quoad naturam copiamve humorum. Alii multo sanguine onerantur : alii atrâ bile : pituitâ alii. In iisque singulis diversa est conditio solidorum, diversa pathemata animi, adeoque diversa morborum occasio.

Consequenter, ad stabiliendam artem prævidendi futuros morbos, simul & cognoscendi characteres morborum præsentium, fas est, post Hippocratem, distinguere quatuor peculiares constitutiones corporum ; sanguineam scilicet, biliosam, atrabiliosam, & pituitosam : quæ totidem paragraphis nunc veniunt exponendæ, non omissis constitutionibus extensis paragrapho quinto exponendis.

§ I.

CONSTITUTIO SANGUINEA.

CONSTITUTIO sanguinea dicitur hic status in quo sanguis copiosus est, sufficienter densus & dives, ideòque pronus ad contrahendum calorem insolitum, insolitamve densitatem ; aptus consequenter ad producendos morbos inflammatorios, si occasio dederit.

Naturaliter hæc constitutio valdè confert sanitati corporis &

animi. Propria est pueris & adolescentibus, sed imprimis ætati juvenili, necnon & virilitati incipienti; nam illa sequitur eos status vitæ, in quibus datur sensus major, ut & major irritabilitas. Talis constitutio sanguinis fovetur quidem à victu congruo, unà cum congruis exercitiis. Sed maximè producitur ab illâ tempestate anni quæ magis favet robori corporum viventium, sicut & fami, necnon somno & quieti : qualis est hyems. Confer. aph. 15, sect. 1æ.

Idcirco cognoscitur constitutio sanguinea, ab ætate puerili usquè ad mediam virilitatem, præsertim, si simul detur robusta valdèque sensibilis corporis fabrica, congruens victus, congruens regio, congruentesque exercitationes & habitationes. His signis addi debet pulsus satis fortis, nonnihil durus & celer : sæpèque crusta illa alba, dura, coriacea, gallicè dicta *la couenne*, quæ apparet in superficie sanguinis refrigerati post venæ sectionem; tùm addendi morbi inflammatoriæ profapiæ, aut præsentis, aut jam antea tolerati; sed considerandus est imprimis major numerus juvenum ægrotantium, quàm numerus ægrorum qui alias agunt ætates : & simul consideranda regularis constitutio hyemis prægressi; nam observare licet, quòd singulis annis soleat constitutio inflammatoria regenerari per talis hyemis efficaciam; & quòd ea abhinc plerùmque vigeat usquè ad mensem Junium inclusivè, si ver subsequens fuerit etiam regulare, ut & æstas ipsi successiva.

Hâc ratione non mirum, quòd labente hyeme, sanguinea constitutio sensim abeat in inflammatoriam, eò quòd sanguis paulò nimis densetur per tempus illud, aut acquirat simul singularem qualitatem irritantem, quâ mediante stringantur partes solidæ. Indèque colligere datur, quare soleant morbi inflammatorii populares quotannis regularibus vigere à fine De-

cembris; præsertim sævire mense Februario & Martio; atque sese exporrigere usque ad mensem Junium inclusivè, quousque scilicet incipiat constitutio biliosa.

Dùm verò incipit inflammatoria constitutio, ea tantùm catharralis est, propterea quòd aliquid adhuc retineat de humiditate hybernâ; hæcque ratio est cur, antè morbos inflammatorios, semper magis vel minùs vigeant morbi catharrales dicti, qui aliquandò populariter graffantur per tempestatem inflammationi propriam: nempe, quandò debilior est dispositio inflammatoria.

Quemadmodùm autem incipiens inflammatoria constitutio catharralis est dùm tempestivè tempesta fiunt: ita & illa desinit sensim abeundo in biliosam efficaciâ æstatis; æstas enim minùs idonea est collectioni sanguinis copiosi, simul & minùs apta fovendæ sensibilitati & irritabilitati solidorum: eaque suapte sponte valet adaugere partem sanguinis flavam. Undè jam concipitur quare, dùm æstas sic finem facit constitutionis inflammatoriæ, sensim accersat constitutionem biliosam, de quâ mox dicturi erimus.

Quandò verò tempestas hyemalis non omninò conduceret, unà cum vere, ad producendam veram constitutionem inflammatoriam, sequens observatio attendenda venit. Sciendum quòd, ab illius ordinariâ epochâ, febres catharrales quæ his temporibus incidunt, magis vel minùs participant inflammationem. Quod ita censendum est, tùm de febribus humoralibus simplicibus, aliter vocatis nomine synochorum non putridarum, tùm de aliis cæteris morbis febrilibus. Nam talis est tendentia naturæ, ut semper ea tunc inclinet versùs inflammationem. Sed hâc occasione annotabimus, quòd hæc participatio inflammationis valdè sit variolis vernis infensa, si paulò major fuerit; nam indè turba

oritur major in præparatione & separatione variolarum, sicut & in earum suppuratione, seu expulsionem.

Hoc adhuc imprimis considerandum venit circa genium inflammatoriæ constitutionis, nempe eam præsertim donari aliquâ specificâ virtute ad irritandam telam cellularem, simul & ejusdem vasa; eamque ideò non decumbere nisi in textu cellulari.

Propterea non mirum præprimis inflammari partes omnes cellulares, prout illæ magis vel minus aptæ sunt ad irritationem inflammatoriam suscipiendam; qualia sunt interstitia musculorum, textus cellularis mesenterii, & pars cellulosa cæterorum viscerum & membranarum. His enim in locis semper sedet officina suppurationis, quâ tam sæpè terminatur inflammatio.

Ex dictis de genio inflammatoriæ constitutionis datur resolve, cur morbi populares inflammatorii soleant parcere pueris, ut & tenerioribus adolescentibus: dum sæviunt ergà juvenes, & ergà viros juventuti proximos. Quàmvis enim infantes præprimis sanguine multo polleant, ut & teneriores adolescentes: cum simul gaudeant majori laxitate & ductilitate solidorum, nunquam in illis facile creatur densitas sanguinis inflammatoria, sicut nec irritatio indè oriunda; neque etiam illi unquam adeò afficiuntur à copiâ sanguinis, quantum afficiuntur juvenes, ut & viri juventuti proximi. Nedum pueri graventur à sanguine copioso, ii potius ab illo benè se habent, quatenus indè obtinent causam & materiem debiti incrementi.

Juvenes è contrà & viri, (quorum solida multò firmiora sunt & qui non indigent tanto sanguine), nequeunt illius augmentum nimium impunè perferre. Idcirco in iis facile sanguis alteratur & acquirit inflammatoriam densitatem; adeoque capax fit irritare textum cellularem, & in eo facere decubitus inflammatorios.

Deniquè ex iisdem rationibus etiam intelligitur, quare,

irritâ ætate juvenili, ut & virili, irritâque tempestate aptâ ad gignendam constitutionem inflammatoriam, plurimi homines nusquàm tententur inflammatoriis morbis, aut saltèm iis corripiantur multò levioribus. Quia nempe plurimi homines sunt, apud quos sanguificatio tardior, aut debilior est, simul & minus robur minorque sensibilitas organorum : propter peculiarem rationem vivendi, vel alia quædam adjuncta.

Similiter, senes inflammatoriis morbis rarò laborant ; nam ii plerùmque pituitosi existunt, aliundèque habent organa minùs sensibilia & minùs irritabilia ; sed concipitur eos indè aptiores esse ad patiendas stases œdematosas. Secùs enim, datâ semel inflammatoriâ constitutione populari, senes, pariter ac juvenes & viri, affligerentur inflammatorio morbo tunc temporis populariter grassante. Quæ ratio de cæteris quoque epidemiis similiter reddendâ est, mutatis mutandis, respectu variarum constitutionum popularium.

Quamvis verò constitutio aliqua sanguinis dicatur inflammatoria, quatenùs subministrat stimulum quemdam inflammatorium, præcipuèque materiem facillimè inflammandam quæ requiritur in inflammatione legitimâ & per excellentiam : minimè putandum est nullam gigni inflammationem, nisi ab illâ constitutione. Aliæ enim sunt inflammationes, ex. gr. œdematosæ : tum aliæ biliosæ, putridæ, facilèque gangrenosæ : aliæque demùm symptomaticæ aut criticæ variæ : quæ aliam profectò causam, tum determinantem, tum materiale agnoscunt, sicut explicabimus ubi de inflammatione.

C O N S T I T U T I O B I L I O S A .

BILIOSA constitutio illa est , in quâ redundat pars flava sanguinis quæ vera est bilis materies , & quæ videtur procedere ex globulis rubris quasi senescentibus , ut ita dixerim ; id est , ex cruoris globulis nimium detritis , in mixtione suâ alteratis , atque cum salibus obviis & pinguedine valdè attritâ unitis.

Talis constitutio præsertim generatur apud viros firmatos , necnon in juvenibus robustis , varias ob causas. Nempè 1°. propter abusum ciborum pinguium , aut ex animali regno depromptorum. 2°. Propter majorem edacitatem. 3°. Propter peculiarem accidentalemque affectionem , cum humorum , tum solidorum , quæ præsertim inducitur ab exercitiis validis , ut & à caloribus externis. 4°. Propter quamdam causam capacem impedire liberam bilis secretionem & excretionem. 5°. Deniquè , propter efficaciam æstatis regularis quæ omnium prædictarum causarum magis potens est , magisque generalis : quâ ideò quotannis solet induci constitutio biliosa , quæ per æstatem succedit abeunti constitutioni inflammatoriæ.

Licet igitur suspicari constitutionem biliosam , 1°. ex ætate juvenili vegetâ , præsertimque ex firmatâ virilitate. 1°. Ex flavedine & gravitate corporis. 3°. Ex urinis flavis & parcioribus. 4°. Ex prægresso abusu pinguium ciborum. 5°. Ex nimis exercitationibus , tempore æstivo præsertim sumptis , aut in loco valdè concalescente. 6°. Ex tolerato morfu quorundam animalium venenatorum ; aut ex exantlato quodam animi motu , qualis est ira , vel mœror acerbis. 7°. Ex toleratis antea febribus æstivis.

æstivis popularibus. 8°. Ex pravo statu hypocondriorum. 9°. Deniquè , ex labente aut prægressâ æstate regulari.

Copiosioremem bilem generari efficaciam æstatis , nequaquam mirabile est. Postquam enim æstas satis diù viguit , partes corporis solidæ necessariò resiccantur , debilitantur , fiuntque minùs sensibiles atque irritabiles. 2°. Pinguedo animalis continuò eliquata , & funditùs diffusa per humores omnes , nonnihil forsan arefcere cogitur , & combinatur cum moleculis salinis obviis. 3°. Tota massa sanguinis retinet minorem copiam aquei principii , quàm per aliud quodcumque tempus anni : ideòque aliquam veluti ariditatem simul contrahit , fortè suscipiendo nimiam copiam ignis electrici ; quibus fit ut accedat ad naturam resinofam. Porro , cùm in hisce circumstantiis sanguis celeritùs attingat summum animalisationis gradum , pars ejus rubra magnoperè detrita & electrica , dissilit veluti in frustra quæ abeunt in bilem valdè copiosam , mediante unione suâ cum moleculis pinguedinosi , salinisque similiter attritis ; adeò ut massa humorum necessariò oneretur maximâ copiâ bilis. His etiam adde , quòd in tubo alimentari generetur quoque singularis colluvies , seu saburra , quæ biliosa dicitur ob colorem & saporem biliosum. Quæ saburra formatur ex peculiari degeneratione ciborum valdè pinguium , qualis præsertim accidit tempore æstivo ; quæ sæpè virescit propter miscelam vegetabilium rerum ; & quæ forsan quoque conducit ad gignendam in sanguine colluviem biliosam. Sed hæc imprimis colluvies pendet à causis ex tempestate æstivâ desumendis , sicut mox diximus.

Jam verò præsentem esse biliosam constitutionem popularem conjicere licet , quandò labente *secundâ* æstate exoriuntur morbi biliosi ; tunc enim incipit potissimùm regnare vera *synochus* putrida , aliter dicta *typhus* veterum. Sed circa mensem Au-

gustum, sæpiùs ingruit cholera morbus, & deindè saltèm accedit febris biliosa, dysenteria, erysipelas biliosum, tùm febres intermittentes.

Quinimò, notandum morbos sporadicos varios tunc temporis incidentes, semper magis vel minùs participare constitutionem biliosam; sicut jam observavimus ergà morbos sporadicos, qui concurrunt cùm constitutione inflammatoriâ populari, aut qui saltèm accidunt eo tempore quo solet hæc constitutio locum habere.

Semel enatâ biliosâ constitutione, observatur eam plerùmque regnare ad usquè mensem Novembrem. Sed optimè norunt Medici, quòd tunc servantur immunes à grassantibus morbis sobrii homines qui oleribus indulgent & indulserunt; & quòd imprimis servantur infantes, ut & molliores mulieres: tùm ii juvenes & viri quorum temperies humidior est, & tardior animalisatio. Quibus addi etiam debent ii qui acidum assiduò eruçant; quos omnes rarò admodùm tentari pleuritide docetur aph. 33, sect. 6, nec immeritò. Hæc enim assertio convenire videtur pleuritidi cùm legitimæ, tùm biliosæ. Legitimæ, inquam, quatenùs hæc pleuritis aliena est ab acido, utpotè quæ erysipelatosa sit, atque ideò biliosam sapiat naturam: biliosæ verò, & quidem præsertim, proptereaquòd ista longiùs adhuc recedat à qualitate acidâ, quâ formationem bilis refrænari certum est.

De cætero notandum restat 1^o. quòd biliosa constitutio suapte naturâ valeat afficere & irritare strictionem faciem membranarum, sicut diximus textum cellularem laxiorem præprimis affici ab inflammatoriâ constitutione. 2^o. Quòd fomes biliolarum febrium præsertim sedeat in systemate abdominali.

C O N S T I T U T I O A T R A B I L I O S A .

U B I definit constitutio biliosa , nempè circa mensem Novembrem , ibi incipit constitutio atrabiliosa dicta. Hæc formatur eò quòd jam tunc non ampliùs redundet flava bilis , sat diluta , maximæque acrimoniæ expers ; sed bilis acer & terrestris facta , quæ colore suo saturatè flavo accedit ad nigredinem. Talis fuit opinio Veterum , post Hippocratem , quam Recentes quidam ignoranter neglexerunt , ac vituperarunt.

Prædictæ bilis qualitates producuntur ab autumno , propter singularem concentrationem quam tunc illa contrahit mediante ulteriori dissipatione principii sui aquei tunc accidente , simul & propter aliquam strictionem solidorum quæ novas frigoris impressiones sequitur. Autumnus enim tempestas est sicca & frigida , si in toto spectetur , irritis pluviis aliquibus quas tunc cadere congruum est : irritoque calore diurno prioris partis ejus , qui abundè compensatur nocturno frigore quo non solùm noctes occupantur in fine autumnii , sed & dies ipsimet. Undè , nedùm autumnus emendet siccitatem fibrarum , & nedùm restituat aquam bili ablatam ab æstate prægressâ , potius ille valet bilem magis ac magis resiccare & acrem reddere , solidis simul constrictis non-nihil , ideòque aptioribus factis ad actionem potentiores exercendam.

Ratione naturæ suæ , constitutio atrabiliosa præsertim infesta est systemati hypocondriorum , quoniam illud præprimis oneratur tali materie. Ideòque , si materies illa ibi aliquandiù hæferit , ea valet vario modo perturbare digestionem , à quibus producuntur febres atrabiliares hybernæ , tam continuæ , quàm

intermittentes. Quandò verò idem humor mirabiliter irritat varios plexus nerveos abdominis, tunc producit affectus melancholicos varios; vel si ad cerebrum feratur, producit lethales apoplexias, seu sphacelismos cerebri ineunte hyeme accidentes; vel & sæpiùs pulmones aggreditur, ob frequentem concursum facilemque complicationem humoris atrabiliosi cum humoribus pituitosis: ideòque tunc nascuntur spuria peripneumonia bene multæ.

Talis constitutio durare solet per mensem Novembrem, Decembrem & Januarium, si hyems serena fuerit. Sed si hyemis initia nubila fuerint & pluviosa, tunc sæpè contingit, ut à fine Novembris jam incipiat apud senes constitutio pituitosa, de quâ mox acturi sumus. Quinimò sæpè quoque videre est, quòd à fine Decembris, seriùs ociùsve, ortum ducat constitutio inflammatoria apud homines sanguineâ temperie donatos.

Secundùm ea quæ diximus de ortu bilis atræ, constitutio atrabiliosa præsens cognosci potest ex prægressâ biliosâ constitutione ætatis, quam excipit autumnus regularis. Sed ea præsertim agnoscitur, quandò tunc temporis major numerus ægrotantium habetur inter individua ætatis virilis, & ultra-virilis. Nam morbi atrabiliares mox relati, præprimis aggrediuntur viros firmatos, necnon & crudos senes, dùm ii aliis ætatibus parcunt. Parcunt autem præcipuè pueris, adolescentibusque, juvenibusque. Sed nonnullæ effœtæ mulieres passim quoque tentantur; quoniàm aliquæ earum tunc accedunt nonnihil ad constitutionem virilem.

De cætero, morbi quilibet sporadici qui sub hâc constitutione accidunt, semper de illâ quidpiam habent, sicut dictum est de constitutione sanguineâ, & de biliosâ. Id præsertim no-

tatur apud homines quorum propria natura biliosa est, & qui ideò paululùm semper inclinant versùs constitutionem atrabiliarem, mediante actione causarum communium autumnalium.

§. I V.

C O N S T I T U T I O P I T U I T O S A .

PITUITOSA constitutio ille est status, in quo humorum massa scatet nimio mucro crudo, magis vel minùs ferofo & tenaci, eòque præcipuè magis vel minùs acri, pro vario connubio suo cum atrabiliari humore, cum quo facillimè concurrit & conjungitur.

Generatur talis constitutio ex impeditâ sufficienti elaboratione partis mucidæ ciborum, sicut senibus præsertim familiare est; sed ea potentèr fovetur adaugeturque, ob præcipitem nimiamque intussusceptionem principii humidi hyemalis. Eo siquidem annihilatur beneficium ignis electrici; valdèque probabile est, ab eodem principio humido simul solida relaxari, atque fieri inertia: consequenter, abhinc quoque humores evadere nimis ferosos, vappidos, necnon inertes.

Cognoscitur pituitosa constitutio popularis, præsertim ex australi humiditate hyemis, potissimùm contingentis post sicciozem autumnum. Cognoscitur etiam ex frequentia majori morborum senes agredientium, simul & infestantium ipsos viros debiliores, aut habituali sputorum mucosorum excreationi obnoxios. Cujus ultimæ peculiaris constitutionis quamdam diagnosim & prognosim videtur tradidisse Hippocrates, dicens aph. 2, sect. 6: *Quibus nares naturâ sunt humidiores, & genitale semen liquidum, sanis insalubre; quibus verò à morbo è contrâ fit, salubrius.*

In genere autem notatur, quòd constitutio pituitosa popu-

laris valdè cohærens sit cum atrabiliari, cum quâ complicatur ab ipso mense Novembri, præsertim apud senes; & quòd ea duret usquè ad constitutionem inflammatoriam, quæ plerùmque incipit in fine Decembris, saltèm apud sanguinolentos. Hoc apparet in pleuritidibus ac peripneumoniis legitimis, quæ tunc contingunt apud homines mediæ ætatis paulò laxiores; sed illud præsertim prostat in morbis catharralibus dictis qui simul accidunt: nam eorum materies & caterva procedit ab humore pituitoso, simul & nonnihil inflammatorio.

Præ mucosâ ferosâque naturâ constitutionis pituitosæ, ea potissimùm infensa est organis humores mucosos secernentibus. Ideòque ea nocuam sese præbet glandulis lymphaticis, necnon & cellulari textui. Proptereà non mirum, si exindè gignantur frequentes tusses, numerosi seniles catharri, pituitosæ anginæ, leucophlegmaciæ, &c. Neque etiam mirabilius, si abhinc scatuant adeò frequentes pleuroperipneumoniæ spurix, quas aliquandò difficile est dixisse, utrùm magis atrabiliares sint quàm pituitosæ; aut vicissim.

Deniquè dùm regnat pituitosa constitutio, ea valet concurrere ad morbos quoslibet tunc accidentes, sicut de aliis constitutionibus dictum est. Quinimò, levis concursus ille locum etiam habet per hyemem, quamvis tunc non vigeat determinata & popularis constitutio pituitosa. Natura namque ad illam spontè vergit tunc temporis, & quidem semper satis, ut senes debiliores quotannis opprimat magis vel minùs.

§. V.

CONSTITUTIONES EXTENSÆ.

ALIQUANDO tantæ sunt anni tempestatum aberrationes, ut videatur annus quasi foret una ferè & eadem tempestas; adeò ut

constitutio morbose eadem floreat per annum integrum : dum plerumque vixens constitutio mutatur à subsequente tempestate, saltèmq; ab hyeme , vel ab æstate.

Dicitur tunc temporis dari constitutionem extensam, eò quòd ex. gr., constitutio inflammatoria hyemis & veris occupet integram æstatem ipsam, imò & fortè adhuc prorogetur usquè ad hyemem subsequentem. Quæ extensio pariter fit aliquoties respectu aliarum constitutionum.

Cognoscuntur autem tales extensiones, non solùm ex continuatâ ferè simili temperie tempestatum ; verùm etiam ex perennitate morborum qui similibus symptomatibus stipati sunt, & qui eandem continuò ætatem, aut speciem hominum aggrediuntur.

Hâc ratione, si extenditur constitutio inflammatoria, juvenes atque adolescentes ægrotabunt, præ hominibus mediæ ætatis : si biliosa, viri : si atrabiliosa, homines ætatem ultra-virilem agentes , ut & senes crudi : si pituitosa, senes , sæpèque & infantes.

De reliquo , quandò una quælibet constitutio extenditur , semper ipsi tandem desinenti succedit constitutio hæc , quæ ipsi succedere solet quandò tempestates regulares sunt. Ex. gr. , si inflammatoria constitutio extensa fuerit , semper ipsi abeunti succedit biliosa constitutio ; pariterque biliosæ constitutioni extensæ abeunti, atrabiliaris succedit : & sic de cæteris. Undè si constitutio biliosa occupet autumnum , tunc æstivi morbi vigent per autumnum , loco morborum autumnalium ; & morbi autumnales per hyemem. Sed ii remissiores sunt , & brevioris regni , quia atrabiliaris constitutio faciliùs deletur ab hyeme : & sic de cæteris. Sæpèque accidit , ut extensæ constitutiones evadant annuæ.

ARTICULUS III.

SIGNA sanitatis ex ætate & sexu inferenda.

QUATUOR anni tempestates videntur præbere maximam analogiam cum quatuor stadiis humanæ vitæ, sicut pulchrè observarunt Antiqui, post Hippocratem. Ideò dixerunt pueritiam & adolescentiam veri affinem esse: juventutem æstati primæ: virilitatem secundæ parti æstatis, ut & autumnò: hyemi senectutem.

Saltèm, ex aph. 18, sect. 3, luculenter apparet talem fuisse sententiam Hippocratis, quippè qui expressiùs loqui non potuisset de prædictâ analogiâ sedente inter varias tempestates anni, & varias ætates hominum. *Per anni tempora autem, inquit ille, vere quidem & primâ æstate pueri, & qui ætate his proximi sunt, optimè degunt, & maxime valent; æstate verò & quadamtenus autumnò senes; reliquâ verò parte autumnì, & hyeme, qui mediâ sunt ætate.*

Statim mirum videretur, quòd vernum tempus, naturâ suâ analogum cum pueritiâ & adolescentiâ, ipsis faveat, nedùm noceat. Nam calor humidus veris apparet æquè capax lædere corpora calida & humida puerorum adolescentiumque, ac frigus humidum hyemale senes afficit: quantum etiam calor æstatis primæ labefacit juvenes, viros verò secunda pars æstatis & pars prima autumnì.

Alio tamen modo se res habet respectu puerorum & adolescentium. Corpora eorum ductilia sunt admodum; ideòque facile ferunt copiam boni sanguinis verno tempore præsertim luxuriantis: imò & illâ indigent, ratione incrementi sui, indèque tunc benè se habent. Similiter, ii per æstatem primam manent illibati

illibati à constitutione propriâ hujus tempestatis, quoniâ illa adhuc sapit qualitates vernas. Consequenter, sicut dicitur aph. citato, vere & primâ æstate pueri, atque qui ætate his proximi sunt, optimè degunt & maximè valent.

Senes, è contrâ, qui naturâ suâ humidi sunt ac frigidi, optimè valent caniculari tempore, sicut & per primam autumnî partem. Eæ siquidem tempestates valent utiliter calefacere corpora senilia, ea paululùm resiccare, prætereâque demulcere rigiditatem eorum. Idcirco, senes æstate & quodamtenus autumno, magis sani sunt.

Tandem notatur, homines mediæ ætatis optimè plerùmque degere per secundam partem autumnî, sicut & per hyemem. Cùm enim reliqua pars autumnî jam accedat ad frigiditatem humidam hyemis: hinc fit, ut à fine autumnî, pariter ac ab hyeme, tempèretur calor, siccitas & dispositio eorum biliosa. Proindèque non mirum homines mediæ ætatis tunc esse saniores. Nam tunc ab iis dimoventur nimietates illæ, quarum occasione præsertim ægrotarent. Fatendum equidem, quòd ii tandem exponantur inflammatoriis morbis post hyemis finem, si generata fuerit talis constitutio. Sed id fit à fine hyemis tantùm; nec minùs verum est dicere, quòd ut plurimùm homines mediæ ætatis benè valeant per reliquam partem autumnî, & per hyemem.

Prædicta theoria sanitatis propriæ variis ætatibus, secundùm varias tempestates anni, luculenter firmatur aph. 2, sect. 3, in quo sequentia leguntur: *Naturæ hæ quidem ad æstatem, aliæ ad hyemem, benè vel malè se habent.* Nam in hoc aphorismo traditur exceptio regulæ generalis, contentæ in aphorismo 18°. quoad tempestates in quibus ætates variæ benè valent, aut non. Equidem, in aphorismo 2°. mōx allato monetur dari quasdam accidentales habitudines, seu temperies proprias aliquot indi-

viduis variarum ætatum : proindèque , his mediantibus temperiebus impediri , nè generali eventu intelligatur & probetur aphorismus decimus-octavus , quoad tempora anni quibus benè valent pueri , senes , & homines mediæ ætatis. Quædam enim individua variarum illarum ætatum singulari & insolitâ temperie accidentaliter gaudent ; cujus ratione ægrotant per tempestatem magis congruam fovendæ sanitati multitudinis hominum ætatis ejusdem , nedùm tunc benè valeant , sicut statuitur aph. 18 suprâ relato ; & vicissim. Sic , ex. gr. , adolescens accidentaliter biliosus , facilè ægrotabit æstate mediâ , sicut vir fortè pituitosus ægrotabit per hyemem ; sic etiam robustus senex biliosus ægrotabit æstate , nedùm benè valeat ; & hyeme optimè se habebit , &c.

Non alio sub sensu intelligendum esse aphorismum secundum sectionis tertiæ arbitror. Alioquì Hippocrates insulsè tradidisset eandem sententiam in prædictis duobus aphorismis sectionis tertiæ. Quinimò , eandem sententiam adhuc recoxisset insulsiùs , in aphorismo 3°. dicens : *Morbi quoque alii ad alias anni tempestates benè vel malè habent , & ætates quædam ad anni tempestates , & regiones , & vicîls rationes.* Nemo ab omni præjudicatione liber non judicabit , ut opinor , idem doceri de variis morbis in aphorismo tertio , quod traditum fuit aphorismo secundo de temperamentis variis , & quod dicitur de ætatibus variis aphorismo decimo-octavo. Nonne enim quidam morbi faciliùs feruntur & sanantur , per quamdam anni tempestatem , quàm per aliam ? Nonne pariter quædam temperamenta meliùs ferunt unam tempestatem , præ aliâ ? Nonne demùm , variæ ætates generaliter meliùs se habent , aut pejus , in certâ anni tempestate ?

Sed in favorem sententiæ nostræ prætereà notandum venit ,

Medicum Coum addidisse in aphorismo tertio, quòd sicut ætates quædam, necnon quædam temperies, benè vel malè se habent per certam tempestatem anni; ita & ætates eæ, eæque temperies, benè vel malè se habeant ad varias mundi regiones, & ad varias rationes vivendi.

Sicut senex in genere meliùs valet æstate, quàm hyeme, &c: sicut morbus melancholicus faciliùs curabitur verno tempore, quàm per autumnum, &c. : & sicut biliosus vir meliùs valet hyeme, quàm æstate, &c. : ita & ipse idem senex meliùs se haberet in Occitaniâ, quàm in Germaniâ; vir biliosus, meliùs apud Germanos, quàm apud Anglos. Pariterque intelligendum est quòd, sicut senex benè se habet à victu parco, ita & vir à modico : juvenis à multo : à copiosiore adolescens : infans deniquè, à victu affatim exhibito, molli, & plurimis vicibus assumpto. Nec alio modo ratiocinandum est de variis exercitationibus, aliisque rebus inevitabilibus. Indèque concipitur, quare quilibet morbus pro suâ naturâ debiliùs aut fortiùs advocetur, illeque mitiùs aut crudeliùs sæviat, prout ab unâ duntaxat causâ accidentali producitur, aut ab aliquâ simul temperiei dispositione : tum quare major imprimis fiat morbi sævities, quando, unâ cùm dispositione naturali ægrotantis, adhuc concurrat tempestas eundem morbum per se producere capax. Quod medicum dogma videtur apprimè contineri aph. 8, sect. 8; qui fortè non fuit vituperatus à quibusdam, nisi quia ipsis difficilior aut obscurus videretur. Eum sequenti modo legendum ac intelligendum esse nobis apparet. *Quæ secundum naturam ad tabem vergunt, omnia quidem vehementia, & etiam lethalia. Secundum autem* (id est, secundò verò eadem omnia perindè vehementia & lethalia), *si in tempore adverso ægrotet. Nam tempus ipsum morbo opem fert* (id est, morbo vires addit, si fuerit adversum),

quemadmodum febris ardenti æstas (adversa est), hydropico hyems. Naturâ enim (tunc morbus) superiorest, at spleni plus affert timoris (contrarietas illa, sicut reipsâ verum est).

Jam nunc consideratis illis quæ in genere pertinent ad communem sanitatem hominum quoad varias eorum ætates, & quid in particulari conveniat variis ipsorum temperamentis quoad anni tempestates, regiones, & vivendi rationes: superest dixisse quinam morbi sint in genere magis familiares variis ætatibus.

Morbi autem magis familiares variis ætatibus recensiti inveniuntur in ultimis octo aphorismis sectionis tertiæ. Nempè morbi puerorum annumerantur aphorismis 24, 25, 26 & 27, eorumque terminationes frequentiores memorantur aph. 28. Morbi adolescentium & juvenum referuntur aph. 29, quos inter præcipuè notandi sunt comitiales dicti; quatenus videlicet ii præsertim tollantur per mutationes ætatis, regionum & victûs, ex aph. 45, sect. 2; & in quantum iidem sanabiles fortè habeantur, si oriantur antè pubem: insanabiles verò, si anno quinto & vigesimo oriantur, sicut legitur aph. 7, sect. 5. Postea celebrantur morbi viriles, aph. 30; & demùm morbi seniles aph. 31, seu ultimo. Sed, quoad senes, ita Hippocrates prætereà loquitur aph. 39, sect. 2: *Ut plurimum quidem senes juvenibus ægrotant minus: at qui ipsis morbi diuturni contingunt, eos ad mortem comitari solent.*

Deniquè finem faciemus hujus articuli, expositione eorum quæ attinent ad signa morborum ex vario sexu depromendorum. Porro, præter illa quæ respiciunt morbos uterinos, ut & morbos testium & urethræ (quæ omnia habebuntur ubi de pubertate, & ubi de urinis), sequentia notanda sunt respectu morborum arthriticorum, 1º. Nempè ex aph. 30, sect. 6,

reminiscendum pueros non laborare podagrâ, antè veneris usum 2°. Eunuchos non laborare podagrâ, ut fert aph. 28, sect. 6. 3°. Deniquè, mulieres minimè tentari podagrâ, nisi menses ipsis defecerint, sicut legitur aph. 29 sectionis ejusdem. Sed illæ observationes nunc non intelligendæ sunt sine grano salis, sicut fusiùs dicetur loquendo de morbis arthriticis, nempè ubi de humore synoviali.

Solitâ suâ cum brevitate Hippocrates, quasi omnia prædicta recapitulando de ætatibus, sic loquitur coacâ § 12: » Sed neque » antè pubertatem occupant hi morbi, pulmonum inflamma- » tiones, laterum dolores, podagræ, renum vitia, varix in » tibiâ, fluor sanguineus, cancer non innatus, albicans vitiligo » non cognata, defluxio in spinalem medullam (*hîc sanè intel- » gendo phtysim dorsalem*), sanguinis per ora venarum proflu- » vium, tenuioris intestini morbus (quem *chordapsim* vocant), » non à naturâ insitus. Horum nullus antè pubertatem me- » tuendus est. Ab anno autem decimo-quarto ad quadragesimum » secundum usquè, natura omnis generis morborum corporis » ferax est. Contrà verò, ab hâc ætate ad annum sexagesimum » tertium, neque strhumæ fiunt, neque vesicæ calculus, nisi » antèa occupet; neque in spinalem medullam defluxio, neque » renum morbus, nisi ex aliâ ætate sequantur, neque sanguinis » per ora venarum profluvium, neque fluor sanguinis, nisi » priùs adfuerit; atque hi morbi ad senectutem usquè absunt ». Ita ille. Sed hæc saltèm de senibus effata supponunt homines benè vivere. Nam crapula valeret plurimos inexpectatos adducere morbos; imò ipsis multùm quoque nocere posset degenerata lues venerea, quæ ignota fuit Hippocrati.

ARTICULUS IV.

SIGNA morborum petenda ex ipsis morbis prægressis & curatis.

PRÆGRESSIS morbis Medico attento uti valdè etiam proficuum. Ii siquidem lucidam faciem præbent ad cognoscendam naturam & speciem morborum actualium, ut & possibilem. Prima lux necessaria est therapie: altera prophylaxi. Nemo negabit homo.

Propterea, ubi non facilè distinguitur aitiologia morbi cum quo homo conflictatur, aut quisnam timendus sit, attendere oportet ad sequentia; quæ etiam majori certitudini inferendæ fervirent, etsi jam nosceretur præsens morbus, aut imminens.

1°. Nempè sciendum est, utrùm hic homo olim quodam morbo correptus fuerit? 2°. Quinam fuerit hic morbus, saltèm quantùm æger valet dicere quoad symptomata graviora; tum præcipuè quoad modum abeundi? 3°. Quânam tempestate morbus acciderit? 4°. Quânam ætate? 5°. Deniquè, quomodò tractatus fuerit?

Facile concipere est, Medicum ex prædictis cognitionibus saltèm dubium acquirere posse de naturâ morbi, si illam non indè lucidè aspexerit. Dubitare saltèm, inquam, utrùm prægressus morbus inflammatorius fuerit, necnè? Nùm verò tantùm catharralis, vel biliosus, vel atrabiliosus, vel pituitosus, vel arthriticus, aut alterius cujuscumque profapie?

Sed, si morbus prægressus nullam videatur præbere cohærentiam cum ætate ægrotantis, sicut nec cum tempestate anni; tum, si instituta medicatio ejus nihil ostendat, sicut nec ejus abeundi modus: aliorsum instituenda est diagnosi. Tunc inquirendum venit, quænam circumstantiæ cognitæ talem morbum

præcefferint, vel in quibusnam ille acciderit? Hoc pacto videbitur, morbum olim toleratum nonnisi accidentalem fuisse, seu sporadicum; minimè verò natum ob causam epidemicam. Undè judicandum dumtaxat supererit, perpensis ejus symptomatibus, utrùm quamdam participaverit constitutionem humanam inter ordinarias: numve ille morbus ortus fuerit à quâdam causâ peculiari, nempè vel arthriticâ, vel scorbuticâ, vel siphiliticâ, vel metastaticâ quâlicumquè, vel & ab intemperantiâ?

Tali arte Medicus attentus sæpenumerò pervenit ad cognoscendam materiale causam morbi, vel causam aliquam moralem: consequenter ad cognoscendam quoque temperiem ægrotantis, & ad instituendam therapeïam congruam, aut prophylaxim.

ARTICULUS V.

SIGNA repetenda ex actuali statu convalescentis.

SANE quidem ægrotantes magis vel minùs tutè sæpenumerò convalescunt. Hoc fit 1°. prout corpora eorum liberata fuerunt à principio morbofo, vi naturæ, vel artis. 2°. Prout quoddam viscus affectum manet morbo secundario, sive ibi relictus fuerit abscessus; sive enatæ fuerint ibidem obstructions, aut adauctæ quædam priùs existentes, vel & ductæ ultrà limites naturæ suæ schirrosæ. 3°. Deniquè, prout convalescentes resurgunt, & tunc utuntur cibo, somnoque quotidiano. In his enim datur reperire indicia plurima recidivarum, vel & morbi alicujus secundarii qui priore sæpiùs pejor sit, aut saltèm admodùm chronicus, vel & omninò insanabilis.

Primò videndum in convalescente, quid proficiant cibi, & quid proficiat somnus.

Quod spectat cibos, bonum censetur, si convalescens vires suas ritè recuperaverit, & si ab assumptione ipsâmet ciborum recreetur. Nemo enim non intelligit quare, *ex morbo bellè comedenti corpus nihil proficere malum*, sicut docetur aph. 31, sect. 2, & sicut prætereà firmatur coacâ 127, in quâ additur, ægrotantes ideò malignè relabi. Nequè id mirum; tunc enim metus est, nè pravæ digestionis procreent novum morbum; aut potius timendum, nè quædam supersint reliquiæ morbi imperfectè judicati; eæ siquidem reliquiæ solent facere recidivas, sicut docetur aph. 12, sect. 2, & sicut facile est concipere. Neque obscurior est sensus aphorismi 8, sect. 2, ubi legitur: *Si quis ex morbo cibum capiens, vires non recipiat, eum copiosiore alimento uti significat. Quòd si cibum non capienti istud contingat, inanitione indigere sciendum est.* In primo enim casu hujus aphorismi, datur quidem appetitus, sed obruuntur vires chylo-poieticæ: in secundo verò, deest appetitus, & datur saburra in officinâ digestionis. Confer aph. 32 sect. ejusdem.

Quoad somnum, indè quoque elucet potentissima signa. Nam, ut legitur coacâ 151, *profundi somni neque turbulenti, judicii firmitatem denunciant. Turbulenti verò, non sine corporis offensione, instabiles sunt & infirmi.* Hæcque prognosis sic firmatur, lib. de judicationibus, circa finem. » Morborum reversionibus:
 » tentatur quibus citrà febrem vehementes vigiliæ, aut tur-
 » bulenti somni adveniunt, aut corporis robur solvitur, aut
 » singulorum membrorum dolores adsunt, & quibus febres,
 » non accidentibus solutionis signis, neque diebus judicatoriis
 » quiescunt. Quòd si deficiente febre & accedente sudore,
 » urinam fulvam albam subsidentiam continentem reddiderint,
 » his eodem die febris reversionem sperato. Ejusmodi verò
 » reversiones quinto die, citrà periculum, judicantur. At si,
 » judicatione.

» judicatione factâ, urina rubra subsidentiam rubram continens
 » reddita fuerit, his quoque febris reversio eodem die con-
 » tingit, ex quâ pauci servantur.

Secundò, considerandæ consequentiæ morborum, quatenus
 ex felices sunt, aut infelices. Felices sunt, quandò effectu
 febris deletur aliquod vitium habituale, tùm ubi tollitur dis-
 positio ad similem morbum contrahendum, sicut fit in variolis,
 quæ nunquàm plerùmque revertuntur. Infelices verò, quandò
 abhinc surgit vitium aliquod in quodam viscere; sive hoc
 viscus secundario morbo affligatur; sive idem jam antea fuerit
 affectum, & posthac gravius lædatur; sive demùm illud debi-
 litatum fuerit à morbo. Sic itaque sæpè videre est nasci obstruc-
 tiones in hepate post toleratam hepatitidem, aut febrem
 biliosam, cùm intermittentem, tùm continuam: sic etiam cancer
 occultus manifestatur occasione morbi prægressi, potissimùm
 si febrilis fuerit. Sicque cruda vomica abit in suppuratum, ob
 causam similem: sic, ob peripneumoniam malè resolutam,
 remanet induratio anhxelosa, aliquandò fortè abitura in vomicam.
 Sic demùm abscessus quandòque relinquitur post morbum,
 1º. quia pars affecta debilitata fuit ab illo, & hâc ratione
 ibi aliqua stetit metastasis; 2º. quia decubitus clanculò factus
 in aliquâ parte non fuit resolutus, sensimque abiit in suppu-
 ratum. *Quibus convalescentibus ex quovis morbo, pars aliqua labore
 vexatur, illuc abscessus fiunt, ex aph. 32 sect. 4. Quemadmodùm,
 in ipsismet morbis acutis, si pars quædam antè morbum labo-
 raverit, in eam se morbus obfirmat, ut docetur aph. 33 sectionis
 ejusdem. Nempè propter ejus partis debilitatem, aut quamdam
 irritationem præexistentem.*

Inter infelices morborum consequentias, considerata deniquè
 imperfecta aufugia principiorum morbiferorum. Ea namque

principia aliquandò vi naturæ cooperiuntur aliquo veluti involucro, sub cujus larvâ aliquandiù feruntur hinc indè; vel & ea metastaticum decubitus faciunt alicubi. Aliis vicibus, eadem deleteria imperfectè quoque subacta, sed jam nonnihil mutata, emigrant in cellularem textum, ibi deitescendo; quâ in parte non rarò aliquandiù stagnant impunè, aut mirabilem valdèque periculofam leucophlegmaciam creant, &c. Quandòque etiam tumores per modum criseos enati, solvuntur absquè evacuatione subsequente, ideòque fit morbus recidivus. Hoc præsertim malum sic notatur lib. de judicationibus, ergà tumores parotideos: *Quibus judicationis tempore exorta ad aures tubercula non suppurantur; his solutis, morbi reversio, pro recidivarum ratione, simili circuitu contingit.*

Multas alias annotationes quisque pro marte suo valet facere in hanc rem; sed ex suprâ allatis jam planum est, quantum intersit Medico convalescentes aspicere sub respectu pathologico-semeiotico. Indè enim permulta mala præsentia vel futura dignoscet, adeòque & prognosim congruam stabilibit, congruamque medelam; sive therapeuticam, si possibilis sit; sive tantummodò prophylacticam, si natura morbi jusserit.

Nunc pauca supersunt tradenda de signis sanitatis quæ repetenda sunt ex loco & habitationibus. De his igitur breviter agendum articulo sequenti, ad hoc ut completior habeatur notitia pathologico-semeiotica rerum, quæ ad sanitatem afficiendam & designandam pertinent.

A R T I C U L U S V I.

S I G N A repetenda ex loco & habitatione.

HABITATIONES hominum, ut & loca in quibus illæ sitæ sunt, multum facere ad sanitatem, quis negaverit? Primò quidem

quotidianâ constat observatione, plures homines benè aut malè valere eâ tantùm de causâ, quòd ii congruâ vel incongruâ fruuntur habitatione. Cùm enim aspectus domorum borealis valeat imprimis fringere humanorum corporum compagem, illamque ut plurimum aspergere copiosiori principio electrico, dùm auster contraria præstat; & cùm inter duas illas potentissimas oppositasque causas frequentissima detur alternatio, vel & alterutrius longa quandòque prædominatio: his ipsis factis certò probatum manet, varias hominum mansiones plurimùm conducere non solum ad fovendam constitutionem quamdam morbosam aliundè exortam; sed & ad illam accidentaliter inducendam, contrà solitum ordinem rerum quæ congruæ sunt variis hominum ætatibus, variisque tempestatibus anni. Quoties accidit ut, eâ simplici de causâ, popularis quædam morbosa constitutio faciliùs aggrediatur homines ad illam naturâ suâ jam dispositos, aut iis è contrà parcat; vel & in quibusdam nascatur aliqua constitutio, quæ nec ætati congrua sit, nec anni tempestatibus! Undè apparet haud spernendam exindè cognitionem haberi respectu individuorum grassante quodam morbo populari corripientorum, aut præservandorum; tùm respectu quorundam hominum qui tentantur ægritudinibus sporadicis, vel & suo statui civili magis familiaribus.

Quod dictum est de habitatione, illud à fortiori, & generalius quidem intelligendum de loco in quo illa sita est; præsertimque id considerandum venit, ergà regiones quæ obnoxia sunt majoribus & crebrioribus cœli mutationibus. Mirum enim est, quantum indè mutantur sanitates populorum variorum, ut & morales eorumdem affectiones; prout nempè ab hinc mutatur physica eorum constitutio, necnon societas & fortuna ipsamet. Hæc omnia abundè probari licet, ex iis Medici Coi observatis quæ in fine libri de aëre, locis & aquis ita leguntur,

» Qui regionem quidem montanam, asperam, altam & aquis
 » carentem incolunt, & anni temporum mutationes habent
 » multum differentes, illic hominum formas magnas esse par
 » est, tum ad laborem, tum ad robur à naturâ optimè esse
 » comparatas. At agrestibus & ferinis moribus ejusmodi naturæ
 » non parum sunt præditæ.

» At qui loca concava, herbosa & æstuosa habitant, quique
 » ventis calidis magis quàm frigidis perflantur, & aquis utuntur
 » calidis, hi magni quidem esse non possunt, neque recti, &
 » ventre substricto; in amplam verò corporis molem à naturâ
 » producuntur, corpore sunt carnosio & capillis nigris, colore
 » potius nigro quàm candido, & minùs pituitosi quàm biliosi.
 » At animi robore & laborum tolerantia, non æquè à naturâ
 » valent, sed accedens vitæ institutum id efficit. Quòd si
 » flumina ea regio habeat, quæ stagnantes & pluvias aquas
 » educant, ii incolumes degunt & colore cutis sunt splendido.
 » Sin verò nulla sunt flumina, aquasque fontanas statarias &
 » malè olentes bibant, has ventri & lieni noxias esse necesse est.

» Qui verò regionem altam, planam, ventis perflatam &
 » aquosam incolunt, ii corporis habitu sunt prægrandi, inter se
 » similes, & erecti, & animo tranquilliore.

» At qui gracilia & arida loca, aquis carentia & nuda tenent,
 » neque temperatas habent anni temporum mutationes, hæc
 » in regione homines duro & robusto corporis habitu esse par
 » est, & colore flavo potius quàm nigro, moribus & animi
 » appetitionibus nimis placentes & superbos, & in conceptâ
 » opinione permanentes.

» Ubi enim anni temporum mutationes, tum crebræ, tum
 » plurimum inter se differunt, ibi & formas, & mores, &
 » naturas plurimum diversas comperias. Atque hæc quidem

» maximæ causæ sunt , cur naturæ permutentur , deindè etiam
 » regio in quâ quis nutritur , & aquæ. Magnâ enim ex parte
 » hominum formas & mores regionis naturam imitari reperias.

» Ubi enim terra pinguis est , & mollis , & aquosa , aquæ
 » verò valdè sublimes , ita ut æstate sint calidæ , & hyeme
 » frigidæ , quæque ad anni tempora probè habet , ibi homines
 » sunt carnosî , articulis non discreti , humidi , labores non fe-
 » rentes , at ut plurimum pravi animi. Quin etiam segnes sunt
 » & somnolenti , & ad artes crassî , neque subtiles , neque
 » acuti.

» Ast ubi regio nuda est , non munita , aspera , quæque &
 » à frigore hiberno prematur , & à sole æstivo exuratur , ibi
 » duros , graciles , articulis discretos , carnosos & hirsutos ho-
 » mines cernas , & qui ad aliquid agendum naturâ sunt industrii
 » & vigilantes. Mores autem habent superbos , in iram pro-
 » clives & pertinaces , magisque feritatis quàm lenitatis parti-
 » cipes , eosque ad artes acutiores & solertiores , & ad res
 » bellicas gerendas meliores deprehendas.

» Quin & reliqua omnia quæ è terrâ producuntur , terræ
 » ipsius naturam sequuntur. Atque maximè quidem contrariæ
 » naturæ & formæ sic se habent , ex quibus conjecturâ ductâ ,
 » si reliqua consideres , minimè aberrabis ». Ita ille , neque
 » quidquam pulchrius dici potest , aut veracius. Nî vetaret metus
 » offendendi existimationem aliquot populorum , non deessent
 » faciendæ applicationes , non solum quoad vulgatas quatuor orbis
 » hujus partes , sed & quoad Galliam , imò & Provinciam nos-
 » tram , sicut apparebit cuique attendenti. Scopus hîc noster non
 » est quemquam lædere , sed non omittere rem pathologico-
 » semeioticam , spectabilem respectu topographiæ medicæ mundi
 » variorumque ejus locorum.

CAPUT TERTIUM.

DE fame & siti.

FAMES quæ statis temporibus, statoque tenore revertitur, quam concomitatur solitus eduliorum sapor, optimum est signum. Ea utiliter monet sanos de indigentia novi cibi; prætereaque indicat omnino peractam esse animalisationem ciborum antea assumptorum. Imò, si in hisce circumstantiis corpus non sit ponderosius, neque ad sensum, neque ad stateram, inde probatur debitam vigere quoque excrementorum expulsionem.

Sed, quemadmodum fames illa periculosa est quæ redigitur ad solum appetitum, non excitandum nisi ab eruditore culinâ: ita & ipsiusmet famis naturalis iusti limites sunt agnoscendi, quos ultra, citraque, nequit consistere sanitas. Fames enim, etiam in ipso statu apparenter sano, ubi molestat, morbus fit. *Quidquid homini molestiam ac tristitiam infert, hoc morbus vocatur,* inquit Hippocrates, lib. de statibus; & postea addit: *quod ergo est famis remedium? Hoc scilicet quod famem sedat; id autem facit cibus, & eo malum illud medicandum.*

Jucunda sanè quidem medicina famis. Sed in hoc adhibendo medicamine, certis cautelis opus est. *Nec minus delictum,* inquit ille, lib. de veteri med., *nec minus lædit hominem, si pauciora & defectuosiora quàm satis est assumantur. Fames enim magnam potentiam in naturam hominis habet, & sanandi, & debilitandi, & occidendi. Ideoque, neque satietas, neque fames, neque aliud quidquam bonum est, quod naturæ modum excesserit, ut docetur aph. 4 sect. 2; præcipuique diætæ errores respiciunt ciborum copiam & qualitatem, tum horam in quâ cibi assumuntur.*

Hora pastûs intempestiva est, quandò non expectatur justum tempus donec venter cibos antea ingestos perfectè consumpserit. Tunc valdè periculosum est digestionem turbari; cibos in ventriculo diutiùs servari atque ideò corrumpi, undè plurima mala subsequi possint; qualia sunt anorexia, colici dolores, diarrhea, febris ipsa, &c.

Quod spectat ciborum qualitatem, ea quidem in genere accommodari debet temperiei, tempestati, ut & ætati. Nihilominùs verò sæpè accidit ut, ex consilio aph. 38 sect. 2, *cibus & potus paulò pejor, suavior autem, melioribus quidem, sed insuavioribus, anteponendus sit.*

Copia ciborum potest esse nimia, vel parcior. Si minor fuerit quàm par est, intelligenda sunt ejus pericula ex iis malis quæ sequuntur famem nimis protractam, & quæ hæc sunt. Nempè talis fames nimiam infert humorum siccitatem, attenuationemque animalem nimiam, haud secùs ac illæ inducuntur à nimiis laboribus corporeis; præsertim si labores ei incidant cum fame: *ubi fames, laborandum non esse*, meritò dicit Hipp. aph. 16 sect. 2; qui Auctor hanc sententiam magis veluti probaturus ait aph. 58 sect. 7, *corporibus humidis carne præditis, famem inducito, fames enim corpora exsiccat.* Quandò verò cibi nimia copiâ fuerunt assumpti, sciendum est, non minoribus malis exindè præberi occasionem. *Ubi copiosior præter naturam cibus ingestus fuerit, morbum creat; manifesta verò curatio*, ex aph. 17 sect. 2; neque sententia hæc obscura est. Sed & delictum illud adhuc majus habendum, quandò cibi assumuntur absquè legitimâ fame, præsertimque, si quædam cacochylia adfuerit. Ut docetur aph. 10 sect. 2, *impura corpora quò plus nutriveris, eò magis lædes.* Quod medicum dogma, severiùs adhuc colendum in acutis, explicatur per partes in aphorismis 4, 5,

7, 8, 9, 10, 11, 16 & 19, sect. 1, ubi statuitur quænam congrua sit diæta in variis morborum acutorum & peracutorum temporibus, ad hoc ut maxima pericula devitentur; neque liceret quidpiam clarius doceri, aut utilius, ergà tales ægrotantes.

Nè decipiamur distinguendo quænam fames apud sanos congrua sit, quænam verò minor, vel nimia: attendere oportet ad sequentia. Sciendum nempè famem non eandem esse in omnibus ætatibus, sicut nec in omnibus temperiebus & tempestatibus. Hæc omnia apprimè docentur in aphorismis 13, 14, 15, 17 & 18 sect. 1; hîc sigillatim referendis.

Nempè aph. 13, *Senes facillimè jejunium ferunt: secundùm eos ætate consistentes: minimùm adolescentes: omnium verò minimè pueri: atque inter ipsos qui alacriores sunt.*

Aph. 14, *Qui crescunt, plurimùm habent calidi innati: plurimo igitur indigent alimento, alioquè corpus absumitur. Senibus verò paucus calor, idcirco senes paucis fomitibus indigent, à multis namque extinguitur. Eandem etiam ob causam, neque senibus febres perinde acutæ contingunt: frigidum enim est eorum corpus.*

Aph. 15, *Ventres hyeme & vere, naturâ calidissimi, somnique longissimi. His igitur temporibus copiosiora cibaria exhibenda: siquidem plurimùm inest calidi innati, ideòque copiosiore indigent alimento.*

Aph. 17, *Quibusdam semel aut bis, & aliis copiosior, aut paucior, aut per partes cibus offerendus est: aliquid autem & tempori, & regioni, & ætati, & consuetudini concedendum.*

Aph. 18, *Æstate & autumnno cibos gravissimè ferunt: hyeme facillimè: deinde vere.*

Quæ omnia ergà diætam sanorum dogmata facilè intelliguntur, quotidieque probantur à Medicis, sicut præceptum sequens, quod lib. de ratione victûs habetur respectu temperamentorum biliosorum

biliosorum & pituitosorum: ii qui amarâ bile infestantur molestius ferunt parciolem cibum, dum è contrâ pituitosi, cibi præter morem abstinentiam facilius ferunt. Quod ultimum effectum de pituitosis firmatur & aph. 58 sect. 7, supra citato; quo consulitur famem excitandam esse in iis qui carnes habent humidas.

Ex dictis facile resolvere est quænam præsertim mala exspectanda sint à præposterâ diætâ, in variis ætatibus, in variis temperamentis, in variis consuetudinibus, in variis tempestatibus, in regionibus variis, atque in morbis acutis.

Sed adhuc attendere necesse est, non esse indifferens quomodò sedanda sit fames urgentior, aut quomodò succurrendum inanitioni. Equidem, *potu quàm cibo refici facilius est*, ut scriptum habetur aph. 11 sect. 2; & ab aph. 21 ejusd. sectionis ediscitur, *famem vini meracioris portione solvi*. Enim verò, omnibus iis sapienter, & cum ratione uti convenit; *confertim & repente vacuare, vel replere, vel calefacere, vel refrigerare, vel utcumque aliter corpus movere, periculosum, omne siquidem nimium naturæ inimicum*. Verùm quod paulatim fit, securum est, tum vel maxime, si ab uno ad alterum transitus fiat. Aph. 51 sect. 2.

Nunc sitim consideraturi, dicimus illam bonam esse, si tantummodò ordinaria sit, si facili compescatur negotio. Talis enim sitis indicat fieri debitam aquosorum humorum unionem, distributionem, exhalationem. Ideoque sitis hoc modo constituta monet aliquantum quidem cibi & sanguinis vehiculum aqueum desiderari; sed demonstrat simul abesse calorem nimium à corpore, illudque esse illibatum à notabili humorum acrimoniâ peregrinâ.

Undè sanitas eò firmior censerì potest, quò minor est sitis: quæ & quandòque in sanitate propemodum deficit. Quinimò, bonum quoque signum non habere sitim in acutis, & contrâ

malum , sicut in prognosticis docetur ; bonumque imprimis sine siti esse in pleuritide , tùm in omnibus circa pulmonem morbis , ex coacâ 393. Verumtamen sitim in gravi morbo penitus & præter rationem cessare , malum est , ut notatur coacâ 58 , & alibi ; malusque ille defectus , & tanquàm signum , & tanquàm causa ; tanquàm signum inquam , quatenus pendet à delirio , aut à resolutione sensationem sitis impediante ; tanquàm causa verò , quia defectu potûs necessarii magis excalescunt humores , iique tandem in tabum gangrænosum dissolvuntur. At notandum est , tussibus siccis & leviter irritatis posse sitim quadantenus minui in febribus ardentibus ; nempè quia levibus irritamentis gutturis allicitur humiditas in organis sitientibus. *Quibus tusses siccae , plurimæ & modicæ , irritantur , in febribus ardentibus , ii non multum siti vexantur* , aph. 54 sect. 4.

Notatur quoque sitim levem sæpè sedari per noctem à levi somno , etiam in ipsis ægrotantibus. Sed piaculum foret denegare potum sanis valdè sitientibus , sub spe somni sitim levaturi , sicut placuit quibusdam , malè concepto aphorismo 27 sect. 5 , qui est veluti continuatio aphorismi antecedentis , in quo agitur de dignoscendâ aquâ levissimâ. *Aqua quæ citò calefcit & citò refrigeratur , levissima* , inquit Hipp. aph. 26 sect. 5 ; posteaque ait , aphorismo sequenti : *hæc verò confert* (nempè aqua levissima) *quibus bibendi de nocte appetentia est , iis admodum sitientibus , & si postea dormierint , bonum*. Levem sitim à somno sedari , imò & eam interdum à vigiliâ curari , si orta fuerit per somnum , commemoratur lib. 6 epid. sect. 4 , his verbis : *levem inter vigilandum sitim somnus sedat ; eam verò quæ ex somno orta est , vigilia interdum*. Equidem perspiratio quævis interna major est tempore somni , ideòque fauces antè somnum leviter sitientes

humectantur somni efficaciâ. Pariter, si ore patulo dormiatur, hincque fauces arefcant nonnihil, sitiantque post somnum; iis brevî humectatis motu linguæ in evigilato, sitis hæc levis fugatur.

Fames demùm & sitis suos patiuntur morbos formatos, quibus supersedere nefas foret. In fame scilicèt occurrit 1^o. *dysorexia*, seu appetitus cibi imminutus: 2^o. *anorexia*, idem deletus: 3^o. *apositia*, seu fastidium cibi: 4^o. fames adaucta, quæ vel canina, vel bovina, vel lupina distinguitur: 5^o. demùm, *pica* & *malacia* puellarum chloroticarum, gravidarumque mulierum; quæ affectiones labefactant famem æquè ac sitim, & quæ sæpiùs inserviunt revelandæ graviditati. *Si mulieri purgationes non prodeant, neque horrore, neque febre succedente, ciborumque fastidia ei accidant, gravidam esse existimato*, inquit Hipp. aph. 61, sect. 5.

Neque etiam reticendum de multis prognosibus morborum, faciendis prout ii se habent cum fame & siti; quas inter præprimis occurrunt sequentes.

Ex aph. 3, sect. 6, *In longis dysenteriis cibi fastidia malum denunciant; & si accidunt cum febre, pejus*. Sicut enim fastidia cibi tunc indicant turbatas esse chylopoieticas potentias: ita & febris declarat, vel ægrotantem laborare ulcerosâ intestinorum exfoliatione valdè periculosâ, vel & natam fuisse à dysenteriâ longâ pessimam cachexiam, obstructionibus fortè stipatam. Adeòque febris illa pessimi ominis est.

In longis aliis morbis, fastidium cibi maximè etiam considerandum est. Quoniàm indè conjectari licet 1^o. viscus aliquod obstructum esse ob quamdam metastasim, vel defectu febrilis coctionis, aut crisis perfectæ: 2^o. quòd efficaciâ morbi valdè longi, sic fuerint mutata recrementa & organa esurialia, ut

appetitus nequeat ampliùs promoveri. In his porrò circumstantiis metus est , nè assumptorum ciborum coctio non possit perfici, imò fortè non inchoari ; consequenter metuendum , nè indè sequatur defectio nutritionis , & varia digestionis phœnomena prava. In hunc sensum intelligendus videtur aph. 6 sect. 7 qui hic est : *In morbo diuturnò ciborum aversio , & sinceri vomitus , & biliosæ dejectiones , malum.*

In genere enim, vestigium aliquod appetitûs pristini , bonum omen portendit in morbis, sicut & mentis lumen. *Mente conflare , & benè habere ad ea quæ offeruntur, quovis in morbo bonum ; contrà verò malum,* inquit Hippocrates, aph. 33 sect. 2. Cui sententiæ assentitur Celsus , dicens lib. 2, cap. 3 : *Quandò jam ad sanitatem venit corpus , sternutamentum inter bona indicia est , & cupiditas cibi , vel à principio servata , vel etiam post fastidium orta.*

Attamen , irritò appetitu, non omnes convalescentes fructum accipiunt à cibis , adeòque nec sanitas eorum semper tuta est. Hoc pendet à modo quo assumpta digeruntur. Convalescentes quidem aliquandò proficiunt edendo, quantùmvis debiles sint, si modò cibis quàm parcissimis utantur quos ideò benè concoquant. Sed aliquandò , nedùm resurgant , ii è contrà languent diutiùs, tandemque appetitum amittunt. Quod ultimum fit præsertim, quandò eorum appetitus edacior est quàm congruit viribus stomachi. Hâc enim ratione sensim creatur cacochyliæ nova , per quam primò deletur pristinus appetitus , tandemque fastidium cibi inducitur. Hùc spectat aphorismus 32 , sect. 2 , qui hic est : *Omnes ferè malè qui se habent , circa initia quidem cibum benè sumentes , neque quidquam proficientes , circa finem rursùs cibum non appetunt. At , qui circa initia vehementer abstinent , postea verò cibos probè appetunt , ii meliùs degunt.* Conferatur aph. 8 & 31 ejusdem sect.

Apud hominem verò non febricitantem qui aliundè sanus habetur , fastidium cibi indicat saburram ventriculi ; præsertimque , quandò fastidium illud concurrit cum cardiæ morfu , visûs obscuracione , & vertigine ; nec unquàm in hoc decipitur Observator , qui & exindè ediscit quid tunc moliendum sit. *Si cui sine febre , cibi fastidium , oris ventriculi morsus , tenebrosa vertigo contigerit , & os amarulentum fuerit , hæc necessariam esse per superiora purgationem indicant.* Aph. 17 sect. 4.

De cætero , nihil in functione famis & sitis , nec alibi , quicquam videtur miserabilius quàm *hydrophobia* rabiosiorum , circa quam ea quæ nuper cognita fuerunt fusiùs exponentur capite de inhalatione , ubi de miasmate rabido.

C A P U T Q U A R T U M .

DE ciborum manducatione , degustatione , ac deglutitione.

MASTICATIO quandòque læditur vitio maxillarum , dentium & linguæ , imò propter palati foramen , sicut in chirurgicis docetur. Læditur & apud puellas *Pica* aut *malacia* affectas , quæ aliquandò frustula fat crassa desiderant devorare , sicut eorum vomitu passim demonstratur ; undè , ex. gr. , ab inattentis forsan tunc acciperetur pro verme monstroso , id quod fuisset tantùm aliqua portio intestini cujusdam animantis , à certo tempore clanculò deglutita ; quæ , per macerationem suam in gastrico succo vitiato , peculiariter mutata fuisset ac indurata : quasi corium , corticis quernei pulvere infectum. Sed autopsia accurata haud difficulter valeret delere eventûs illius admirabilitatem : factâ scilicèt anatomicâ dissectione. Caveant ergò creduli *Magnetisatores*.

Gustus autem mox nullus percipitur , mox ingratus , mox

erroneus : eaque symptomata plerùmque pertinent ad *anorexiam*, *apositiam*, *picam*, *malaciam*; sed & aliquandò proveniunt ab aliquâ affectione nerveâ.

Circà hos affectus nonnullas notas tradidimus in capite præcedenti, ubi de fame & siti; nec plura dicenda esse credimus.

Quod pertinet ad deglutitionem, ea functio vitatur multiplici de causâ. Nempè, culpâ linguæ, palati, velaminis ejus, canaliculorum salivalium; tum etiam vitio musculorum laryngæorum & pharyngæorum, videlicet affectuum inflammatione, vel erosione, vel spasmo, vel paralyfi. Deniquè vitatur propter oesophagi obstructionem, compressionem, spasmus, aut paralyfim; quorum affectuum plures casus varii referuntur apud Sauvagesium. Imò quoque læditur sæpè deglutitio, & quidem gravissimè, ratione præsentis anginæ multiplicis, seu legitimæ, seu spuria; de quâ fusiùs capite de respiratione, ubi de anginâ sermo erit.

C A P U T Q U I N T U M.

DE ciborum chylicatione, & expulsionem fecum.

QUANDO benè se habent organa digestionis ciborum dicata, & simul benè constituti sunt humores digestivi, prætereaque nulla incusanda est ingluvies aut prava ciborum assumptorum qualitas, tunc sequentia observantur; deglutita alimenta stomacho, ut ita dixerim, æquè grata sunt ac palato, eaque nullum proficiunt incommodum; quin è contrà, corporis vires jam erigunt ab ipsâ assumptione, jamque animi operas simul recreant, ac roborant. Talis est status hominis colentis vitam sobriam, frugalemque præsertim, quem amaræ curæ non mordent; cui,

post pastum paulisper recreari, reliquo tempore exerceri, aliqua veluti religio est.

His omnibus ita se habentibus, intestina ab accepto chymo nè quicquam patiuntur. Coctio in illis recta perficitur, quia in ventriculo rectè fuit incoëpta. Absolvitur deindè bona chyli secretio. Alvus nec pigra est, nec citatior. Non recedunt à congruo fluxu urinæ cibi, chyli & sanguinis; quia tunc succedit animalisatio chyli debita, congruaque coctorum excrementorum sensibilem & insensibilem expulsio. Quibus omnibus indicatur debita corporis nutritio, stipata bono corporis habitu, ut & robore ætati proprio. Quâ de causâ statis horis revertitur appetitus solitus, æquali oblectatione simul & utilitate simili constanter saturandus.

Plura verò symptomata caput extollunt, ubi læditur vel simplex fecum expulsio, tum ubi turbatur digestio assumptorum ciborum; quæ omnia duplici articulo nunc sunt exponenda.

A R T I C U L U S P R I M U S.

SIGNA repetenda ex ciborum coctione vitiatâ.

ASSUMPTORUM ciborum digestionem multâ de causâ turbari notum est. Nempè 1°. vitio ciborum ipsorummet; 2°. vitio potentiarum digerentium; id est, vitio organorum & succorum digestionem famulantium.

Ventriculus, ut & reliquus tubus alimentaris peccare potest multiplici ratione: 1°. propter majorem irritabilitatem, aut sensibilitatem ejus; 2°. propter nimiam laxitatem.

Major eorum organorum sensibilitas & irritabilitas oritur 1°. culpâ nervorum ipsorummet, sicut accidit in hypocondriacis & hystericis; 2°. propter aliquam phlogosim, aut hæmosiam,

qualis existere potest primis graviditatis mensibus, sicut & post recentes mensium suppressiones à terrore inductas in femellis sanguineis ; 3°. propter repetitas irritationes pharmacorum acrium, aut condimentorum aromaticorum, aut alicujus veneni per accidens assumpti ; 4°. occasione ulceris cujusdam gastrici, aut intestinalis ; 5°. affluxu humoris arthritici, vel alterius ; 6°. demùm, effectu alicujus majoris herniæ umbilicalis, aut ventralis. Talium enim causarum efficaciam contingit, ut alimenta molesta fiant statim ab assumptione eorum, indèque nascantur cardialgiæ, ructus acidi, vomitus frequentes aut habituales, dolores capitis sympathici ; vel & quandòque citatior ciborum crudorum devolutio ad intestina, cujus descensus ratione fiunt borborygmi, tormina, alvi fluxus diversi ; tum cacochyliæ, inappetentiæ variæ, cachexia multiplex, debilitas, &c.

Laxitatis ventriculi causæ sunt, 1°. constitutio debilis ; 2°. frequentes digestiones nidorosæ, resolvendis nervis aptæ ; 3°. copiosæ, frequentesque ingurgitationes ; 4°. assidua tepidæ potatio ; 5°. paralyxis ; 6°. equitatio dura & insolita, paulò post pastum ; 7°. meditationes nimix, factæ pleno stomacho. Quæ laxitas semel enata sequentibus malis originem præbet. Nempè percipitur pondus ingratum in stomacho statim à pastu ; ibique non rarò intelligitur sensibile potulentorum fluctuantium murmur. Mox, paulò post pastum sublimantur ructus varii, pro variâ ciborum stagnantium naturâ. Posthâc, chymo ad intestina devoluto (qui vel crudior est, aut variè degeneratus) subsequuntur borborygmi, variaque intestinorum irritamenta ; mox tandem ventriculus acrioribus reliquiis cibariis stimulatus, roditur flatibus acerrimis Quibus singulis symptomatibus relatis aliquandiù protractis, succedere potest habitualis *anorexia*, *apostia*, *dyspepsia*, *bradypepsia*, *aepsia*, necnon *pica* ipsamet,

aut

aut *malacia*, tùm canina fames, & alia mala ex prædictis oriunda.

Turbatur digestio ciborum errore succorum digestivorum, 1º. si illi deficient; 2º. si fuerint vapidi; 3º. si nimis acres.

Deficiunt ii succi propter quascumque evacuationes enormes, tuncque appetitus fermè nullus, dùm sitis è contrà vix compescibilis est; prætereàque urinæ paucæ sunt, simul & flammeæ, summaque percipitur debilitas. Deficiunt etiam per accidens quidam succi, quandò deest eorum excretio, sicut bili sæpè accidit; quo in casu, non solùm turbatur coctio ciborum in intestinis, sed & vitatur alvinarum fecum color & excretio.

Vapiditatis digestivorum succorum causæ sunt, 1º. ingens fibrarum laxitas, seu constitutionalis, seu accidentalis; 2º. cachexia ferosa; 3º. alimenta oleosa, ut & farinosa non fermentata assiduò sumpta, præsertim torpente simul corpore; 4º. demùm obstructio visceris alicujus. Quibus de causis oritur 1º. debilis appetitus; 2º. nulla vel pauca admodùm sitis; 3º. plenitudinis sensus ferè perpetuus; 4º. desiderium acrium condimentorum, ciborumve similium; 5º. satietas à paucò alimento; 6º. coctio admodùm languida, eaque cruda ac flatulenta; 7º. urinæ multæ, pallidæ, ferè inodoræ, & simul alvus pigra; ideòque *urina copiosè de nocte reddita, paucam alvi dejectionem significat*, ex aph. 83 sect. 4: 8º. denique, iisdem de causis accidunt tumores albi, tùm lethalis debilitas.

Acrimonix succorum esurialium causa multiplex agnoscitur: 1º. animalisatio intensior; 2º. usus acrium ciborum & condimentorum; 3º. metastaticus humor prædictis succis mixtus; 4º. cachexia purulenta, syphilitica, scorbutica, aut à febrilibus reliquiis orta; 5º. digestiones acres indè perennatæ. Quibus de causis nascitur desiderium acidorum potuum, sordida siccaque lingua,

averfatio ciborum ex regno animali defumptorum, naufeæ vel vomitus biliofi & putridi; quibus facilè fuccedunt *anorexia*, *apofitia*, dolores colici, diarrhææ biliofæ valdè acres, fanguinis biliofa & putrida conftitutio; tùm pulfus parvus, frequens, & fæpè durus; urinæ paucæ, flammæque & olidæ; tandem febres putridæ, gangrenofæ, corpus citiffimè colliquefacientes, & periculofæ, ex aph. 28 feët. 2.

Quod nunc fpectat digestionis ciborum læfiones quæ creantur vitio ciborum ipforum, eæ pendent ab eorum copiâ nimîâ, vel ab incongruâ qualitate; quæ duo nunc examinanda funt, poftquàm dixerimus quid fit qualitas nutritia cibi in genere, & quotuplex cibi fpecies.

Qualitas nutritia efculentorum generalis, feu natura, una eft. Ea confiftit in partibus mucosis, ac veluti gelatinosis comestibilium rerum, capacibus animalifari. Sed varias fpecies eorum conftituunt 1°. major facilitas quâ eorundem principia nutritia extrahi patiuntur, ac deindè animalifari; quo in cafu efculenta dicuntur *euchyma*. 2°. Copia varia contenti principii nutritii in eodem volumine; undè *analeptica* audiunt efculenta quæ continent multam materiem nutritiam: levia verò, quæ nonnifi minimam habent. 3°. Deniquè, varia copia, durities, aut qualitas rerum fibrofarum, aliarumve adjunctarum nutritiæ parti; quâ ratione cibi dicuntur *dyspepti*, aut periculofi. Dyspepti inquam cibi funt, quando nonnifi difficillimè digeruntur, nec fine præviâ cocturâ, aliâque præparatione. Periculofi verò, qui partibus fui adjunctis nocent, nifi congruo artificio fuerint repurgati, ficut docuit ars aut faltem ufus, etiam apud fylveftres homines. Paucioribus verbis fimilia Hippocrates docuit, lib. de alimento: *alimentum*, inquit, & *alimenti fpecies*, *unum & multæ*.

Nihil ergò verè nutritium eft, nifi id quod in fubftantiam

nutriti capax est abire. Minimè nutritia est pars fibrosa quæ cibo adjungitur , sicut nec partes quædam extractivæ , aut acres , latentes plurimis in cibis. Sed partes extractivæ variæ famulantur saporì : dùm fibrosæ inserviunt expansioni organorum digerentium , tùm digestionì moderandæ , & corporatiõni fecum. Ex quibus datur resolvere cur cibi , ratione variæ qualitatis , aut molis suæ , possint esse esca grata , aut ingrata , aut utilis , aut periculosa variis animantibus : tùm quare cibus , reipsâ cibus sit uni animanti , alteri verò venenum , aut alteri medicamentum. Cibus est , si possit animalisari ab animante assumente : venenum , si nullo modo illud possit mutari , & si è contrâ valeat maximas facere mutationes in illo : medicamentum deniquè , quandò quidpiam in assumente producit præter nutritionem : ex. gr. , si tardiozem citiozemve reddat animalisationem ; tùm , si capax sit sensibiles fibras exstimulare , aut demulcere , &c.

Nunc verò , referatis naturâ & qualitibus ciborum , videamus quomodò ciborum coctio lædi possit , eorum ciborum culpâ. Porro , secundùm ea quæ superiùs dicta sunt , apparet hanc ciborum culpam revocari posse ad eorum copiam , & ad eorum qualitatem variam ; cujus utriusque culpæ effectus seu signa hìc exponenda sunt , designandæque prognoses.

Nempè cibi turbant digestionem ratione copię suæ , si hæc major , vel minor sit ; nam justa quædam cibi copia est , quoad ætates , ex aph. 14 & 17 sect. 1 : quoad tempestates , ex aph. 15 & 17 ejusd. sectionis : quoad morbos acutos , ex aph. 4 , 5 , 7 , 8 , 9 , 10 , 11 , 16 & 19 sect. 1 , jam suprà citatis , ubi de justâ fame.

Signa quæ indicant copiam ciborum esse nimis parcam , hæc sunt : nempè acores biliosi aut nidorosi , foetor oris , sitis magna ,

sensus inanitatis junctus cum magnâ debilitate corporis & animi; tandem extenuatio & marcor. Si junius sit individuum, spectandus defectus evolutionis corporeæ, sicut observare est apud juvenes qui cibo nimis parco vescuntur pro more quorundam Magnatum, pravissimæ consuetudini passim obsequentium: aut pro fatuitate aliquot plebeiorum, quibus honorum habetur Magnatum errores imitari. Hujus ciborum copiæ minoris prognosis sic traditur aph. 5 sect. 1: *in tenui victûs ratione delinquent ægri, ob quod magis læduntur. Quidquid enim contingit, gravius id fit in tenui quàm in paulò pleniori victûs ratione. Idcirco etiam sanis periculosa est valde tenuis, & certò præscripta, ac exquisita victûs ratio, quoniàm errata graviùs ferunt. Eam igitur ob causam, tenuis & exquisitus victus paulò pleniori maximâ ex parte periculosior est.*

Signa verò quæ indicant nimiam copiam ciborum assumptorum esse in causâ cur digestio lædatur, sequentia sunt: nempe sensus alicujus distensionis ventriculi statim à pastu; postea, ructus varii, cardialgiæ, anxietates, vel horrores, vel nausæ, vel leipothymix, vel vomitus: vel & quandòque apoplexia pessima, aut etiam periculosa ebrietas.

Quoad prognosim nimix ciborum copiæ, sufficient notæ sequentes. Generali dogmate docetur aph. 17 sect. 2, *ubi copiosior præter naturam cibus ingestus fuerit, morbum creat; manifesta verò curatio.* Equidem cita curat evacuatio. Secùs verò, præter symptomata actualis indigestionis suprâ allata, ab hinc deindè oriuntur cacochyliæ acidæ, biliosæ, nidorosæ, putridæque, ex quibus permulta alia mala subsequuntur; nempe borborygmi, tormina, diarrheæ variæ, inappetentia, fastidium cibi, obstructions, cachexia varia, tum variæ febres. Quinimò actuali indigestionì acutiora alia pericula quandòque succedunt, præsertim à potu

multo , ex quo rigor & delirium malum esse legitur aph. 7 sect. 7. Sed quid pejus , quàm temulentia quæ stipatur signis relatis aph. 5 sect. 5 , qui hic est ? *si ebrius quispiam subito obdormierit , convulsus emoritur , nisi eum febrisprehendat , aut cum ad horam pervenerit quâ crapulæ solvuntur , vocem recuperet.*

Deniquè , ciborum qualitas valet etiam turbare digestionem. 1°. Si ii sint euchymi apud robustos : dyspepti apud debiles. 2°. Si viru naturali non fuerint purgati , sicut *Manioth Americanorum* , &c. aut si non orbentur parte quâdam extractivâ , beneficio coctionis , qualia sunt portulaca , pisa , fabæ , &c. 3°. Si aquosi apud cachecticos : oleosi , vel euchymi , aut analeptici apud sanguineos , biliososve. 4°. Si tales offerantur febricitantibus , quales vacuis à febre. *Si febricitanti quis cibum exhibuerit , sano quidem robur , ægrotanti autem morbus* , ex aph. 67 , sect. 7. Tum si victus siccus præbeatur præter consuetudinem , tum pueris , tum febricitantibus. Nam , ex aph. 16 sect. 1 , *victûs ratio humida , omnibus febricitantibus , pueris verò maxime , atque aliis qui ita vivere consueverunt confert.* 5°. Si cibi invito gustu eduntur ; nam , ut fertur aph. 38 sect. 2 , *cibus & potus paulò peior , suavior autem , melioribus quidem , sed insuavioribus anteponeendus.* 6°. Si cibi insoliti aut nimis assueti : *quæ à longo tempore assueta sunt , quamvis deteriora insuetis minùs molesta esse solent.* Quare ad insolita etiam facienda mutatio , aph. 50 sect. 2.

Quod spectat prognosim , facile concipitur quòd , propter turbatam digestionem occasione pravæ qualitatis ciborum , debeant eadem circiter mala superaccidere , quàm ab aliis indigestionibus.

ARTICULUS II.

SIGNA ex expulsionē alvinarum fecum repetenda.

QUANDÒ alvinarum fecum evacuatio non recedit à statu naturali, illa semel fit in die, sæpèque iterùm, sine labore nimio, eâ copiâ quæ congruit quantitati simul & naturæ ingestorum, & intermixtis quibusdam flatibus; quâ evacuatione expelluntur materies subfulsæ, cylindraceæ, quarum consistentia nec major nec minor sit, sicut nec odor nimis foetidus.

Necessariæ hujus functionis vitium patet in constipatione alvi, & variis alvi fluxibus. Sed illud patet quoque in variis morbis ipsismet, quandò nempè dejectiones non habent formam naturæ morbi accommodatam. Suus enim est modus in dejectionibus apud ægros, sicut apud sanos, suæque aberrationes. Nunc videndum, quid boni vel mali competat morbis variis, quoad dejectiones alvinas. Deindè deveniemus ad morbos formatos, accidentes in illâ functione.

Generalia signa bonarum egestionum in morbis sic traduntur ab Hippocrate, lib. de prænotionibus: » Alvi dejectio optima » est, si mollis est & consistat, eoque tempore quo per sanitatem dejecti solet, copiâ verò ciborum ingestorum rationi » responderit. Talis enim exitus inferiorem alvum benè valere » declarat. At liquida alvi ejectio ex usu est, si neque stridet, » neque crebrò, neque ex brevibus intervallis excernitur. Fre- » quens enim desidendi labor ægrum fatigat, eique insomniam » affert. Quòd si affatim & sæpè dejecti, periculum est nè » animus deficiat. Verùm pro ingestorum ciborum copiâ, bis » aut ter interdiù, aut noctù semel, dejecti debet, plus tamen » primâ luce, pro hominis consuetudine. Crassiorē autem

» fieri dejectionem oportet , morbo ad judicationem tendente.
 » Sit etiam subfulva , neque admodum graveolens. Lumbricos
 » quoque rotundos cum alvi excretionem prodire , morbo in
 » judicationem tendente expedit. In omni verò morbo ventrem
 » mollem esse , & mediocriter intumescere convenit. Confer aph.
 » 35. sect. 2.

Ibidem , pravæ dejectiones ægrorum ita describuntur : » At
 » valdè aquosum , aut album , aut ex viridi pallidum , aut
 » vehementer rubrum , aut spumans dejici , hæc omnia mala
 » sunt. Præter hæc quoque malum est , quod exiguum , glutin-
 » osum , candidum , ex viridi subpallidum , & læve existit.
 » His verò magis lethalia sunt nigra , aut pingua , aut livida ,
 » aut æruginosa , aut foetida. Varia autem his quidem sunt
 » diuturniora , nihilo tamen minùs exitialia. Hujusmodi sunt
 » strigmentosa , biliosa , cruenta , porracea & nigra , modò
 » simul inter se mixta , modò per vices prodeuntia. Flatum
 » autem sine sonitu quidem ac crepitu exire optimum. Præstat
 » tamen cum strepitu prodire , quàm isthuc revolvi. At qui eo
 » modo prodit , ægrum aliquo dolore vexari , aut delirare
 » indicat , nisi æger suâ sponte hoc modo flatum emisit. At
 » præcordiorum dolores & tumores , recentes quidem & sine
 » inflammatione , murmur solvit circa præcordia ; idque potis-
 » simum si cum stercore , urinâ & flatu prodierit , alioquè ubi
 » ipsum per se transmissum fuerit , juvat , idque magis si ad
 » inferiores sedes descenderit. Ita ille.

Quod nunc spectat morbos in dejectione fecum alvinarum
 accidentes , ii sunt : nempe alvi Suppressio , Diarrhæa , Vo-
 mitus , Ileus , Dysenteria , Tenesmus , Fluxus hepaticus , Fluxus
 coeliacus , Leïenteria , Cholera , de quibus agendum distinctis
 paragraphis.

A L V I S U P P R E S S I O.

SUPPRESSIO alvi, ex nomine suo nota est, eaque distinguitur in accidentalem, & in habitualement.

Hujus mali causæ sunt permultæ, & concipitur eas esse, vel habituales, vel accidentales. Talia sunt 1°. bilis defectus in ductu alimentari, vel insulsa ejus qualitas; 2°. feces insulsæ, quales sunt sæpè ob usum lactis; 3°. ardor viscerum abdominalium, creatus ab hæmorrhoidibus tumentibus aut inflammatis, aut aliâ de causâ; 4°. obturatio recti intestini ob callosum tumorem in ejus tractu vel fine enatum; 5°. sudatio nimia; 6°. immodica venus; 7°. equitatio longa, longaque vectio in rhedâ; tùm longa inter meditandum sessio; 8°. urinæ profluvium, præsertimque nocturnum, ex aph. 83 sect. 4; 9°. liquamen viscosum in intestinis cumulatam, uti solemne est apud melancholicos; 10°. paralytis recti intestini, qualis sæpè fit post contusiones nervorum sacrorum; 11°. glomi vermium, aut retentio nucleorum, pelliumve fructuum, &c.; 12°. dissolutio adeò intima ciborum assumptorum, ut ex iis fex nulla fermè remaneat.

Quandò dejectio alvi dumtaxat retardatur aliquandiù, non morbus est, sed incommodum. Secùs dicendum, si illa habitualis fuerit, aut pendeat à causis insuperabilibus, ex quibus nempè immineant varia symptomata; qualia sunt inappetentia, colici dolores, hæmorrhagiæ hæmorrhoidales, tùm prava nutritio & mala hinc pendentia; undè varia præcipuè prognosis, secundùm varietatem causarum à quibus producit alvi adstrictio. Sed, quoad morbos acutos, generaliter melius est duram alvum habere, quàm liquidioram. Liquida tamen alvus bona in febricitantibus

citantibus , si fortè talis fiat modo critico : rarò autem id advenit ; frequentius est videri ægros à diarrhæis consumptos in decursu febrium ; nihilque capacius ad crises retardandas. Pessima imprimis diarrhæa in morbis pleuriticis ac peripneumonicis gravibus , ex aph. 16 sect. 6.

His adde , quòd apud pueros , lactentes præsertim , adstricta alvus mali sit non rarò ominis. Ex Coacâ 109, *in pueris (illis) acutâ cum alvi suppressione & pervigilio , calces velut jactare , ac colorem mutare , & ruborem contrahere , convulsionem minatur.* Idemque censendum de pueris dentientibus , sicut notatur lib. de dentitione.

§. II.

D I A R R H Æ A.

DIARRHÆA vocatur liquida & frequens alvi dejectio. Quî affectus designat actionem intestinorum peristalticam maximè accelerari , vel occasione vitii alicujus localis sensum intestinorum acuentis , qualia sunt aphtæ aliaye ulcera : vel sæpiùs , propter acriorem quamdam saburram ; seu hæc procedat à cibis malè digestis aut per se acribus , tum à chymo in intestinis degenerante : seu pendeat à vermibus vivis aut corruptis , tum à putredine biliosâ , vel & à materiâ huc appellente , hærente , rodente.

Propter diversitatem rerum excretarum , diarrhæa distinguitur stercoracea , biliosa , serosa , pituitosa , colliquativa , &c.

Symptomata diarrhææ sunt inappetentia , sitis , dolores colici , quandòque tenesmus ; tum urinæ parvæ & turbidæ ; virium prostratio ; tandemque marcor , si alvi fluxus diuturnus fuerit.

Sequentibus signis licet diarrhææ causas agnoscere. Nempè

si illa stipetur ructu, inappetentiâ, cardialgiâ, aut vomitu accidentali, tunc oritur à vitio concoctionis ciborum. Si torminosa sit, eundemque locum dolor constanter occupet, id designat vitium quoddam locale in intestinis, ut phlogosim, ulcus, &c. Si adsit febris continua, incusat putrorem rerum latentium in primis viis, tùm sæpè vermes, præsertimque in febribus autumnalibus. Si verò præcefferit diæta moderata, si nullus dolor fixus, si nulla tormina, si absint læsæ coctionis signa: tunc diarrhæa dependet ab humoribus ad intestina confluentibus, imprimis quandò habitualis est & contingit febri cuidam hecticæ. Exemplo sit diarrhæa colliquativa phtysicorum.

Quod spectat prognosim, diarrhæa quæ accidentalis est, parvi momenti censetur; imò, ex aph. 2 sect. 1, bona est in perturbationibus alvi spontè evenientibus, si qualia oportet purgentur. Bona est etiam in surditate, ex aph. 28 sect. 4; tùm in hydrope, ex aph. 14 sect. 6: itemque raris in crisibus aliis. Ad hæc, sanguinem nigrum hâc via emitti quandòque bonum, ex aph. 25 sect. 4. Verùm plurimis aliis in casibus diarrhæa pessimi ominis est, & pejoris quidem pro varietate adjunctorum, sicut patebit in notis prognosticis mox citandis.

Nigræ dejectiones, qualis sanguis niger, spontè prodeuntes, & cùm febre, & citrà febrem, pessimæ, & quò plures colores dejectionum pravi fuerint, eò pejus. A medicamento autem melius, & quantò plures colores fuerint, non pravi. Aph. 21 sect. 4.

Quocumque morbo incipiente, bilem atram suprâ vel infrâ prodire, lethale. Aph. 22 sect. 4.

Quibuscumque ex morbis acutis, aut diuturnis, aut à vulneribus, aut alio quovis modo extenuatis, bilis atra sanguini atro similis subierit, ii postridiè moriuntur. Aph. 23 sect. 4.

Tabæ detento, superveniens alvi profluvium, lethale. Aph. 14 sect. 5.

Mulieri utero gerenti, si alvus multum profluat, abortionis periculum est. Aph. 33 sect. 5.

Pleuritide aut peripneumoniâ vehementer detento, succedens alvi profluvium, malum. Aph. 16 sect. 6.

In alvi fluxionibus dejectionum mutationes, nisi in prava commutentur, juvant. Aph. 14 sect. 2.

Longo alvi profluvio detento, spontanea succedens vomitio, profluvium solvit. Aph. 15 sect. 6.

De cætero, quædam sunt notabiles observationes circa diarrhæam, quæ etiam habentur in aphorismis respectu juventutis & senectutis; nempè legitur aph. 20 sect. 2: *Quibus per juventutem alvi sunt humidæ, iis senescentibus exsiccantur; quibus verò in juventute siccæ sunt, iis senescentibus humedantur.* Aphorismo autem 53 sect. ejusdem docetur quomodò senes & juvenes se habeant ab alvo liquidiori aut duriori: nempè, *quicumque alvos habent humidas, ii quidem dum juvenes sunt, melius degunt, quàm qui siccas habent; at in senectute pejùs degunt, ipsis enim senescentibus ut plurimum resiccantur, (quia multò minùs edunt.)*

Sed difficile diceretur, quare balbi longo alvi profluvio maximè corripiantur, sicut notatur aph. 32 sect. 6, nisi id fiat: eò fortè quòd balbi plerumquè biliosi sint, imò & atræ bili obnoxii, ut traditum est lib. 2 de morb. popul., sect. 6.

§. III.

V O M I T U S.

ORDINARIUS vomitus nihil est nisi materierum in ventriculo contentarum per superiora rejectio. Sed & aliquandò feces ipsæ alvinæ vomitu rejiciuntur, sicut fit in ileo, de quo postea.

Producitur vomitus à contractione simultaneâ musculorum

dilatatorum pharyngis, tùm ipsius diaphragmatis & muscutorum epigastricorum, necnon actione fibrarum muscularium ventriculi, atque pylori ipsius. Quæ contractio multiplex sympathicè producitur quidem ab irritato potissimùm ventriculo; sed & à multis aliis irritamentis variarum partium.

Vomitum, inquam, [produci à causis plurimis notum est. 1°. Ab irritamento quodam, sensui ventriculi nequaquàm proportionato & vellicante tunicam ejus nerveam, quale sæpiùs latet in cibis nimia copiâ assumptis, aut omninò insolitis, aut diutiùs in stomacho commorantibus: tùm in escis dyspeptis, vitiosis, acribus, austeris, vel cùm repugnantia assumptis. 2°. A stimulatione rerum drasticarum, emeticarum, aut venenatarum per accidens assumptarum. 3°. A vitio ventriculi solius, nempè ab ejus phlogosi, inflammatione, ulcere, aut aphtis; quæ varia, acuendo sensum ejus, faciunt ut res vel mitiores gerant actionem veluti emeticam. 4°. A rebus peregrinis quæ ex intestinis ad stomachum feruntur, qualia sunt bilis, feces ipsæ, vermesque; aut quæ in ventriculum guttatim depluunt, qualia sunt sanguis & pus, quæ fluere possunt ex ulcere ventriculi rodente & carcinomatoso.

Ibi quoque memorandus vomitus ille mirabilis & omninò sympathicus, qui producitur quandò peculiare partes irritantur, nempè fauces, œsophagus, diaphragma, intestina, renes, caputque ipsum, necnon & uterus; tùm ille qui fit efficaciam solius imaginationis, v. g. ab odore vel aspectu rei cujusdam fœdæ & horrendæ, aut quandò quispiam præter consuetudinem vehitur in equo, rhedâ, vel navi, vel & jactatur in fune suspenso; nec omittendus singularis vomitus leipothymicorum, ut & ille qui accidit in primo gradu asphyxiæ mephiticæ, qui idem est.

Prognosis vomitûs varia est pro varietate causæ & symptomatum , simul & pro naturâ materie excretæ. Omnium minùs periculosus , qui ab actuali indigestione oritur ; nam spontè cessat , cibis evacuatis. Talem vomitum sæpè experiuntur recens nati , ex aph. 24 sect. 3. Similisque etiam aliis in ætatibus sæpissimè fit per ætatem , ex aph. 21 sect. ejusdem.

Maximè verò periculosus vomitus qui oritur ab incipiente asphyxiâ , tùm ille qui ab inflammatione aut aphtis ventriculi , sicut & ab ulcere ejus. Malus etiam ille , post quem fit singultus & rubent oculi , ex aph. 3 sect. 7. Pessimusque præsertim ab ileo , ex aph. 10 sect. ejusdem.

Nihilo tamen minùs notari debet , vomitum spontaneum bonum esse quandò supervenit longo alvi profluvio , quod ideò sanari docuit observatio , ex aph. 15 sect. 6.

Deniquè varia vomitûs prognosis est , pro variâ materierum rejectarum naturâ. Malum magnum quandò ex materies sunt æruginosæ , & valdè acres : imò quidpiam lethale habetur , bilem atram vomitu rejici quocumque morbo ineunte , ex aph. 22 sect. 4. Sed prætereà , maximè periculosa vomitio sanguineolenta , aut purulenta. Fit autem quandòque vomitus sanguinis , & quidem gravissimus , non solum à vulnere ventriculi , sed & ab obstructionibus hepatis aut lienis , ad quem explicandum perperàm invocantur *vasa brevia* dicta , Riolani exemplo. Nam hæc vasa nullam habent communicationem cum cavitate ventriculi , sicut demonstratur apud Winslowium : necnon & nuperius demonstratum fuit ab Hallero , qui hanc viam fictitiam vocavit. Fit deniquè vomitus purulentus ex rupto abscessu ventriculi , & ex ulcere ejusdem.

Quandòque tamen vomitus innocuus accidit mulieribus post totalem cessionem fluxûs menstrui , quem natura imitatur

viâ vasorum exhalantium in stomacho ; quapropter , *mulieri sanguinem evomenti , menstruis erumpentibus solutio fit* , ex aph. 31 sect. 5.

§. IV.

I L E U S , seu V O L V U L U S .

IL E U S , aliter volvulus dictus vel & *chordapsus* , aut passio iliaca , vernaculè *miserere* , est affectio in quâ æger exactissimè constipatur , enormesque patitur colicos dolores , & aliquandò tandem per vomitum rejicit omnia in intestinis ipsismet contenta.

Nascitur hic affectus 1º. ab impactis materiebus quibuscumque in fine ilei aut in colo ipso , quales sunt feces , tum nuclei pellesque fructuum , aut vermes , aut quorum occasione ileus aliquandò fit per autumnum , quo tempore eum sæpè accidere notavit Hippocrates aph. 22 sect. 3. 2º. A tumore steatomatoso intestinorum , aut enato in partibus vicinis. 3º. Ab intestinorum strangulatione , ob subingressum partis superioris in inferiorem. 4º. Ab herniâ intestinali strangulatâ. 5º. Demùm , à constrictione accuratâ intestini alicujus tenuis , occasione irritationis & inflammationis quam ibi creavit acre quoddam drastrictum.

In hoc autem affectu non illicò cohibentur materiæ , nec omnia symptomata illicò accidunt ; ea fiunt pedetentim , ita ut aliquandò alvus tantùm constipata videatur per tres quatuorve dies. Ast , postquàm certo tempore suppressa fuit alvus , superveniunt tormina , iliacusque morbus quàm proximè imminet. Tunc tensio dolorifica percipitur in parte quâdam , quæ tactu magis dolet ; tuncque , paulatinâ motûs peristaltici inversione , contenta refluent ad ventriculum usquè : & , si vomitus non

statim fiat, nausæ saltem accidunt, aut singultus, aut cardialgia, vel & ipsa syncope. Quibus in circumstantiis prosteruntur vires, atque etiam extrema plerumque frigent, sudore frigido ut plurimum simul erumpente.

Præsens morbus nullo negotio dignoscitur ex signis in ejus definitione suprâ recensitis. Prævidetur autem imminens, ex alvi adstrictione torminosâ, accedente meteorismo aut subfultibus singultuosis. Tandem accedit vomitus, qui nonnisi in exitialibus ileis fit; & si ille vehementius distorqueat ægrum, tunc stercus superiora petit, singultusque evadit apertus; imò & quandòque desipientia & convulsio (consentiente scilicet nervorum principio cum affectione stomachi), tùm multa alia hinc oriunda mala. Si dolor fixus in parte quâdam permanferit diutius: si torminis sensatio percipiatur quotiès & quandiù materiæ per illum transfluunt locum, tunc ileus probabiliter pendet à tuberculo, aut alio quolibet vitio topico. Si ab herniâ, facile cognoscitur. Verùm si febris adsit essentialis, ab inflammatione oritur ileus; sicut apparet eum fieri à fecibus, si quibusdam diebus prægressis tardata fuerit alvus; aut à vermibus, si verminosus sit æger, anteaque vermes complures cacaverit.

Morbus hic est per se periculosus. Hinc enim non solum depravatur aut aboletur chylosis, verùm etiam semper imminet inflammatio in gangrænam facile propensa. Si tamen induratae feces, nuclei, vermes aut hernia eum creaverint, levisque causa videatur, non pauca spes. Contrà, ileus ortus à tuberculo, inflammatione, subingressu, gravior est: ab ulcere calloso, cancroso, gravissimus. Si verò vomitus rarus, vires valentes, externa non frigida, pulsus benè constitutus, curatur: si è contrà, nulla fermè spes. Si materiæ foetidissimæ, fecesque alvinæ evomantur, maximum periculum; & contrà, minus.

Bonum autem & salutare signum, si symptomata remittant, alvusque resolvatur; adeoque optimum, si æger commodè desiderit. Minimè fidendum derepentinæ fecum expulsionì, sine ullis aut saltem sinè gravibus torminibus accidenti; nisi pulsus & vires interim benè valeant, prædictaque expulsio per aliquot dies duraverit cum levamine. Quandòque enim omnia brevè recrudescunt: siquidem gangrena dolofo latens cinerì paulisper serpit, ideòque æger ruit in pessum ac extinguitur. Ex quibus omnibus prognosibus patet, quare *ab ileo vomitus, aut singultus, aut convulsio, aut delirium, malum*, sicut docetur aph. 10 sect. 7. Nam ibi prava referuntur signa quæ accidunt in ileo exitiali.

Sed non adeò facilè concipitur quare, ex aph. 44 sect. 6, *quibus ex stranguriâ volvulus accedit, intra septem dies moriantur, nisi febre accedente, copiosa urina effluat*. Sic natum volvulum neque vidi, neque visum fuisse audivi. Si tamen talis fortè appareret, putarem eum fieri propter inflammationem aut hæmostasiam vesicæ serpente ad intestina, feces indurantem, sicque ilei creandi capacem. Quâ hæmostasiâ aut inflammatione non resolutâ, periret æger intra septem dies, tum propter urinas retentas, tum propter sequelas lethales ilei. Sed, si febris tunc accederet & flueret urina copiosa, hæc mihi indicarent liberatam vesicam, liberataque proindè intestina. De cætero, Galenus ipse hæsitavit circà sensum hujus aphorismi; neque ausus est dicere, an germanus esset.

DYSENTERIA.

DYSENTERIA, seu difficultas intestinorum malè visa fuit à Veteribus tanquàm pendens ab exulcerationibus intestinorum, sic frequenti effectù dysenterix perperàm accepto, pro dysenteria ipsâ.

Dysenteria est alvi fluxus semper torminosus, plerùmque magis vel minùs cruentus, sæpè cum febre satis magnâ; quandoque sine febre, saltem per initia morbi.

Malum illud mihi videtur pendere ab affectione erysipelatosâ, magis vel minùs gravi superficiei internæ intestinorum præprimis gracilium; cujus occasione ita acuitur sensus eorum ut tormina sæviora excitentur à materiebus per hæc loca transfluentibus, & ut hæc tormina constituent essentielle signum hujus morbi, sicut dolor lateris pungitivus est signum inseparabile à pleuritide.

Quæ affectio interioris membranæ intestinorum plerùmque ferè nascitur spontè ob dispositionem erysipelatosam individui, absquè quòd saburra valdè acer necessaria sit ad illam producendam; tunc sufficiente naturali fecum acrimoniâ ad dolores excitandos, propter adauctum sensum in intestinis. Verumtamen si dysenteria, ferè immunis à saburrâ præexistenti, neglecta fuerit aut perperàm tractata, aut si fuerit ab assumptis cibis irritata: tunc dejectiones brevì evadunt sanguinolentæ, brevìque subnascitur saburra magna eaque acerrima, cujus morsu morbus acuitur, succedente ut plurimùm febre admodùm putridâ & gangrænosâ, valdè lethali.

Quæ dysenterix exacerbatio minimè mirabilis videbitur, si attendatur ad frequentiam phlæctænarum quæ erysipelati, etiam

externo accidunt, & quæ in intestinis sunt forsan faciliores ob spurciciem loci, tum propter tenerrimam membranæ villosæ naturam. Porro phlictenas illas, magis vel minus latas, facilimo negotio lacerari quasi visibile est; adeoque intelligitur quare gangræna tam citò quandòque accidat, imò & sphacelus, quandò saburra biliosa acerrima & copiosa adest, unâ cum biliosâ constitutione ægrotantis in putredinem valdè pronâ: Quare verò in casibus mitioribus, ac ferè ordinariis, tantummodò contingat effluvium sanguinolentum quo dejectiones cruententur magis vel minus, pro latitudine scilicet excoriatarum phlictenarum, simul & pro acutie irritationis huc attrahentis proportionatum affluxum sanguinis & humorum aliorum. Hincque intelligitur, quomodò dejectiones brevi tempore evadant cruentæ in dysenteriâ, quamvis sub initiis morbi tales non sint.

Ex prædictis pariter concipitur, quare febris ut plurimum absit ab incipiente dysenteriâ, nisi hæc celeri passu iverit in augmento suo; quare verò tandem ea accendatur, si morbus negligatur & sævior evadat; tum quare putridum deniquè induat characterem, ubi dantur evidentissima signa gangrænosa. Nec alio modo, ut opinor, nascuntur dysentericæ illæ castrenses adeò lethales, nisi quia tunc viget biliosa constitutio putrida, aut vulgaris methodus medendi huic morbo non valet avertere tantum periculum; tum quia exindè nascitur foetidas cadaverosa, capax spargere contagionem febrilem quæ adjungitur dysentericæ dispositioni & efficit morbum pessimè complicatum.

Prædicta dysentericæ aitiologia nobis indubia videtur, 1º. ex eventu felici medelæ ad illam accommodatæ; 2º. ex eo quòd dysenteria popularis non grassetur nisi vigente constitutione biliosâ, præsertim post tempestates siccas, ex aph. 16 sect. 3; tum autumno,

ex aph. 22 sect. ejusdem: potissimumque, ut nobis apparet, quandò æstas præcedens valdè fuit tonitruosa. Quibus nempè temporibus regnare simul solent externa erysipelata, tùm icteri, necnon & febres biliosæ, tàm intermittentes quàm continuæ; præsertimque apud juvenes & viros, quibus dysenteriam magis familiarem esse notatur aph. 30 sect. 3.

Nasci etiam dysenterias populares in fine hyemis & adventante vere, non inauditum est. Sed eæ pertinent ad effectus constitutionis biliosæ extensæ propter tempestatis irregularitatem, de quibus casibus agitur aph. 11 & 12 sect. 3; eæque dysenteriaë semper sunt mitiores quàm per autumnum, quia jam debilitatur constitutio biliosa quæ est causa earum.

Pariter certum est oriri quandòque dysenterias accidentales & sporadicæ, propter accidentalem nuditatem intestinorum faciei internæ; qualis nuditas fit sæpè occasione superpurgationis; qualis etiam fit post alvi profluvium, sicut notavit Hippocrates aph. 77 sect 7, qui jam ibidem scripserat aph. 23, dysenteriam quoque nasci ex sinceris dejectionibus.

Symptomata dysenteriaë varia sunt pro vario tempore morbi & ejusdem gradu vario, eaque paulò longiorem discussionem requirunt propter morbi hujus gravitatem, simul & obscuram opinionem quæ de illo passim habetur. Nempè, si dysenteria sit adhuc potius imminens quàm formata; id est, si incipiat tantùm adaugeri sensus intestinorum propter nascentem ibi phlogosim: tunc adsunt tantùm fluidæ quædam dejectiones copiosiores & stercoræ, magis vel minùs torminosæ, sed non adhuc cruentæ. Quæ conditio durat aliquot horis, magis vel minùs, pro celeritate morbi adventantis.

Sed dysenteriaë jam incoeptæ & formatæ alia sunt symptomata. Cùm jam detur inflammatio erysipelatosæ formata, ideòque

sensus acutus intestinorum tenuium (in quibus plerùmque sedet affectio hæc), acutior adhuc evadat: tunc temporis jam primò ingravescunt tormina, sedentia præsertim circà umbilicum ubi convoluta sunt intestina prædicta. Deindè, superficies intestinorum phlicænæ probabiliter affecta, facillimè vulneratur phlicænæ illis abrasis; & indè fit, ut sanguis exstillet magis vel minùs copiosus, quo mediante dejectiones plus minùsve tingantur.

Consequenter tormina ingravescunt per augmentum dysenterix, iisque ad crassa intestina quandòque delatis, verus quandòque adjungitur tenesmus. Prætereaque dejectiones fiunt frequentiores, liquidiores, magis sanguineolentæ, foetidiores, sæpèque sanguinem purum mentiuntur: contingente simul maximâ prostratione virium, & febre majori. Quo tempore, si dysenteria gravior sit (vel si neglecta aut perperam tractata ingravescat admodùm), superveniunt symptomata febris putridæ: præsertim, si constitutio popularis inclinaverit multùm versùs putrorem; vel &, vigente interim maximâ febre maximâque prostratione virium, dejectiones torminosissimæ fiunt pro tempore; quo brevi elapso mitiores evadunt, tandemque indolentes. Sed illis induciis non fidendum; tunc enim dejectiones stipantur odore cadaveroso, sæpèque formidatissimo singultu, necnon frigore extremorum: quibus certissimum habetur gangrænæ lethalissimæ indicium.

Quoad *statum* dysenterix, ferè nullum distinguere est, si tempore augmenti jam accesserit gangræna, signis suprà relatis agnoscenda. Tunc enim ægrotantes brevissimè intereunt; ideòque fit, ut in ipso morbi augmento veluti habeatur status ejusdem, imò & terminatio, nempe mors. Sed si dysentericum erysipelas non pendeat ab humore valdè acri, vel si illud medelâ

congruâ paulisper cicuratum fuerit: tunc conceditur huic morbo *status* notabilis, imò & satis quandòque longus, ut longissimus dici possit. Quo labente tempore, dejectiones manent semper torminosæ & frequentes; sed ex tunc sunt magis serosæ, & semper foetidiores quàm in augmento, earumque color sanguineus dilutior sensim evadit, imò quandòque deletur. Sic procedente malo, quousquè tandem declinatio illucescat sub torminibus mitigatis, dejectionibusque sensim tardatis ac paulisper inspissatis.

Tunc datur tempus declinationis, quo labente, resolutio erysipelatis intestinalis contingit & symptomata pedetentim pacantur. Sed si induciæ illæ, quæ apparuerunt in fine statûs morbi, non ducant ad felicem resolutionem, tunc accidit suppuratio valdè tædiosa valdèque chronica, uti competit erysipelati suppurato; exindèque dejectiones fiunt evidenter purulentæ, plus vel minùs, pro latitudine ulceris; & prætereà, consequentiæ multæ subsequuntur, exque dolosæ admodùm. Nempè chronicus alvi fluxus purulentus, qui aliquandò quidem curatur; sed qui sæpiùs abit in veram febrem hecticam aut in ascitem: adeòque morte inevitabili sæpiùs terminatur.

Prædicto modo solet procedere dysenteria si gravissima sit, si neglecta fuerit ab initio aut perperam tractata. Sed ex praxi meâ compertum mihi est illam minimè affectare moras adeò longas, eamque paucorum dierum spatio feliciter plerùmque terminari beneficio resolutionis; dummodò ipsi occurratur, prout ex prædictâ aitiologiâ intelligitur à Medico attendenti.

Quod spectat dysenterię diagnosim, morbus patet ex dejectionibus torminosis sæpiùsque simul cruentis. Quæ tormina sævire magis solent circà umbilicum, quia ibi sedent tenuia intestina in hoc morbo præprimis affecta. Indèque fit, ut illa

tormina sævitiem suam exerceant paulò antè quàm singulæ accidant dejectiones : quamvis tamen , malo ad inferiora intestina aliquandò serpente , tormina illa totum abdomen torqueant , eaque etiam statim antè dejectiones eveniant. De cætero , quì perspecta habuerit diversa diversorum hujus morbi temporum phænomena , facilè quoque judicabit quodnam eorum temporum percurratur.

Sicut dysenterix symptomata & diagnosi merentur attentiones peculiare , ita & prognosis : nam planum est prognosim variam esse , pro vario morbi stadio & intensitate. Quoad varia stadia , licet dicere in genere , quòd dysenteria incipiens facillimè ut plurimùm persanetur , si ea debelletur quantociùs ope congruarum venæ sectionum celeriter celebratarum , & quousquè tormina fermè deleantur ; adhibito simul potu quàm copioso & demulcente , qualis est aqua vitulina pro omni cibo assumpta , quæ & ibi forsan gerit vices conductoris electrici. Ad quod opus perficiendum , utilissimum quidem est exhibere radicem brasiliensem , semel atque iterùm pro re natâ , quandòque & potiones rhabarbarinas ; sed attendere oportet , quòd eo dumtaxat tempore id faciendum sit , quo tormina jam fermè pacata ac deleta sunt. Secùs radix illa , quantumvis decantata sit , nocet admodùm , sæpiùsque benignam dysenteriam facit degenerare in malignam. Item cane & angue pejora censemus clismata omnia , sicut & medicamina oleosa , tùm opiatia. Neque , ut opinor , originem aliundè trahit malignitas , letalitasque summa quarundam dysenteriarum epidemicarum. De cætero , *dysenteria , si ab atrâ bile ortum duxerit , lethalis* , ex aph. 24 sect. 4.

Prognosis dysenterix in augmento positæ non adeò benigna est , si incipiens fuerit neglecta aut perperam tractata. Plerùmque

tamen in juvenibus aliundè sanis , morbus hic quantumvis aliquandiù neglectus , potest adhuc curari , sed paulò difficiliùs , beneficio rerum suprà indicatarum. Nihilominùs , bonum hunc eventum minimè obtineri fas foret , si maxima ad gangrænam daretur dispositio. Nam his in circumstantiis brevì conclamatum est de ægro ; indèque apparet , quare dysenteria perperàm tractata sub initiis suis , sit quandòque lethalißima : imò & aliquo modo pestilens habita fuerit à quibusdam.

Periculosissima quoque prognosis , quandò dysenteria statum suum percurrit cum pravis signis. Hìnc enim metus est , nè ad minimum superveniat suppuratio faciei interioris intestinorum , quæ difficillimè sanatur. *Ex diuturno partium circa ventrem dolore , suppuratio* , inquit Hipp. aph. 22 sect. 7.

Iisdem de causis , dysenterix abeuntis pessima quoque prognosis est , quandò præteriit alia stadia sua cum malis signis. Tunc equidem , si gangræna devitetur , incidere est in suppurationem , quæ valdè chronica & periculosa est etiamsi levior foret : & quæ aliquandò ita rodens est , ut brevì mortem accersere valeat ; undè patet ratio cur , ex aph. 26 sect. 4 , *dysenteria vexato , si carunculæ ejiciantur , aut dejectiones nigræ , lethale sit*. Sed quandò dysenteria in longum dumtaxat trahi videtur , non apparente evidenti signo suppurationis , hìnc metuendum est , nè tandem deperdatur appetitus simul & chylosis , & nè oriatur cachexia lethalis quæ febre lentâ stipetur ; proindeque , ex aph. 3 sect. 6 , *in longis dysenteriis , cibi fastidia malum denunciant ; & si accidunt cum febre , pejus*. Neque tunc periculum minus , *si dysenterix leïenteria succedat* , ut monetur aph. 78 sect. 7.

Prognosis consequentiarum dysenterix liquidò jam constat ex prædictis. Quis dubitare posset de morte *ascitici* aut marasmodei hominis , ita affecti post toleratam longam dysenteriam ?

Terminabimus has notitias de dysenteriâ, memorando quamdam speciem dysenteriae quam Græci *aimateran* passim vocârunt, quæ sæpissimè critica est in chronicis malis, & quam in febre biliosâ criticam quoque aliquoties ipse ego observavi. In hoc consistit dysenteria illa, quòd tunc fiat cruenta excretio sanguinis per intestina, sicut per uterum mulieribus, quibusdam per nares, nonnullis per hæmorrhoidas: sic naturâ expurgante vitium gravioris mali, sub specie sanguinis magis vel minùs nigri & copiosi, sæpè etiam pici liquidæ simillimi. Undè intelligitur, quare & quomodò *lienosis accedens dysenteria, bono sit*, ex aph. 48 sect. 6: sicut etiam *à furore dysenteria, aut hydrops, aut vehemens mentis alienatio, bono est*, ex aph. 5 sect. 7. Quare demùm, ex aph. 43 sect. 6, *lienosis qui dysenteriâ corripuntur, si longiùs protrahatur dysenteria, hydrops, aut lævitas intestinorum superveniat, & moriantur?* Sicut expressè quoque notatur coacâ 466.

§. VI.

T E N E S M U S.

TENESMUS dicitur assidua & inanis cupiditas egerendi quâ nihil egeritur, præter modica cruenta, vel mucosa, quandòque & purulenta.

Multa symptomata dysenteriae similia infert tenesmus, sæpè eandem causam & dispositionem obtinens, nisi quòd in tenesmo vehementiores sint nixus. Sed ii affectus loco discrepant, cum dysenteria sedeat quandòque in cunctis intestinis, recto non excepto; tenesmus verò, nonnisi in hoc eodem.

Variae tenesmi causæ agnoscuntur; nempè 1º. phlogosis recti intestini, de genere dysenterico; 2º. locales intestini recti irritationes, factæ ab ascaridibus, à pure huc affluente, vel & occasione

occasione calculi vesicarii, &c. 3^o. hæmorroïdes tumentes, aut inflammatae.

Tenesmus plerùmque symptoma est diarrhææ, dysentericæ, calculi vesicæ, aut stranguriæ. Sed aliquandò idiopathicus est, sicut sæpè contingit grassante dysenteriâ; quo scilicèt tempore plures ægrotantes tenesmo dumtaxat tentantur, qui tamen neglectus dysenteriam plerùmque invehit.

In genere, morbus hic ex se satis levis est. Sed cùm eadem habeat pericula ac causæ à quibus pendet, periculosus est si ortum duxerit ab aphtis, à dysenteriâ inveteratâ: præsertim, si febris ipsi accesserit, tùm abscessus, aut fistula, aut gangræna podicis.

Ad hæc, *mulieri in utero habenti, tenesmus superveniens abortum, facit*, ut legitur aph. 49 sect. 5.

§. VII.

FLUXUS HEPATICUS.

FLUXUS hepaticus est alvi fluxûs species, in quâ materiæ liquidiores atque frequentiores ejiciuntur, & prætereà tinctæ sanguine diluto, aquoso, & loturæ carniū recentium simili, sine dolore, sine torminibus, aut saltem sine ullo dolore vivido.

Producitur hic morbus 1^o. à dysenteriâ degeneri; 2^o. ab affectibus melancholicis inveteratis; 3^o. à scorbuticâ sanguinis diathesi.

Equidem, dysenteria quæ abit in suppuratum, quandòque relinquit ulcera chronica aut aphtas, quibus malè deterfis & assiduò irritatis ab a'imenti saburrâ copiosiore, exsurgunt carnes fungosæ, multo sanguine refertæ, parùm dolentes, attactu levissimo lacerandæ; à quibus effluit sanies sanguinolenta multa, quæ diluit coloratque feces alvinas.

Quandò autem sanguis melancholicus hæret in radicibus venarum portarum propter resistantiam oblatam ab hepate obstructo, tunc fieri possunt *hæmostasæ* & varices in tenuibus intestinis; quibus laceratis, sanguis distillaturus erit paucâ quidem quantitate simul, sed læpè repetitâ aut ferè perpetuâ; copiosâ indè sanie simul affluente.

Demùm, à scorbuto confirmato nascuntur erosiones variæ variis in partibus texturæ delicatoriis, sæpiùsque ideò in intestinis. Quo in casu, facilè concipitur quòd his erosionibus per labentes feces acres abrasis, necessariò effundatur saniosus sanguis, quo dejectiones eliquentur atque tingantur.

In omni fluxu hepatico, sanguis colore dilutissimus fluit saltem per intervalla, si non continuò; qui sanguis, modò quantitate majori adest in dejectionibus, modò minori, modòque cum pure aliquo permixtus. Quandòque etiam pus sincerum interim apparet, aut cum fecibus alvinis permixtum. His signis, facile est fluxum hepaticum agnoscere.

Quoad causas dignoscendas, facilè quoque ediscitur nùm dysenteria neglecta præcefferit, nùmve ægrotans sit atrabiliaris confirmatus, nùmve acrimoniâ scorbuticâ imbutus?

Hepaticus fluxus morbus est chronicus admodùm, difficilissimus curatu, atque etiam insanabilis, nempè pro causarum ejus naturâ & dominio. Brevi marcor, marasmus & virium exolutio ei superveniunt, nisi fortè profligari possint vitia à quibus pendet.

§. VIII.

C H O L E R A.

C H O L E R A seu cholera morbus, gallicè *trouffe-galant*, est affectus in quo contenta in ventriculo & intestinis fursùm ac

deorsum eodem tempore rejiciuntur, concomitantibus angoribus maximis & summâ debilitatione.

Creatur terribile hoc malum propter acrimoniam specificam, eamque maximam, quâ forsan bilis præsertim cystica corripitur, sicut & cæteri succi tam gastrici quàm intestinales; quæ acrimonia potissimum gignitur apud biliosos in fine calorum æstivorum, præcipuè quandò hæc tempestas valdè sicca fuit & calida, simulque admodum tonitruosa. Et hæc est ratio, cur malum illud tunc temporis popolare aliquandò evadat per autumnum, affligatque imprimis mediam ætatem, ut docetur aph. 30 sect. 3. Sed similis acor deleterius choleram creans, aliundè quoque nascitur alio in tempore sicut & in ætate aliâ, nempe ob errores graves in diætâ aut in exercitiis, vel & ob assumptionem venenatarum quarundam rerum.

Hoc in morbo, qui omnium ferè magis præceps est, adsunt symptomata multa, eaque gravissima. Nempè singultus ferè perpetuus, cardia'gia, leipothymia, syncopes, sitis ingens, frigus extremorum, imò & corporis totius albor, summa prostratio virium, faciei livor horribilis; tum spasmi valdè crudeles, qui varios musculos infestant, potissimumque tibiales & femorales. Quibus omnibus accidentibus mors cita supervenit, nisi citò occurratur.

Nihil magis empyrismum & incertitudinem redolere mihi videtur, quàm vulgaris praxis Medicorum in hoc debellando morbo. Sed experientia triginta annorum mihi comprobavit, choleram citò sanatum iri intrâ viginti ferè quatuor horas, mediante ingenti admodum copiâ aquæ levis vitulinæ, quasi urceatim eporæ, quâ mirabiliter averruncatur atque deletur acor cholericus. Aretæus primus fortè fuit qui aquam consuluerit in hoc morbo. Sed indigna suâ profert, ubi de illo auxilio

loquitur; neque ab eo Medico illud proponitur tanquàm medela præsentissima & per se sola sufficiens. Sydenhamus mentionem expressiorem fecit de eodem medio, cui in fine adjungit aliquod paregoricum. Sed eo ultimo medicamine rarissimè usus sum; mihiq̃ue videtur, aquam ibi gerere vices conductoris ad dimovendam acrimoniam electricam bilis, quæ resinosa propemodùm facta est efficaciam æstatis valdè calidæ & siccæ, undè potus ille per se solus sufficit. Sed si quispiam, exemplo Sydenhami, uti vellet paregoricis, caveat nè citiùs adhibeantur. Tunc enim nocerent, suspendendo evacuationes, ac proindè impediendo aut retardando integram miasmatis cholero-electrici extinctionem & expulsionem.

§. IX.

L E I E N T E R I A.

L E I E N T E R I A, levitas intestinorum perperam dicta (quasi æquabilis facta fuisset superficies intestinorum), est alvi fluxus in quo non solum materiæ fecales per anum egeruntur, sed & assumpta haud mutata, aut leviter dumtaxat.

Patet in hoc morbo graviter turbari ac impediri coctionem ciborum, & reipsà adesse *aepsiam*, magis vel minùs completam. Quod fieri quidem potest, tum propter Trimalcioneas comeestiones & abusum ciborum dyspeptorum; tum propter febres longas, & obstructions indè oriundas. Sed sæpiùs leïenteria accidit, quandò vires à morbo gravi prægresso exhaustæ fuerunt; præsertim, si morbus ille affecerit organa ciborum coctioni vacantia. Hæc ratione solemne est leïenteriam superaccidere hæcticis, aliisque ægrotantibus longo morbo exhaustis: sed illam præsertim succedere dysenterix malè terminatæ, ex aph. 78 sect. 7. Nec aliâ de causâ leïenteria frequentior accidit per

autumnus quàm per alias anni tempestates , sicut notatur aph. 22 sect. 3 : nisi quia autumnus dysenteriis epidemicis perquàm obnoxius est , ex eodem aphorismo. Interdum etiam leïenteria sequitur pulmonum vomicam , vel abscessum abdominis , vel pectoris aut renum suppurationem , certissimo ægrotantis periculo.

Diagnosï leïenterix patet in cibis sincerâ sub suâ formâ egestis. Quòd verò spectat prognostica hujus morbi , hæc sunt : Si morbus iste homini adhuc juveni accidat ob intemperantiam aliquam , vel propter abusum pharmacorum purgantium , sat feliciter potest curari , mediante diætâ eûchymâ , analepticâ , parcissimâque , additis pharmacis roborantibus. Quæ curatio dum tentatur , etiam leïenteria jam longâ existente , si ructus acidus qui antea non adfuit accidat , bonum est signum , ex aph. 1 sect. 6 ; nam indicat jam inchoari coctionem ciborum , quæ prius nulla fiebat. Cæterum , leïenterix solent in tabem desinere , & hic eventus sequentibus signis præfagitur ; nempe spirandi difficultate & pectoris morfu , ut probat experientia. Adde quòd leïenteria nunquàm magis lethalis sit , quàm dum sequitur longam diarrhæam , longamve dysenteriam ; tum illa quæ accidit lienosis post longam dysenteriam , nam omninò lethalis est , ex aph. 43 sect. 6.



CAPUT SEXTUM.

DE viis per quas chylus ad sanguinem vehitur.

NATURALEM chyli secretionem, ejusque traductionem ad sanguinis oceanum exerceri judicatur ex tranquillâ digestionem ciborum, quæ soliti appetitûs & pulsûs congrui impiger pedisequa sit. Sed probatur præsertim ex perennitate virium, simul & boni appetitûs constantiâ; tùm imprimis ex abdominis detumescentiâ ac mollitie, quæ contingunt aliquot horis elapsis post pastum. Quibus signis addatur debita fecum alvinarum consistentia, moles & color.

Secretionem verò chyli perturbatam indicat & producit 1°. diarrhæa, sicut & aliæ alvi fluxûs species; 2°. habitualis digestio viscosa, quam insequitur adstrictio alvi simul & intumescencia abdominis, sicut præcipuè observatur apud strumosos; 3°. bilis & nutritionis defectus; 4°. debilitas & marcor; 5°. obstructions mesenterii; 6°. labefactatio tunicæ interioris intestinorum ob dysenteriam suppuratam. Quæ omnia signis suis, tam diagnosticis quàm anamnesticis, faciliè innotescunt attendenti.

Prognosis impeditæ secretionis chyli spectat causam illius. Sed facile est agnoscere, marasmm lethalem spontè enasci quandò functio illa gravem læsionem aliquandiù patitur; & quòd, vel minor læsio ejus, semper malum sit periculosum.



C A P U T S E P T I M U M.

D E C H Y L I N A T U R A.

BONA chyli natura & constitutio indicantur congruo statu abdominalium viscerum, optimâque sanguinis & humorum idiosyncrasiâ, quibus fovetur bonus habitus corporis, congruaque ejus nutritio.

Verùm chylus in qualitate suâ mucosâ & saccharatâ læditur, duplici potissimùm de causâ, 1^o. si crudior sit, 2^o. si nimiùm acer.

Chylum crudiores generari observatur præsertim apud pueros, necnon homines segniorem vitam degentes, præcipuè si utantur cibis dyspeptis; tùm apud virgines debiles; ut & apud pauperes; non omissis artificibus loca humida, vel halitu acido referta habitantibus, quales sunt fabricatores cerevisiarum, &c.

In illis qui ita affecti sunt apparent sequentia signa: 1^o. familiaris langor famis & sitis, nisi pro rebus valdè fragrantibus; 2^o. habitualis plenitudinis sensus; 3^o. frequens cardialgia, & eructationes saporem ciborum assumptorum imprimis referentes; 4^o. urinæ pallidæ; 5^o. feces acidum spirantes, imò & quandòque fudor ipse; 6^o. debilitas corporis; 7^o. cachexia humida; 8^o. obstructions viscerum, aliæque ex prædictis oriunda mala. Sed ii homines difficillimè laborant morbis inflammatoriis, nisi catharalibus ad summum.

Quoad acrimoniam, chylus dicitur de illâ quidpiam habere, quoties notabili qualitate acidâ aut nidorosâ intinctus est; tùm quandò massa humorum imbuta est acrimoniâ quâcumque, qualis est ex gr. scorbutica, impetiginosa, &c. Eæ

Eæ acrimoniæ suis signis dignoscuntur. Acrimoniam scilicet acidam designant, 1°. ructus acidi, quibus *soda*, gallicè *fer-chaud* sæpè adjungitur; 2°. desiderium aromaticorum, dùm acefcentia abhorrentur; 3°. tormina frequentia, sæpèque morbi pruriginosi.

Nidorosam verò acrimoniam declarant, 1°. ructus nidorosi; 2°. sitis sæpè magna; 3°. appetitus dejectus, præsertim ergà cibos animalis regni; 4°. desiderium acidorum; 5°. diarrhææ biliosæ foetidiores; 6°. debilitas, ob ineptitudinem ad nutriendum; 7°. urinæ sæpè graveolentes sæpiùsque nimis parcæ; tùm febres putridæ & gangrenosæ.

Impetiginosa demùm acrimonia indicatur per impetigines habituales, variasque cutis maculas prosapiæ illius. Scorbutica verò innotescit digestionibus valdè turbulentis, lassitudinibus aut anhelationibus spontaneis, tumore atque graveolentiâ gingivarum, tùm maculis nigris & indolentibus quæ erumpunt imprimis suprà tibias, aut crura.

Cæteræ autem acrimoniæ possunt etiam observari, quales præsertim creantur ab humoribus metastaticis aut à reliquiis morborum, sicut Medico licet judicare pro Marte suo. Sed de illis pauca dicemus capite nono.



CAPUT OCTAVUM.

DE SANGUINE ET EJUS NATURA.

QUOTIESCUMQUE sanguis ita constitutus est, ut cruor bonus adsit in quantitate congruâ, illeque potius redundet quàm deficiat; toties datur laudanda sanguinis constitutio seu natura perfecta; qualis putatur esse apud homines benè valentes ætatis mediæ, præcipuèque juvenilis.

Multis verò de causis nequit ille bonus status sanguinis perennare in omnibus hominibus variam ætatem agentibus. Mutationes hâc occasione contingentes in eorum corporibus, faciunt ut suus sit status seu idiosyncrasia, vel constitutio sanguinis pueritiæ simul & adolescentiæ: suus juventuti: tum virilitati & senectuti suus; qui singuli competunt variis functionibus singularum illarum vitæ humanæ periodorum.

Utinam illibata semper maneret sanguinis constitutio quæ singulis ita congruit vitæ periodis! Homines servarentur immunes à morbis, præter eos qui culpâ eorum incidunt; nec ii morerentur, nisi placidissimâ illâ morte quæ in summo senio contingit, quia tunc tandem deficit sensus & irritabilitas. Verùm dantur causæ innumeræ latentes in rebus inevitabilibus, præcipuè apud homines degentes in regionibus temperatis, quarum efficaciam ii patiuntur varias mutationes easque frequentissimas in sanguine suo. Earum causarum multæ profectò pendent ex ratione vivendi diversâ, acceptâ secundum majorem latitudinem; sed multæ efficaciores habentur in magnis & crebris cœli mutationibus. Istæ enim sunt pleræque inevitabiles & potentiùs agunt; dùm ratio vivendi non admittit ubiquè terrarum eosdem errores:

quia omnibus mundi plagis non est idem libidinum quarumcumque aculeus, nec potestas eadem. His adde, quòd & in unâ eâdemque regione, mutationes ab inclementiis cœli inducendæ in sanguinem discrepent etiam secundum ejusdem locos, aërem & aquas; & quòd ideò locus unus sæpè tantum discrepet à cæterâ regione suâ, ac regio una discrepat à cætero mundo. Nam, sicut anni tempestates sunt sibi constanter æquales in aliquibus plagis mundi, eæ è contra sunt minùs æquales in aliis; imò & magis inæquales in quibusdam locis unius ejusdem regionis, quàm in reliquâ parte illius, &c.

Maximum fanè meditationis argumentum! Sed quia inutile foret, imò periculosius nimias subtilitates affectare circa hanc quæstionem, longè melius reputaverim admittere quatuor duntaxat constitutiones hominum, quas sagax Hippocrates designavit pro numero quatuor tempestatum anni à quibus illæ inducuntur. Hoc unum tamen spero, æquè ac exopto, nempè quòd comprobetur quinta una constitutio, communis inter quatuor præcedentes, constitutio scilicet electrica. Hæc enim valet plus minusvè inficere constitutionem sanguineam, biliosam, atrabiliosam & pituitosam, de quibus per partes actum fuit articulo secundo capitis secundi, neque dubitaverim illam inter reliquas non rarò dominari.



CAPUT NONUM.

DE sanguinis formatione & genesi humorum.

QUANDÒ sanguinis & humorum formatio genuinum sequitur naturæ votum, tunc secretiones cæteræque functiones omnes variis individuis propriæ exercentur ut par est; tuncque ideò viget sanitas eorum, quæ est naturale signum statûs illius perfecti.

Quærenti ex quibus causis pendeat bona sanguinis & humorum formatio, respondebitur eam pendere ex debitâ assumptorum ciborum animalisatione, simul & ex necessariâ quorumcumque excrementorum & recrementorum secretionem ac excretionem. Horum enim beneficio, massa sanguinis & humorum bona constituitur & pura.

Consequenter, si assumptorum animalisatio ut & animalifactorum depuratio non rectè procedant & inciderint in aliquem excessum aut defectum; hinc planum est necessariò labefactari constitutionem sanguinis, ut & crasim humorum ex illo emergentium.

Porro certum est prædictam alterationem pluribus de causis contingere. Quæ causæ habentur in usu sex rerum homini inevitabilium, aëris nempe, cibi & potûs, motûs & quietis, somni & vigiliæ, excretorum & retentorum; tum animi pathematum. Nam cujuscumque regionis fuerit homo, cujuscumque ætatis, & quodlibet coluerit artificium; ille semper cogitur prædictis uti rebus pro ætate & regione suâ, tum pro loco suo, & pro arte quam proficitur; proindè quilibet homo necessariò afficitur, si aliquibus his rebus abutatur, aut si lædatur ab illis: tum si ab aliquibus abstinuerit præter rationem.

Hinc concipitur efficacia varia variæ vivendi rationis , tum quare homines gaudeant vario temperamento , pro vario modo quo vivunt & pro varietate loci quem habitant. Neque proinde latet ratio , cur constitutio variorum populorum diversa sit, sicut & artificum & individuorum diversorum.

Exinde pariter elucet , cur sanguis & humores acrimoniâ multifariâ intingantur ; nempè si quædam excrementa subtilia retineantur ob cœli inclementiam aliquam ; vel si quædam miasmata cibi aut condimenti non superentur ; aut si ea non expellantur debito tempore ob quamcumque causam : Quæ varia acredo hæret humoribus , vel oleosis , vel mucosis , vel ferosis : prout miasmata ejus præbent *latus* idoneum unioni contrahendæ cum prædictis humoribus ; unde sæpè acrimoniæ mirabiles.

His acrimoniarum causis addenda sunt miasmata metastatica aut ex reliquiis morborum oriunda , quæ similiter uniri constat cum variis humoribus , pro mutuâ affinitate eorum. Neque etiam reticenda est species acrimoniæ quam ab igne electrico foveri putamus , quam suprà diximus spectabilem videri in cholera morbo , & quam multis in morbis maximas agere partes forsitan comprobabit nepotum nostrorum observatio.

Quibusdam placuit, post Boërrhaavium , innumeras imaginari acrimonias. Sed ab illis subtilitatibus putamus esse abstinendum, eò quòd nihil magis periculosum sit in praxi , sicut nihil magis est hypotheticum in theoriâ.

Jam pluries diximus , idque pluries repetere juvat : si vivendi ratio bona foret omninò , homines sobrii & frugales raram morbi occasionem obtinerent ab acrimoniâ , imò rarissimam. Sed heu ! non ita facile est tutamen ergà inclementias cœli ; earum quidem effectum licet aliquo modo mitigari , prævideri

ac præcaveri ; sed , irritâ omnimodâ curâ , semper accidit ut plures homines indè lædantur. *Tempestatum anni mutationes potissimum morbos pariunt , & in ipsis anni tempestatibus magnæ mutationes aut frigoris , aut caloris , aliæque pro ratione ad hunc modum.* Aph. 1 sect. 3.

Verùm ii homines qui assiduo labore firmati sunt , qui tolerandis cœli inclementiis sunt magis affueti , qui vivendi rationem æqualem gerunt , longè minùs sunt proni ad patiendas sanguinis & humorum alterationes. Imò si quatuor constitutiones ab Hippocrate designatæ aliquandò evehantur ad morbosum gradum apud illos , nunquàm indè mala oriuntur æquè pertimescenda , ac ea quæ accidunt hominibus vitam delicatam atque opiparam degentibus.

Felices ergò mortales , qui patrios agros fideli findunt fulco , soluti omni fœnore ! Ii sanguinem laudabilem potius accumulunt , ex quò minùs metuendum censetur apud illos. Fortunatos inquam , si sua bona nôrint ! ii enim mente & corpore robustiores sunt , difficiliùsque læduntur ab influxu meteororum propter quamdam assuetudinem.

Sed heu ! quàm infelices ii agricolæ , quorum labores majores sunt quàm cibi , quorum perpetui mœrores , inseparabilis paupertas , omnimoda indigentia ! in his enim sanguis non solum alteratur , quia fit ex materiamentis pravis ; sed & eò quòd mœrore perpetuo conditur , quo minuitur vis resistendi causis morbiferis tùm inquilinis tùm peregrinis. Undè non mirum eos miseros præsertim circumveniri à catervâ morborum , tàm chronicorum quàm acutorum.

De morbis in pulvere gymnasii generatis ob sanguinis crasim indè oriundam , proh dolor ! ferè non movetur quaestio nostris in temporibus. Sed si quidam adhuc morbus hujus originis

passim appareret , puta eum convenire cum morbis oriundis à redundantia sanguinis aut bilis ; sicut sæpius aliundè appareret ex tempestate in quâ morbi illi acciderent.

C A P U T D E C I M U M.

D E F I B R I S.

MEEDICO signa sanitatis & morborum in ipsismet fibris perquiranti , non licet opprobare subtilitates inutiles , si ille prædicta signa duntaxat inspexerit modo sequenti : nempè 1°. sub facie fibrarum benè constitutarum quas fortes appellare decet ; 2°. sub facie fibrarum laxarum seu debiliū ; 3°. sub facie fibrarum ficciorum seu rigidiorum.

Bona seu fortis fibrarum constitutio illa est , in quâ talis datur cohæsionis gradus inter partes earum elementares , ut cedere aliquatenus quidem valeant vi vitæ , sed indociles sint ab ipsâ superari. Quæ fibræ sunt igitur aptæ aliquam pati distensionem ; quin tamen , cessante eâ distensione , remaneant seipsis longiores aut in iis ruptura veluti immineat.

Talis esse solet constitutio fibrarum apud homines robustos sobriè viventes , & congruenter exercitados , præsertimque in regionibus minus calidis. Eaque constitutio genuina est soboles , tutaque conservatrix sanitatis firmæ æquè ac optandæ.

Nihilominus homines hâc forti fibrarum constitutione donati , obnoxii sunt morbis ab excessu sanguinis aut à bile oriundis. Ast morbi illi , in hâc felici constitutione facilius curari solent bonâ crisi quàm in aliis ; aliundèque constitutio illa expers est à morbis frigidis nuncupatis & chronicis : nisi ea prius degeneraverit , effectu desidii aut quorundam morborum accidentalium.

Debilis constitutio fibrarum seu laxa, illa est in quâ fibræ non solum censentur veluti graciliores, sed & in quâ partes elementares fibrarum tam levi nexu cohærent inter se, ut illæ motu paulò graviori superentur: ita ut, cessante distractione, remaneant seipsis longiores, & in eis faciliùs ruptura contingat.

Fibras sic constitutas suspicari fas est apud homines segnem vitam ducentes; ut & eos qui utero materno gestati fuerunt in circumstantiis relatis aph. 12 sect. 3; similisque laxitas familiaris est hominibus habitantibus regiones humidas simul & calidas; tum illis qui vescuntur alimentis acescentibus, oleosisve, absquè quòd operoso labore frænum opportunum illis injiciant. Quod malum sequiori sexui magis familiare esse, faciliè intelligitur.

In hac debili solidorum constitutione frequentiores contingunt morbi cachectici cæterique omnes qui creantur occasione minoris virtutis solidorum in humores; quales sunt tumores frigidi, ut aiunt, aut per congestionem facti: cæterique omnes affectus quos accersere capax est insulsa humorum vapiditas.

Fortior constitutio fibrarum haud difficulter intelligitur, conceptâ veluti nimietate molis earum simul & fortiori cohæsione inter elementa. Talis autem creari solet ex generatione robustâ, ex usu ciborum faciliè & copiosè nutrientium, præcipuè si ii cibi usurpentur inter labores assiduos & in regione siccâ, magis frigidâ quàm calidâ. Sed prætereà creatur, aut ea saltem inchoata firmatur usu rerum acido-austerarum, spirituosarum fermentatarum, tum à motu musculari majore & ab aëre constanter frigidiori ut fit apud incolas borealium plagarum; tum deniquè, ubi constanter datur minor vasorum plenitudo, sicut fit apud macilentos valdè exercitatos.

Rigiditas hæc nimia fibrarum inclinare facit versùs morbos
oriundos

oriundos ex humoribus nimis compactis , forsanque valentiùs animalisatis ; quales sunt morbi inflammatorii , necnon biliosi.

Præter considerationes prædictas , utile quoque est fibras conspiciere sub formâ organicâ , eas distinguendo in fibras cellulares , in musculosas seu *irritabiles* , & in sensûs capaces seu nerveas. Sub hoc enim triplici aspectu , Pathologus intelligit nimiam aut minorem adipis collectionem procedere ex fibrâ cellulari magis vel minùs laxâ ; varios gradus roboris deberi variis gradibus irritabilitatis musculosæ ; sicut nimia vel minor sensibilitas obtinetur ex nervis nimio sensu pollentibus , aut contrà : eò nempè quòd ii sint teneriores ac veluti nudiores , aut è contrà solidiores , forsanque nimiooperè velati. Sed ibi cautè fidendum est opinioni cuicumque ; quoniàm multa phænomena dantur , quibus explicandis impar est humana mens suffulta experimentis in animante vivo captis. Sapienter hærendum bonis observationibus ; iisque utendum tanquàm lapide quodam lydio. Hujus ope tandem comprobabitur , alio modo censendum esse de munere variarum fibrarum , prout eæ sunt in statu sano vel in morbo. Nam indubitabile mihi videtur , diversas corporis viventis partes pollere sensu & motu aliquo dùm ægrotant , quamvis illæ in sanitate appareant sensu carentes , ut & motu.



CAPUT UNDECIMUM.

DE TELA CELLULARI.

MEDIOCRIS obesitas, juncta cum colore cutis subroseo, præsertim in vultu, naturale signum est temperamenti sanguinei; quod formositate humanâ, majori ad scientias aptitudine simul & valetudine firmiori plerumque beatur: scilicet, quando naturalium horumce bonorum pretiosa germina non suffocantur terribili efficacîâ mutationum cœli, tum vitiorum omnigenorum, quibus humanæ societates scatent.

In regionibus saltèm temperatis hæc forsân hominum optanda temperies generalissima foret; nullusque homo, ut opinor, decederet ab hoc felici archetypo, nisi constitutio hominis sæpiùs in ipsâmet conceptionis ejus marerie & operâ depravaretur: nisi ejusdem evolutio mille modis adhuc perturbari posset antequàm nasceretur: nisi innumeris degenerationum occasionibus miserè occurreret postquàm natus est. Non aliis enim de causis accidit, ut tanta observetur diversitas inter variorum hominum formas, qualitates, characteres.

Nequaquam verò hîc aggrediemur hanc generalem Pathologiam semeioticam. Sed putabimus illam sufficienter impræsentarium attigisse, si exposuerimus notabilia magisque essentialia mala & signa quæ ex telâ cellulari pendent & mutuantur; non solum quatenùs pars illa corporis spectatur tanquàm aliquod humanæ compagis essentialiale organum: sed & quatenùs illa est generalissimum integrî corporis viventis materiam, quod easdem non tantùm partes agit respectu cæterorum ejusdem corporis organorum, ac aqua *crystallisationis* respectu variarum *crystal-*

lisationum salinarum; sed & quod plurimarum partium humani corporis genuina & unica materies apparet.

Ut incipiamus à generaliori notitiâ morbosâ quæ ex telâ cellulari obtinetur, hîc celebrabimus diversas corporis habitûs modificationes quas præsertim producere capax est, sed quas nullibi expressiores præbet quàm in vultu humano. Nonne, irritâ incredibili diversitate quæ sedet inter diversas hominum gentes, observatur suam esse ipsimet *Æthyopi* ut & *Europæo* faciei habitudinem, quæ certò significat sanitatem præsentem aut turbatam? congruenter scilicet coloratam & gratam aspectui, in valetudine bonâ: vario è contrâ infuscatam colore, necnon afflictam dolore aut tristitiâ dùm morbus quidam adest.

Tantam vultûs virtutem ad patefaciendum statum hominis physicum simul & moralem, nemo Physiologus stupebit nec Pathologus, attendendo ad mirabilem consensum quo textus cellularis vultûs fruitur cum tribus magnis cellulosæ telæ provinciis, in quibus habitant viscera functionibus cunctis famulantia, & pro variis vitæ suæ circumstantiis sensificata: consensum nempe textûs cellularis faciei cum textu cellulari capitis & colli, pectoris & brachiorum, abdominisque simul & inferiorum artuum, beneficio mutuæ communicationis omnium cellularum istius textûs patratum. Qui generalissimus consensus mechanicus faciei humanæ per cellulas adiposas, alio adhuc consensu nerveo adjuvatur; in quantum videlicet cellulosa tela in morbo fit patibilis, necnon & forsan paululùm *irritabilis* seu alicujus motûs capax: & in quantum phyosignomia millies in horâ mutari valet actione mechanicâ muscutorum suorum, quorum nervi consentiunt cum maximis nervorum visceralium regiminibus: adeò ut vultus necessariò commoveatur doloribus viscerum, perindè ac variis pathematibus animi.

Ideò, quæcumque cachexia, ut & quælibet morboſa viſcerum affectio vel ſimpliciter nervoſa, necnon febris ipſamet, expreſſiſſimâ deſcriptione pingitur in vultu: qui, ut ſanitatis & animi, ita & morbi ſpeculum eſt fideliffimum. Exemplo ſit facies Hippocratica dicta.

Quinimò, ſi pulmo dexter ex. gr. ſuppuratus ſit, vultus in eo latere magis tumet quàm à latere ſiniſtro: itemque, ſi cavitas dextra thoracis aquâ vel pure repleta foret, pars dextra vultûs magis perindè tumida deprehenderetur: dùm pars ſiniſtra illæſa maneret, aut non afficeretur, niſi longo temporis lapſu. Neque illa mutuæ ſympathiæ laterum corporis diſtinctio ſtupenda eſt. Nam videretur humanum corpus primordialiter conflatum eſſe ex duâbus cellulofis medietatibus longitudinalibus, unitis ſecundùm longitudinem ſuam; quæ ambæ medietates non ita facilè ſeſe mutuò afficiunt, eò quòd in puncto unionis detur ſtriçtura capax non parùm reſiſtere variis humorum tranſmigrationibus, ab uno corporis hemiſpherio in alterum.

Nonne enim cernere licet humano in corpore aliquam veluti futuram verticalem, ſeu potiùs ſtriçturam vel conjunctionem (evidentiſſimam, ſi attendatur), quâ mediante corpus vivens in duas portiones verticaliter parallelas funditùs dividitur? quæ futura ſeu *raphe*, in perinæo incipiens, indè antrorsùm vergit aſcendendo uſquè ad verticem: undè deorſùm ducitur ſecundùm ſpinas vertebrarum, ad perinæum uſquè.

Hinc ni fallor eluceſcit ratio cur tumor (etiam oedematoſus) unius lateris, tam difficulter tranſeat ad latus oppoſitum: cur ipſamet ſigna ex pulſibus obtinenda, pariter ſequantur ſortem earum duarum medietatum corporis, obſervante de Bordeu: cur paralyſis ut & atrophia, in unâ corporis medietate contingat, alterâ omninò illæſâ remanente.

Dicendi non foret finis , si singula textûs cellulosi munera recensere aggredieremur. Hîc sufficiat adhuc annotare cumulatim , organum illud generalem esse sedem *emphysematis* , *ecchymosis* , inflammationis , resolutionis , suppurationis , *metaptosis* , *gangrænæ* , *sphaceli* , indurationisque : tum etiam ipsiusmet *leucophlegmaciæ* & *anasarci* : consequenter organum illud , omnigenis humani corporis partibus commune , spectandum esse veluti genuinam officinam , in quâ evolvuntur animalis œconomix phœnomena prædicta omnia , omiſſis incognitis.

Sed quia brevis hæc notitia de telâ cellulari , non valeret amplexari numerosam ejus suppellectilem pathologicam ac ſe-meioticam (quæ per partes alibi exponetur congruentius) , fat erit ibi illam designasse pro generalissimâ & tristissimâ viâ *metaptosium*. Viam hanc loquimur , cujus ope morbifera quævis materies tam citò quandòque ſerpit & exportatur ab unâ parte corporis ad partem alteram , liberatâ parte priùs affectâ ; absquè quòd *circulatio* quicquam inserviat ad hanc viventis naturæ revolutionem mirabilem , quidquid in contrarium dixerint inattenti mechanicorum Medicorum ſectatores. Quomodò aliter conciperentur tam frequentes quæ in praxi observantur morborum transmigrations , ac proindè quânam arte tot malis adeò formidolosis occurreretur ? Quomodò etiam intelligerentur & utilia forent innumeræ Hippocratis annotationes judicioſaque præcepta de *metaptosis* ? quæ ab incautis olim rejiciebantur tanquàm fatua & inconsiderata ; quæ verò luminosis Neotericorum observationibus nunc verissima agnoscuntur , & ægrotos vi naturæ certò ſanandos conantur liberare ab omnibus officioſorum medicaſtrorum tentaminibus , periculosis æquè ac tenebrosis.

Inter multa Medici illius oracula circâ *metaptoses* , fat erit ſequentia exemplo attuliſſe , quorum quidem plurimorum mentio

jam alibi facta fuit, sed quæ non piget repetere; quia sunt certa & utilia, æquè ac frequentia.

Anginâ detento, si tumor in collo extrorsum oriatur, bonum. Aph. 37 sect. 6. Quod etiam repetitum legitur sect. 7 n^o. 48, fortè per errorem Librariorum.

Quibus anginâ liberatis, ad pulmones malum vertitur, ii intra dies septem intereunt: si tamen hos dies evaserint, suppurati fiunt. Aph. 10 sect. 5.

Tussiculæ, quæ cum crebris oris sputationibus procedunt, tubercula ad aures emolliunt. Coacâ 204.

Quibus observationibus veracissimis, innumeras similis momenti sententias liceret addere, ex eodem fonte depromptas: non solum respectu anginæ & parotidum, verum etiam respectu hypocondriorum, &c. Quæ omnia medicatricis naturæ miracula, agnoscenda sunt tanquàm naturalia textûs cellulosi beneficia.

Quomodò enim aliter concipere daretur aphorismus 53 sect. 7, quàmvis verissimus qui sic se habet? *Quibus inter septum transversum & ventrem pituita concluditur, & dolorem exhibet, neque in alterutram cavitatem viam habet, iis per venas in vesicam pituitâ versâ fit solutio.*

Talis est etiam aphorismus 8 sect. 6: *Hydropicis quæ in corpore fiunt ulcera, non faciliè sanantur.* Necnon 14 ejusdem sectionis, nempe: *Hydrope detento, si aqua per venas in ventrem confluxerit, morbus solvitur.*

Tùm aph. 10 sect. 6: *Capite dolenti, ac vehementer laboranti, pus, aut aqua, aut sanguis, per nares, vel os, vel aures effluens, morbum tollit.*

Tùm aph. 18, sect. 4: *Dolores supra septum transversum (qui purgatione indigent) purgationem sursum: qui verò infra, deorsum*

requirunt. In quo ultimo aphorismo Hippocrates observatione clarâ ductus, luculenter (1) agnovit hanc alteram & valdè insignem corporis viventis divisionem transversalem in duas portiones, nunc ab omnibus Medicis attentis cognitas; quarum

(1) Quamvis Hippocrates expressè locutus non fuerit de celluloso textu, attamen apparet eum ipsi cognitum fuisse & de eo saltem cogitasse, dùm notabat varias metastases morborum de quibus agitur in aphorismis suprâ relatis. Quinimò, mihi videtur sæculum hoc nostrum non posse omninò sibi gloriari de detectione textûs cellularis, sed tantùm de illius evidentiori descriptione apud Medicum de Bordeu. Hippocrates enim, lib. de arte, pag. 6 Foëf., lin. 47 & seq., sic apertè loquitur de telâ cellulari : » Quæcumque, inquit, membra » carnem in orbem circumdatam habent, quam musculum nominant, » ea omnia civitatem habent. Quidquid enim minimè coaluit, five pel- » liculâ, five carne tegatur, cavum est, quod dùm homo valet, » spiritu quidem, dùm verò ægrotat, sanie plenum est. Habent ita- » que brachia hujusmodi carnem, habent & femora, habent & tibiæ. » Quin & in partibus, carnis expertibus, hujusmodi caro inest, qua- » lem in benè carnosus inesse diximus. Nam & thorax dictus sub quo » jecur concluditur, & capitis orbis, in quo cerebrum compre- » henditur, ipsumque dorsum, cui annexi sunt pulmones, hæc omnia » prorsùs sunt vacua, multis intervallis referta, quæ ferè vasorum » naturam obtinent, cùm res eas continent, quæ partim quidem » eum qui eas possidet juvant, partim etiam lædunt. Ad hæc etiam » venæ sunt multæ, & nervi..... quorum nihil est quod non aliquan- » tulùm spumofum sit, & circà se latibula habeat, quæ sanies ipsa » arguit, quæ iis apertis copiosa, & multis molesta effluit. Neque » enim sanè eorum, quæ dicta sunt, quicquam oculis intuenti conf- » picere licet. » Ita ille. Porrò, quis ibi non agnoverit egregiam subtilissimamque descriptionem textûs cellulosi?

nempè una (eaque textui celluloso *menyngum* & *pleurarum* propria) sedet suprâ diaphragma ; altera (ad *peritonæum* pertinens) occupat inferiora omnia viscera & membra.

Nùm deniquè, absquè cellulosi textûs beneficio naturali cognito nec turbato, obtinerentur illa bona quæ memorantur aph. 74 sect. 4, his verbis? *Quibus spes est ad articulos abscessurum, ab abscessu liberat urina copiosa, valdè crassa, & alba reddita, qualis in febribus cum lassitudinis sensu quarto die quibusdam fieri incipit. Quòd si ex naribus etiam sanguis fluxerit, tùm brevè admodùm liberatur æger.* Ea enim omnia solo ministerio vasorum sanguinem circumducentium fieri nequeunt, sicut fatentur omnes Medici ab hypothesebus scholasticis liberi, solâque naturâ duce operantes & ratiocinantes.

Dantur siquidem insignes communicationes inter viscera per textum cellularem propriæ eorum regionis, imò & regionis alienæ, quæ attentum Medicum non fugiunt & à quibus ipse aliquandò auxilium valdè proficuum mutuatur. Undè jam non latet ampliùs quare *vesicantia* & *epispaptica* congruo in loco apposita, valeant præservare à *metastasis* aut illas turpiter advocare? quare *vacuationes* per alvum semper noceant, quoties pertimescenda est *metastasis*? nisi fortè sufficientem ex loco opportuno materiem *metastasi* jam valdè proximam tollere possint, sicut quandòque fit incipientibus *metastasis* puris vulnerum, præsertim in artubus inferioribus? quare similes *evacuationes* alvinæ semper noceant criticis sputorum thoracicorum aut excretionum gutturalium *ejectionibus*? quare humores catharrales, ex naribus, auribus & ipsomet cerebro possint adire fauces, nec proindè catharticiis ullis vel alio revellente medio deviari indè debeant? quare pulmonum infarctus qui oritur à saburrâ primarum viarum, tollatur adhibito emetico? quare

vesicantia

vesicantia & cauteria , ponè aures , vel ad nucham aut brachia juvent in sanando infarctu celluloso cerebri & pulmonum? Quæ omnia sufficiunt , ni fallor , ut comprobetur quantum boni *pathologia* necnon *semeiotica* mutuari possint , ex observatis & cognitis cellulosæ telæ muneribus in œconomiâ animali.

C A P U T D U O D E C I M U M.

D E A D I P E.

U BI corpus sanum utitur alimento satis largo & congruo , illudque nimiooperè non fatigatur & aliundè fruitur cellulosâ telâ congruenter strictâ , solet certa colligi copia adipis in textu cellulari. Quâ moderatâ carniū impinguatione fit gratior corporis forma , minorque datur dispositio ad patiendum occasione frigoris externi.

Hanc felicem existendi normam observare est in temperamentis sanguineis potius quàm in biliosis. Nec rarum , imò ferè ordinarium est , aliquam huic humani corporis constitutioni contingere in ætate maturâ obesitatem quæ plerùmque absquè morbo sensim evanescit in senio , non sine aliquâ spe futuri ævi longioris.

In constitutionibus verò debilibus & laxis , torpente præsertim corpore , simul & inter epulas , sæpiissimè adeps benè multa maturior accumulatur , ideòque major vel minor nascitur obesitas , ab ipsâ juvenili ætate quandòque incipiens. Quâ obesitate semel natâ , non solum agilitas simul & sensilitas corporis minuitur ; verùm etiam indè mors sæpiùs improvisa accersitur , aut saltem maturior. *Naturâ admodum crassi celerius intereunt quàm graciles* , aph. 44 sect. 2.

Præterea notatur aph. 45 sect. 5 , obesitatem mulierum infensam esse generationi. *Quæ præter naturam crassæ non concipiunt* ,

iis omentum os uteri comprimit , neque priusquam extenuentur , pręgnantes efficiuntur. Neque etiam discrepant facta cum dictis ejusdem scriptoris , respectu puerorum obesorum quibus , maximè dùm caninos dentes emittunt , solemne est accidere gingivarum stimulantibus pruriginibus , febres , convulsiones & alvi profluvia , ex aph. 25 sect. 3.

Macies è contrà valdè spectabilis & constans contingit hominibus malè nutritis aut præter modum fatigatis ; eaque sæpius temperamenta aggreditur biliosa tùm atrabiliosa , irritis mensis opiparis , si nempe ipsis sit strictior cellulosæ fibræ compages. Sed prætereà , macies non rarò quoque adducitur reluctante ipsâmet constitutione individuorum , quoties latet in sanguine miasma quoddam peregrinum , irritare capax ; tùm quoties ciborum coctio vel & secretio chyli constantem aliquam experitur læsionem , quâcumque de causâ generatam. Hoc observare est ubi adsunt graves viscerum obstructions , aut chronicus quidam alvi fluxus , aut febris marasmodea qualiscumque.

Quoad prognosim maciei , eruitur ex ejus origine. Macies illa fugari potest haud difficulter , quæ procedit à defectu cibi sufficientis , aut ab ejus qualitate pravâ. Sed vix mitigari docilis , si fuerit effectus temperamenti. De cæterò , æstimanda sunt maciei pericula secundùm causas ejus ; facilèque apparet macilentiam eò periculosiorem esse , quò celerius accersita est , quò magis essentialiale est viscus ex cujus læsione pendet , quò majorem suspicari licet acrimoniam , quò provectior ætas.

Sedulò etiam attendere oportet ad certam quamdam viscerum abdominalium crassitudinem quàm adeò utilem esse in ægrotantibus notatur aph. 35 sect. 2 , his verbis : *in omnibus morbis , partes quæ sunt ad umbilicum & imum ventrem crassitudinem habere præstat ; valdè autem tenues & tabefactas , prævum. Sed hæc quoque ad inferiores pur-*

gationes periculosum. Quandò enim eæ partes molliter crassæ sunt, ac veluti munitæ tomento quodam levi, benignam viscerum indicant humiditatem, quâ mediante facilius fit coctio humorum morbificorum, faciliùsque toleratur actio cathartorum pharmacorum, si iis opus sit. Dùm è contrà tenuitas viscerum ostendit humores acriores esse, minùs dilutos, ideòque minùs pronos ad congruam emendationem simul & ad felicem evacuationem; prætereàque sæpiùs illa declarat latentes viscerum spasmos; tùm nimiam imprimis extenuationem corporis, quam atro carbone notavit Celsus Scriptor, aph. 28 sect. ejusdem.

CAPUT DECIMUM-TERTIUM.

DE MEMBRANIS.

SEPTEM sunt cognitæ præcipuæ membranæ : scilicet utraque Meninx, Pleura duplex, Peritonæum, Cellularis Textus ipsemet, & deniquè Cutis externa. Quibus octava alia addi liceret, nempe Epidermis.

Earum membranarum singulæ maximas agunt partes in sanitate ut & in morbis. Quod munus obtinetur multiplex, quatenùs illæ partes diversis phœnomenis præbendis inserviunt mediante variâ consistentiâ suâ, varioque sensu, vel relativo vel absoluto; quibus phœnomenis indicatur integritas vitæ, ut & multifaria ejus perturbatio ac multifarium discrimen.

Autopsia itaque anatomica non docet apertè cur ab unâ membranâ peculiariter affectâ producantur perturbationes insignes aliis in membranis, necnon & in cætero toto corpore. Quinimò, appareret ex experimentis Halleri aliorumque Clarorum Virorum membranas esse insensibiles, exceptâ cute

ejusque propagationibus, easque sympathicis motionibus excitandis ac recipiendis proindè impares existere. Sed ibi cavendum ab errore. Quamvis non manifestentur nervi per substantiam propriam membranarum evidenter demonstrati; quamvis peculiare irrationes artificiales ipsis videantur indifferentes in animante sano experimentis capiendis subiecto; non indè licet resolvere, nec affirmare membranas nervis omninò carere propriis, easque in omnibus circumstantiis esse sensu penitus destitutas. Earum saltem inflammatione, contraria elicitur assertio apud Medicos clinicos, qui naturam sæpiùs inexplicabilem modestè venerantur & agnoscunt in ejus operibus.

Possunt equidem nervi sic existere in membranis, ut illos insequi non valeant oculi, etiam optimè armati. Nec aliâ ratione fit ut ipsissimi cutis nervi, quantumvis visibilis sit destinatio eorum, non permittant sese perlustrari usquè ad ipsas papillas cutis, in quibus tamen proprietas eorum luculentissimè demonstratur. Quis tamen ideò dixerit eas papillas carere nervis?

Consequenter credere fas est, ut opinor, membranas, exceptâ epidermide, instructas omnes esse aliquibus nervis propriis, clanculario modo ordinatis & officio cuidam singulari destinatis à naturâ. Easdem ideò membranas sensu saltem pollere quodam relativo, seu aliquibus dumtaxat aculeis proportionato: quem proindè sensum non exercent, nisi quandò nervi earum peculiariter se habent & fiunt apti peculiaribus experiendis stimulis; quem videlicet sensum dumtaxat exercent in raris quibusdam circumstantiis, respectu quorundam stimulorum peculiarium: quamvis eæ non fruuntur sensu æquè generali & æquè evidenti ac sensus cutis. Alioquì, oculus ipse nervis expers dicendus foret, eò quòd ignoret contactum rumoris.

Nervi in membranis clanculùm existentes, & incognito distri-

buti artificio, ita ibidem forsitan premuntur atque inordinantur, ut nequeant sensationem præbere ullam nisi quando mutatur status eorundem, occasione scilicet inflammationis localis: aut propter singularem quampiam stimulationem, etiam sympathicam, quamvis hæc fieret in parte quæ evidenti sensu privaretur, quales sunt tendines, quibus sensum plures Scriptores non concedunt ullum.

Plurimæ observationes, tam medicæ quàm chirurgicæ, demonstrant quantum peculiaris aliqua dispositio alicujus membranæ sicut & alicujus tendinis valeat cæteras partes musculares aut membranaceas afficere, & quantum affectio cujusdam partis possit vicissim mutari, mediante aliquâ mutatione in ipsis sanis partibus inductâ. Ut incipiamus ab ipsâ cute simul & ab ejusdem propaginibus, deinde transitori ad partes passim pro insensibilibus habitas; nonne ab immersione corporis in tepidâ vel in oleo, sedantur dolores interni, dummodò inflammatorii non sint? Nonne post dolores colicos vel iliacos, præsertimque post colicam metallicam dictam, sequitur brachiorum crurumve paralyxis, ac tandem eorundem artuum marcor? Nonne pariter contingunt convulsiones lethales ab actione nimîa pharmacorum purgantium, stupendaque lethalissimorum malorum cohors à cholerâ morbo? Nonne etiam à vulnerato mesenterio, quandòque mors post enormes dolores, quamvis illud tanquam insensibile spectetur à quibusdam? Nonne horribiles convulsiones succedunt menyngibus vulneratis inflammatisve, sicut & ipsimet pericranio similiter affecto? Nonne demùm frequentes oriuntur convulsiones, imò & tetani, vulneratis inflammatisve tendinibus, aponeurosibus, aut membranis? Quæ omnia sanè phænomena nequaquàm apparerent, nisi mediante partium illarum mutuâ sensificatione relativâ

stabiliretur mutuus quidam consensus mutuumque *regimen*, quorum auxilio pars una condoleret alteri, imò & ipsi pro parte suo opitularetur. Semper veneratus sum intentionem Halleri, Clarorumque Virorum qui ad illius imitationem scrutati sunt vestigia sensûs & motûs in variis partibus animantis vivi. Sed non vidi sine admiratione multâ, innumeros deindè scriptores Hallerianis experimentis & similibus seriò usos fuisse, ut majorem corporis nostri partem sensu & motu prorsùs expertem facerent & proclamarent. Quasi verò, in casu puncti tendinis aut cujusdam vulneratæ vel inflammatæ membranæ, acriores ægrotantium dolores pejoraque ipsis supervenientia symptomata non probarent illas partes pollere sensu exquisitissimo dùm ægrotant, quamvis eæ sint insensibiles in statu sano. Nonne dolores à partibus illis punctis, vulneratis aut inflammatis oriundi, sunt etiam experimenta sui generis, quæ tribuunt testimonium sensibilitatis tendinum & membranarum ægrotantium, perindè ac experimenta Halleriana demonstrant eorum insensibilitatem dùm benè valent?

Prædictas assertiones meditati si quid dubium videretur, attendat illas firmari luminosis observationibus prognosticis Hippocratis, quarum plurimas hîc referre juvat. Iis profectò fides debetur eò major, quò magis vacuus fuit ab hypothesebus ille Vir magisque accuratus in observatione faciendâ, & quò major fuit amicus amœnæ veritatis.

Sic itaque legitur aph. 1 sect. 5, *convulsio ex veratro lethalis est*. Deindè aph. 4, *immoderatæ purgationi convulsio aut singultus, malum*. Tùm aph. 17 sect. 5, *frigidum verò convulsiones, nervorum distensiones, livores & rigores febriles infert*. Aph. 20 sect. ejusdem, *frigidum ulceribus mordax, cutem obdurat, dolorem insuperabilem facit, denigrat, rigores febriles, convulsiones & tetanos invehit*.

Deniquè aph. 52 sect. 6, *spektare verò oportet quæ etiam ex oculis per somnum subapparent ; etenim si quid ex albo , non exactè commissis palpebris , subappareat , neque id ex alvi profluvio aut potione purgante contingat , prævum signum est , & lethale admodum.* In quo ultimo aphorismo, dùm observat Auctor nasci convulsiones occasione irritationis illatæ tubo intestinali (qui suapte naturâ pollet sensu admodum exquisito), non minùs luculenter agnoscit convulsiones oriundas ex irritatis vulneratisque partibus quæ clandestino sensu gaudent : dùm generaliter monet aph. 2 sect. 5, convulsionem, *si superveniat vulnèri*, lethalem esse. Nonne enim sæpè videre est, tetanos lethalissimos supervenire vulneratis contusisque partibus tendinosis & aponeuroticis manuum pedumve? Sicut comprobari liceret plurimis aliis tam priscorum quàm neotericorum observationibus. At verò prædicta sufficiant; obstinatis non loquimur.

Antequàm deferamus gravem quæstionem de membranis pathologicè consideratis, non abs re erit hìc obiter eripere crassum hunc errorem qui perperàm tribuitur Hippocrati, dùm prognosim peculiarem instituebat de quibusdam membranis & partibus mutilatis : nempè, aph. 19 sect. 6 legitur vulgatis in editionibus : *os cùm perfectum fuerit , aut cartilago aut nervus , aut genæ tenuis particula , aut præputium , neque augetur neque coalescit.* Quâ assertione nihil profectò absurdius, nihilque periti Medici indignius.

Verùm hic error non est Hippocratis. Pendet ex pravâ textûs græci versione, quam varii Editores oscitanter imitati sunt. Aphorismo itaque prædicto sicut & coacâ 503 & 504 ubi similia referuntur, vox græca *diacope* accipitur pro voce *tò dissectum*, quamvis obvio sensu significet *SEPARATUM*, *AMPUTATUM*; & similiter coacâ 505, *tò aprocoptò* vertitur in verbum

tò diffeco, quamvis etiam exprimat *ABSCINDERE*, *AUFERRE*. Prætereà eodem aphorismo, ut & coacâ 505, verbum *tò auxanò* ridiculè accipitur pro verbo *tò AUgeo*, quamvis, ut sui juris est, ibi significet *tò RENASCOR*, *REPRODUCOR*, *REGENEROR*. Porro eæ inversiones præbent sensum omninò alienum à sensu Hippocratis, quoniàm locis citatis apertè scripserit: *os cùm AMPUTATUM fuerit, aut cartilago, aut nervus, aut genæ tenuis particula, aut præputium, neque REGENERATUR, neque coalescit*. Id est, quod fuit ablatum minimè *reproducitur*, sicuti reproducuntur abscissi unges nostri, aut sicut *regeneratur* pes cancro ablatas: neque illud, per modum *traducis*, ferruminatur cum parte à quâ fuit separatum. Quid porro Chirurgia valeret modernorum arguere adversùs prædictam assertionem, nisi fortè objiciendo experimenta *Chirurgiæ curtorum per infitionem* Andreæ Taliacotii? Sed in quibus *tradux* agglutinandus restituendæ parti, non separatur à *matre*: quæ maxima differentia est. Proindè, simili factâ correctione in aph. 24 sect. 6 ac in aph. 19, ibi legi debet: *ex tenuioribus intestinis, si quod amputatum fuerit, non FERRUMINATUR*, sicut reipsa verum est. Hinc enim nata fuit ingeniosa praxis anum artificialem instituendi, quæ pro votis sæpenumerò cessit. Sed miror prædictos versionis errores fuisse prætervisos à peritissimo Domino D. Bosquillon; quippequi, latinè reddendo aphorismum 27 sect. 7, (qui est mera repetitio aph. 19 sect. 6) correxerit partem erroris, quodam nihilominùs pleonasmò ibidem relicto.



CAPUT DECIMUM-QUARTUM.

DE VASIS.

MAXIMUM operæprecium mihi habetur hîc omittere scholasticas subtilitates de indefinitâ vasorum divisione, de *errore loci*, tum de vasis spectatis tanquàm forent integrantes membranarum partes, haud secùs ac fila cannabina respectu telæ vulgaris. Eæ enim hypotheses, quas Pseudo-mechanici post Fizium ac Boërrhaavium ornârunt, nonnisi fictitias valent ideas pathologico-semeioticas præstare: ideòque ab illis cavendum.

Hîc tantummodò spectamus vasa viventis corporis tanquàm quosdam canales hydraulicos, per medias quaslibet carnes perforatos vi humorum à corde projectorum; qui canales vix viginti divisiones admittunt in arteriis antequàm desinant in venas; qui omnes simul accepti inserviunt ad illum sanguinis absolvendum motum perennem, nomine *circulationis* dictum, à quo vita physica hominis dependet. Consequenter, non alio sub conspectu pathologico & semeiotico considerabimus vasa, nisi quatenùs tollatur aliquandò transitus liquidorum per illa, ideòque nascatur hoc malum quod obstructio vocatur, vulgato apud Medicos nomine.

Obstructio itaque nihil aliud est quàm obturatio canalis alicujus, ejusque sequentes causæ agnoscuntur. 1°. Lateralis ejus pressio; 2°. excessus molis transituræ, aut angustia vasis transmissuri; 3°. concretio materie in vase aliquo; 4°. deniquè, concursus plurium causarum ex dictis. Undè id omne spectandum venit pro causâ obstructionis, quod capax est comprimere vasa aut illa coarctare: vel & inspissare humores, illosve alicubi admissos indurare.

Sed facilè meditati concipere est obstructionem duntaxat contingere minoribus in canalibus divergentes ramos emittentibus, sicut & in minimis caveis cellulosis membranæ adiposæ; nequaquàm verò id accidere in maximis vasorum truncis, venosisque præsertim, sicut nec in aliis maximis ductibus, si excipiantur casus quidam accidentales iique rarissimi: ex. gr. polypi cardiaci detrusio in præcordiales arterias; angustatio majoris alicujus vasis aut œsophagi ipsiusmet à quodam tumore innato aut à corpore quocumque extùs comprimente; retentio intrusorum calculorum in uretheribus aut in urethrâ ipsâ; obturatio ductûs ipsiusmet intestinalis, sicut aliquandò accidit propter tumorem callosum, steatomatosumve intùs natum aut vicinum; vel propter duras feces, glomeresque vermium, necnon fructuum pelles nucleosve; tum propter alia corpora quædam dura, deglutita per accidens aut ex consilio appetitiæ morbosæ: quibus casibus raris addendæ sunt illæ obstructiones quas miseri quidam creant, præ stultitiâ aut astutiâ, immisis videlicet corporibus peregrinis in aliquem canalem (1).

(1) Exempla prædictarum obstructionum canalis intestinalis, creatarum ab aggestis fecibus vermibusque, aut à retentis pellibus nucleisve fructuum, minimè rara sunt, sicut videre est apud Observatores. Nec desunt historiæ nebulonum quorundam, qui sibi ipsis peregrina corpora varios in canales maligniter immiserunt; tum eorum qui res omninò insolitas deglutierunt, aut præ astutiâ, sicut dictum est, pag. 77, id aliquandò arridere puellis *picâ* aut *malaciâ* laborantibus. Inter observationes hujus generis nobis cognitæ, non abs re visum est aliquot enarrare, ad hoc ut tyrones hinc cautè advertant nihil quandòque veritati similius videri quàm mendacium, & quòd nunquàm perfectè veritatem casus imitetur. Adeòque hæc erit utilis recensio ut

Quâcumque verò obstructione semel natâ, indè transitus fluxuræ materiei tollitur partim vel totaliter, hâcque ratione fit necessum ut varia mala oriantur : nempè pro vario mûnere organi impediti, sicut & pro variâ naturâ & degeneratione

Cives nostri imprimis intelligant quantum ii decipiantur qui bonâ fide negant, quòd magnetisatæ dictæ somnambulones valeant deglutire mollia corpora paulisper longa, non superantia diametrum pollicis unius, ad hoc ut, opportunè concitato vomitu portentoso, eventus videatur respondere magneticis divinationibus; quæ ideò prædictiones veluti divinipotentes habeantur, dùm nihil sunt nisi periculosæ hallucinationes *. Sic veritatem omni decore nudam exponere nostra religio est; illam enim assentantibus instruere margaritis, aut blandienti imbuere fuco: non ornari, sed deturpari videretur. Primò itaque referemus dolosas temerariasve peregrinorum corporum intro-missiones in canalem quemdam; deindèque stupendarum rerum deglutiones.

Nempè, anno 1746, juvenis quidam Vinitor Bifuntinus, captandæ misericordiæ gratiâ ut effugeret sortem Militis Provincialis, duos cerasi nucleos in urêthram sibimet immiserat: sed iis arte peritâ eductis, me præsentè, cognitâque nebulonis illius malitiâ, hic calculosus factitius declaratus est desertor & carcere damnatus.

Ab annis circiter triginta, quædam puella in Nosocomio hujus Urbis visa fuit, quæ sibi ipsi pluries urinarium in meatum intruserat fragmenta lapidea ut fingeret calculosum morbum, ideòque quiesceret diutius inter blanditias hujus hospitii. Brevi autem reферatâ femellæ

* Videatur caput de *Inhalatione*, ubi de ridiculis magnetismi animalis dicti dogmatibus; tum cap. de *Functionibus animalibus*, ubi de somnambulismo. Ibi habentur quæ jam priùs in unâ & alterâ thesi pariter proposueramus pro datâ occasione, à primâ aurorâ eorum miraculorum.

materiei impediens ; quæ omnia latum sanè meditationis campum exhibent , tum respectu effectuum ab obstructionibus oriundorum , cum respectu causarum remotarum. Sed in iis exponendis rebus non immorabimur , nè scilicèt ibi agatur

hujus turpitudine , ea solemniter crimine suo convicta fuit & expulsa ; parùmque abfuit quin securitatis humanæ custodibus traderetur.

Anno 1765 , circumciscà , sexagenarius quidam , tunc forsan insaniens vel ad minimum ebrius , sub intentione tollendi obicem alvi adstrictæ , sibi ipsi in anum detruferat vetustum vitis statumen , ad longitudinem pedis unius. Quo baculo stultis conaminibus effractò , nata fuerat singularis admodùm obstructio podicis. Tandem verò , (præ doloribus atrocibus , & duriori sanè obstipatione) demens ille factus propemodùm exanimis , suam revelavit vesaniam , rogando supplex ut quantociùs liberaretur. Quod factum est ex industriâ peritioris Chirurgi hujus Urbis , non sine labore maximo. Sed hoc mirum est , quòd hic fatuus paulò post simile malum sibi dederit , dolentissimo eodem artificio eliminandum.

Non à longo tempore fermè incarcerata fuit supremi Judicis decreto , quædam puella quæ , post alias benè plures fallacias , sibi vaginam coctis rapis impleverat , postea graviter gemendo de lugendissimâ suâ invaletudine , & humillimè chirurgicam invocando manum , quâ feliciter evelleretur terribilis ille obex , urinis fluxuris , ut aiebat , oppositus.

Nota est Parisiis historia meretriculæ cujusdam , quæ duas juniores columbas in vaginam suam immiserat , sic monstrosam simulaturam partum , ad hoc ut Chirurgum suum mitteret in fabulas.

Quoad monstrosas deglutitiones , ea statim exemplo erit observatio quæ spectat vetustam quamdam ancillam D. Roussel de Breville , Forensis olim Procuratoris apud Bisuntinenses ; quæ ancilla , fatuo

quod alibi vel actum est vel agendum, ubi videlicet quæstio movetur de quolibet morbo ab obstructione oriundo. Sat erit impræsentiarum superius tradidisse simplicem obstructionis ideam. Quoad cætera, varias omninò hypotheses floccifacimus, quas

quodam instinctu, deglutiverat clavem ferream armarii sui, sex pollices longam, & ideò extincta est. Aliquot enim diebus ab hâc deglutitione elapsis, clavis hæc traducta fuit ad inguinalem herniam, & ibi infixæ; hincque advenerunt pejora strangulatæ herniæ symptomata, quin licuerit auxiliis uti chirurgicis, ob nimiam miseræ ægro-
tantis debilitatem. Aperto cadavere ejus, clavem hanc ex loco prædicto educi vidimus.

Non à multis annis clarissimus Medicus Durande, amicus noster, apud Divionenses reperiit in stomacho defunctæ cujusdam stultæ mulieris capulum unius cultelli, cochlear unum stamneum, unumque clavum ferreum magnæ molis, aliaque benè plura corpora peregrina.

Mirabilior adhuc nec minùs certa habetur historia cujusdam Remigis Brivatenfis, nomine Andreæ Bazyle, qui obiit die 10 octobris 1774 in Nosocomio Brivatenfi. Miser ille Remex tædio ac mœrore confectus, imprimisque debitâ perterritus poenâ, capto forsân secùm consilio sibi mortem consciscendi, stomachum suum adimpleverat deglutitis plurimis omnigenis corporibus peregrinis, quæ in ejus cadavere reperta sunt colore atramentario imbuta, foetentiaque admodùm. Videatur *Journal de médecine, décembre 1774*, ubi referuntur visæ quinquaginta hominum, qui præprimis peritiores Medici erant aut Chirurgi, & quibus præsidebat D. de Courcelles Medicus primarius ejusdem Nosocomii. Sic ibi prostat recognitio eorum peregrinorum corporum, quam hîc integram retulisse pluribus lectoribus placebit. Eam enim notam facimus ineunte anno 1786, quo tempore nimis heu! celebrantur apud nos vana humanæ rationis ludibria, inter dolosas

Scriptores merè scholastici celebrârunt , ab epochâ detectæ circulationis sanguinis ad nos usquè.

Non noverim fieri mentionem de obstructione in particulari apud veteres Medicos. Sed patet ejus effectus ipsis apprimè cognitos fuisse. Et ut clariores Auctores excitemus , nonne

credulorum somnambulonum magneticorum calliditates. Ita autem legitur loco citato.

INVENTAIRE de ce qui a été trouvé dans l'estomac du nommé André Bazyle , forçat.

- » Une portion de cercle de barrique , de dix-neuf pouces de long ,
- » sur un pouce de large.
- » Un morceau de bois de genêt , de six pouces de long & un demi-
- » pouce de diamètre.
- » Un morceau *idem* , de huit pouces de long , même diamètre.
- » Un morceau *idem* , de six pouces de long , même diamètre.
- » Un morceau *idem* , de quatre pouces , même diamètre.
- » Un morceau *idem* , de quatre pouces de long , coupé dans sa
- » longueur , à-peu-près par le milieu.
- » Un morceau de bois de chêne , de quatre pouces & demi de long ,
- » un pouce & demi de large & un demi-pouce d'épaisseur.
- » Un morceau *idem* , de quatre pouces de long , un pouce de large ,
- » sur huit lignes d'épaisseur.
- » Un morceau *idem* , de quatre pouces de long , un pouce de large ,
- » sur un demi-pouce d'épaisseur.
- » Un morceau *idem* , de quatre pouces de long , un demi-pouce
- » de largeur , sur quatre lignes d'épaisseur.
- » Un morceau *idem* , de deux pouces de long , un pouce de large ,
- » sur un demi-pouce d'épaisseur.

Galenus plurimis in locis optimè docuit quid scirrhus esset? Nonne & Hippocrates ipse perito suo Commentatori calca-
verat viam, perspicaciores tradendo notitias de viscerum indu-
rationibus, præsertimque de iis quæ contingunt in hepate &

- » Un morceau *idem*, de quatre pouces & demi de long, quatre
- » lignes de large sur chacune de ses quatre faces.
- » Un morceau *idem*, de quatre pouces de long, de forme trian-
- » gulaire, avec une surface de quatre lignes.
- » Un morceau *idem*, de quatre pouces de long & quatre lignes de
- » diamètre.
- » Un morceau *idem*, de cinq pouces de long, un demi-pouce de
- » large & deux lignes d'épaisseur, séparé dans sa longueur par le
- » milieu.
- » Un morceau *idem*, de cinq pouces de long, quatre lignes de
- » large & deux lignes d'épaisseur.
- » Un morceau *idem*, de forme irrégulière, trois pouces de long
- » & trois lignes d'épaisseur.
- » Un morceau *idem*, de trois pouces de long, un demi-pouce de
- » large & trois lignes d'épaisseur.
- » Une portion de cercle de barrique, de cinq pouces de longueur,
- » sur un pouce de large & deux lignes d'épaisseur.
- » Un morceau de sapin, de quatre pouces de long, sur un pouce
- » de large & cinq lignes d'épaisseur.
- » Un morceau *idem*, de quatre pouces de long, quatre lignes de
- » diamètre.
- » Un morceau *idem*, de deux pouces & demi de long, d'un pouce
- » de large, en forme de coin, épais à sa base, de quatre lignes.
- » Un morceau *idem*, de trois pouces de longueur, d'un demi-pouce
- » d'épaisseur, & de forme irrégulière.

liene ? Non omiffis quoque fcirrhis uterinis , qui legitimi etiam funt foetus obftructionum , de quibus tam exprefsè locutus eft lib. 2 de mulier. morb. , cap. 38 , tum ubi de naturâ muliebri.

Jam reftat generalem quamdam obftructionum diagnofim

» Un morceau *idem* , de deux pouces & demi de long , & quatre
» lignes d'épaiffeur.

» Une portion d'écorce de cercle , de trois pouces & demi de long ,
» fur un pouce de large , faifant partie d'un grand morceau de qua-
» torze pouces , détachée de la partie fupérieure qui étoit dans l'œfo-
» phage , & qui eft tombée dans l'eftomac.

» Un bouchon de bois , d'un pouce de long , fur un pouce de
» diamètre.

» Une cuiller de bois , rognée fur les bords inférieurs , de cinq
» pouces & demi de long fur un pouce & demi de large.

» Un tuyau d'entonnoir de fer-blanc , de trois pouces & demi de
» long , un pouce de diamètre fupérieurement , & un demi-pouce
» inférieurement.

» Une autre portion d'entonnoir , de même matière , de deux pouces
» & demi de long fur un demi-pouce de diamètre.

» Le manche d'une cuiller d'étain , de quatre pouces & demi de
» long.

» Une cuiller d'étain entière , de fept pouces de long , le cuilleron
» replié.

» Un autre cuilleron de même matière , de trois pouces de long.

» Un *idem* , de deux pouces & demi de long.

» Un briquet de fer , de deux pouces & demi de long , large d'un
» demi-pouce fur une de fes faces , & de quatre lignes d'épaiffeur ,
» pefant une once & quatre gros & demi.

præbere ,

præbere, simul & prognosim. Quoad diagnosim, in hoc illa consistit, quòd obstructiones sæpenumerò innotescant tumore quodam duro magis vel minùs indolente, quandò scilicèt sedent in organo per tactum interrogando. Sed si obstructionibus afficiatur viscus minimè obvium sentui tactûs nostri; aut si moles earum non creaverit tumorem ullum qui agnosci possit: tunc judicare licet viscus illud obstructum esse, cujus secretio vel

» Un fourneau de pipe écorné, avec un morceau de tuyau, le
» tout de trois pouces de long.

» Un clou de demi-lisse, épointé, avec sa tête, de deux pouces
» de long.

» Un clou de petit-fix, extrêmement pointu, d'un pouce & demi
» de long.

» Une portion de cuiller d'étain aplatie, d'un pouce de long sur
» un demi-pouce de large.

» Trois portions de boucles d'étain, de figure irrégulière, environ
» chacune d'un demi-pouce de long.

» Cinq noyaux de prunes.

» Un petit morceau de corne.

» Deux morceaux de verre blanc, dont le plus grand a un pouce
» quatre lignes de long, sur un demi-pouce de large, de forme
» irrégulière.

» Deux morceaux de cuir, dont le plus grand a trois pouces de
» long sur un pouce de large, de forme irrégulière; & l'autre, d'un
» pouce quatre lignes de long & un demi-pouce de large.

» Un couteau avec sa lame, à manche de bois recourbé, de trois
» pouces & demi de long & d'un pouce dans sa plus grande largeur:
» le tout ensemble formant cinquante-deux pièces, & pesant en total
» une livre dix onces & quatre gros.

alia quævis functio constanter læditur. Quod iudicium aliundè firmari planum est, si præcesserint causæ aptæ ad malum illud generandum. Sic cachexia & alvi adstrictio quæ succedunt ictero aut hepatitidi malè terminatis, indicant hepar obstructionibus tentari. Et similiter, anhelatio ad minimum motum accidens, aut habitualis dyspnœa quæ succederet peripneumónico morbo non terminato per bonam resolutionem neque per suppurationem, foret signum indurationis schirrosæ pulmonum. Quæ exempla sufficiant.

Prognosis obstructionum sequitur momentum visceris affecti, sicut & magnitudinem naturamque causæ & effectuum obstructionis. Sed in genere spectantur tanquàm insanabiles obstructiones quæ prorsus schirrosæ sunt, nullo nempè sensu illis in partibus superstite; dùm è contrà aliqua remanet spes, quandò partes nuper obstructæ sensu quodam obscuro adhuc gaudent. Verùm ubi obstructiones doloribus stipatæ sunt lancinantibus, eæ pessimum suum statum adipiscuntur.



CAPUT DECIMUM-QUINTUM.

DE VASIS SANGUIFERIS.

RATIONE diversitatis quæ sedet inter sanguiferas arterias & venas quoad eorum vasorum munera, congruum est distincto articulo exponere phœnomena semeiotica & pathologica quæ pertinent ad hanc distinctam vasorum speciem.

ARTICULUS PRIMUS.

DE arteriis sanguiferis.

PRÆCIPUA phœnomena sanitatis & morborum quæ ex arteriis sanguiferis obtinentur, respiciunt vitalem motum sanguinis per vasa illa, tum singulares eorundem vasorum pulsationes. His tamen ibi supersedebimus, quia congruentius disceptabuntur cap. XVIII, ubi de pathologiâ & semeiotice circulationis sanguinis.

Nunc ea duntaxat evolvenda suscipimus quæ pertinent ad mutationes contingentes in corpore ipso arterioso, qualia sunt aneurisma, rupturæ, ossificationes: tum phœnomena illa quæ in ultimis arteriarum finibus patrari vulgò putantur, qualia sunt variæ sanguinis emigrationes, inflammatio, &c.

Aneurismatis nomine audit tumor cujusvis arteriæ dilatatæ. Legitimum aneurisma dicitur, quandò arteria aliundè illæsa intumescit alicubi, ibique plus minùsve tumida remanet: spurium verò, quandò arteriæ sic dilatatæ tunica interna aut externa rupta est, vel erosa, vel dissecta; adeò ut tunica tunc superstes, ideòque debilior, cogatur insolitam hoc in loco pati

distensionem, undè arteria ibi elevetur in tumorem aneurismaticum dictum: sic amittendo uniformem figuram suam cylindraceam & efformando quemdam veluti saccum seu sinum extraordinarium.

Aneurisma legitimum præcipuè accidit in vasis præcordialibus, tum in carotidibus. Spurium verò ubicùmque. Prioris causa habetur in maximis conaminibus tum in diuturnis orthopnoëis ut & in violentis vomitibus; posteriorum verò in vulneribus, contusionibus, & accidentalibus erosionibus.

Dignoscuntur aneurismata ex prægressis aliquibus causis relatis, quibus successerunt sequentia symptomata; nempe palpitaciones habituales, aut saltem frequentissimæ, si aneurismata in corde fuerint vel cordi propiora: tumor verò nonnihil sub digitis fremens, facilè cedens pressioni iterùmque sese extendens illicò, si malum fuerit tactui propinquum. Quæ utraque metuendas præsagiunt lethales vasorum crepaturas, aliquandò observatas in corde ipsomet.

Rupturæ, quæ sunt alterum malum arteriis quandòque contingens, frequentem ergò causam agnoscunt in aneurismatibus diù toleratis, sicut & in arteriosarum tunicarum erosione paulatim accidente, necnon in earumdem vulneratione & nimia distensione. Eæ in aortâ quidem fiunt difficiliùs quàm in arteriis pulmonaribus, quia istæ frequentiores graviorefque obices patiuntur; sed nullibi faciliores quàm cerebrosis in arteriis, eò quòd propria earum tunica multò gracilior sit & debilior, prætereàque obnoxia frequentissimis succussionibus, occasione vehementium vociferationum, anhelationum & vomituum.

Tertiò appellandæ sunt singulares illæ ossificationes, contingentes inter arteriarum tunicam cellularem & nerveam, præsertimque in magnis truncis propè cor. Quæ ossæ, seu potius

lapideæ concretiones fiunt ab extravasatâ ibidem materie crys-
tallifabili, potissimùmque accidunt apud robustos homines, vio-
lentis motibus corporeis addictos, & solent dare occasionem
palpitationum cordis, tùm anhelationum in lethalem deniquè
orthopnoeam abeuntium. Sic obiit Vesuntione Medicus Delale,
in quo repertum fuit orificium pulmonaris arteriæ veluti lapi-
deum, valvulisque suis omninò orbatum.

Phœnomena demùm morbosa quæ putantur fieri propè fines
arteriarum, sunt ea quibus ponitur Inflammatio necnon
Ecchymosis; quibus addenda sunt varia sanguinis effluvia, quæ
justâ apud veteres Medicos distinctione vocantur nomine *Rixis*
vel *Diæresis*: tùm *Diabrosis* vel *Anabrosis*, & demùm *Anastomosis*;
quibus olim adjecta forsân non fuisset *Diapedesis*, si tunc fuissent
melius cognita exhalantium viarum oscula, accidentalique
munera eorum.

De hisce variis emigrationibus sanguineis, nihil est cur longiùs
differamus. Sat erit explicatiùs protulisse quid sit *Ecchymosis* &
Inflammatio. Quæ duæ quæstiones totidem sectionibus expla-
nandæ nunc veniunt.

S E C T I O P R I M A.

I N F L A M M A T I O.

INFLAMMATIO, sic dicta ob inseparabilem calorem adauctum,
est ille status partium humani corporis, in quo eæ magis vel
minùs tument, simul & dolent calentque rubentque, cùm
adjunctâ febre occupante corpus integrum, saltemve partem
morbofo illo apparatu affectam. Quæ omnia signa internis par-
tibus inflammatis convenire patet, per ea quæ contingunt in
externis.

Generatur inflammatio ab irritatione quâdam singulari alicubi excitatâ, quam ibi passim produci creditur ab humore quodam acri vel & ab ipsomet sanguine; sed quæ probabilius nascitur ex eo quòd hic locus singularem nactus sit sensum pathologicum accidentalem. Hoc reverà fit imprimis occasione frigoris suprâ partem aliquam agentis, tùm occasione alicujus impressionis quasi contudentis, aut vim veluti epispasticam ibi exercentis, quibus prædicta inducitur sensificatio pathologica; sed & sæpissimè illud idem etiam fit, quia partes pathologicæ quemdam sensum nanciscuntur per sympathiam quam habent cum aliis corporis partibus suo modo irritatis, ideòque aptæ evadunt ad localem contrahendam irritationem inflammatoriam.

Quæ irritatio localis, semel alicubi nata, sanguinem allicit versùs viciniam loci illius; adeò ut tali occasione fiat major vasorum ejusdem loci plenitudo necnon & oscillatio fortior: quibus de causis aliqua sanguinis extravasatio contingat in textu cellulari obvio. His porrò meditatis facillimè concipere est cur inflammata pars tumeat, doleat, caleat & rubescat, sicut in definitione inflammationis dictum est; imò intelligitur exindè cur horrores plerùmque concutiant corpus ineunte inflammatione; cur etiam post horrorem succedat febris, vel in toto, vel in parte tantùm.

Hanc simplicem fuisse opinionem Hippocratis patet ex scriptis ejus. Quippequì, explicando modum quo conciperet fieri inflammationem pulmonum ex quâ nasceretur purulentia eorum, sic loquatur lib. 1. de morbis, sect. v. Foëf. pag. 9. lin. 28 & seq. *Caro vulnerata (id est, irritata) aliquantulùm resiccatur & incalescit, & ex vicinis tùm venis, tùm carnibus humiditatem ad se trahit; cùmque attraxerit, intumescit & inflammatur.* In quo textu sagax ille observator evidenter non solùm auctoritate suâ ap-

probat copiosiores humores & sanguinis appulsus, necnon & singularem dispositionem **partis** quibus creari inflammationem intelligimus; verum etiam indicat subtilia illa *latibula* quæ circa partes omnes adeste notat lib. de arte (1), & quæ nihil aliud sunt nisi subtiles eæ cavernulæ invicem communicantes, quarum concursu efformatur organica hæc pars corporis, nunc nomine textûs cellulosi designata apud Scriptores hujus sæculi; & in quâ contendimus aliquam semper sanguinis extravasationem accidere, dum alicubi gignitur inflammatio.

Neque dubitare licet quod ingeniosus magni Hippocratis interpres Galenus aliam inflammationis ideam habuerit, quoniam sic ait lib. x. de method. med., cap. 6: *Cum sanguis calidus copiosior in aliquam animalis partem procubuit, majora ejus vasa protinus distenduntur, utpotè abundantiae continendæ non sufficientia; ab his deinceps quæ minora sunt. Mox ubi nec iis satis continetur, exsudat foras in ea ampla spatia, quæ inter vasa sunt, sic ut & OMNIA quæ in compositâ carne habentur LOCA occupet.*

Prædictæ inflammationis imagini eò lubentiùs animus hæret noster, quod pulchrior simul & veracior indè illucet theoria symptomatum ejus mali, variorumque illius eventuum, sicut mox ex dicendis apparebit. Undè non veremur asserere penitus fabulosam esse theoriam Boërrhaavianam, & quidem multiplici de causâ, irritis obsequiosis Gerardi VANSWIETEN commentariis. Namque 1º. imaginariæ omninò sunt successivæ decrecentium vasorum series indefinitæ, suprà quas ingeniosus Batavus suam extruxit doctrinam: imaginariusque proindè *error loci*.

(1) Vide not. pag. 127.

Dantur duntaxat ultimæ arteriolæ rubræ quæ reflectuntur in venulas rubras; ex his arteriolis rubris oriuntur arteriolæ flavæ quæ in flavas venulas abeunt; & deniquè, ex arteriolis flavis sobolescent arteriolæ albæ, aliter lymphaticæ dictæ, quæ reflectuntur in venulas albas. Sed ex arteriolæ quæ in statu sano inconspicuæ sunt, & quæ tamen rubescunt occasione inflammationis, non spectari debent tanquàm sanguini rubro alienæ, sicut Boërrhaavius putabat censendum esse de vasis conjunctivæ oculorum membranæ, & de similibus, ad hoc ut systema suum ornaret. Tenuiores illæ arteriolæ sunt duntaxat inconspicuæ, quoties solitarios globulos sanguinis rubros vehendos habent; exque absquè *errore loci* evadunt conspicuæ, quoties sanguine copiosiori turgent. Quod verò spectat illas arteriolas quæ omninò pellucidæ & de factò imperviæ sunt globulis rubris; cùm diameter earum multò tenuior sit quàm moles globuli unius rubri, impossibile est ut ii globuli rubri ibi admittantur; ideòque temerarium est invocare *errorem loci* ad hunc imaginarium ingressum explicandum. 2°. Ea obstructio vasculorum arteriosorum, ex quâ inflammationem creari supposebat Boërrhaavius, nequaquàm potis est reddere sanguinis motum celeriore in hisce vasis, nec fortiozem ejus ibidem attritum determinare. Demonstravit equidem SAUVAGESIUS, sanguinis affluxum & motum è contrà ibidem diminui ab obstructione: proindeque perperàm affirmari, quòd à simili causâ inflammatorius calor produceretur, sicut nec dolor. 3°. Non concipitur quomodò inflammatorius rubor tam æquabiliter foret diffusus in parte inflammata, si procederet ex ramificatis vasis rubro sanguine turgidis. Ad summum videretur hanc partem discretis duntaxat vasculis variegatam ab hinc futuram esse; sicut accidit post feliciores coloratæ ceræ injectiones. 4°. Deniquè, non
quadrat

quadrat vasculorum arteriosorum obstructio, sicut nec *error loci*, cum variis inflammationis symptomatibus cæteris, sicut nec cum variis ejus speciebus ac eventibus; dùm ea omnia optimè conveniunt cum theoriâ Hippocratis & Galeni.

Ex simplici itaque veterum eorum Medicorum theoriâ, haud difficulter eruitur quodcumque inflammationis phænomenon. 1°. Quomodò, efficaciâ stimulationis alicujus localis & specificæ, alliciatur major copia sanguinis versùs hanc partem; ideòque ibidem inflammatio nascatur, quocumque modo ille sanguis constitutus sit; quod factum, evidenti æquè ac constanti eventu firmatur, quoties pharmaca rubefacientia dicta viventi applicantur corpori. 2°. Quomodò sanguis versùs locum irritatum determinatus ac veluti attractus, magis repleat ejus vascula, eorumque oscillatoriam adaugeat actionem. Quarè proindè eadem vascula nimiooperè acta, hunc tandem sanguinem cogantur partim adigere in obvias cellulosæ telæ cavernulas, ibidem sanguineum faciendo decubitus: adeòque, cur ibidem producat tumor, calor, dolor, necnon rubor æquabiliter diffusus? 3°. Quomodò prædictus apparatus, ab irritatione exordium trahens, valeat præcursores inflammationis horrores accersere; tum proritare febrem in parte saltém inflammata, si non in toto corpore: videlicèt, pro gravitate irritamenti, & pro sensibilitate ac *regimine* partis irritatæ. 4°. Quomodò contingant inflammationis eventus diversi, nempe resorptiones sanguinis effusi, cæteraque abeuntis inflammationis phænomena, de quibus mox in particulari. 5°. Demùm, ex eâdem theoriâ optimè quoque deducitur quomodò concipiendæ sint variæ inflammationis species ab antiquis Medicis distinctæ & recognitæ: à quibus, nè latum quidem unguem, ausi sunt recedere Neoterici; quæ differentiæ maximi sunt momenti in quæstione

propositâ , & quibus explicandis nunc incumbendum.

Equidem , ratione aliquarum diversitatum valdè notabilium , quas essentialis symptomatum inflammatoriorum tenor admittit , Neoterici post veteres agnoverunt inflammationem unamquam *phlegmonem* vocavêre : aliam verò , nomine *erysipelatis* distinctam.

Phlegmo nempè dicitur tumor inflammatorius sat elevatus , paulisper renitens , circumscriptus , sedem non nihil profundam simul obtinens , intenso donatus rubore , stipatus dolore tensivo ac pulsanti ; cùm adjunctâ febre : vel in toto , vel in affectâ tantummodò parte.

Erysipelas verò audit tumor inflammatorius superficialius , non circumscriptus , colore donatus ex flavo rubente qui digiti pressione evanescit , stipatus dolore deurente ; cùm adjunctâ etiam febre : vel in toto , vel in parte tantùm.

Prædictæ phlegmonis & erysipelatis discrepantiæ ex hoc potissimùm pendent , quòd phlegmonis materies crassior sit ; ejusque sedes laxior & minori sensu donata quàm sedes erysipelatis , sicut mox apparebit. Itaque , dùm phlegmo adest , præter vasa vicina (quæ magis sanguine turgent quàm in statu sano) , afficitur laxis textus cellularis benè profundus partium , quatenus ibi extravasatus est sanguis sat copiosus , magis vel minùs crassus & pinguedini inquilinæ admixtus. In erysipelate verò , unà cùm vasculis superficialiis , occupatur compactior duntaxat textus ille cellularis pinguedine orbus , qui densâ in facie membranarum existit ; ibique effusa est aliqua sanguinis portio multò tenuior & acrior , donata colore rubro ad biliosum tendente , quam ideò biliosam dixêre veteres Medici. Quæ erysipelatosa materies , cùm parcior & acrior sit , & cùm stimulet partes acutiori sensu tunc donatas , capax est superficium duntaxat

tumorem , ruboremque levem ibi facere , & deurentem excitare dolorem : dùm in phlegmone tumor major est , faturatèque ruber , prætereaque dolor tensivus ac pulsans.

Nî vetasset præoccupatio Boerrhaavii ergà theoriàm suam , quis assignatas phlegmonis erysipelatisque diversas sedes accuratius evolvisset ? Cùm ipse , vi illius veritatis agnoverit , §. 374 , inflammationem nullibi federe *frequentius ac tenacius quàm in adipe* ; in quâ etiam , ipsemet prædicti scriptoris Commentator fatetur sanguinem quasi transudare & accumulari effectû inflammationis ; undè , inquit , *tumor ruber & durus veram phlegmonem comitans , oriri videtur , qui FERE SEMPER TANTUM IN HAC TUNICA CELLULOSA HÆRET*. Quo fanè in loco incogitans ac veluti coactus Vanswieten admittit theoriàm Veterum ; sed cùm modificatione singulari : firmus quoad cætera adhærendo doctrinæ præceptoris sui.

Conceptâ ut statuimus inflammatione , jam nunc quærendum 1^o. quænam sit præcisè materies inflammatoria ; 2^o. quid censendum sit de crustâ illâ albâ , durâ , ac veluti caseosâ aut coriaceâ , quæ sæpè videtur in superficie sanguinis refrigerati , & quæ à multis Medicis spectatur tanquàm genuina inflammationis materies.

Quoad primum , dicimus materiem inflammationis cujusvis nihil aliud esse quàm portionem sanguinis hominis ægroti , quæ ibi inflammatoria fit ob apparatus localem suprâ designatum ; & quæ ibi peculiare acquirat dotes , tùm quia secessit à toto , tùm quia extraordinarium attritum & calorem ibi patitur. Contendimus proindè nullam sanguinis qualitatem per se esse capacem producendæ inflammationis : sed sanguinem magis vel minùs pronum esse ad inflammationem contrahendam ; magis vel minùs calidam & legitimam , pro variâ suâ constitutione.

Consequenter, si sanguinis massa fuerit cruore dives & densa (qualis existit in hominibus actu sanguinolentis), & si pars quædam tunc inflammatione tentetur, talis sanguis tunc habebitur inflammatus in loco ita affecto; qui proinde locus laborabit phlegmone legitimâ, aut legitimo erysipelate: dum homo donatus sanguine pituitoso, bilioso & putridulo, laboraret inflammatione œdematosâ, biliosâve putridulâ. Sanguis enim, seu densus sit seu biliosus & vario modo saniosus, inflammatur per ipsam suam duntaxat depositionem atque concalescentiam in foco inflammatorio; illeque hoc ipso quod ibi inflammatus sit, nanciscitur qualitatem diversam à suâ pristinâ qualitate: ut faciliè patet ex eo quod indigeat elaboratione peculiari ad hoc ut impunè resorberi queat: tum ex eo quod, si ille forsan metastaticè transferatur, non semper creet inflammationem priori similem, sed sæpiùs morbum valdè diversum.

Si sanguis per se foret inflammatorius ob peculiarem suâ qualitatem, nunquàm generaretur inflammatio nisi universalis: eaque semel nata non desineret adaugeri, quin priùs deleretur supposita illa sanguinis qualitas per se inflammatoria. Porro contrarium ex utroque capite observatur. Inflammatio semper particularis est; illaque fatiscit & crescere cessat, absquè quod sanguinis massa dimiserit suas qualitates & emendata fuerit. Copiosus equidem sanguis densus & cruore dives conducit ad suscipiendam inflammationem. Sed id non præstat, nisi quia mole suâ distendit vasa corporis, eaque distendendo irritat ubi magis faciliè irritari queunt, atque ideò illa disponit ad generandam inflammationem. Propterea accidit aliquandò, ut in plethorico homine dolor aliquis præcedat inflammationem: quæ tunc non exspectat nisi sufficientem irritationem localem, ad hoc ut nascatur. Sed sæpiùs inflammatio incipit absquè prævio

ullo dolore , quandò scilicèt pars aliqua alio modo determinatur ad inflammatoriam irritationem suscipiendam ; nimirùm occasione subitanei frigoris , aut alterius cujuscpiam irritationis externæ vel internæ ; quas inter annumeranda est irritatio inflammatoria quam producit miasma quoddam deleterium alicubi defixum , seu per accidens , seu motu naturæ symptomatico aut critico : quale est morbillosum , variolosum , furunculolum , carbunculolum , &c. Horum enim omnium effectû , pars ab illis occupata variè sensificatur & constringitur ; sicque disponitur ad contrahendam irritationem inflammatoriam , quæ decubitus hujus naturæ ibi determinat & facit eumque non nihil varium , pro variâ individui affecti constitutione & Idiosyncrasiâ. Consequenter , in homine qui bono sanguine actu plenus est , accidet utroque in casu inflammatio phlegmonosa aut erysipelatosâ legitima : dùm iisdem de causis , homo pituitosus , sanguineve bilioso & pravo donatus , non tentabitur nisi inflammatione œdematosâ , vel & biliosâ ac putridulâ. Porro , hanc inflammationem in utroque homine similem necessariò futuram esse quis non intellexerit , si unica foret inflammatoria materies ?

Quoad secundum quæsitum , nempe quid censendum sit de crustâ albâ quæ in sanguine post venæ sectiones refrigerato sæpè observatur , hæc est opinio nostra. Quoties adest inflammatio quædam paululùm gravis , seu phlegmonosa sit seu erysipelatosâ seu catharralis , apud homines sanguinolentos (præsertimque tempore verno aut ad vernum approximante , in constitutionibus tempestatum regularibus) ; toties videre est sanguinem in scutellis refrigeratum obtegi crustâ quâdam albâ , veluti caseosâ , magis vel minùs densâ & spissâ ; nisi aliquid fortè obstiterit illius apparitioni , sicut infra explicabitur. Quæ crusta alba , gallicè dicta *la couenne* , spectanda quidem est velut signum

seu aliqua circumstantia constitutionis inflammatoriæ , in quâ nempè faciliùs generantur legitimæ inflammationes magis vel minùs graves , si detur occasio ; sed ea minimè haberi debet tanquàm materialis causa inflammationis , sicut nonnulli scriptores perperàm celebrârunt ; hujusque nostræ assertionis sequentes sunt rationes.

Si hæc crusta alba sanguinis talem possideret virtutem inflammatoriam , quare 1^o. non generaretur universalis aut saltem multiplex simul inflammatio , in homine cujus sanguis ita crustosus esset ? Dùm è contrà , si fortè nascatur inflammatio , ea non sit nisi in parte quæ disposita fuit ad suscipiendam localem irritationem inflammatoriam , minimè verò in pluribus simul partibus ; 2^o. quomodò inflammatio , semel nata ob præsentiam talis crustæ sanguinis , curari posset antequàm delata & extincta penitus fuisset ea pars sanguinis inflammatoria ? Dùm è contrà , multò spissiore simul & densiori crustâ refertus est sanguis qui ultimò mittitur in ipsâ pleuritide , vel feliciùs abiturâ : quod & idem contingit , quandò sanguis fortuito casu mittendus est post curatam pleuritidem aut peripneumoniam ; 3^o. quare in casu vulneris aut ictûs accidentalis , tam sæpè mittatur sanguis forti densâque illâ crustâ albâ oneratus , sicut & passim in aliis occasionibus benè multis , quamvis de ullâ inflammatione non cogitetur tunc temporis , nec ullum omninò detur illius vestigium ? 4^o. quare demùm (& hæc observatio majoris adhuc momenti videtur) ; quare inquam , frequentissimæ nascerentur inflammationes , eæque dolentissimæ ac periculosissimæ , quandò sanguis (perperam sanè tunc missus) nativâ veluti plasticitate suâ destitutus videtur sub specie variegati cujusdam tabi aut saniei duntaxat sanguinolentæ , nedùm refertus sit illâ famosâ crustâ albâ quæ inflammatoria dicitur per excellentiam ? Nonnè similes inflam-

mationes admodum dolentes & acutæ observantur in febris illis epidemicis , pleuritides aut peripneumonias , alteriusve visceris *phlegmasias* mentientibus ? Quæ tam sæpè grassantur initio hyemis ob vigentem constitutionem atrabiliosam biliosamve : quæ & ab hinc longiùs quandòque regnant , si modò prædicta constitutio extendatur ultrà solitum terminum suum : aut quæ etiam quocumque anni tempore passim aggrediuntur aliquot homines prædictâ constitutione biliosâ vel atrabiliosâ laborantes.

In talibus equidem febrilibus morbis , ut abundè nôrunt Medici clinici , dantur semper varii dolores , seu pleuritici seu alii diversi , qui realem arguunt reipsâ inflammationem : sed inflammationem quæ , sive phlegmonodea , sive erysipolatodea fortè videatur , semper est spuria & maligna ; naturæ scilicèt biliosæ , putridulæ , ferèque gangrænosa ; cujus nempè materies non est sanguis densus & dives ; sed sanguis biliosus atrabiliosusve perquàm depravatus , sanguinolentam duntaxat amurcam referens. Qui sanguis , vel in pectore , vel alibi varios decubitus facit (*stases* febriles passim dictos) , ibique inflammatur propter singularem variorum eorum locorum sensificationem ; quam sympathicè & tam sæpè inducit ac fovet biliosa primarum viarum saburra , magis vel minùs putrida : sicut patet ex præsentì levamine quod usu efficacis vomitorii obtinetur , dùm venæ sectiones jugulant. Quis Medicus attentus non noverit quantum tales inflammationes discrepent ab inflammationibus legitimis , tum quoad genium , tum quoad decubitûs unitatem & stabilitatem ? Putridæ enim illæ inflammationes obtinent plures simul mansiones , sæpè pullulantes nisi ipsis occurratur ; earumque spontanea tendentia est versùs gangrænam & sphacelum , à quibus mutuantur lethalissimum suum characterem. Cùm verò hæc ita sint omnia , saltem quoad naturam sanguinis prædictas inflam-

mationes putridas & gangrænosas producentis : quis nunc dixerit, quòd unica sit inflammatoria materies ? & quòd prædicta illa pars alba crustosa sanguinis, gallicè dicta *la couenne*, sit vera & unica materies per se inflammatoria ?

Non hìc stetit erronea consideratio Pathologorum. Medici benè plures, consilio Baglivii, crediderunt abstinendum esse à venæ sectionibus in ipsâmet pleuritide magis legitimâ, si fortè crusta illa alba tunc non cooperiat sanguinem è venâ missum : quinimò venæ sectiones deinceps celebrandas non esse, quantumvis sæviret pleuritis, ubi ea crusta primitùs observata jam non apparet in unâ venæ sectione.

Verùm error ille haud difficulter diruitur. Attendere sufficit ad naturam crustæ illius, & quòd illa sæpè reipsà adsit pro oculis ad id eruditis : quamvis non appareat oculis qui contrariâ imagine occupati sunt. Quæ ut elucescant, quærendum quid sit illa crusta, & quomodò formetur ? Deindè, cur illa aliquandò abesse videatur ab inflammationibus legitimis, quamvis de factò existat ?

Crusta sanguinis inflammatoria dicta, gallicè *la couenne*, ea est ipsamet pars sanguinis alba & plastica, quasi caseosa, non potens in aquâ solvi & reliquo sanguine specificè levior, quæ in omni sanguine reperitur magis vel minùs copiosa. Quæ copiosior quidem, atque densior plerùmque apparet, quandò datur constitutio sanguinea, de quâ cap. 2 actum est ; sed quæ etiam valdè sensibilis est, ubi vel minimè cogitatur de inflammatione, sicut patet ex venæ sectionibus in aquâ passim celebratis.

Porrò ex eo quòd illa caseosa pars sit specificè levior sanguine reliquo, nonne exemplo cremoris lactis ea debet pedetentim affurgere ad superiorem sanguinis coaguli superficiem prout formatur coagulum illud, dummodò nihil obstiterit ? Nonne & ea separatio perfectior erit, quò lentior sanguinis refrigeratio

refrigeratio & major ejus quies inter refrigerandum? Nonne demùm eadem pars sanguinis in crustam abibit tenuiorem spissioreme , prout sanguis receptus fuerit in vase latiori aut diametri è contrà multò minoris? Similia sanè fieri in lacte, nôrunt ipsæmet mulierculæ.

Consequenter , si sanguis graciliori tantùm rivulo aut guttatim ex venâ fluxerit , sicut contingit in illis venæ sectionibus quæ vernaculè dicuntur *saignées baveuses* : si sanguis emissus permoveatur dùm refrigescit : tùm si reponatur frigidiori in loco statim ab ejus effusione : in quâcumque profectò earum circumstantiarum non licebit albæ sanguinis parti petere supernam coaguli faciem pro levitate suâ ; sicut nec liceret lacti suum evomere cremorem , si illud similiter tractaretur post mulctram. Quemadmodùm verò cremor lactis in ejus coagulo abditus tunc lateret , ita & caseosa sanguinis pars omninò inviscaretur à reliquo sanguine & retineretur permixta in coagulo : vel & ea tantummodò generaret quamdam crustam colore coccineo donatam , in coaguli superficie ; qui color , quamvis primo intuitu videatur testificari exindè abesse hanc crustam inflammatoriam dictam , nihilominùs illam recondit : sed personatam sub hoc ipso rubore rutilanti aut variegato. Hoc ex discissione coaguli facilè comprobare est.

Cuicumque prædictas observationes facienti dabitur colligere quòd , si reipsà detur in sanguine copiosa illa pars alba , ea semper abeat in crustam magis vel minùs spissam & supereminentem coagulo sanguinis refrigerati in scutellis. Quæ crusta omninò alba erit in sanguine congruenter emisso , non perturbato post emissionem , neque citiùs refrigerato ; sed quæ velabitur colore coccineo valdè rutilanti aut variegato , ideòque fallere capaci , quandò aliqua ex prædictis circumstantiis locum habuit

tempore fluxûs sanguinis , aut post eundem. Quoties mihi accidit, comprobandæ hujus veritatis causâ , ut illam crustam inflammatoriam dictam mutarem aut de integro celarem pronutu & arbitrio ! Res eo modo toties mihi successit , vel in unâ tammodò scutellâ inter plurimas : vel in unâ venæ sectione inter alias mediâ. Caveant ergò Tyrones à consilio Bagliviano.

Nunc diagnosim variarum inflammationum tradituri , dicemus primò de spuriis. Ex autem inflammationes spurix , seu stases inflammatoriæ febriles & putridulæ , distinguuntur à legitimis inflammationibus sequenti artificio. Nempè attendendum ad actualem hominum constitutionem generalem & particularem ; ad ætatem rationemque vivendi individuorum affectorum ; tum imprimis ad normam dolorum ; ad vires ægrotantis , ut & ad qualitatem pulsûs ejusdem. Horum signorum beneficio fas erit dignoscere tales inflammationes , seu sporadicæ fuerint & accidentales , seu fuerint epidemicæ. De signis ex regnante populari constitutione eruendis , aut ex ægrotantis constitutione ac ætate videatur caput secundum. Quod spectat reliqua , hæc sunt :

1^o. Dolores creati ab inflammatione spuria seu putridulâ , nullum vel minimum plerùmque adducunt horrorem dùm incipiunt. Ii sunt acres & deurentes , quamvis nonnihil obscuri. Tristitiâ & mentis dejectione stipantur , unâ cum siccâ ut plurimùm cute , aliundè urenti : tum facie sæpiùs luridâ , linguâque siccâ & tremulâ. Ad hæc , caput afficitur dolore tenaci & inquieto , facilè abeunte in delirium obscurum. Qui omnes dolores sunt profundi , latè ut plurimùm extensi , hinc indè serpentes & insuper locum suum mutantes , prout nempè serpit ac extenditur inflammatoria stasis ; quæ quidem à dolore semper incipit : sed quæ brevi etiam tempore suam sæpiùs deponit sensibilitatem , succedente alio simili dolore in vicinis.

Dolores è contrà verè inflammatorii , ab horrore magis sensibili plerùmque fumentes exordium , pulsantes sunt aut gravativi vel distensivi ; patientiùs tolerabiles ; adusquè exteriora velut extensi ; febre magis explicatâ stipati tùm sudabundâ cute : suamque demùm sedem fixam retinentes.

2°. Vires ægrotantis in inflammatione spuria admodùm prostratæ sunt , languente pariter animo ; facilèque subrepat delirium obscurum inter hanc prostrationem , subsultibus tendinum sæpè generalibus obsitam. Dùm homo verâ inflammatione tentatus multas conservat vires corporis , ut & vigorem animi : tuncque delirio phreniticæ naturæ corripitur , si forsan deliret.

3°. Pulsus in inflammationibus spuris parvus est , debilis , celerimus , quasi vacuus , facillimè evanescens sub tangente digito , paucam veluti superstitem significans vitam ; simulque vigent subsultus tendinum & artuum. Dùm in veris inflammationibus pulsus durus est & sat fortis , imò quandòque fortissimus : magisque rari subsultus tendinum , minùsque generales.

His omnibus characteribus addatur alterum illud signum à Medicis clinicis adeò cognitum , nempe quòd venæ sectiones celebratæ in casu stasium inflammatoriarum putridarum summo-perè debilitent ægrotantes , eorum simul exasperando dolores , & maturius accersendo delirium : dùm è contrà in casu inflammationis legitimæ , sanguinis missio ægrotantem statim recreat , viribus ejus parùm offiando , mitigando dolores & avertendo delirii periculum.

Ex suprà dictis de diagnosi inflammationum spuriarum facile est eruere diagnosim phlegmonis & erysipelatis legitimorum. Sufficit attendere ad characteres in eorum tumorum descriptione designatos , pag. 154 , agnoscendo tunc abesse prædicta signa spuriarum inflammationum. Quia verò inflammatio phlegmosa & erysi-

pelatosa mutuam quandòque patiuntur complicationem, aliasque varias: necessum est nonnulla hìc addere de signis earum complicationum diversarum, ad obtinendas speciales earum diagnoses.

1^o. Nempè phlegmo quandòque erysipelatosus est, erysipelasque aliquandò phlegmonodeum. Quotiescumque nimirum non cellularis solum tela laxior & pinguedine magis minùsve dives inflammatur, verum etiam pars quædam strictior membranæ vicinæ simul tentatur aliquantisper: toties dicitur adesse phlegmonem erysipelatosum, totiesque symptomata participant utramque inflammationem.

Vicissim, toties adest erysipelas phlegmonodeum, mixtis quoque utriusque affectûs signis dignoscendum, quoties pars strictæ membranæ non inflammatur sola, sed & quædam simul portio telæ cellularis vicinæ.

2^o. Aliquoties etiam occurrit phlegmo œdematosus dicta, tum erysipelas œdematosus; quandò videlicet unà cum apparatu phlegmonis aut erysipelatis concurrit aliquantulus apparatus aqueo-pituitosus in adiposis cellulis vicinis: sicut, vice versâ, adest quandòque œdema phlegmonodeum aut erysipelatosum, quoties phlegmonis aut erysipelatis levia signa adjunguntur pastaceo cujusdam partis infarctui, vestigia pressionis retinenti; qui ipse infarctus pastaceus si solus fuerit, jam meretur simplex nomen *œdematis*, de quo fusiùs cap. 26, ubi de cachexiis.

3^o. Aliquandò etiam accidit, sed rariùs, ut phlegmo & erysipelas vel externum, nonnihil gangrænosum contineat; quod sæpiùs erysipelati quam phlegmoni contingere nôrunt Practici. In utroque casu, cum inflammatio aliquatenus participet causam & genium inflammationis spuria, hujusque ideò signa quædam adjungantur communibus inflammationis veræ signis, instituenda

erit mixta quoque diagnosi , propter conjuncta signa utriusque mali.

4°. Demùm his inflammationum complicationibus adde , quòd phlegmo & erysipelas possint adhuc incidere cum ecchymosi. Quo in eventu diagnosi elicienda venit ex mixtis eorum malorum symptomatibus cum causis & symptomatibus ecchymosis , de quâ agendum erit , sectione II hujus articuli.

Quod nunc pertinet ad prognosim inflammationis cujusvis , ea quærenda est in diversis modis quibus inflammatio quælibet terminari capax est. Sunt autem hi modi numero quinque : scilicet *Resolutio* , *Suppuratio* , *Gangræna* , *Metaptosis* seu translatio , & *Induratio*. Quæ singulæ terminationes nunc perpendendæ incumbunt , ad hoc ut ipsis medullitus cognitis , quæsitæ prognosis reperiatur completissima. Sed antequàm omnia illa enucleentur per partes , non abs re erit hîc quædam prognostica subodorari generalia , tam respectu phlegmonis erysipelatisque legitimorum quàm erga stases inflammatorias putridulas.

1°. Dicimus stases inflammatorias putridulas ex se perquàm pronas esse sphacelosam in gangrænam certò lethalem , si malum illud nobilibus hæserit partibus ; sed eas nihilominus aliis quoque modis non rarò terminari.

2°. Phlegmonem magis inclinare versùs suppurationem : erysipelas versùs resolutionem. Sed in utrâque inflammatione resolutionem esse bonam.

3°. Suppurationem quidem satis tutam ut plurimùm esse externis in partibus , exceptâ erysipelatis suppuratione quæ ad minimum tædiosa est. Sed suppurationem internis in partibus frequenter esse lethalem per se : vel saltem ratione secundarii morbi ab illâ suppuratione oriundi , quia ille in mortem sæpiùs abit ; eamque in externis esse saluberrimam omnium terminationum , quando decubitus criticus datur.

4°. Pessimam esse terminationem per gangrænam; quandoquidem ista difficillimè curatur in ipsismet partibus externis : in internis nunquàm. Ad hæc , gangræna adducit sæpè sphacelum qui in externis aliquandò quidem potest sanari per ablationem partis : sed qui mors ipsa est in internis.

5°. Delitescentiam seu subitaneam evanescentiam inflammationis , græcè *metaptosin* dictam , bonam esse si fiat versùs partem ignobilem : secùs si versùs nobiliorem ; talemque terminationem in genere familiarem esse magis erysipelati quam phlegmoni.

6°. Ab induratione imminere scirrhum , difficillimè sæpiùs tollendum ; qui prætereà magis pertimescendus est vel minùs pro varietate affectæ partis , tum pro majore vel minori ejus sensibilitate : vel & pro mole , aut pro ejus propensione ad cancerum.

7°. Denique statuimus sequentia esse generaliter annotanda quoad eventus inflammationum compositarum. 1°. Phlegmonem & erysipelas invicem complicata, omninò subjecta esse prædictis generalibus prognosticis. 2°. Conjunctionem phlegmonis & erysipelatis cum œdemate , non adeò vergere ad suppurationem aut gangrænam ac mutua phlegmonis & erysipelatis compositio. 3°. Phlegmone œdemati adjunctâ constitui tumorem qui præsertim pronus sit ad scirrhosim : & qui longiorem saltem morbum faciat , quandò feliciùs persanatur. 4°. Demùm œdematosum erysipelas non tam facilè quidem delitescere ac aliud erysipelas quodvis ; at longiori semper durationi obnoxium esse.

His delibatis de naturâ & diversitatibus inflammationis , jam evolvendæ sunt singulæ illius terminationes quinque , singulis totidem paragraphis ; addito post paragraphum tertium & quartum appendice ; quorum prior de Carbunculo seu Anthrace :

posterior de Cancro ; nempe propter affinitates prioris cum gangrænâ : posterioris verò cum scirrhusi.

§. I.

R E S O L U T I O .

RESOLUTIONEM inflammationis fieri dicitur, quando pars sensim liberatur humore in illâ inflammato, absquè quòd ulla vasorum contingat ruptio saltem sensibilis, nec ullum in eâdem parte aut alibi supersit inflammatoriæ materiei vestigium.

Duplex resolutio distinguitur à Medicis. Alia sine crisi : alia, cum crisi. Cujus utriusque sequentem imaginem mente concipere veritati consentaneum est.

Resolutio fit sine crisi, quando inflammatoria materies valdè benigna aut pauca, leviterque impacta minorem propter irritationem, recuperat mobilitatem suam antequàm illa per moram degeneraverit ; adeò ut redeundo ad torrentem vitæ, ibi possit legibus illius obedire absquè necessitate ullius evacuationis. Quod aliquandò ita fit, quando incipiente inflammatione tollitur inflammatorius stimulus, ideòque non pergit augeri decubitus, minimaque ejus exordia diruuntur mediante promptâ resorptione. Sic incipiens legitima inflammatio, vel interna, per potentem venæ sectionem statim institutam edentatur & fatiscit : similiterque non rarò sine crisi cedit incipiens inflammatio biliosa perineumonica, efficaci emetico quantociùs adhibito. Confer aph. 18 sect. 4.

Resolutio verò fit cum crisi quando ipsi prævia est coctio, *pepsis* dicta apud Hellenas, ideòque contingit cum sensibili & necessariâ aliquâ evacuatione coctâ ; quæ evacuatio judicatoria dicitur apud Medicos seu critica, eò quòd reipsâ decernat de sorte ægrotantis.

Secunda hæc felix terminatio inflammationis absolvitur, quoties inflammatoria materies sic subigitur ac mutatur viribus vitæ, ut induat qualitates amicas, loco deleteriarum quas jam fortè habebat antequàm decumberet, aut quas saltem acquisiverat suo in foco. Ad quam mutationem efficiendam concurrunt sequentes potentia. 1°. Nempè febrilis calor generalis, si adsit; sed ille imprimis qui inflammato in loco semper accenditur ab adauctis ejus oscillationibus, citiorique sanguinis transitu. 2°. Mutua reactio caustica sanas inter & morbosas materies; quo in opere videtur adeps magnas partes agere. 3°. Vicinorum vasorum oscillationes ipsæ, unà cum naturali organorum *regimine*; quatenus scilicet hujus beneficio accersuntur possibilia omnia consentientium partium auxilia. Qui omnes facultatis sensibilis & irritabilis agentes (naturam dicunt), externis partibus famulantur perindè ac internis: sub hâc tamen generali conditione ut adjuventur ab humiditate ferosâ, quæ nec major nec nimia sit.

Mediantibus prædictis instrumentis inflammatoria materies peculiarem subit mixtionem & attritionem; vel & pars ejus magis nociva, si quæ fuerit, quoddam veluti accipit involucrium. Undè illa sic elaborata convertitur in liquorem valdè dilutum, penetrabilemque & innocuum, quin saucietur integritas vasorum in quibus illa inflammata fuerat.

Tunc temporis materies hæc docilis evadit deferri ad communem humorum oceanum, mediante facili resorptione: illaque torrente sanguinis abrepta devehitur & exportatur, haud secus ac pulverulentæ terræ averruncantur à diluvie pluviosâ. Ea inquam exportatur & eliminatur per varias viventis corporis cloacas, pro variâ affinitate suâ cum humoribus eas cloacas frequentantibus; vel & partim ab illis cloacis immediatius accipitur, ut probabile apparet ex summo vicinarum partium consensu

fenſu necnon & ex mutuorum humorum reſpectivâ communi-
catione ac penetrabilitate.

Prædictæ cloacæ reſolutionibus criticis obediētes , ſunt 1°. perſpirantia cutis vaſcula , reſpectu totius corporis. 2°. Via naſalis , gutturalis , auricularis , & rimæ ſphæno - maxillaris pro cerebro adjacentibusque partibus. 3°. Via expeſtorationis pro regione pleuriticâ , nonnihil ſæpè vomitûs ſuccuſſionibus adjuvantibus. 4°. Via inteſtinalis pro regione peritoneâ. 5°. Via uterina pro liberando utero. 6°. Demùm via urinaria , renibus quidem liberandis proximè dicata , ſed quæ reliquo ſimul corpori viam quoque criticam offert , ſicut competit perſpirationi ; quâ ratione ambæ illæ viæ ſæpiùs iisdem criſibus promiſcuè famulantur.

Quærenti quænam ſit natura inflammatoriæ materieï poſt coctionem ejus ? reſpondemus eam multùm accedere ad formam laudabilis puris de quo mox dicemus in particulari. Hæc analogia naturæ probatur ex eo quòd ſemper ſigna quædam puriformia appareant in urinis , dùm quædam criſis abſolvitur. Imò notum eſt , ea ſigna jamjam ibi ut plurimùm ſubapparere diebus aliquot antè diem quamdam ex *judicatoriis* ſeu *criticis* dictis nempè aliquâ die ex illis quæ *indicatores* vocantur. Quapropter , ex aph. 71 ſect. 4 ; *Quibus ſeptimo die , judicatur morbus , illis urina rubram die quarto nubeculam habet , aliaque ſigna pro ratione.* Quæ ſcilicèt urina cùm aliis ſignis *pro ratione* apparens , id eſt cùm ſignis aliis *pepaſmum* indicantibus , certò promittit *pepſim* ſeu coctionem jam potenter inchoatam eſſe. Quibus in circumſtantiis , dummodò vitæ vires ſufficientes perſtiterint , docuit obſervatio quòd brevè ſuccedat color albus ſeu purulentus ſedimenti urinarum , qualis conſtanter in urinis cernitur coctione peractâ ; quâ ratione , coacâ 586 non ſolùm laudatur ſubſi-

dentia rubra urinarum, sed & notatur celerem quoque judicationem ab albis urinarum subsidentiis designari.

Actio illa concoquens & efficiendæ resolutioni criticæ necessaria, quam naturâ suâ suppurationi valdè analogam dicimus, multò blandior est quàm suppuratio. Nequaquàm enim ab illâ destruuntur tenuiores cellularis textûs laminæ, sicut nec vasa in quibus exercebatur inflammatorius sanguinis transitus: dùm suppuratio contrarium importat. Quæ differentia fanè maxima est.

Hinc luculenter apparet cur resolutio cùm crisi faustissimum semper eventum adducat, dummodò fiat cùm sufficientibus coctionis signis. Alioqui enim morbus morte terminaretur, vel altero morbo. *Quæcumque absquè judicationis significatione disparent, inquit Hippocrates, lib. 2 de morb. vulgar. sect. 3, malè denunciant, velut in erysipelate quod Polemarchi ancillæ contigit, videre satis licuit.* Jamque paulò suprà dixerat: *quæ præmaturam judicationem dùm cruda sunt omnia occupant, morborum recidivas convehunt & solutionem omninò malam, aut propè nullam portendunt.* Nec unquàm mendax fuit illud effatum.

His signis bonæ coctionis resolutionem faustam renunciantibus adde, quòd aliqua posthàc debeat fieri evacuatio materiei coctæ cujusdam, seu per cloacam particularem, seu per generalem. Cui evacuationi quocumque modo officere nefas foret, ex aph. 21 sect. 1; quia nempè sic cohibitâ expulsione integrâ materiei coctæ, ea forsan ita fatigaret focum suum ut hujus perfectâ non fervaretur integritas; vel & indè oriretur dispositio ad simile malum, aut ad aliud. Eâ enim de causâ sæpè superstites manent quædam reliquiæ post judicationem, à quibus recidivæ creari solent, ex aph. 12 sect. 2; Verumtamen, *quæ judicantur aut judicata sunt perfectè, ea neque moveto, neque medicamentis, neque aliis irritamentis innovato, sed finito, sicut præcipitur aph. 20, sect. 1.*

Limitatur autem tempus intrà quod absolvi congruit illa inflammationis resolutio , illudque quatuordecim dierum esse ergà morbos acutos statuitur aph. 23 sect. 2 , non exclusis tamen judicationibus infrà dies septem aliquandò accidentibus , sicut nec illis quæ aliis decretoriis ab hinc diebus usquè ad vigesimum accidunt & ultrà. Sed ergà pleuriticòs morbos duratio hæc necessariò est dierum ad summum quatuordecim , per quos debent & resolvi & per sputa purgari. Alioquì malum in suppurationem vertitur , ex aph. 8 sect. 5.

Hæc sufficiant de resolutione inflammationis. Nunc ad suppurationem veniamus.

§. II.

S U P P U R A T I O .

SUPPURATIO vocatur conversio materiei inflammatoriæ in pus , seu mutatio decubitûs inflammatorii in abscessum.

Conversio hæc fit quandò inflammatoria materies forsan nimis copiosa aut spissior , vel aliundè resolvi impotens , sedem suam nimiooperè excitat , vicissimque ab istâ validius agitur. Tunc enim materies illa necessariò corripitur inflammatione potentiori , quia vividioribus verberatur oscillationibus , atque intimius promovetur. Quibus ita accidentibus , necessum quoque est fieri magis distinctum hunc sensum pulsationis quem sanguis pulsante motu actus excitat , arietando contrà vascula tunc magis depresso ab humore inflammatorio , qui magis expansus est propter majorem suum calorem.

Non mirum igitur si , contingente suppuratione , sensibile percipiatur augmentum symptomatum : nempe tumoris , caloris , ruboris , necnon doloris qui tunc valdè pulsans deprehenditur , majore simul factâ febre concomitante. Ideòque *dolores & febres*:

contingunt magis circa puris generationem, quàm eo confectò, ex aph. 47 sect. 2 ; quibus paucis verbis designatur naturalis epocha puris jamjam futuri, sicut & puris jam confecti. Quæ non solùm vera est respectu inflammationum acutarum de quibus loquimur : verùm etiam respectu chronicæ inflammationis illius quâ sensim corripuntur aliquandò tumores ipsi strumosi, aliique frigidi dicti, antequàm in peculiarem solutionem-abeant purulentam sibi ipsis propriam.

In prædictâ humoris inflammatorii conversione, non ea duntaxat omnia contingunt quæ mox docebamus fieri in humore simili, dùm ad resolutionem pararetur. Sed, mediante adminiculo earundem potentiarum efficacius agentium, cellulæ ipsæmet adiposæ, ut & adeps, tùm vascula vicina quæ in promiscuo habebant inflammationem, præterà patiuntur peculiarem dissolutionem ; quatenùs nempè ea omnia promiscuè detrita, mixta, penetrata, involuta & subacta abeunt in pus : in hunc inquam humorem singularem, blandum, album, inodorum, subpinguem, æqualem & aquâ specificè graviolem, qui suâ in mixtione recondit omnia veluti rudera prædictorum organorum & humorum.

Consequenter, peracto suppurationis opere, remanet cavitas pure plena, loco decubitûs inflammatorii ut dictum est detriti : dùm ibidem nihil non integrum forsan superest, bonâ resolutione absolutâ. Haud aliter ignis qui manducandas carnes duntaxat coquit vulgari in ollâ, ossibus intactis : easdem carnes Papinianâ in machinâ multò potentiori dissolvit penitùs, ipsis simul ossibus emollitis, partimque solutis : illeque easdem concremaret, si ipsi liceret immediatum per contactum. Ex quâ comparatione intelligendum venit, quomodò liquor ille pus dictus, confectus à naturâ victrice beneficio inflammatorii ignis,

differat ab illâ sanie purulentâ, acri, rodente, variegatâ, fluxiliori ac fetente : quæ, quasi per concremationem humorum, fabricatur ab igne inflammatorio ardentiori ; quandò nempè natura huic igni resistere impar, ipsi proindè nequit congruum impertiri modum.

Quantùmvis verò perfectâ suppuratio eveniat, ea totum sæpè decubitus non omninò dissolvit, sed aliquam in ejus circumferentiâ relinquit portionem posthàc suppuraturam aut resolvendam. Hoc præsertim fit in inflammationibus mali moris, quales sunt strumosæ ; tùm in aliis quæ sæpè pravum induunt characterem propter nimias venæ sectiones, aut incongruorum topicorum applicationem. Quibus in casibus aliquod residuum quandòque remanet, capax schirrosam contrahere naturam aut alteram deindè similem advocare inflammationem ; vel & quod sensim in sanguinem possit resorberi, varios postea metastaticos effectus producturum.

Sed quod mirabile ! peractâ, uti dictum est, suppuratione integrâ, omnia mitescunt symptomata quæ accidente suppuratione sæviebant ; tuncque prætereà, si factum fuerit pus blandum & laudabile, quale suprâ descriptum fuit : illud remanet aliquandiù conclusum in foco suo, ubi circumvallatur à partibus ambientibus vitali suo nisu resistentibus adversùs ulteriorem suppurationem. Undè, si purulentus ille focus non aperiatur longiorem post moram, non datur magna occasio paulatinæ vicinarum partium suppurationi ; adeò ut pus prædicto modo confectum atque collectum, aliquandiù fermè innocuum stagnet in parte suppurationem passâ.

Sed contrariâ in suppositione, in casu videlicet puris saniosi & pravi, aliter se res habet. Nec alibi quærendum est cur & quandò suppuratis in partibus accidant erosiones variæ, aut

effodiantur varii sinus illi cuniculosi, gallicè dicti *des fusées*. Quinimò attendenti quoque patebit, cur ea detrimenta præprimis fiant versùs partes teneriores ac decliviores, sicut optimè nòrunt periti Chirurgi; neque etiam latebit via & successiva progressio purulentarum emigrationum quæ de proximo in proximum obtingunt, imò & quandòque ex unâ cellularis textûs regione in aliam.

Ad hæc; eodem ipso processu quo natura mechanicè producit prædictas erosiones, ea continuò molitur spontaneam aperturam abscessûs facti; sicque illa tentandam attento artifici viam indicat. Quinimò mechanicum illud molimen, seu tacita naturæ machinatio, præsertim instituitur circà locum minùs resistentem; eâque ratione citior contingit formati effusio puris, quandò illud ex artis industriâ non evacuatur. Consequenter suppuratio reapsè spectanda est veluti quoddam vitæ instrumentum, quo natura diligens utitur ad evellendos humores nocuos alicubi hærentes, sicut & corpora ipsa peregrina fortuito casu accepta.

Ex hoc benefico suppurationis benignæ genio haud difficulter resolvere est, quòd illa externis in partibus felicissimam plerùmque sanationem promittat; imo quòd ipsimet resolutioni sæpiissimè anteponenda censeatur, quandò nimirum aliquod latet peregrinum corpus, aliquodve dolosum miasma, seu contagiosum seu criticum.

Verùm aliter censendum est de suppuratione viscera occupanti, sicut & de illâ quæ altis in carniû recessibus latefcit; hæc enim sæpè sæpiùs funesta est propter consequentias suas: altera ferè semper lethalis.

Alicujus itaquè visceris suppuratio singulares primùm sæpè adducit leipothymias periculosas ubi jam rumpuntur claustra ejus, ex aph. 8 sect. 7; eaque etiam certam inducit mortem,

nisi felici naturæ curatricis nisu superveniat integra puris purgatio per locum ad hanc expulsionem aptum; nisi que purgatio hæc certo quodam absolvatur temporis lapsu, qui est dierum quadraginta ex quo ruptio facta est in pleuritibus suppuratis, ex aph. 15 sect. 5. Verùm enim verò, aliis in visceribus suppuratis, ea purgatio non adeò feliciter absolvi licet ob defectum dispositionis æquè idoneæ ad perfectam puris evacuationem; eaque ratione, ægrotantes ita affecti sat citò sæpiùs intereunt, vel ad minimum tabidâ lentâque morte moriuntur. Qui & eventus adhuc certior, ubi ex purulento foco diutiùs recondito tandem educitur graveolens amurca loco puris albi & boni, sicut generali dogmate traditur, aph. 43 sect. 7: specialiter verò de suppurato jecinore, aph. 44 sectionis ejusdem.

Quoad suppurationem quæ suū indicia non dedit, eò quòd latuerit profundis sub carnibus aut produxerit pus nimis spissum, de quâ aph. 41 sect. 6, ea quoque suos patitur manes. Varia siquidem ex illâ suboriri mala solent, qualia sunt abditissimi cuniculi, conversio puris in saniem, ossium denudationes cariesve, tum purulentæ metastases, præter febres admodum chronicas & periculosas.

Hæ sunt essentielles considerationes circa suppurationis theoriam & genium. Sed operæprecium duximus hîc etiam memorare suppurationem gravibus vulneribus necessariam; sicut & illam quæ circumcidendis partibus sphacelatis famulatur, ut & escarrhis quibuscumque. Dicemus deindè quomodò sit intelligenda carniū regeneratio.

Quoad suppurationem vulnerum, ita illam fieri concipimus. Quandò partis alicujus simplex tantum divisio facta est ab instrumento optimè secante, si labra vulneris probè mundati ad se approximentur, eaque contineantur sic ut pars disposita sit

velut antè vulnerationem; tunc simplex illud vulnus fat citò concrefcit folius naturæ artificio, abfqùè fuppuratione valdè fpectabili; nam tunc nonnullum dumtaxat ros lymphaticum exindè emittitur. Ubi verò gravi vulnere fauciatae sunt partes ab inftrumento imprimis contundente: tùm ubi facta eft aliqua deperditio carniùm: tunc fanatio non obtinetur fine auxilio fuppurationis; quæ eò copiofior erit & durabilior, quò major carniùm deperditio fuerit & quò major fortè contufio: præter alia permulta quæ vulneribus adjungi poffunt impedimenta, de quibus hìc non agendum.

Hæc vulnerum fuppuratio (ut & ea quæ fphacelos & efcharras educit) hoc modo intelligitur fieri, illiusque effectus funt fequentes. Nempè ubi pars quædam fphacelo vel efcharrâ afficitur, tunc utrumque (peregrini corporis ad inftar), inimicum evadit vicinæ fenfibilitati & irritabilitati, atque ideò vices gerit perennis cujufdam mechanici ftimuli (feu illum ftimulum præftet pondere fuo vel duritie, feu quâdam pravâ aut virulentâ qualitate), cujus ope inflammatio excitatur, neceffariò fuppuratione. Similiterque, ubi vulneratae carnes paululùm aruerunt ob effufionem roris lymphatici quod vulneris labra undiquè plorant, expulfo priùs eorum fanguine: in iis fubnafcitur irritatio perindè inflammatoria, per quam fuppuratio, æquè neceffaria ac inevitabilis mechanicè accerfitur, ficut in cafu fphaceli aut efcharræ.

Vulnerata nimirùm pars, ob inanitatem fuam *aliquantulùm reficcatur & incalefcit*, ficque vicinas exftimulat partes, ficut illam fuo quoque modo irritat & fphacelus & efcharra. In his porrò circumftantiis partes illæ fic irritatae, *ex vicinis, tùm venis, tùm carnibus humiditatem ad fe trahunt* (ut verbis Hippocratis utar), *cùmque attraxerunt, intumefcunt & inflammantur.*

Eæ siquidem partes plenius ob hanc causam onerantur ac distenduntur à sanguine appellente ; & consequenter sensibilitas loci ut & irritabilitas , potentiùs impelluntur ad agendum. Verùm enim actio illa nequit major existere , quin localis sanguis cogatur citius hanc transire , fortiozem simul experiendo quaffationem ; quorum fanè effectù , quædam portio sanguinis illius vicinas in cellulas exprimatur necesse sit , sicut ad inflammationem ciendam requisitum esse suprà docebamus.

Si quis nunc quæsierit cur ea escharræ aut sphaceli circumdata inflammatio necessariam obtineat suppurationem , sicut & inflammatio vulneri accidens ? responsio facilis est. Cùm nempè , irritato apparatu inflammatorio tunc præsentì , impossibile sit sphacelum ut & escarrham reviviscere beneficio resolutionis , aut suppurationis : quia scilicèt vita in iis abolita est ; & cùm pariter nequeant vulnervis labra ferruminari , eò quòd ea semper sint plus minùsve contusa , lacera vel detrita , atque ideò in iisdem vita penè sit destructa ; nemo attentus non resolvat lubens , suppurationem tunc inevitabilem ac necessariam esse.

Quandiù nimirum prædicta adsunt impedimenta ab escharris aut vulneribus oblata , tandiù subest continuus inflammationis stimulus , quo mediante indefinens quoque inflammatio fovetur , continuò deinceps perennatura , dummodò vitæ valeant vires , nihilque ex parte medicationis obstiterit. Quæ igitur inflammatio , sic reproducta ac perennis , viget quousquè ea tandem in suppuratum abeat & quidem necessariò , quoniàm ea resolvi omninò indocilis ac impotens est. Non alio enim præter suppurationem pacto , assignata sinunt se depelli impedimenta ; exindèque patet cur nulla escarrha nullusque sphacelus tolli possit , sicut nec vulnus perfanari ullum , sine auxilio suppurationis.

Ex prælibatis ratiociniis alia practica consecutio haud operose deducitur. Nempè malum ingens imminere, quandò nullus inflammatorius creatur calor in circumferentiâ sphaceli aut escarrhæ, sicut nec in vulneribus. Undè illucet ratio cur, ex aph. 66 sect. 5, *si, magnis & parvis vulneribus, tumor non conspiciatur, ingens malum.* Quia videlicèt ibi pariter deest vitalis ille apparatus necessariæ suppurationis, quâ mediante rescindatur id quod ex vulnerum labris subluendum atque exstirpandum est, ad hoc ut disponantur ad cicatricem suscipiendam. Talis namque dispositio non pendet solum ex prædictâ solidarum aliquot laciniarum deterfione; sed & in eo præprimis consistit, quòd mediante vulnerum suppuratione eorundem labra sensim veluti exhausta deprimantur, nonnihilque tabescant; quam ob causam ea fundo vulneris proximiora evadant, minorem hoc pacto superficiem oblatura faciendæ cicatrici.

Quod hìc dicimus de ulceribus externis, illud idem intelligendum de internis. Nec aliâ ratione observatur empyicos curari nullos, nisi transitoriam experiendo emaciationem, quæ fit dùm ii congrua per loca purgantur; indèque patet veteres Medicos rationabili consilio admisisse balsama, plantasque extractivo-resinosas, numero pharmacorum generandæ cicatrici faventium.

Sed ut redeamus ad examen tumoris calidi vulneribus tam necessarij, de quo agitur aphorismo citato: admonere convenit eos non semper advocandæ suppurationi idoneos enasci in vulneribus. Sæpè siquidem contrarium evenit; seu propter majorem contusionem; seu propter pravam vulnerati idiosyncrasiam; seu demùm, propter incongruam administrationem pharmacorum, tum externorum cum internorum.

Vulneribus autem magnis & parvis accidente tumore pravo, indè fit sæpè ut nulla suppuratio vel difficillima duntaxat

oriatur, eaque spuria & faniosa, potius erosioni creandæ idonea quàm ad cicatricem invitandam. Undè operæprecium est cognoscere in vulneribus, perindè ac in cæteris inflammationibus quibuscvis, quinam sint tumores boni, quinam mali. Hanc porrò diagnosim solitâ brevitæ suâ Hippocrates tradidit dicens aph. 67 sect. 5, *molles tumores boni, at crudi mali*. Crudi siquidem tumores seu duriores, nec aptè concalescunt, omninò inhabiles sunt ad suscipiendam suppurationem tunc temporis necessariam, sicut nec ad resolutionem; ideòque tumores illi potius valent gangrænâ invehere in casu vulneris, aut ipsam indurationem vel suppurationem pravam: sicut iisdem de causis nocerent cuilibet inflammato decubitu spontaneo. Quinimò ii tumores vulneribus accidentales debent ad certum tempus esse constantes, ad hoc ut materies ibi deposita elaborari valeat, nullaque funesta superveniat metastasis. *Quibus à vulneribus tumores conspiciuntur, ii non maximè convelluntur, nequè insaniunt. At iis derepentè evanescentibus, iis quidem, quibus à tergo ulcera fuerunt, convulsiones & tetani fiunt. Quibus verò in anteriori parte, insania, aut lateris dolor acutus, aut puris collectio accidet, aut dysenteria, si tumores fuerint rubri.* Quæ documenta aphorismi 65 sect. 5, quoad majorem saltem partem quotidiano firmanur eventu.

Quod nunc spectat carniū regenerationem quæ blando sub pure patrari vulgò traditur, ea forsan valdè dubia est, vel saltem æstimata criterio minimè accurato. Quantum mihi observare licuit dùm chirurgicis rebus operam dedi, illud vitæ officium frequenti modo absolvi mihi apparuit; nempè quòd, dùm labra vulneris putantur minùs spissa fieri, vel & ulcus minùs profundum, ea certè non contingant quia carnes novæ fundum ulceris adimpleverunt: sed rem potius ita apparere intuenti, eò quòd (exhausto cellulari textu vicino per suppurationem.)

tenuiores duntaxat fiant limbi ulceris, quia macrescunt; adeo ut ulcus videatur carnibus novis repletum, dum tamen mutatio ejus profunditatis non aliunde procedit, quam à subsidentiâ ejusdem limborum. Haud alio pacto, ut opinor, veluti complanatur ulcus quodlibet antequam cute obtegatur; neque aliunde trahenda videtur depressio magis vel minus sensibiliis, quæ deprehenditur in cicatrice ulceris superficialii aut profundioris; exindèque patet cur vulnera profundiora tam difficilè perveniant ad cicatricem, quando illa debitam per artem congruè non fuerunt dilatata.

Exindè quoque æstimare licet maximam hanc cicatricis difficultatem, quæ propria est ulceribus magis cavis, præsertim quando ea circa fundum suum rotundata sunt. Tunc enim, non solum major deperditio carniū impedit quominus fundum ulceris tam citò adæquetur superficiei cutis, irritâ subsidentiâ labrorum ejusdem: sed & figura hæc circularis ulceris vetat mutuam renascentis utrinquè cutis interstructionem & agglutinationem. Certum enim est, eam junctionem multò facilius citiusque perfectum iri oblongo in ulcere, quia in hoc fermè ubiquè est æqualis distantia parietum, fermèque ad punctum redacta in illius fundo.

Allatis rationibus addatur illa quæ ex puris stagnatione deducitur: nempe quod pus, stagnatione suâ in ulcere profundiori, necessariò abeat in faniem quæ sic erodat carnes, easve callosas faciat, ut ulcus longas quandòque per moras respuat cicatricem. Neque stupendum in eâ difficili sanatione. Tunc namque cicatrix enasci nequit, antequam area ulceris amplificata fuerit beneficio ipsiusmet erosionis, ad hoc ut ulcus minùs aptum evadat retinendo puri, cessentque ab illo labefactari carnes. Tunc itaquè ulcus naturali hoc artificio minùs profundum apparet

respectivè ad latitudinem suam ; factæque ideò meliores ejus carnes putantur repullulavisse. Sed re attentius perspectâ apparebit , ulcus lento duntaxat passu amplificatum & mundatum , suo quadamtenùs æquatum fuisse solo , satisque vivas evasisse carnes ut cicatricem admittere queant.

Sed tunc necessum est cicatrices eas coriaceas durasque esse , imò & valdè cavas , præter mala quæ ex ulcere antiquo impendebant suppositis partibus. *Ulceræ enim annua quæcumque fiunt , aut longius tempus detinent , in iis os abscedere est necesse , & cicatrices cavas fieri* , ex aph. 45 sect. 6 : neque abstrusa ratio est. Nam ex dictis jam patuit origo fœditatis & cavitatis cicatricum antiquis ulceribus advenientium ; prætereàque facile advertere est , quòd his in casibus sanies sensim valeat vicinorum ossium tenuissimam absumere pellem , atque ita immediatis tandem moribus suis scalpere ipsammet ossium substantiam ; quæ ideò cariem contrahit magis vel minùs gravem , pro quantitate ossis quæ sphacelosa fit ob mortem vasis suis nutricibus illatam.

Præter allata optandarum cicatricum discrimina , supersunt alia benè plura quibus ulcera quandòque etiam veluti æternantur. Talia sunt , 1º. peregrinum quoddam corpus in vulneribus ulceribusque relictum. 2º. Præpostera membri affecti positio aut deligatio. 3º. Turgentia leucophlegmatica textûs cellulosi , sicut de hydropicorum ulceribus optimè monetur aph. 8 sect. 6. 5º. Deniquè diætâ malè ordinata , præcipuè si ea justò tenuior sit ; quod enim mali contingit à diætâ , id gravius fit in tenui quàm in paulò pleniore victûs ratione , ex aph. 5 sect. 1. Sed cum ista ad praxim præprimis chirurgicam pertineant , diutiùs in eis non immorabimur.

Gratiâ ordinis suscepti , hîc exponenda foret prognosis supurationis. Verùm nè crambem recoquere videamur , ea pu-

tamus satis esse quæ superius dicta fuerunt varios suppurationis eventus enucleando. Nunc deveniendum ad medicam gangrænæ theoriam.

§. III.

G A N G R Æ N A.

GANGRÆNA vel mortificatio vocatur ea inflammatae partis affectio, quæ pendet ab intercepto sanguinis fluxu per arterias & venas illius, sufflaminato simul ejusdem partis sensu & motu.

Si gangræna diutius perennet, adeò ut non solum affectû in parte cessaverit sensus & circulatio, verùm etiam restitui jam ibidem nequeat quæcumque solidorum actio, propter inceptam destructionem eorum simul & humorum sistitorum: superstitè tamen vitâ reliquis in partibus; hic status audit nomine sphaceli, qui proindè spectandus est tanquàm gradus gangrænæ maximus.

Inflammatiò quæcumque spontanea, ut & ea quæ vulneribus propria est, gangrænâ potest terminari seu morte partis. Hoc contingit quandò extravasatio, irritatio, tumor, rubor, dolor, calor, pulsatio tam magna sunt: vel & humor hærens adeò tenax & acer: aut pars adeò lacera, contusæ & atona: ut sensibilitas atque irritabilitas tandem fatiscant in parte inflammatâ. Tunc namque ibidem cessante omni actione, sanguis cogitur & quiescit in eâ parte, quæ ideò verâ obstructione mortiferâ tentatur; cessante ibidem rubore, calore & pulsationis sensu: quandòquidem ea pendebant à motu vitâli & sensibilitate, quæ tunc absunt.

Quòd si prædictus aggravetur status, accidit ultimus gradus gangrænæ, sphacelus dictus, qui est ipsissima gangrænatae partis corruptio, sicut statutum est in ejus descriptione.

Sæpè gangræna, ut & sphacelus, spontè superaccidit ob

pravum spontaneum statum partis inflammatae, vulneratae, aut contusae supra designatum, & ex quo mors ejus advenit. Sed & heu! saepissimè mortifera hæc terminatio invitatur mediante præposterâ tractatione; sive hæc erraverit in deligationibus & incisionibus; tum in peregrinorum corporum neglectu aut imperitis eorum extractionibus; sive in adhibitione topicorum maligniter repercutientium aut nimiooperè relaxantium; sive demùm in administratione auxiliorum internorum, necnon venæ sectionis ipsius.

Factâ gangrænæ consideratione ab ejus initio usquè ad sphacelum imminentem, signa ejus hæc sunt: 1^o. Sublatio signorum inflammatoriorum, absentibus simul signis resolutionis; 2^o. integra sensûs & motûs ablatio in parte affectâ, cujus pondus adauctum patienti videtur; 3^o. color partis, antea valdè ruber, nunc verò fuscus, lividus, imò & nigricans; 4^o. deniquè mollities, frigus & flacciditas partis veluti oedematosa factæ, sæpèquè pustulis refertæ variis: quibus signis prædictis perfecta designatur gangræna, jamque ideò imminere sphacelum.

Signa sphaceli jam præsentis primò igitur complecti debent signa perfectæ gangrænæ. Sed præter integram ablationem sensûs & motûs partis ejusque colorem fuscum & subnigrum, tum præter frigus & mollitiem: datur ibidem separabilitas cutis, necnon cadaverosus fetor, corruptioque omnia depascens adusquè ossa: aliquandò contingente mirabili siccitate partis, penè sicut in affervatis Ægyptiorum medicatis corporibus. At verò d' m hæc omnia succedunt inflammatae **parti**, suboritur tandem in ejus vicinitate inflammatorius dolor novus, si vires vitæ valeant: qui excitatur propter novam irritationem à sphacelo illatam, sicut fieri observavimus, ubi de suppuratione sub escarrhis nascente.

Diagnosîs gangrænæ & sphaceli facilè eruitur ex prædictis eorum descriptionibus. Quod verò spectat eorundem prognosim, ea varia est pro varietate sedis & causarum, tum pro vario gradu & extensione utriusque mali. In genere ipsa gangræna pessima est quidem, sed sphacelus multò pejor. Quod ut intelligatur, necessum est de utroque statu paulò fusiùs differere.

Gangrænam sphacelo minùs funestam esse probatur ex sequentibus. Cùm nempè illa nullam aliam adhuc supponat inflammata in parte mutationem, præter suspensionem vitalis motûs sensûsque sicut & symptomatum ab illis facultatibus pendentium: non adhuc impossibile est hunc motum restitui simul & sensum, dummodò gangræna fuerit recens, minùs gravis, ejusque causa docilis debellari. Tunc itaque gangrænosa pars de integro fermè liberari potest, seu beneficio resolutionis cùm crisi, seu auxilio bonæ suppurationis, de quibus suprâ egimus.

Sphacelus è contrâ multò pejor. Præter apparatus gangrænosum, humores & solida loci affecti jam incipiunt intimè corrumpi, ipsis non exceptis ossibus; ideòque debellari nequit sphacelus quin omninò separetur à vivis illud totum quod emortuum ac corruptum est: non parcendo ossibus ipsismet. *Ex syderatione* (id est ex sphacelo), *os obscedit*, inquit Hippocrates aph. 79 sect. 7, optimè gnarus vitam ossium pendere à vitâ carniû; neque proindè ignorans, imò & ibi præcisè indicans portionem sphacelati ossis necessariò separandam esse à vivâ, quia funditùs corrupta est perindè ac carnes, atque ita vitæ novæ pariter impotens.

Prædicta sphacelatae partis separatio à vivis, etiam in osse adducitur mediante illâ inflammatione statim velut lineari, quæ sphacelum mechanicè circumdat ut & escarrhas; hicque felix eventus procedit ex eo quòd necessaria illa inflammatio suppurationem

purationem quoque necessariam contrahat, propter rationes recensitas ubi de suppuratione. Quinimò sola hæc spontanea separatio ipsamet ossa rescindit cum integro artu si sphacelus soli naturæ auferendus committatur, sicut fieri congruum est in certâ gangrænæ specie de quâ mox pauca erimus dicturi. Cui saltem sphacelo separando perita manus non audet opitulari, nisi quandò separatio naturalis jam penè absoluta est, & cum cautelis ibidem infra referendis.

Sed cum agitur de vulgari sphacelo vulgaribus inflammationibus externis accidente, ubi primùm limites ejus apertè videntur indicari, quantociùs industria amputatio ejus facienda incumbit. Quâ mediante arte ægrotans servatur, dummodò vires ejus valeant fovere suppurationem obtinendæ sanationi necessariam. Undè iterùm plànum est, quantum sphacelus pejor sit gangrænâ, & quare internis in partibus nullâ vi naturæ vel artis ille sanari sese permittat.

Nunc memorandæ supersunt peculiare alix gangrænæ, sanè priori similes quoad essentiam, sed ortu & progressu non parùm discrepantes. 1°. Occurrit sphacelosa illa gangræna quæ ab adurente frigore producitur. 2°. Gangrænæ oriundæ ex applicatione & insertionem quorundam venenorum. 3°. Deniquè ea gangræna quæ suam trahit originem à singulari ipsorummet animalium humorum qualitate, vices gerente inquilini cujusdam veneni.

Gangrænæ per frigus inusta, talis est effigies, progressio & diagnosi. Statim pallor oritur à frigore, & deinceps rubedo quam comitatur punctorius dolor va de molestus vel & pruritus ingens; quibus gangræna præsens indicatur. Hæc verò protractâ, adaugetur partis rubedo eaque sæpè saturatissima evadit: succedente posthàc nigritudine monstranti adesse sphacelum ad ossa usquè.

Ad gangrænâs ex veneno peregrino subortas pertinent illæ

gangrænæ magis vel minùs graves quæ contingunt ob accidentalem quarumdam venenatarum squalidarumve rerum applicationem, & quæ majorem minoremve extirpationem exposcunt, cum majore vel minori vitæ periculo. Talis est gangræna quæ spectatur in carbunculo à quâlibet causâ orto, de quo mox dicturi; tùm illæ quas advocant variarum bestiolarum venenati morsus, quorum enumerationi brevior hæc pagina non sufficeret; præsertim, si per tempus & sat numerosas observationes liceret id quodcumque à veritate secernere quod fabulosum est; sicut factum est à sagacissimo Abbate Fontana, respectu morsûs viperini. Ille enim imperterritus periculorum experimentorum observator demonstravit, quòd ille quidem latex flavus, qui per canaliculum dentis viperini instillatur in vulnus tempore morsûs viperæ, venenatam vim obtineret in omnibus animantibus calido sanguine donatis; ea nempe animantia omnia & singula ab hinc laborare mirabili morbo naturæ nonnihil gangrænosa, demorsâ in parte præsertim sævienti, physicamque vitam magis vel minùs perturbanti. Sed simul compertum fecit laudatus Vir quòd, quamvis ab hoc morbo certissimè occiderentur aviculæ omnes tùm juniores columbæ & cuniculi, jam non interirent cuniculi adulti sicut nec molossi canes, cæteraque grandiora animantia. Proindèque iisdem experimentis planum atque inconcussum remansit, animantia viperino veneno superiora esse prout illa majori corporis mole gauderent: exceptis tamen felibus, quarum robusta ferocitas tam abundè supplet molem corporis, ut felis una irritos faciat morsus trium viperarum iratis dentibus illam arripientium.

Gangrænæ demùm quæ sphacelosam humorum inquilinorum naturam agnoscunt pro causâ, sunt gangrænæ illæ sicca & pessimæ quas solemne est præsertim oriri ex usu fecalis cornuti,

gallicè dicti *seigle à ergots* ; tùm aliæ ferè similes , aut naturæ humidæ , quæ præprimis nascuntur apud senes debiles & segnes : seu abusu epularum opipararum : seu propter sanguinis eorum acrimoniam ; tùm deniquè gangrænæ illæ singulares quæ quandòque scaturiunt ab aliquibus causis valdè extraordinariis ac pestilentibus , quas referre licet ad carbunculum , de quo agemus appendice infrà annexo.

Quod spectat imaginem earum portentosarum gangrænarum , sufficiat brevis hæc notitia , cujus ope distingui possint à gangrænis vulgaribus quæ partes primitus inflammatas aggrediuntur. Gangræna sicca sæpius statim prodit signa perfecti sphaceli quo digiti pedum quàmprimùm occupantur , membrumque deinceps integrum ; eaque ab ipsis sæpius initiis maximam inducit corporis debilitatem , nullâ unquàm prægressâ inflammatione. Illæ verò quæ naturæ humidæ sunt , incipiunt plerùmque à tumore flaccido & variegato qui brevè dat signa perfectæ gangrænæ , pulsu quandòque haud mutato.

Quod spectat prognosim prædictarum gangrænarum portentosarum , sciendum est 1°. gangrænas siccas minimè sanari posse nisi beneficio separationis mortui à vivo , haud secùs ac sphaceli ex inflammatione oriundi ; quia illæ naturâ suâ sphacelosa sunt. 2°. Idem censendum esse de gangrænis humidis , quandò evadunt perfectæ & ad sphacelum evehuntur. 3°. Demùm pariter terminari gangrænam à frigore ortam , si adusquè sphacelum processerit ; sed eam sanari & partem affectam sat citò restitui , simodò primis sub initiis congruè tractetur : applicatâ scilicet aquâ congelationi proximâ , deindèque purâ ipsâmet nive.

Sed advertendum separationem gangrænarum siccarum soli naturæ committendam esse , ut jam diximus ; proindèque illam ferro nusquàm tentandam : nisi fortè peritâ tandem manu opus naturæ ,

moxmox absolvendum, sic queat ad exitum paulò citiorem perducì. Nam observare est 1°. quòd hujus gangrænæ terminus nequaquàm cognosci possit nisi beneficio circuli inflammatorii; 2°. quòd in amputatione naturali, sæpè ossa separentur altiori ex loco quàm ille in quo membrum artificialiter fecari liceret. De hâc re consuli meretur egregius Tractatus de gangrænâ, Auctore Medico Quesnay. *Paris* 1749. in-12.

A P P E N D I X D E C A R B U N C U L O .

CARBUNCULUS seu anthrax, gallicè *le Charbon*, est peculiaris tumor de genere inflammatorio qui optimè describitur apud Celsum, lib. 5, cap. 8. Sed in hoc differt ab inflammatione vulgari, quòd ille nullatenùs resolvatur unquàm neque suppuratur, semper verò sphacelosam abeat in escarrham, cui evellendæ circumnascens famulatur suppuratio.

Anthrax seu carbunculus est tumor circumscriptus, depressus, ruber, renitens admodùm, initio pruriginosus, deindè verò perquàm dolens, calore ut plurimùm intenso stipatus, escarrham in parte faciens: cùm vesiculis in ejus apice tandem accidentibus, quibus apertis nigredo sphacelosa subtùs latens referatur.

Terribile malum illud producitur à causâ externâ vel ab internâ. Fit ab internâ causâ quandò febrile aliquod deleterium miasma impetu quodam critico aut symptomatiko exploditur ad aliquem cutis locum, in quo sensibilem inurit escarrham, cujus ope tollitur illius loci sensus. Quo eventu accidit ut miasma illud prædictâ in escarrhâ sepultum, jam non exerceat vim suam; adeò ut, si possit illud ibidem totum deleterium deponi, deindèque abhìnc evelli mediante suppuratione, anthrax ipsemet quoad multa medeatur anthraci. Tales bubones observantur in

peste ipsâ , necnon in febribus quibusdam epidemicis & malignis nostratibus , quæ carbunculis quàm malignis aliquandò etiam stipantur. Nec absimiles erant carbunculi qui Cranone grassabantur per magnos æstus , continentisque pluvias austrinas , de quibus Hippocrates lib. 2 de morb. vulg. sect. 1 ; ibidem asserendo se & vidisse partes ipsasmet internas iisdem bubonibus tentatas fuisse. Similesque erant illi qui pestilentem comitabantur constitutionem , de quâ idem observator , ibid. lib. 3 , sect. 3.

Nascitur verò anthrax ab externâ causâ & quidem sæpiùs , propter alicubi infixum quoddam venenosum miasma , seu profapiæ animalis fuerit , seu vegetabilis. Profapiæ inquam animalis , quale per puncturam aut morsum animantis cujusdam inferitur : vel & quale later in putridis quibusdam animalibus emanationibus quæ per contactum intussusceptæ fuerunt , aut longioris fomitis occasione. Vegetabilis verò naturæ , ubi malum illud ingeneratur ab infixâ sicciori & maleficâ cujusdam plantæ spinâ , vel ab accepto ejusdem succo acri-aromatico. Qui anthrax productus ab utrâque causâ externâ , illud ipsum malum est quod vernaculè dicitur *pustule maligne* apud Sequanos & Burgundiones.

Sedes anthracis ab externâ vel internâ causâ exorti habetur in cute , necnon in membranâ adiposâ huic subjectâ , sed præterea glandulas aggreditur anthrax causæ internæ ; ille verò qui viscera febricitantium occupat , sedet in eorum viscerum superficie. Sed inter duas anthracis species datur discrepantia multiplex valdè notabilis , sicut mox apparebit.

Nempè 1°. anthrax oriundus ab internâ causâ singulas corporis partes aggreditur , sæpèque partes glandulosas : dùm anthrax causæ externæ nudas dumtaxat corporis adit partes , videlicet faciem , collum , manus , brachia , necnon superiorem thoracis

partem apud femellas ; tùm pedes & tibias eorum qui nudis hisce partibus operantur.

2°. Anthrax febrilis , seu symptomaticus sit seu criticus , sæpè sub initiis suis patitur metastasim : dàm anthrax ortus à causâ externâ nunquam delitescit.

3°. Deniquè , anthrax febrilis satis celerem semper obtinere videtur symptomatum suorum progressionem : dùm ille qui externæ causæ debetur , plures per dies aliquandò manet sub larvâ parvulæ pustulæ , quæ tummodò pruriginosa ac duriuscula est sine magnâ mutatione cutis , sed maximas deindè actura tragoedias.

Quoad cætera , tres hoc in morbo status agnoscuntur à Practicis. Primus habetur quandò nihil adhuc apparet nisi tumor parùm eminens , suaptè durus , pruriens , calensque. Secundus , quandò hic tumor abit in escarrham nigri coloris , magis vel minùs quandòque serpentem , latentemque sub parvulis vesiculis quæ in ejus apice nascuntur. Tertius demùm , quandò tumor corripitur inflammatione circumvallante & suppuratoriâ , cujus ope obtinetur prædictæ escarrhæ avulsio.

Prædicti tres status carbunculi quandòque labuntur spatio horarum viginti-quatuor aut paulò longiori ; quo tempore æger languidus est ac plerùmque somnolentus , cùm pulsu debili necnon febre. Eaque omnia eveniunt cùm tanto vitæ periculo , ut mors sæpè contingat intrâ breve admodùm tempus. Verùm in carbunculo causæ externæ multò segnior quandòque datur morbi progressio ; illeque , ut jam innuimus , aliquandò latet per plures dies sub larvâ cujusdam pustulæ quæ in statu quasi indifferenti non rarò manet per dies duos , tres , quatuor , aut quinque. Sed ubi malum hucusquè cunctabundum fuit , brevi tandem tempore caput suum extollit. Tumor itaque celerrimo increscit

passu , velocissimèque exporrigitur circà circumferentiam primitivæ pustulæ , imò & brevi tempore membrum occupat integrum : vel & strangulationis metum infert si collum afficiatur : quin tamen cutis color sensibilem adhuc exhibeat mutationem.

Interim , quo passu augetur tumor , eodem & primitiva crescit pustula , sensimque tumor cooperitur vesiculis lenticularibus diversicoloribus , quibus dehiscentibus emergit escarrha velut à candente ferro inusta. Deindè pullulat gangræna latens sub cute parumper tantummodò immutatâ ; eaque brevè augetur & serpit magno cùm periculo , nisi tandem ipsi occurrat circulus inflammatorius circumnascens. Hic profectò omnibus escarrhis imponit jura : ipsum simul designando locum futuræ separationis mortui à vivo.

Prædicta sufficiant ad levem mali illius formidandi indicationem. Videatur accurata ejusdem descriptio in opere cui titulus, *Dissertation sur le charbon malin de la Bourgogne , ou pustule maligne , qui a partagé , en 1780 , le prix de l'Académie de Dijon , par M. Thomassin.* Legantur etiam optima opuscula celeberrimi D.D. *le Roux* , Chirurgi Divionensis , cui in hac parte plurimùm quoque debetur. Nunc magis urget consideratio inflammationis in induratum abeuntis.

§. I V.

I N D U R A T I O.

TERMINARI dicitur inflammatio per indurationem , quoties loco inflammationis remanet tumor durus , magis vel minùs indolens. Hoc fit quandò inflammatoria materies celluloso in textu deposita , sensim ibi defraudatur vehiculo suo. Tunc enim

ea ibidem sensim concrefcit , induratur & adhæret , nedùm resolutionem queat admittere aut suppurationem : eaque demùm illam gignit affectionem quæ vocatur *scirrhus* vel *scirrhus* ; id est , tumor durus atque indolens , qui creatur à prædictâ materie plus minùsve impactâ & immotâ : vicinis quoque vasis nonnihil similiter obstructis , favente nimirum compressione ipsis illatâ.

Quia verò huic tumori duro , aliquis quandòque sensus subest levis , quandòque nullus : scirrhus alius exquisitus audit , alius non exquisitus. Prior omninò insensatus est & durus : dùm posterior non omni caret sensu , quamvis ille difficulter omninò sentiat quidpiam. Qui uterque scirrhus ex suâ collabitur classe characteremque cancrosum ambire jamjam dicitur , ubi lancinantium dolorum capax fit , sicut mox dicemus in appendice de cancro.

Induratione præprimis terminatur ea inflammatio , quæ sedet in partibus naturâ suâ laxioribus quàm ut valeant humorem ibi depositum elaborare & coquere : quia nempè longiorem post moram suam humor ille tandem deperdit principia sua subtiliora , superstitie facto ejus crassamento. Sed præterea notandum est , nihil indurationi favere magis quàm inflammatorius humor crassioris naturæ ac veluti nimis terrestris : qualis est humor pituitosus quilibet aut atrabiliaris.

Non mirum ergò induratione potissimùm terminari inflammationem apud pituitosos , strumosos , & atrabiliares : præprimisque si ea glandulosas occupaverit partes. Eæ enim non laxâ solum gaudent texturâ , sed & humoribus irrorantur magis concrefcibilibus ; iisque secernendis plurimæ inserviunt.

Nihilo tamen minùs talis scirrhusa induratio quandòque etiam determinatur , tum in prædictis glandulis , tum in pulmonibus
necnon

necnon carnosus artuum partibus ipsismet, loco resolutionis rationabiliter expectandæ. Hoc ita evenit 1º. quando inflammatorius humor ut & pars in quâ sedet, fortè jam per se paulò iners, evadit adhuc inertior sub decursu morbi; sicut præsertim contingit ob præposterarum largioresve sanguinis missiones, aut evacuationes alias: vel & propter incautam applicationem ingestionemve rerum nimis relaxantium. 2º. Si fiat abusus medicorum calidorum, tum internorum cum externorum, quibus dissipentur tenuiora, reliquis proinde hoc ipso inspissatis.

Neque obscura ratio est cur scirrhus non rarò nascatur pedetentim in iisdem partibus absquè prægressâ inflammatione ullâ, sed propter inquilinorum humorum concrefcentiam sensim sine sensu accidentem: seu, ut aiunt, propter lentam congestionem localem quâcumque de causâ ingeneratam.

Diagnosis indurationis duplex est. Alia respicit imminentem indurationem: præsentem alia. Dignoscitur imminens induratio ex laxitate partis inflammatae, ex temperamento & ætate ægrotantis, ex naturâ humoris inquilini simul & incongruâ curativorum medicorum usurpatione; sed imprimis ex imminutione doloris inflammatorii, quæ accidit sine crisi perfectâ, dum tumor & renitentia non minuuntur secundum eandem proportionem, eaque potius crescunt sensim: vel & si tunc remanserit idem impedimentum functionis læsæ, ubi sedes mali non est externis subjecta sensibus. Prævidetur verò subnascens induratio per congestionem eventura, suspicioque ejus non parva habetur, ex tumore indolente sensim adventante, si organum sensibus obvium fuerit. Sed in parte abditâ ferè nequit talis congestio prælagiri, imò hæc ibi jam nata non agnoscitur, nisi summâ factâ attentione ad constitutionem individui, ad prægressas ejus ægritudines, simul & ad singularem functionis alicujus læsionem sensim.

advenientem , nulli alteri causæ probabilius tribuendam.

Diagnosîs præsentis indurationis obtinetur per essentielles scirrhi characteres , insensibilitatem nempe & duritatem , si tumor fuerit externus aut queat in visceribus tactu renuntiari. Verùm si scirrhis internè latuerit, eam persentiscere ac judicare licet ex prægressis signis futuræ indurationis in organo quodam ; tum præsertim ex symptomatibus naturaliter sequentibus impeditam indurati organi functionem. Exemplo sit habitualis difficultas spirandi peripneumonico morbo non suppurato succedens : vel & bilis defectus in officinâ digestionis post hepatidem probabiliter induratum , &c.

Prognosis scirrhi ex inflammatione induratâ enati , sicut & alterius indurationis cujusvis , varia est in genere prout ille exquisitus est aut inexquisitus ; nempe in quantum prior nequaquam sanari queat : dum posterior non rarò curationem admittit , quantumvis difficilem.

Sed & varia scirrhi prognosis in particulari 1º. pro naturâ causæ ; 2º. pro nobilitate organi ; 3º. pro mole scirrhi 4º. demùm pro mutatione quam scirrhosus accidentaliter suscipere capax est ob pravam vivendi aut medelæ rationem : miserè nimirum degenerando lethalem in vomitam , cujus mentio fit ubi de morbis ad respirationem pertinentibus : vel variam inducendo cachexiam , de quâ ubi de nutritione agetur : vel & deniquè malignum abeundo in cancrum qui est peior scirrhi eventus , de quo nonnulla sequenti appendice nunc dicenda esse operæpretium duximus.

A P P E N D I X D E C A N C R O .

TOTIES scirrhis scirrhosusve quilibet tumor jam meretur vocari nomine cancri vel carcinomatis , quoties corripitur do-

loribus lancinantibus, initio sat raris & demissis, sed progressu mali frequentioribus ac sævioribus. Quo in statu tumor ille deinceps augefcit, angulosam simul acquirendo figuram, tum colorem variè lividum aut subnigrum ac splendidum: unà cùm cæruleis venis circumcircuita turgidis, atque ut cancrorum pedes divaricatis.

Duplex distinguitur cancer. Alius obscurus seu occultus, vel non exulceratus, qualem suprâ descripsimus: alius verò manifestus, qui nimirum ex pellibus suis disruptis prominet quasi foràs emigraturus, tunc emittendo faniem acrem, fetentem ac rodentem; extùs simul inversis labris ejus, iisque veluti corneis factis: moxque insuper maximis fungis ex ejus centro excrefcentibus: aut ibidem variis è contrâ excavatis lacunis, à quibus non rarò succedunt hæmorrhagiæ formidabiles. Quæ manifesti cancri accidentia stipantur febre lentâ per tempus glifcente, neutiquàm dimittendâ antequàm patiens occiderit.

Quod malum cancer dictum, cùm ita visibilibus in partibus procedat quoad phænomena localia & accidentia utrique speciei cancri propria; sic & illud progredi censetur in internis. Sed quod spectat modum quo scirrhus naturam inducat cancrofam, ille consistere videtur in expansione magis vel minùs celeri scirrhusæ materiæ; quæ rarefit per modum casei, aut corporis mucosi vegetabilis similem dilatationem subitam patientis, vel ab igne, vel à fermentatione spontaneâ. Undè concipere est quare, ubi accidit prædicta scirrhusæ materie rarefactio, ideòque inducitur subita distensio partium ejus continentium (quæ expansioni habituali, quietæ atque ideò indolenti assuefactæ erant): quare inquam, tunc tantoperè mutetur status earum partium pathologicus, ut tumor ex indolente evadat dolens admodum, dolore nimirum lancinati, velut secundum distinctos

mucosæ materieï impulsus & nîsus ad rarescendum. Ex quâ scirrhi expansione indefinente resolvitur etiam, cur tandem crepare cogantur extenuatæ canceri pelles, atque ita ejusdem veluti *miya* in aperto dilatetur, tetrum plerùmque abeundo in fungum?

Sed hæc essentialis est clinica observatio circâ genium canceri. Quemadmodum nempè bubones suppuratorii, tum strumosi, faciliùs frequentiusque tuboriuntur apud pueros quàm apud viros, ex aph. 26 sect. 3, nullatenus verò in senibus, ex coacâ 512: ita & canceri, tum occulti cum manifesti, mediæ ætati familiares sunt, præsertimque senibus: quos & frequentibus cancrofis verrucis corripì nunc quoque observamus, sicut idem notatur lib. 2 prædictorum, sect. II. Foës., pag. 77. Ad cancrofam enim degenerationem duo imprimis requiruntur: solidorum nempè compages durior, & crasis humorum multò magis acer.

Cum hæc ita sint, haud difficulter distinguere est causas multiplices quibus cancrofa scirrhi rarefactio inducitur; quoniam istæ complectuntur ea omnia quæ valent quiescentem scirrhi materiem movere, calefacere, acrem reddere, simul & ejus exstimulare sedem. Talia autem sunt 1°. diætâ calidâ, vinosâ & acer. 2°. Calefaciens medela. 3°. Solitæ evacuationes suppressæ. 4°. Miasmata morbosa quæcumque. 5°. Demùm omnigenæ irritationes externæ, ut & morales.

Ad majorem rei accurationem simul & ad diagnosim prognosimque præparandam, diversus cancer in quâcumque specie distinguendus est. 1°. Cancer magnus & cancer parvus. 2°. Adhærens, adeoque exstirpationi omninò ineptus: aut contrâ fluctuans, seu existens laxâ cum adhæsione ad partes magnis carentes vasis. 3°. Ortus à causâ internâ aut ab externâ. 4°. Deniquè, malignus & benignus: quæ ultima distinctio maximè

essentialis est. Benignus nempè dicitur si causa ejus benigna, ægrotansque bonæ constitutionis. Malignus è contrà, si extiterit in corpore valdè senili & cacochymo: si materies celerimè rarefcat: atque insuper si nervi insignes obvii fuerint, aut partes singulari modo pathologico sensificatæ; nam sicut aliqui iisdem in partibus canceri sunt quandòque dolentissimi: ita & quidam fermè sunt indolentes, seu dolentes leviter admodum.

Quoad prognosim, sanè quidem cancer internus pejor est externo: itemque pejor ab internâ ortus causâ, quàm ab externâ. Si cancer à longè immineat, præcavetur aliquandò. Sed cancer præsens curari ferè nunquàm docilis est, nisi ille ortus sit à causâ externâ, juniori in corpore & minimè cacochymo: prætereàque nisi sit parvus, benignus & discretus. Tunc enim quandòque curatur beneficio integræ extirpationis per ignem aut ferrum: debellatâ priùs quâcumque dispositione, cancerum fovere ac reproducere capaci. Sic quemdam carcinomate laborantem in faucibus, per Hippocratem ustione servatum fuisse legitur lib. 7 de morb. vulgar., sect. VII Foës., pag. 337. Sic ulcerosam cancrofamque linguam semel se curavisse scripsit Ruifchius obs. anat. 76. Sic demùm nonnullas scalpello patratas cancerorum benignorum, recentium & parvorum ablationes bellè succedere passim observamus.

Verùm in quibusvis maligni aut maximi canceri circumstantiis, nihil tentare licet præter lenimen symptomatum, & aversionem occasionum quibus quies canceri turbari possit: nisi fortè felicibus plurimis eventibus maximè probetur id quod nuperrimè fuit propositum de usu opii externo, *Journal de Médecine*, mai 1786, p. 292. Proptereà, quousquè aliquid tuti confirmatum sit, putamus adhærendum esse aphorismo 38 sect. 6, in quo dam-

nantur therapeutica pharmaca, & qui hic est, quibus canceri occulti fiunt, eos non curare præstat; qui enim curantur, celeriter pereunt; qui verò non curantur, multum tempus perdurant. A fortiori, periculosissima foret extirpatio ultrà casus. suprà memoratos. Hinc enim sæpiùs cancer renascitur malignus; vel & malum recurrit ad interiora, ubi latentem fortè quamdam dispositionem cancrofam evolvit, novos ibidem cancros generando: aut illud citam accersit mortem. Sic Abderitanæ cuidam mulieri, interceptâ fluxione saniei carcinomatosæ per mammæ papillam, mors contigit, ut legitur in fine libri 7 de morb. vulg.

Nunc deveniamus ad quintum modum quo terminari potest inflammatio.

§. V.

M E T A P T O S I S.

METAPTOSIS nomine generaliter intelligenda est alicujuscumque morbi permutatio in alium, priori cessante. Sed ibi talis eventus considerandus venit in specie respectu inflammationis, quæ evanuit quia materies ejus exportata fuit in aliam partem, in quâ novum procreavit decubitus.

Hæc inflammationis translatio duplex quoad eventum præcipuè distinguenda est. Alia nempe accidit per *metastasim*, ut aiunt; alia per *diadochen*. Per *diadochen* scilicet, quandò materies inflammatoria feliciter transfertur in partem minùs nobilem aut foràs emigrat ab internis: per *metastasim* verò, si fiat in partem nobiliorem, aut ab externis ad interiora. Posset quoque agnosci translatio indifferens, quandò nimirum inflammatio deserit aliquam partem ut aliam similem aggrediatur. Sed quidquid admit-

tatur , modus semper idem est , eventusque dumtaxat æstimandus : nempe ob diversitatem partis de novo occupatæ.

Inflammationem duplici potissimum de causâ transferri concipitur. 1°. Scilicet , quandò materies mobilior est , aut pars affecta impar illam retinere. 2°. Si culpâ medelæ aliarumve externarum rerum , aut effectû pathematum animi , materies inflammatoria è loco suo dimoveri cogatur.

Notum siquidem est experientiâ , eas inflammationes metaptosi imprimis obnoxias esse quarum materies suaptè mobilior existit , qualis est erysipelatosa , præsertimque arthritica ; tum illas quæ contingunt in corpore valdè debilitato. Inflammationes enim illæ , (& quidem arthritica antè alias) , non rarò delitescunt spontè , absquè quòd valida quædam causa interna externave , saltem sensibilis , huic transpositioni occasionem præbuerit.

Notum pariter nullam esse inflammationem vel seigniozem , sicut nec ullum decubitum , quæ non sit etiam capax emigrare quandò dantur occasiones sequentes , seu causæ loco secundo suprâ indicatæ. Nempe 1°. applicatio reperiuentium aut frigoris externi. 2°. Magna quædam evacuatio valdè debilitans & revulsiva , tum magna animi commotio. 3°. Dissita aliqua irritatio , qualis v. g. excitatur ab epispasticis. His enim de causis non solum inflammationes sæpè emigrant ; verum etiam retrocedere valent , ut aiunt , quæcumque eruptiones criticæ : tum habituales , quæ ipsæ quædam veluti crises perennes sunt. Imò ab iisdem retrocessionibus immunes non sunt ipsimet abscessus ; quorum tamen translationes sæpius contingunt ob simplicem loci afficiendi proclivitatem ; præcipuè quandò focus eorum purulentus nimis ferò vel imperitè apertus fuit : aut pars malè deligata post aperturam.

At quæcumque materies morbosa alicubi decumbens transf-

feratur, ea emigrat per cellularem textum, suasque tragoedias excitat triplici modo. 1°. Scilicet, illa quandòque celerrimè transmota per medias adiposas cellulas novum decubitus statim facit in aliâ parte, sæpè satis dissitâ; sed præsertim in eâdem provinciâ cellulosæ illius membranæ. 2°. Aliàs, longè latèque disseminatur eadem materies cellulari in telâ, ibique aliquandiù degit singularem creando leucophlegmaciam, sæpè localem, difficilè quandòque subigendam vi vitæ vel artis. 3°. Demùm, materies hæc per talem cellularem aliquandiù vagabunda ibique variè mutata, tandem abhinc resorbetur, & varios coinquinat humores in oceano sanguinis pro variâ suâ cùm variis humoribus affinitate; deindèque aliquandò varios morbos producit mirabiles, sed præsertim stupendos si nervi præprimis fuerint metastaticâ aurâ penetrati & specialiter irritati. Qui morbi omnes metastatici, peculiarem subeundo tractationem diversæ metastasi accommodatam, sæpè sanantur contrà omnem boni expectationem: dùm ii de die in diem aggravati, sæpiùsque de horâ in horam, certò enecant si ipsis occurratur nullâ attentione factâ ad metastasim.

His porrò omnibus meditatîs, facile eruere est omnigenæ metaptosis diagnosim: neque obscura prognosis. In hâc ideò ultimâ inflammationis terminatione longiùs non immorabimur, ut transeamus ad secundam hujus articuli sectionem in quâ de Ecchymosi agendum.



S E C T I O S E C U N D A.

D E E C C H Y M O S I.

*E*CCHYMOSIS seu *Ecchymoma*, Latinis sugillatio, est ille contusarum partium status in quo sanguis sic jacet effusus in cellulari textu, vicinisque vasis quasi detritis, ut eo in loco percipiatur tumor, quandoquè mollis quandoquè duriusculus, lividus ut plurimùm vel fuscus, sæpèque ater: tùm aliquandò dolens, aut è contrà doloris expers.

Ratione sedis & materie, ecchymosis non parùm convenit cùm inflammatione. Verùm ab illâ multiplici ex capite distinguitur. 1°. Ecchymosis nulla fit absquè præviâ notabili solutione continuitatis, nec absquè deperditione toni; dùm inflammatio ab irritatione incipiens, comitem semper irritationem habet majoremque tonum; eaque prætereà nonnisi levissimam continui solutionem sensim infert in textum cellularem inflammatum: quæ igitur læsio inflammationis effectus est, non verò causa.

2°. Sanguis in ecchymosi extravasatus, nequaquàm ibi pressus est sicut in inflammatione, illeque statim ab extravasatione suâ cessat moveri, adeòque abit in grumulos & frigescit; dùm è contrà sanguis in inflammatione continuò verberatur ab adauctis inflammati loci oscillationibus, ideòque fortiùs agitatus incallescit magis, nisi fortè gangræna ingruat. 3°. Pars quæ ecchymosi tentatur livida est aut variè denigrata: dùm inflammata pars plus minùsve rubescit. 4°. Deniquè ecchymosis sæpissimè doloris expers est, aut ad summum dolore dolet obscuro ac veluti gravitante: dùm inflammatio essentialiter stipatur dolore pulsanti aut

deurente , vel ad minimum calente infestatur pruritu , qui primus doloris gradus est.

Cùm hæc ita sint , sequitur causam ecchymosis illud omne esse , quod valet obterere , lacerare , simul & atona facere vascula partis alicujus arteriosa ut & venosa ; quæ sic coguntur sanguinem suum evomere vicina in latibula telæ cellularis , similiter quoque obtrita & atona facta. Hippocrates sibi facturus imaginem causæ ecchymosis , illam spectabat tanquàm foret quidam nauseabundus vasorum effectus ; quasi sanguis ab his refunderetur ac restagnaret , velut cibus in nauseabundâ stomachi redundantia.

Consequenter inter causas ecchymosis recensentur ictus contundentes , nimia musculorum conamina , necnon & clandestinæ vasculorum erosiones ab acri quodam humore adhærente. Undè planum est ecchymoses contingere posse abditis in partibus quibusvis , perindè ac sub cute externâ. Nam , prædictis de causis , vascula ubiquè disponi possunt ad sanguinem suum evomendum : cellulosa autem tela ubiquè adest ad recipiendum.

Diagnostica signa externæ ecchymosis haud difficulter ex dictis eruuntur. Verùm diagnosi internæ ecchymosis non elicitur , nisi acie ingenii : juvante videlicèt prægressarum historiâ rerum , vel & beneficio maximæ suspicionis quæ aliundè reperitur in dolore interno & habitu tandem suboriente , variaque symptomata producente pro diversitate organi. Nonnè simili dolore malum illud quandoquè probatur in neglectis contusionibus capitis aliarumve partium , sicut & post nimios operariorum conatus ?

Quod spectat ecchymosis genium , ejusque modos abundi ac proindè prognosim , ea omnia ex sequentibus quatuor factis insignibus colligere atque æstimare est.

1^o. Si sanguis in ecchymosi non multus, ille haud difficulter spontaneâ sui dissolutione tranquillâ sensim degenerat in quamdam faniem singularem, quæ partim resorbetur deindè eliminanda congruos per locos; quæ etiam partim ex contuso loco immediatè exhalatur foràs.

2^o. Dùm fit resolutio ecchymosis externæ, observatur contusam partem evadere pedetentim ex nigrâ cæruleam, deindè cæruleo-flavam, flavam deniquè & variè pallidam, quousquè demùm ea colorem suum recuperet: ita per partes deposito colore morbofo, prout extravasati cruoris stagnantes moleculæ dissiliunt. Hisque signis apertè renunciatur fausta ejus resolutio.

Sed eorumdem factorum similia denegantur signa ecchymosi internæ; ideòque resolutio ejus aliundè expiscanda & indaganda est. Nempè ex veniente paulatim liberatione partis intùs gravatæ per ecchymosim; tùm ex sudore nonnullo vel & aliquantulo sedimento urinarum. Quibus signis addantur sputa atro-rubra aut flava, si ecchymosis in pleurâ fuerit ut quandoquè observavi; tùm addendus effluxus sanguinis, vel puris, vel aquæ, per aures, vel os, vel nares, capite contuso dolenti, ac vehementer laboranti, sicut docetur aph. 10 sect. 6, & clinicis Medicis notum est.

3^o. Si verò ecchymosis paulò major fuerit, cùm non adeò facilis resolutio ejus, præsertim si illa negligatur, abhìnc varia scaturire queunt mala. Tunc enim indè nasci potest scirrhis aliqua; vel sæpiùs metuendum, nè ipsemet sphacelus eam occupet, aut nè accendatur dolens admodùm inflammatio faciliùs suppuratione quàm resolvenda, imò & ipsam in gangrænam aliquandò abitura. Quandoquè etiam ecchymosis materies partim elaborata, metastaticè vagatur cellulofam intrà telam, ibi producendo chronicam quamdam turgentiam veluti leucophlegma-

ticam , ordinariis aliis cachexiæ humidæ signis carentem. Quæ turgentia inferioribus artubus præprimis infesta , præcipuè cessura erit pharmacis stimulantibus , ut & exutoriis cantharidum applicationibus. Aliàs demùm ecchymosis materies , quanta quanta sit , diuturnâ stagnatione suâ in viscere quodam , singularem ibi acrimoniam suscipit , vicina tandem vascula rodere & aperire capacem. Quâ *diabrosi* aliquoties adducuntur reconditæ sanguinis effusiones cellularem intrâ textum , proteiformia creantes mala ; vel & inexpectatæ atque periculosissimæ hæmorrhagiæ invehuntur aut purulentæ : seu per renes , in casu ecchymosis renalis neglectæ : seu per pulmones similiter affectos , &c. Ex quibus ecchymosis finibus , facilimam periculosissimamque phtisim posse oriri manifestum est ; renalem nempe , aut pulmonarem , aut aliam.

4^o. Deniquè , si negligatur ecchymosis etiam apparenter levis , ea successu temporis multùm quandoquè nocet. Quod nempe fit , tum effectu debilitationis solidorum exindè oriundæ , tum propter aliquam inquilini humoris mutationem abhinc latenter scaturientem. Si in oculis hæc eveniant , hinc *glaucomata* aliæve obcæcationes visûs : si in ossibus , caries : si glandulosis in partibus , scirr hoses : si in scirrho , carcinoma.

Omnibus porrò prædictis pensitatis , haud difficulter resolvere est quandònam ecchymosis minimè gravis aut meritò pertimescenda ; & quare.

A R T I C U L U S I I.

D E V E N I S S A N G U I F E R I S.

IN genere , amplitudo visibilium venarum earumque multiplicitas , unâ cùm turgentia nonnihil renitenti , habentur tan-

quàm indicium bonæ earum constitutionis. Hoc ita videre est usquè ad senectutem apud individua sanguinea ; præsertimque apud mascula quæ mediocri adipe onerantur. Sed talis venarum habitus haud frequens aspicitur apud pinguiore, femellasque imprimis, in quibus è contrà venæ intrà multam adipem cohibitæ non efformant nisi gracillimos rivulos, in cute velut eburneâ pulchrè aliquandò subcærulescentes.

In senibus verò quibuscumque, ob naturalem eorum macilentiam, ordinarium est externas venas sensibiliter cuti supereminere, tuncque notabiliter ampliari ac flaccescere. Quandòquidem venarum densitas hanc per ætatem sensim decrescit.

Nunc pathologicos venarum sanguiferarum status varios consideraturi, sequentia ipsis tribuimus, præter communem earumdem cum sanguiferis arteriis affectionem in ecchymosi de quâ mox diximus. Nempè observatur aliquandò maxima & accidentalis visibilium earum venarum turgentia in partibus corporis supernis, ut & in inferioribus, quæ fit plerumquè ob difficilem reditum sanguinis ad cor ; nimirum in jugularibus, apud orthopnoicos : tum in venis inferioribus, in casu majorum quarundam obstructionum abdominalis alicujus visceris, aut pertinacioris adstrictionis alvi, aut provectæ graviditatis.

Prætereà venæ magis superficiariæ variarum partium non rarò remanent constanter dilatatæ, præsertim in cruribus ac tibiis, ubi elevantur in tumores, molles, inæquales, nodosos, indolentes, colore subcæruleo ut plurimum donatos, qui varices audiunt. Iis præcipuè corripuntur senes, gravidæquè præprimis mulieres, tum assidui scenarum spectatores erecti. Imò apparuit cadaverum dissectione, aliquandò similes varices natas fuisse in visceribus, decursu & effectu morborum chronicorum.

Ad varicum genus revocandæ sunt hæmorrhoides seu illæ

singularès dilatationes venarum ani, tam internarum quàm exte-
narum, quæ ibi quandoquè supereminent velut uvæ acinorum
aut mariscæ; tùm etiam memorandæ similes intumescentiæ vena-
rum quæ sunt in vesicæ collo, ideòque vesicariæ hæmorrhoides
appellantur. Quæ utræque hæmorrhoides dicuntur clausæ, quandò
nullum effundunt sanguinem: apertæ è contrà, si ex illis sanguis
stillaverit. Quænam sit earum causa, nunc dicendum.

Causa varicum vesicæ habetur in affectionibus stranguriosis
arthriticorum & calculosorum. Proptereà illi non accidunt per
adolescenciam, sed à pubertate ad annum circiter quadrage-
simum-secundum: quia prædicti morbi, pueritiæ & adolescenciæ
parcere solent, ut notatum est coacâ 512, quæ observatione
quotidianâ comprobatur.

Causæ numerosiores assignandæ veniunt hæmorrhoidibus quæ
in ano sunt. 1°. Habitualis constipatio alvi, ut & habitualis sessio
demissiori in fellâ, corpore simul antrorsùm inflexo. 2°. Multiplex
partus & graviditas. 3°. Vesicæ calculus grandior. 4°. Suppressio
mensium, in effœtis præsertim. 5°. Demùm affectio melan-
cholica chronica, tùm hepatis obstructiones.

His prædictis hæmorrhoidum causis medicè æstimatis, facilè
obtinetur ratio cur hæmorrhoides tantùm contingant hominibus
constantem ætatem agentibus, ex aph. 30 sect. 3: tùm quare
præsertim accidant viris qui habitant civitates meridionales,
aquis palustribus utentes, solique & ventis malè expositas, ut
legitur initio libri de aëre, locis & aquis.

Semel natæ gravem ob causam hæmorrhoides, eæ perdu-
rare solent si causa perseveraverit. Tuncque eæ sæpè aperiuntur
cùm levamine. Ideòque, *sanguis suprà quidem, qualiscumque fuerit,*
emissus, malus; infrà autem bonus, ex aph. 25 sect. 4.

Viri, mulieresque effœtæ facilè assuescunt hæmorrhoidali

fluxui , stationariæ cujusdam criseos vices gerenti , illiusque beneficio præservantur à pluribus morbis inflammatoriis , recensitis lib. 6. de morb. vulg. sect. 3 , n^o. 28 ; ubi & referuntur ægritudines quæ illius fluxûs suppressioni superaccidunt , præcipuè si fuerit à longiori tempore habitualis. Undè intelligitur quantum periculosum sit diuturnis hæmorrhoidibus ullo modo officere , proindèque quanto cùm discrimine eæ tollantur per integram ablationem : ideò Hippocrates adversùs hanc curationem meritò refragatur , dicens aph. 12 sect. 6 : *à diuturnis hæmorrhoidibus curato , nisi una servetur , periculum est nè aqua inter cutem , aut tabes , aut insania succedat.* Prætereàque in fine libri 4 de morb. vulg. memorat quemdam nomine Alcippum , qui irritò consilio suo curatus , insaniit ; sed qui resipuit acutâ deindè febre feliciter succedente.

De reliquo hæmorrhoides in morbis supervenientes sæpè admodum juvare , minimè stupendum. Hoc ita fit , sive quia utilem quamdam revulsionem exercent ; sive quia sanguinem atrabiliosum stagnantem & copiosum eliminant. Indèque intelligitur quare *melancholicis affectibus , & renum vitiis , succedentes hæmorrhoides bono sint* , ex aph. 11 sect. 6 ; in quâ & n^o. 21 legitur , *quòd insanientibus si varices , aut hæmorrhoides supervenerint , insanix solutio fiat.*

Nunc quædam pravæ hæmorrhoidum consequentiæ annotandæ supersunt. 1^o. Hæmorrhoidalem fluxum non rarò excessivum fieri , ab illoque imminere cachexiam humidam aut tabidam : tùm icterum valdè chronicum ; 2^o. Hæmorrhoidas non rarò inflammatione tentari , imò & gangrænâ admodum periculosâ ; ab iisque suppuratis graves sæpiùs contingere ani fistulas. 3^o. Hæmorrhoides quandoquè abire callosum in scirrhum annularium , qui capax sit immedicabilem adstrictionem alvi accer-

fere , & demùm characterem contrahere carcinomatofum. 4°. Sæpè etiam hæmorrhoides continuò dolentes manere , ideòque capaces effe febrem moliri periculofam , vel & determinare vicinarum partium inflammationem ex quâ fortè oriatur intef-
tinorum fuppuratio aut fphacelus , aut ad minimum fifula valdè cuniculofa. 5°. Deniquè notabimus quemdam aliquoties observari hæmorrhoidalem fluxum lymphaticum , quo videtur aliquandò fuppleri fanguinolentus. Sed tenere oportet priorem potiùs ominofum effe quàm utilem. Ille fiquidem hepatis præfertim infidiosus eft , ficut probat experienciâ , quia nempè hoc mediante fluxu lymphatico , fanguis redux ad hepar defraudatur parte fuâ fluxiliori.

In prædictis habentur præcipua facta quæ fpectant hæmorrhoidum & varicum aitiologiam ficut & differentias. Proindè licet ibidem earum diagnofim intueri , ut & prognofim.

C A P U T D E C I M U M - S E X T U M.

D E V A S I S L Y M P H A T I C I S.

HABITUS corporis nitidus , albo-roseus , vel exhibens faltem constantem fani ftatûs individui colorem , indicat puritatem lymphæ quantùm pura effe poteft in hoc individuo. Illeque prætereà designat liberum liquidi illius per vafa fua tranfgreffum.

Prædicta cutis externæ modificatio propria eft juventuti , necnon imprimis optimæ juniorum puberum constitutioni , quæ adhinc mutuatur lepores ac veneres felices hujufce ætatis.

Sed pro variis ftatibus pathologicis , hic mutatur habitus corporis. Mox cutis color rubore majori perfunditur quo revelatur plethora ; mox pallore ejus patefit constitutio pituitofa ,
aut

aut cachectica ; mox colore flavo simul & quandoquē subatro, habetur indicium biliosæ constitutionis aut atrabiliosæ ; quæ ultima præsertim adest si quædam simul observetur ariditas cutis, nonnullaque corporis macilentia. Quantum licet de rebus abstrusis ratiocinari, fas est prædictis adhærere considerationibus, nec indè gravis erroris impendet metus. Sed attendere juvat phænomena superiùs degustata tantùm pertinere ad statum telæ cellularis, quantum ad vasa lymphatica.

Nobis repugnaret longiori sermone procedere circà hanc quæstionem. Nam in rebus merè hypotheticis facilius est Medico creari periculum, quàm pathologicos aut therapeuticos colligere fructus.

Finem dicendorum faciemus, notando hydatides nihil esse nisi varices venarum lymphaticarum; quæ & venæ sæpè forsan sedes sunt tumorum quorundam faccatorum dictorum. Quoad arterias verò, eæ quidem de facto laborant obstructione in scirrhis. Sed eæ nequaquàm capaces sunt inflammationis in sensu Boerrhaaviano. Quid deniquè censendum sit de effusione laticis hydropici per eorum vasorum fines, dicemus ubi de humore Pericardii, Pleuræ & Peritonei.

C A P U T D E C I M U M - S E P T I M U M.

D E G L A N D U L I S L Y M P H A T I C I S.

GLANDULÆ lymphaticæ vix in statu sano valent ullibi ferire sensum observatoris, præsertim ultrà ætatem adultam. Patet idcirco illas benè valere, quando prorsus latent.

Nihilominus certum est glandulas illas sæpissimè ægrotare; imò nullum viscus, excepto hepate, frequentius tentari obstruc-

zione & infarctu, cùm periculo scirrhi & carcinomatis. Cujus phœnomeni pathologici petitur ratio ex solitâ retârdatione lymphæ eas glandulas pertranseuntis, necnon & ex qualitate facilè viscosâ & concrescibili humoris quem illæ fecernunt.

Inter memoratos lymphaticarum glandularum infarctus recenferi profectò meretur scirrhus, de quo actum est ubi de induratione loci inflammati. Sed notandus præsertim ille earum tumor ut plurimùm indolens & pallidus, admodùm chronicus, sæpè perpetuò duraturus, non corripiendus inflammatione & dolore nisi per accidens: qui audit nomine *strumarum*.

Apud Hippocratem, lib. de glandulis, strumæ vocantur morbus pessimus colli, quia illius quidem glandulæ sæpè sæpius ab eo morbo infestantur. Sed & strumæ pariter aggredi solent glandulas axillares & inguinales; tùm eas quæ propè articulos manuum ac pedum sedent, necnon & præsertim mesentericas. Idcirco strumæ aliæ dicuntur internæ, externæ aliæ.

Idem glandularum tumor, frigidus passim nuncupatur ob infrequentiam adjuncti caloris & doloris inflammatorii. Generatur ab humore albo, viscoso, sensim ibi aggesto adusquè magnam quandòque molem; sed ille dolorem sensibilem non excitat, quia contingit sensim sine sensu; adeò ut partes affuecant distractioni quam indè experiuntur. Aliquandò tamen illa congestio mole suâ gerit tandem vices alicujus stimuli, præsertim ubi paulò celeriter augefcit, tuncque valet nonnullam advocare inflammationem. Verùm inflammatio hæc non est valdè calida, nec dolens admodùm; eaque nonnisi incompletam lentamque resolutionem admittit: vel & quandoquè spuriam suppurationem, eamque pigerrimam. Quæ suppuratio saniosa & valdè chronica omnes quandoquè partes depascitur, imò & ossibus non parcit, si strumæ apertæ fuerint in iis parvulis glandulis

quæ jacent circà vicinitatem articulationum. Undè intelligitur strumas meritò etiam distingui in apertas, & in clausas.

Prorsùs ignoratur cujusnam sit naturæ virus à quo pendet prædicta singularis inspissatio & congestio lymphæ. Neque apparet ad illius generationem quidquam conferre labem siphiliticam; quandòquidem jam viguerint strumæ sub ævo Hippocratis, quo tempore ignotum erat venenum illud Americanum. Sed non licet credere, quòd venerea lues diù latens & degenerata nequeat strumis vires nunc addere, illisque dolosam imprimere malignitatem. Verùm enim verò, strumofum virus forsan est aliquis tantummodò foetus digestionum crudarum & viscosarum, simul & certæ cujusdam fibrarum laxitatis ac præsertim glandularum lymphaticarum.

Non mirum igitur strumas imprimis nasci apud pueros, ut docetur aph. 26 sect. 3. Eorum enim constitutio corporea, optimè quadrat ad occasionales causas superiùs assignatas, sicut mox videbitur. 1º. Glandulæ lymphaticæ dictæ in pueritiâ luxuriantur admodum: dùm illæ propemodum evanescunt adventante senio. 2º. Strumæ potissimum generantur ac pullulant apud infantes & pueros, tùm quandòque apud debiliores ipsos juvenes arcto in loco aggregatos, uliginosa habitantes loca, sedentariis operibus addictos, percussâ infectos scabie; præsertimque si simul vescantur cibis dyspeptis, pravis, malè coctis, farinosis non fermentatis, crassiore aut rancidâ pinguedine refertis, diutiùs asservatis post cocturam, vel & pluribus simul aliquandiù mixtis manentibus in hoc statu antequàm comedantur. Qui ultimi foedarum strumarum fontes mihi videntur omnem mereri attentionem honestorum virorum educandis pauperum liberis invigilantium. Quoniàm in iis omnibus circumstantiis prædictis, (præsertim si eæ plures miserè cumulatae fuerint), generatur

lymp̃ha viscosior, lymphaticis glandulis infarciendis aptissima. Nec aliundè procedit frequentia strumofarum affectionum quæ certis in locis perperam quandoquè habentur tanquàm contagiofæ. Nam debiliores adolescentes facillè ibidem strumas acquirunt eas ob causas; vel & si quædam in iis latuerit strumofa fortè labes, ea facillimè efflorescit. De cætero observatur strumas nusquàm oriri ultrà annum ætatis quadragesimum-secundum nisi illæ antea occupaverint, sicut jam notatum legitur coacâ 512: vel etiam, nisi aliquod seminium abditum supermanferit usquè ad ipsam senectutem. Sed strumæ quæ tunc fortè apparent, leviores sunt & benigniores.

Diagnos̃s strumarum obtinetur ex inspect̃ione tumorum indolentium & renitentium (renitentiâ tamen non omninò scirrhosâ), qui glandulis in lymphaticis sedent & qui prætereà pertinaces sunt, tardè ut plurimùm augescentes, ac numerosi. Cautè tamen debet illud nomen pronunciari; nam omnis tumor glandularum renitens non est semper strumofus, irritâ quâdam similitudine. Talis tumor oriri potuit ob quamdam metastasim, vel post inflammationem induratione terminatam; quo in casu ille multò faciliùs curaretur, sine ullo metu hæreditariæ labis superfuturæ. Ast quandòque strumæ ita evidentes sunt, ut nullus detur allucinationis metus, & ut abdomen præ illis tumidum deprehendatur.

Benignæ strumæ facillè renunciantur tumore æquali, mobili, subrotundo, non adeò renitente nec ullatenùs dolente. Malignæ verò signis contrariis innotescunt, præsertim si eæ fuerint apertæ, jàmque efformaverint ulcera rodentia ac propemodùm carcinomatosa.

Quoad strumas junioribus pueris imminentes, licet eas augurari & ab illis præcavere, quandò alæ nasi ut & labra fat

constanter tument, aliundèque subapparent signa laxitatis nativæ; earumque major adhuc suspicio habetur, quando gravis insuper admittitur error in ratione vivendi.

Circà prognosim notandum strumas hæreditarias curari non posse: secùs verò accidentales & benignas, dummodò iis incipientibus occurratur, præsertim antè adorientem pubertatem. Sed si strumæ pueris permanferint neque curatæ fuerint circà pubertatem, aut foëminis circà menstruorum eruptiones, eæ consenescere solent haud secùs ac aliæ plurimæ affectiones, sicut traditum est aph. 28 sect. 3. Prætereà attendendum, varias viscerum affectiones strumarum naturâ & moribus infici apud strumosos. Hoc præsertim videre est in phtysibus pulmonariis hujus genii, quæ sine præcedente hæmophtysi accidere solent. Mihique etiam visum est pubertatem admodùm tardiozem efflorescere apud strumosos; prætereàque ab eâdem labe variolis characterem non rarò imprimi multò segniores, quàm æquum foret ad obtinendam optimam veneni variolosi separationem ac expulsionem.



CAPUT DECIMUM-OCTAVUM.

DE SANGUINIS CIRCULATIONE.

RESPECTU circulationis sanguinis, Considerationes pathologico-symptomatologicae eam duntaxat amplectuntur signorum seriem quam colligere fas est in pulsu arteriarum; quatenus scilicet plurimum inde habetur indicium praesentis sanitatis vel morbi. Unde hic quaerendum venit 1°. quisnam sit arteriarum pulsus sanus? 2°. Quisnam morbosus?

1°. Sanus arteriarum pulsus ille est, in quo arteriarum pulsationes omnino sunt inter se similes, sexagies circiter repetitae intra minutum temporis in homine mediam aetatem agente: frequentiores in juvene; in sene è contra rariores; quae pulsationes sunt aequaliter ab invicem distantes, tum molles, liberae, & denique fortes, quin videantur cum aliquo hostili impetu exerceri.

Tales itaque arteriarum pulsationes apprimè demonstrant perfectam omnia inter viscera regnare harmoniam. Quoties enim nihil mutatum est in motu cordis, toties nihil quoque mutatum est in amicâ cordis & reliqui corporis viventis tranquillitate ac pace reciproca. Cum omnes corporis partes concurrant ad modificandam cordis actionem, mediante respectivâ earum sensibilitate & irritabilitate, & cum ex partes per morbum acquirant pathologicam diversam sensibilitatem ut & irritabilitatem: nequit aliqua iis in partibus mutatio contingere absque quod perturbetur actio cordis, quoniam tunc illud experitur novum quendam consensûs sui effectum. Proindeque nihil morbofi latet, quando nihil omnino mutatur in actione cordis.

2°. Morbosus pulsus arteriarum, seu status ejus contranaturalis perperam dictus apud scholasticos, ille est in quo earum pulsationes recedunt à statu suprâ descripto, quoad celeritatem, mollitiem, æqualitatem: seu morbosus pulsus est omnimoda mutatio in ordine secundum quem arteriæ pulsare percipiuntur dum adest sanitas.

Hæc mutatio in pulsu arteriarum fit 1°. quoties, ipsomet corde affecto, variæ contingunt earumdem pulsûs suppressiones, intermissiones, aut palpitationes, de quibus cap. 2°. ubi de physicâ vitâ in se consideratâ. 2°. Quoties corporis organum quoddam patitur insolitam sensificationem, aut irritationem, cujus occasione, cor sympathicè excitetur ad actionem segniores, aut ad celeriores, de quâ ultimâ hîc præprimis agendum incumbit.

Sed quia hæc acceleratio pulsûs mox pendet à mutatione transitoriâ corporis sani & viribus pleni, mox verò à mutatione constanti corporis ægrotantis & debilitati: hinc venit distinguenda pulsûs acceleratio absoluta, & acceleratio respectiva.

Absoluta pulsûs acceleratio illa est, quæ absolutè congruit actuali statui virium hominis sani, qualis ex. gr. observatur in homine currente, aut benè pasto, aut irato, &c. Cui accelerationi absolutæ opponitur illa retardatio absoluta, quæ reipsâ observatur in homine debilitato.

Respectiva verò dicitur ea pulsûs arteriarum acceleratio, in quâ pulsationum celeritas major deprehenditur quàm quæ congruit actuali voluntariarum virium statui, & qualis observatur apud hominem eâ laborantem affectione quæ vocatur *febris*. Cui accelerationi respectivæ opponitur ea retardatio respectiva, quæ de facto reperitur in variis animi deliquiis; in quibus homo, vel fortissimus, statim præbet pulsum tardissimum: sicut è contrâ pulsus citior est in debiliore febricitante.

Quoniam

Quoniam verò minimè satagimus quærere subtilitates, sed colligere facta pathologica quæ facem præferant Medico, graviores morbos cognituro, deindèque curaturo: ea duntaxat scrutabimur quæ pertinent ad respectivam pulsûs accelerationem. 1º. Itaque examinabimus eam accelerationem pulsûs, quatenus ex illâ eruitur generalissimum illud signum, mox mali ominis mox boni, cognitum nomine febris, quod cùm omnibus propemodùm morbis concurrere potest. 2º. Agemus de diversis febris eventibus, per ipsosmet varios pulsus acceleratos dignoscendis. 3º. Demùm, de diversis febrium generibus ac speciebus. Quæ tria, totidem articulis nunc perpendenda incumbunt.

A R T I C U L U S P R I M U S.

F E B R I S.

SICUT jam ex dictis colligere datur, febris dicitur adesse, quotiescumquè pulsûs arteriarum frequentia major deprehenditur, quàm esse deberet comparatè ad vires musculares voluntarias actuales. Adeòque causa formalis febris, ea ipsa est vitalis motûs acceleratio ultrà proportionem virium voluntariarum.

Talis acceleratio pulsûs repetitur ex eo præcisè, quòd cor gaudeat irritabilitate multò majori quàm cæteræ quælibet potentiæ musculares. Nam, mediante illo excessu irritabilitatis, in cujus ratione directâ creatur motus muscularis quilibet, ubi primùm certa quædam contingit interna irritatio per quam valeat cor ultrà solitum sanitatis modum stimulari, necessum est illius actionem multò magis adaugeri, quàm actionem cæterorum quorumcumque musculorum. Eaque respectiva cordis acceleratio semper major erit; seu integræ manserint vires ut fit initio inflammatoriæ febris, seu virium summa longè minor.

facta fuerit propter aliquam humorum degenerationem, sicut evenit in casu febris ab humoribus corruptis oriundæ. In primâ namquæ hypothesi, cor necessariò exequetur celeriores contractiones comparatè ad contractiones cæterarum potentiarum muscularium, quia illud infinitè mobilius est; in secundâ verò suppositione (irritâ humorum alteratione vires communes labefacienti), cor sufficientes semper accipiet spiritus ad hoc ut celerius reagat, etiamsi spiritus tunc deficient respectu cæterorum musculorum; qui ideò muscoli tunc nequeunt æquè ac cor animari à residuis spiritibus, quia non sunt æquè capaces animationis, utpotè qui non sint æquè irritabiles. Consequenter, quâcumque prædictâ occasione imminuatur actio voluntaria muscularis, nihilominus actio cordis mechanica superstes operabitur in ratione directâ præsentis ejus irritabilitatis; quinimò reactio illa cordis tandiù vigebit in eodem tenore, quandiù febrilis stimuli tenor ipse non fatiscet.

Febris ergò nihil aliud est quàm automaticum vitæ conamen, impetratum à prædictis duabus animalis œconomix potestatibus stupendis, sensibilitate nimirum & irritabilitate, consideratis in statu sano sicut & in pathologico; impetratum, inquam, occasione stimuli eas potentias excitantis ad reagendum, & cujus beneficio ille idem stimulus destruatur expellaturque, si fieri possit: sicque, per ipsammet vitam, vitæ restituatur tranquillitas. Hoc itaque nobili prælio semel inito, contentione dimicatur indefinente, quousquè alterutri pugnanti gloria palmæ comparatur; quousquè nimirum stimulus febrifer abolitus eliminetur, aut natura saltem evadat semi-victrix, secundario duntaxat oppressa morbo, posthàc fortean curabili; vel & heu! quousquè vita conaminibus irritis exhausta pereat. Adeò ut, sicut febris signum est arithmeticum ac geometricum perturba-

tionis vitæ sui generis : ita & illa spontè desinat, vel in sanitatem, vel in alium morbum seipsâ leviolem, vel in mortem.

Eâ forsan mirabili vitalium motuum harmoniâ ductus Hippocrates, tum imprimis ob phœnomena somni, putaverat rationalem animam illis motibus regendis invigilare. Hoc ita apparet ex iis quæ leguntur initio libri de insomniis (1); nec alio ut opinor consilio, Medici *Animistæ*, post Principem suum Stahlianum, imaginati sunt perperam, omnes & singulos vivente in corpore motus non excitari ab aliâ potentiâ; quæ scilicet eos motus scienter imperet, pro momento deleterii minitantis. Quorsum verò ad similem confugere explicationem, cum optimè concipiatur prædicta febris phœnomena spontè patrari mediante sensibilitate & irritabilitate, consideratis in statu sano & morbofo, & cognitis per facta de quibus nullus observator Medicus dubitare potest. Cavendum tamen nè auxilia medica diligentius negligantur, exemplo quorundam fanaticorum propè Medicorum *expectantium*, sub spe tutioris auxilii subministrandi à mechanicis vitæ conaminibus. Multum equidem facit natura vivens: imò plus facit quàm vulgò creditur. Sed in hoc præ-

- (1) » Qui de his quæ per somnos contingunt rectè conjectaverit, is
 » ea per omnia magnam habere vim comperiet. Animus enim vigilat;
 » & cum quidem corpori subministrat, in multas partes divisus, suū
 » tantum rationem non habet, sed singulis corporis partibus, partem
 » quamdam distribuit, sensibus nimirum, ad audiendum, videndum,
 » tangendum, ambulandum, agendum, denique ad omne corporis
 » obsequium, adeoque ipsa mens suū solum rationem non habet. Cum
 » verò corpus quiescit, animus movetur, & in corporis partes su-
 » brepens, domum suam regit, omnesque corporis actiones obit.

sertim colenda est Medico attendenti, quòd ea ipsi tutè de-
monstret quânam ex parte morbus oppugnandus ac debellandus
sit; & quòd nusquàm loquaciorem simul & veraciorem sese
præbeat quàm in casu febris.

Febris itaque nihil est nisi signum alicui malo latenti pro-
portionatum, illiusque tentandæ eradicationi naturaliter di-
catum. Quæ quidem assertio vera est ac inconcussa, sive febris
alicui supervenerit malo antea existenti; sive cum illo nata
videatur, nihil prius morbosè sensibiliter apparente. Hic est
haud dubiò primarius generalissimusque febris conspectus, sub
quo spontè accedit divisio illa quæ *essentiales* febres dirimit à
symptomaticis.

Sed præter hanc generaliore februm differentiam, dantur
aliæ dissimilitudines non minùs insignes quæ repetendæ sunt
ab earum typo vario, variâque causâ, & genio vario. Ratione
typi itaque, aliæ febres dicuntur *continuae*; aliæ *intermittentes*.
Ratione causæ, aliæ *inflammatoriæ* sunt, aliæ *putridæ*, aliæ
contagiosæ, aliæ *exanthematicæ*. Demùm ratione genii, distin-
guuntur febres *malignæ* & *benignæ*, quæ nihil aliud sunt quàm
peculiares præcedentium characteres. Hæc lucidiùs explana-
buntur, ubi de diversis februm generibus ac speciebus.

Quantumcumque verò febris signum sit, sua ipsi quoque
symptomata sunt seu signa, sicut cæteris quibuscumque morbis
competit. Alia nempe *pathognomonica* seu essentialia: alia acci-
dentalia seu per *epigenesim* supervenientia, ut aiunt; id est,
creata per vim & propagationem morbi.

Symptomata febris pathognomonica non plura sunt. Unicum
enim & simplex in hoc sensu venit agnoscendum; nempe
excessus vitalis motûs suprâ voluntarias vires actuales. Ea enim
respectiva pulsûs acceleratio designat febrem, absquè ullo sig-
norum aliorum concursu.

Accidentalia symptomata febris ea omnia sunt quæ superac-
cidunt febri, tum ratione febris ipsius, tum ratione organorum
tunc affectorum. Ideòque alia aliis graviora sunt hæc signa;
sicut clariùs apparebit postquam febrium causas exposuerimus.

Causas febrem determinantes jam fas est persentiscere ex præ-
dictis. Eæ in genere habentur in quâcumque irritatione capaci
accelerare cordis actionem, dum è contrà tardescunt vires
voluntariæ: id est, illam citare actionem ultrà tenorem virium
voluntariarum actualium, quibus sufficientem spirituum copiam
recusat labefactata actualis conditio vitæ. Adeòque patet 1º. ali-
quam febris causam remotam existere in quâcumque materiâ,
quæ mole aut variâ qualitate suâ capax sit stimulare utramque
sensibilitatem ac irritabilitatem; adeò ut indè cor ipsum reagat,
quoniam illud cum utrâque facultate vehementer & undiquè
consentit. 2º. Hanc cordis reactionem majorem esse aut mi-
norem, pro variâ materiæ irritantis acrimoniâ, tum prout ipsæ
irritatæ partes majore vel minori sensu fruuntur per se, aut
ratione statûs earum pathologici; in quo scilicet partes omnes
sensûs capaces non solum sensu gaudent acutiori, sed & doloris
capaces evadunt eæ ipsæ quæ tempore sanitatis apparebant im-
passibiles. Hoc de ipsismet ossibus jam videtur meritò censuisse
ingeniosus Aretæus, ubi de Arthritide.

Idcirco credere fas est quòd stupenda illa viventium cor-
porum ægrotantium facultas quæ nomine *regiminis partium* audit
apud veteres melioris notæ Medicos, constituatur mediante
prædicto sensu pathologico, potius quàm per sensum absolutum
sanitati proprium; ideòque in hoc sensu pathologico stupendam
hanc latere virtutem, cujus beneficio numerosæ partes evadunt
sensibiles ac irritabiles, per consensum suum cum aliis partibus
primitus laceffit; adeò ut eæ partes sic per morbum sensificatæ

& animatæ , suo deinceps modo valeant etiam calcar addere cordi reagenti adversus primordiale irritationem. Haud aliter abjectissimus magisque timidus civis , afflictæ Reipublicæ graviter condolet ac publicè auxiliatur , quantumvis ignoratus fuerit dùm aderat summa tranquillitas pacis.

Cùm hæc omnia sese ita habeant , sequentes febris causæ admittendæ sunt. 1°. Quæcumque materies alicubi inflammata ; 2°. Copiosa aut variè corrupta primarum viarum saburra ; 3°. proprius visceris alicujus humor huic ipsimet visceri molestus factus , seu per se , seu propter mutatum illius visceris sensum ; 4°. Sanguis contaminatus humore acri retento vel resorpto , aut viâ contagionis intussuscepto ; 5°. Textus cellularis imbutus quodam miasmate inibi hærente ; 6°. Deniquè , deleteria quæcumque subtilis aura nervos ipsosmet penetrare ac veluti intingere capax ; adeoque eorum sensibilitatem adaugere & consequenter exacuere sensum & irritabilitatem cordis , simul & corporis reliqui. Ex quâ nervorum affectione videntur oriri febres nervosæ meritò dictæ : sed quæ ideò non ita sunt à materie immunes ac vulgus Medicorum passim opinatur. Quidquid verò sit , saltem meditati facile elucescet , febrem sæpenumerò creari à pluribus causis prædictis simul agentibus quæ magis vel minùs pertinaces sint , & quæ diversimodè afficiant unicam partem magis minùsve nobilem , aut plures simul.

Ex omnes causæ febrium materiales ab aliis producuntur causis magis remotis mox exponendis , & quarum sanè numero adscribenda venit quælibet vivendi ratio erronea. Sed majorem earum causarum turbam ab anomaliis tempestatum anni advenire , optimus notavit Hippocrates , aph. 1 sect. 3 : *Tempestatum anni mutationes , inquit , potissimum morbos pariunt , & in ipsis anni tempestatibus magnæ mutationes , aut frigoris , aut caloris ,*

aliaque pro ratione ad hunc modum. Quod nempè ita fit, non solum quatenus variæ anni tempestates sicut & variæ rationes vivendi, jam per se valent accrescere aut complere diversas hominum constitutiones physicas; verum etiam, quatenus illæ constitutiones quâlibet de causâ creatæ, præsertim ad gradum morbosum evehantur ab ipsis anni tempestatum magnis & crebris mutationibus. Consequenter causæ illæ remotæ, tum physicæ cum morales, effectum suum producunt secundum physicam hominum prædispositionem; aliis proinde nocendo, dum aliis proficiunt. Exindèque evenit ut aliqui melius valeant, dum multitudo ægrotat; & vicissim.

Docuit itaque Priscorum observatio, deindèque physicis experimentis & ratiociniis comprobatum mansit, variam esse exterarum causarum ut & moralium efficacitatem, secundum diversitatem adjunctorum. 1°. Nempè efficaces prædictas causas esse quatenus homines variæ ætatis, varii sexûs, variæque constitutionis tam individuæ quàm popularis, vel aggregati, vel separatim à reliquis vivunt, vestiuntur ac nutriuntur, cum paucis vel multis studiis, negotiis, laboribus, fortunis. 2°. In quantum prætereà illi habitant urbes, pagos, villas, domos, casas, sylvas, montes, valles, colles, planitudines aut clivos: tum loca alta simul & arida, aquis carentia, faxosæque, vel & concava, humida, herbosæ, & benè frondosis arboribus ornata: utraque calidis frigidisve ventis variè perflata, tum differentiùs à sole exclarata; simul accolendo vel non, lacus, paludes, fontes, rivulos, amnes, flumina, vel & mare ipsum. 3°. Demùm variè efficaces esse prædictas causas planum est, prout cum illis concurrat diversa diversorum miasmatum contagiosorum intus-fusceptio.

Non aliis de causis dissimiliter combinatis & applicatis, haud

fecus ac cæteri morbi nascuntur febres *endemicæ*, *epidemicæ*, *sporadicæ* seu individuæ, tum *contagiosæ*; quarum omnium hæc est propria natura, mutuaque dissimilitudo.

Eudemicæ febres sunt, quæ uno in loco regulariter grassantur quotannis, seu continuò, seu per certa dumtaxat intervalla, propter aliquot morbosas circumstantias quæ ab illo loco ferè nunquàm absunt.

Epidemicæ seu populares, quæ certo quodam anni tempore aggrediuntur plurimos simul homines ejusdem propè ætatis & constitutionis; quia nempè suprà eos aliquandiù regnavit communis aliqua causa in victu, aut habitatione, aut vestitu: vel & in moralitatibus aut meteoris, &c.

Sporadicæ, quæ dispersos variosque invadunt homines cujlibet ætatis & nullo non tempore accidunt, propter privatam eorum individuorum constitutionem, natam ab aliquâ causâ ipsis propriâ, qualis repeti potest ex habitatione, victu, artificio, vestitu, pathematibus animi, &c.

4^o. Demùm *contagiosæ* febres eæ sunt, quæ originem ducunt ab intussuscepto seminio; qualia sunt variolosum, morbiliosum, & alia, quæ valent sibi simile venenum reproducere, atque ita similes edere fructus. Nî febres illæ requirerent aliquam corporum prædispositionem ad hoc ut communicarentur, nisi etiam aliqui homines valerent seminium fortè acceptum mutare aut expellere: nunquàm daretur contagium ullum, quin omnes homines eodem in loco viventes caperentur. Consequenter non mirum, febres eas mox magis populares esse & funestas, mox minùs; prout nempè hominum huic contagioni expositorum constitutio magis vel minùs apta est ad germinationem nefandi seminii grassantis, simul & ad fovendam illius virtutem frugiferam. Ideò videmus ipsasmet variolas insertas aliquandò non germinare,

germinare , moxve paucissimos parere fructus , mox è contrà infinitè numerosiores. Itemque observatur grassantem contagionem quamlibet , in hâc vel illâ tempestate anni , magis vel minùs esse inimicam huic vel illi ætati. Nec aliâ de causâ fit , ut eæ calamitates mox magis generales sint ac periculosæ , mox minùs , sicut in grassante ipsâmet peste comprobatur.

Hucusquè indicavimus naturam febris , illiusque generales differentias & causas. Nunc dicendum quænam sint ejus symptomata generalia , & deindè quænam generalis diagnosis ac prognosis.

Quoad symptomata , cùm febris adventat , potissimùm si ea essentialis , plerumquè incipitur à majore vel minori horripilatione spasmodicâ , unâ cùm notabili virium corporis & animi dejectione , sæpèque cùm adjunctis nauseis. Talia sunt perspicua veluti vexilla proclamati interioris belli ; quibus , eunte certamine , solet sat brevì succedere calor febrilis , isque magis vel minùs siticulosus.

Calor ille febrilis aliquam propemodùm generalem irritationem designat , illeque sæpè sæpiùs pro pedisequis habet singulares anxietates , antea incognitas ; quæ percipiuntur paulò post febrem accensam , & procedunt ab imminentibus atque jamjam fortè incipientibus aliquot stasibus , quas febriles vocavimus loquendo de inflammatione spurâ. Atque ideò fit , ut plerumquè pars aliqua dolore notabili corripiatur inter febricitandum , nempè prout aliquod fortè organum primitùs irritatum fuit ; tùm prout illud magis aliundè aptum est ad aliquem patiendum decubitum , vi febrilis impetûs.

Proptereà , prædictis primordialibus symptomatibus febris , alia benè multa & varia non rarò superveniunt. Talia sunt per . vigilium , delirium multiplex , diarrhæa , convulsiones , subsultus ,

sudores crudi, exanthemata laboriosa. Eorumque secundariorum accidentium numero simul & gravitate, ostenditur hanc vel illam corporis partem gravius aut levius à febre oppugnari, vel & plures labefactari simul.

Hæc mala celerius tardiusve sese mutuò advocant, eaque semel nata augescunt, non solum pro variâ efficacitate causæ febrilis, sed & pro majore vel minori febricitantis sensibilitate & irritabilitate. Undè patet cur juniora individua potius quàm senilia corripiantur morbis febrilibus acutissimis : id est progredientibus passu multò velociori ac periculosiori. Sed rursus patet cur senes, suapte naturâ minùs sensibiles atque irritabiles, experiantur clancularias stases febriles statim quidem non laboriosas, sed deindè difficilius edomandas ob virium & reactionis defectum ; quæ stases aliquandiù veluti ignorantur ab ipsâmet naturâ sensibili : sed quæ deindè certissimam in mortem, quantumvis tardiori gradu accedentem, deducunt.

Nè timeatis illud febrium augmentum limitibus suis carere. Quoniàm enim una quælibet febris suam plerumquè causam determinatam habet, quasi justâ viventis sensibilitatis bilance ponderatam : & cùm ideò medicatrix natura statim reagat ubi primum satis est mali ad illam excitandam : non datur occasio augmenti indefiniti. Certa dumtaxat inest copia materiæ febriferæ, ejusque deleteria vis ad certum tantummodò gradum evecta ; proindè certus est ac determinatus gradus irritationis febrilis. Consequenter, ubi facta est illius irritationis evolutio, ubi commota sunt omnia quæ valent commoveri, nihil de novo accidit amplius, febrisque ideò desinit augescere. Hâc ratione manet aliquandiù febris in eodem statu & in quâdam veluti æquilibrata cùm causâ suâ, sed interim natura dimicat ; & ea quidem dimicat, quousquè tandem, vel natura vel morbus victrix fuerit ;

superioribus identidem factis viribus pugnatoris palmam reportaturi. Sed heu ! si causa febrilis polleat virtute majori , sicut fit quandò ob dispositionem ægroti , malum celerius pullulascit ; cùm ea tunc causa sit viribus vitæ multò superior , tunc quoque febris & celerius & indefinenter crescit , brevissimo tempore in mortem abitura.

Prædicta meditati facile apparebit ratio cur symptomata diversa sint prout febris incipit , augetur , consistit , & tandem declinat ; jamque ille spontè quæritabit generalem febris diagnosis. Hæc autem habebitur in actuali vitalis motus acceleratione respectu voluntariarum virium ; quandoquidem hæc ipsa acceleratio febris est. Undè nullus allucinationis metus hîc habendus ; dùm Medicus aliâ febris diagnosi contentus , perpetuò circumerrabit ab unâ incertitudine ad aliam graviolem incertitudinem ; vel & febrem non agnosceret ubi aderit : aut illam adesse fatebitur ubi nulla : aut quandò maxima , eam dicet levissimam.

Utinam febris futura prævideretur æquè facile ac præsens agnoscitur ! Quantumvis verò illa plerumquè per viam occultissimam accedat , licet quandoquè adventum ejus à longè prænuntiari. Nempè symptomata imminens febris prævidetur ex gravitate actualis cujusdam formati mali , cujus mos est febrem invitare. Essentialis verò simul & popularis , ex similitudine constitutionis epidemicæ cùm constitutione individui considerandi. Sporadica , ex constitutione biliosâ aut sanguineâ , &c. , ad summum evectâ gradum , cui & fovendæ præsentia favent adjuncta. Endemica , ex similitudine constitutionis hominis cujusdam cùm constitutione incolarum illius loci , in quo recenter ille habitat , aut in quo habitaturus est. Essentiales denique ipsas febres jam è propinquo judicare est ex lassitudinibus spontaneis , quibus

morbos prænuntiari monetur aph. 5 sect. 2 , præsertimque febriles.

Præter generalem diagnosim febris futuræ aut jam præsentis , utilissimum sanè foret singula dignoscere febrium tempora actualia. Quantum indè Medicus clinicus adjuvetur & quantum securitatis ægrotanti accedat , facilè intelligitur. At verò illud minimè impossibile est , nè dixerim attendenti facillimum. Cùm enim febres omnes principium habeant , necesse est & illas quoque finem habere ; quibus sanè duobus febris temporibus competere debet proprius phœnomenorum tenor , seu proprius ut ita dicam vultus per suos characteres dignoscendus. Quoniam verò secundùm scholasticos , ut plurimùm heu ! verbosiores , quâcumque in febre non solùm liceat distinguere medium tempus seu *statum* : tùm *augmentum* , inter principium & statum : & denique *declinationem* quæ sedet inter statum & finem ; hinc difficillima profectò evadit quæsitæ diagnosis , in quantum signorum copia faciat inopiam certitudinis. Sed pro felicitate Medici & ægrotantium , supervacanea hæc est subtilior , variorum febris temporum distinctio. Satis habetur , cùm facilius sit simul & tutius tria duntaxat tempora in febribus discriminavisse ; tempus nempè *cruditis* , tempus *coctionis* , & tempus *criseos* seu judicationis.

Ad obtinendam trinam hanc notitiam seu diagnosticam , seu prognosticam , cujus ope via tutior minùsque latebrosa Medico aperiatur , consuli profectò meretur immensa signorum collectio quæ prostat in operibus Cui observatoris. Sed dolendum est quòd accuratus ille vir , metu quidpiam utile omittendi , futilia innumera adscripserit numero egregiorum ; & quòd ipsi per vitam homini concessam non licuerit earum verum florem colligere , eumque porrigere Medicis libandum. Hujus selectûs defectu factum est , ut signorum suppellex adeò pretiosa passim

neglecta fuerit , imò & vituperata , propter quamdam obscuram farraginem necessariò videndam in collectione promiscuâ. Utinam quis sufficienti patientiâ donatus & tempore satageret ea signa secernere ac redigere congruum in ordinem ! Hinc sanè faciliores forent prognoses , quas summè difficiles esse monetur aph. 1 sect. 1 ; & quæ tam incertæ sunt in acutis , ex aph. 19 sect. 2.

Nihilominus cognita hæc Hippocrati difficultas non debet ab hoc opere juniores Medicos amovere , sed eos duntaxat facere cautiores. Quamvis perpauca fuerint Hippocrates , si quis unquam priori secundus , plurimi saltem Medici extiterunt qui longâ observatione comprobaverint obtineri ex pulsu arteriarum signa certissima benè plura , divino seni Coaco incognita ; quæ si addita fuerint signis aliis ab isto recognitis , longè faciliorem facient artem dignoscendi tria prædicta tempora febrium , simul & eam quâ opus est in prævidendis earum eventibus. Prope-remus igitur ad scrutationem signorum ex pulsu arterioso obtinendorum.

A R T I C U L U S II.

S I G N A ex pulsu arteriarum obtinenda.

NU N C quæsituri signa ex pulsu arteriarum obtinenda in febribus , statim observare curamus pulsum in his morbis triplici præcipuo modo mutatum sese præbere. 1°. Quandò ille fit frequentior , durior , strictior , remanendo tamen æqualis. 2°. Quandò evadit major , mollior , plenior , ac fortior , simul & æqualis. 3°. Quandò pulsus non solum major , mollior , plenior , ac fortior fit , sed & simul vario modo inæqualis ; ratione scilicet magnitudinis pulsationum , tum ratione intervallorum quibus pulsationes distant ab invicem.

Prima species pulsûs morboſi vocari ſolet à Mediçis *pulsus irritationis*, aliter etiam *pulsus nervoſus*, ſeu nimiam ſenſibilitatem designans: vel & dicitur *pulsus non criticus*, qualis nempè deprehenditur inter initia & augmentum morbi.

Altera species dicitur *pulsus extenſus*, poulx développé, ut aiunt Noſtrates, *pulsus mollior*, *pulsus coctionis* ſeu *pepaſmi*; qualis neceſſariò debet præcedere quamcumque evacuationem criticam, quæ abhinc characterem verè criticum accipit. Hic pulſus in acutiſſimis vix quandoquè percipi poteſt. Sed talis jam obſervari ſolet in ſtatu cæterorum morborum acutorum, quo ſcilicet tempore matières morboſa jam aliquatenùs mutatur & mutata eſt, atque ideò diſpoſita ad aliquam evacuationem.

Tertia demùm pulſûs species vocatur *pulsus criticus*, quia ſcilicet evacuationes quaſcumque criticas concomitatur, ideoquè Medici clinici utuntur eâ teſtificatione ad legitimas criſes agnoſcendas. Hic pulſus extensionem quidem & mollitiem *pulsûs coctionis* retinet. Verùm differt ab illo per certas quaſdam inæqualitates determinatas & conſtantes, ſicut mox indicabimus poſt obſervationes Medici de Bordeu, qui æternam in hâc parte gloriam adeptus eſt.

Si quis fortè inattentus, aut fatuus rerum vulgò abditarum oſor, hæce pulſuum thecnicas diſtinctiones falſitatis expoſtulârit: perpendat, quæſo, ſequentes obſervationes clinicas, poſteaſque iudicet.

Pulsus irritationis, initio febrium tam facilè agnoſcendus, ſequentia phœnomena exhibebit obſervatori.

1º. Nullam tunc evacuationem accidere niſi ſymptomaticam, quæ ſcilicet vi irritationis emuncta non ſit, proindequè gravis ægrotanti, ſive morbus adhucdùm incipiens ſit, ſive jam jam parùm proſectus. Omnes enim evacuationes quæ accidunt reg-

nante tali pulsu , nihil indicant nisi humoris morborum copiam , cruditatem & qualitatem irritantem; eæque sæpè ostendunt primitivam humoris hujus virtutem deleteriam nullatenus emendari : vel & sensim in eo fieri aliquam degenerationem malam , admodum debilitatem , cui refrænandæ , vita debilior plerumquè impar. Undè tales evacuationes sunt semper effectus & signum laboris maximi , ideoquè deciperetur ille qui illas spectaret tanquàm críticas salutares. Sunt enim semper admodum ominosæ si diutius duraverint , sæpissimequè mortem inevitandam portendunt.

2º. Omnes evacuationes vi pharmacorum abreptas quandiù viget pulsus ille (sicut quibusdam Medicis mos est) , similiter infaustas esse , merè debilitantes , naturæque inimicas. Talesque evacuationes censerì duntaxat utiles in casibus aphorismorum 22 & 24 sect. 1 , tùm aphorismorum 29 sect. 2 , & 10 sect. 4 : quos hìc appellasse liceat , ad hoc ut concordante eorum veritate apertius videatur , quantum evacuationes tempore cruditatis institutæ , differant ab illis quæ post coctionem peractam celebrantur : & ut intelligatur quomodò de illis censuerit Princeps Medicorum. Legitur aph. 22 sect. 1 , *cocta medicamento purgante educito ac moveto , minimè cruda , neque per initia , nisi turgeant , multa verò non turgent*. Tùm aph. 24 ejusdem sectionis : *in morbis acutis rarò & per initia medicamentis purgantibus utendum , idque diligenti antè adhibitâ circumspèctione faciendum*. Deindequè , aph. 29 sect. 2 , *incipientibus morbis , si quid movendum videatur , moveto , vigentibus verò , quiescere præstat*. Et denique , aph. 1º. sect. 4 , *in valde acutis , si materia turget , die eodem purgandum , morari enim in talibus malum*. Porrò non liceret evidentius declarare , 1º quanta sit necessitas purgandi per initia morborum acutorum , si modò materies tunc turgeat : id est , si copiosa sit

& ad evacuationem prona ; hic enim verus est sensus vocis *tò turgere*. Ideòque cavendum, nè in aph. 22 sect. 1 legatur, *plurima verò non turgent* ; nam hâc voce *tò plurima* excluditur major numerus ægrorum : dùm voce *tò multa*, pauci duntaxat denunciantur qui prætereà de morbis duntaxat chronicis videntur esse intelligendi ; quandoquidem aph. 22 sect. 1 agitur de morbis in genere, non verò de acutis, sicut in aliis tribus aphorismis ibi citatis. 2°. Aliquam latitudinem admittendam esse ad instituendas congruas evacuationes initio morborum, ut apparet ex verbis *tò incipientibus morbis*. Non enim semper licet ægrotis medicari primâ die. 3°. Aliquandò etiam satis feram evacuationem tutam esse quamvis cruda sint adhuc omnia ; sed eam esse instituendam *diligenti antea factâ attentione*, ad hoc ut nimirum judicetur, nùm sub initiis neglecta fuerit evacuatio tunc requisita : nùmve saburra priori addita fuerit, aut de novo creata per notabilem quemdam errorem in victu. 4°. Deniquè evacuationes medicamento purgante ducendas æquè generaliter congruas & necessarias esse ubi coctio peracta est ; ac illæ generalibus cùm cautelis instituendæ sunt, quo tempore viget cruditas designata per *pulsus irritationis*.

Pulsus coctionis dictus, mollitie & latitudine suâ satis differt à pulsu irritationis, ut in statu morbi facile agnoscatur si talis tunc temporis acciderit. Ille enim aliundè insignitur nonnullis induciis quas patienti vitæ jam concessit morbosus humor paulisper cicuratus ; ideòque pulsus ille jam melioris notæ est quàm præcedens. Sed prima hæc spei jam venientis umbra non adhuc designat criticam evacuationem ullam determinatam. Ostendit duntaxat generalem quamdam dispositionem ad utiles evacuationes, in quantum pollicetur morborum humoris coctionem deindè absolutum iri si vires vitæ valuerint, sicut requiritur ad
hoc

hoc ut critica contingant evacuationes. Consequenter, in constanti pulsûs coctionis continuitate, Medici clinici recognoscunt optandissimum signum coctionis mox mox absolvendæ, & quâ absolutâ licet expectari evacuationes certò criticas. Si quis consideraverit quanto cùm labore Hippocrates sit indagatus minutiora similis significationis fragmina in omnigenis phœnomenis morborum: si fuerit contemplatus quantâ cùm difficultate feratur judicium ex collatis rebus innumeris eruendum: nonnè lætabitur quòd, ex solâ pulsûs coctionis constantiâ, obtineatur veracissima coctionis significatio, cæteris aliis quibuscumque multò simplicior & multò faciliior observatu, quæ prætereà per se sola sufficiens sit? Saltem semper mihi visum est alia quæcumque parvula signa coctionis semper adfuisse, ubi pulsus coctionis constanter adfuerat.

Porro quid magis utile, præsertim in acutis, quàm illud signum sine quo nulla optima critica terminatio expectari liceat? Nam, ut optimè notat Hippocrates, loco citato ubi de resolutione agebamus: *Quæcumque absque judicationis significatione disparent, malè decernunt.* Quoniàm, ut alibi ait, quotidianâque probatur experienciâ, *Quæ..... præmaturam judicationem dum cruda sunt omnia occupant, morborum recidivas convehunt, & solutionem omninò malam, aut propè nullam.*

His de rationibus, ad hoc ut quædam evacuatio habeatur capax quempiam morbum acutum legitimè terminare, illa paulò antè prænuncietur necesse est à constanti pulsu coctionis. Sed prætereà observatur evacuationes criticas mox mox adventuras esse, quandò vigente constanti pepasmo aliquot jam apparent indicia pulsûs critici, quæ tunc temporis varia per intervalla admiscuntur pulsui coctionis, aliquibus veluti primitiis talium evacuationum simul apparentibus. Quinimò ex eo quòd earum

evacuationum primordia suboriantur certis diebus (*indicatoribus* dictis apud Medicos veteres), fortè etiam licèt certiùs augurari perfectam crìsim aliquâ die determinatâ futuram esse. Illi dies indicadores recensentur aph. 24 sect. 2, ergà terminationes acutorum quas trium septimanarum spatio frequentiores absolvi compererat antiquitas, sicut hodiè comperitur. *Quartus septenariorum index est. Octavus alterius septimanæ est principium. Undecimus etiam spectandus dies, ipse enim secundæ septimanæ quartus est. Rursus quoque spectandus decimus-septimus, hic enim est quartus à decimo-quarto, septimus verò ab undecimo.*

Quæ cùm ita sint, meritò distinguitur *pulsus coctionis* ad indicandas possibles terminationes febrium críticas, quoniàm ipse spontè deinceps abit in tertiam illam pulsûs speciem quæ audit nomine *pulsûs critici*, cujus character nunc examinandus accedit.

Nempè, postquàm pulsus coctionis notabili tempore constanter apparuit: id est, quandò pulsus aliquandiù fuit *mollis, explicatusque & fortis*, illeque deindè simul evadit aliquo modo *inæqualis* & eam inæqualitatem determinatam retinet, tunc habetur *pulsus criticus*. Sic vocatur ille pulsus eò quòd ab illo donetur proxima dispositio ad hanc vel ad illam evacuationem criticam determinatam, prout ille perpetuò servat hanc vel illam determinatam inæqualitatem. Docente itaque observatione, inæqualitas alia pulsûs designat criticam evacuationem futuram per sputa: alia per nares, per vomitum alia: alia per secessum, &c. sicut apparet in observationibus benè multorum in Europâ Medicorum.

Hæc facta in acutis præsertim morbis datur advertere, similiaque forsan in omnibus observarentur, si liceret per sufficientem peritiam & experientiam. Quidquid sit, cùm saltem Medicus

queat ab hoc egregio simul & sat facili signo accipere plurimum lumen in tractandis morbis febrilibus magis discriminosis; indè fas est resolvere quantæ utilitatis sit attentè observare ac consulere illud vitæ ægrotantis phœnomenon. Hujus auxilio licebit ad minimum certè cognoscere critica frequentiorum morborum febrilium molimina, illisque congruenter obedire vel & opportunè auxiliari, sicut aph. 21 sect. 1 præcipitur his verbis: *Quæ educere oportet, quò maxime vergit natura, eò ducito, per loca convenientia.* Si Medici omnes utili hoc dogmate (omniumque forsàn magis comprobato) imbuti essent, tot eorum non viderentur qui, nullo alio prælucente face præter cæcam consuetudinem aut segnissimam imitationem, nullo non die formati morbi febrilis jubent pharmaca purgantia, vel & continuò naturam perturbant præscriptis aposematibus emetisatis aut repetitis clysmatibus: ita sæpiùs non verendo infernam instituere evacuationem, ubi natura molitur crìsim supernam, aut exequendam viâ sudoris vel urinarum. Sapientiùs ergò agunt qui priùs interrogatâ trium prædictorum pulsuum naturâ sese gerunt, præterquàm quòd exemplo primi præceptoris attendant, nùm evacuationes spontaneæ facilè ferantur, necne; nùmve prænunciatæ fuerint aliquo die indicatore, aut acciderint quibusdam diebus crìsimis.

Hæc prælibasse ferè sufficeret de naturâ & significatione signorum obtinendorum ex pulsu in febribus observato, sicut & de utilitate illius observationis in faciendâ Medicinâ. Sed ad majorem dictorum intelligentiam juvabit hîc distinctis paragraphis disceptare 1º. nùm quædam rationabilis assignari queat theoria pulsûs *irritationis*, *coctionis* & *crisis*? 2º. Quinam número dies præcisè critici sint secundum Hippocratem? quem in hâc parte sibi contradixisse aliqui passim contenderunt.

THEORIA pulsûs irritationis, coctionis & crisis.

ALIIQUIS forsan regeret, pulsum irritationis, coctionis & criseos tot tantisque emolumentis suprâ illustratum, meram esse hypothesim factis clinicis prorsus destitutam, nullâque suffultam theoriâ saltem probabili. Respondebimus non parvam quidem difficultatem latere in quæstione hujus generis; sed non veremur hîc nostram opinionem proponere. In re tam obscurâ, satiùs mihi videtur aliquam saltem attulisse dubitationem & verosimilibus ratiociniis locum dedisse, quàm frigidam fateri ignorantiam. Quibusdam fortè placebit me conatum fuisse quādamtenùs probare *à priori*, ut aiunt, id quod de facto jam comprobatum est indubitatis observationibus multorum clarissimorum Medicorum, præter eas quas celeberrimus olim de Bordeu protulit post Galenum, Solanonem *de Luques*, & Nihelium. Videamus igitur per partes, quomodò tres prædictæ pulsûs species physicâ sub imagine aliquatenùs valeant repræsentari.

1^o. Pulsus irritationis sat facilè, ut opinor, intelligentiâ & ratione comprehenditur. Dicimus eum necessariò creari occasione irritamentorum toti & parti cuilibet illatorum à quâcumque materie copiosiore aut degeneratâ, ubi ubi stagnante, & secundùm naturam suam irritante. Haud difficilli cogitatione perspicitur actionem cordis multifariam immutatum iri, quoties prædictâ de causâ illud organum plectetur, simul & universum viventis corporis systema.

Quâ ratione valeant irritamenta adeò generalia excitari in corpore ægrotante, non liceret ullo modo concipere, nisi

corpus vivens aliter sensficaretur & animaretur dùm ægrotat, quàm dùm sanum est. Quamvis plurimæ fani corporis partes videantur in experimentis insensibiles, tùm plurimæ sensu valdè obscuro donatæ, plurimæque nullo prorsùs sensu gaudentes & irritabiles: exindè nihil mihi videtur concludi posse ergà statum corporis pathologicum, sicut plurimis placuit Scriptoribus post Hallerum. Quemadmodùm corpori viventi congruit varia illa sensûs & irritabilitatis partitio dùm sanum est: ita maximè ipsi opportunum, singulas ejus partes vario modo sentire & moveri in morbo qui status est sanitati oppositus, in quo proindè id proficere valeat, quod noceret in alio.

Itaquè si consideraverimus sanitatem, hic erit nostræ attentionis fructus; quòd nempè mediante vario gradu sensibilitatis & irritabilitatis (qui ad nihilum vel propè nihilum restringitur ergà diversas corporis fibras & organa), illud ipsum corpus vivens & sanum fruatur debitâ aptitudine ad functiones suas exequendas absquè ullo incommodo. Nimirùm muscoli contrahuntur, moventur artus, liquida varios viscerum meandros perlustrant, cor indefinenter palpitât, pondus corporis haud ægrè fertur ab illius basi, alimenta etiam piperata stomacho placent, innumeraque similia phœnomena innumeris in locis patrantur, absquè quòd ullibi percipiatur aliqua incommoditas vel levis.

Contrà verò, si partes omnes & singulæ eundem haberent gradum sensibilitatis & irritabilitatis dùm viget sanitas, ac dùm morbus adest: si omnes æqualiter sensficarentur ac movere sese valerent tunc temporis: nonnè exhinc sanitas ipsa perpetuam experiretur turbam? nonnè omnes corporis actiones dolorem varium continuò excitarent? nonnè ipsamet palpitatio cordis simul & motus sanguinis & humorum per vasa sua

perpetuo fremitu & concussu intolerabiliter horrerent? adeò ut corpus animatum non posset vivere, neque vivendo agere quidquam, absquè dolore, absquè perturbatione.

Mutatur ergò status organorum, vel & simpliciorum fibrarum quandò ægrotant, cùm tunc temporis sensationes antea incognitas patiantur. Mutatur inquam hic status organorum quorumvis, sive quandò in seipsis quidpiam mutatum habent, sive quandò plectuntur à corpore insolito. In primâ enim hypothesis mutantur eorum organorum physicæ relationes cùm rebus obviis: in alterâ, mutantur eadem relationes obviarum rerum cùm organis. Consequenter, mutato eorum omnium mutuo contactu mutuâque commotione physicâ, mutari & necesse est effectum illius commotionis: proindèque novas tunc contingere perceptiones. Haud aliter lumen, oculis amicum dùm valent, eosdem vulnerat dùm ægrotant: & similiter, intenso duntaxat lumine oculi dolent, quamvis sani. Dicimus ergò quælibet organa, ut & fibras, in statu morbofo donari sensu accidentali & auxiliatore, necnon aliquâ irritabilitate ab eodem statu inductâ. Quæ proprietates pathologicæ illis ipsis organis & fibris æquè propriæ sunt tunc temporis, ac propriæ sunt aliæ eorum facultates dùm sanitas adest. Ideò ex partes in morbo capaces evadunt oscillationis novæ novique sensûs, iisque facultatibus antea opportunissimè silentibus fruuntur, & quidem maximâ cùm utilitate. His enim, mediantibus organa illa acquirunt aptitudinem ad percipiendas præsentis stimuli novi irritationes, simul & ad reagendum ac reluctandum adversus oblatum stimulum, ad hoc ut ille tandem tollatur ac destruatur: non parùm quoque favente physicâ mutatione quæ in humoribus morbofis inducitur, propter extraordinariam eorum librationem, calorem, & causticitatem. Alioquì quæcumque pars

corporis viventis , quæ demisso duntaxat sensu vel nullo donatur dum sana est , impunè sineret sese obstrui , divelli , erodi : ideòque corpus animatum , occasione innumerorum morborum , foret spelunca omnigenarum infirmitatum reconditarum , planèque ignoratarum. Consequenter , variis vitæ organis clandestino impedimento sensim captis , homo pedetentim privaretur facultatibus suis & quidem inscius ; illeque tandem sinè præviâ monitione ullâ , particulatim evaderet incapax actionum suarum & vitâ fungeretur : nec ulla mors foret , nisi repentina.

Concepto verò quòd corporis animati partes publicâ sensibilitate & irritabilitate gaudentes , ut & eæ quæ illis facultatibus videntur orbatae , novam normam existendi acquirant per morbum : tunc corpus vivens valet sibi ipsi mechanicè invigilare. Nimirum , quatenus mediante sensibilitate & irritabilitate suâ pathologicâ capax fit res novas sentire , percipere nocuas , simul & invocare ac determinare salutiferum vitæ integræ auxilium , cujus beneficio inimicum suum depellat.

Itaque stupendum illud auxilium universale flagitari atque obtineri , altera statûs pathologici consequentia est. Hoc fit mediante mirabili illo consensu & mutuâ conspiratione quæ vigent inter omnes & singulas corporis partes ægrotantes ; cum nulla tunc sit quæ utiliter non sentiat , & nulla quæ non moveatur pro generali microcosmi emolumento. Qui consensus , non solum inter cor & cætera organa datur : sed & mutuus est inter varias omnes corporis partes , seu vicinas seu quodam officio relativo fungentes , vel & aliâ abditâ ratione hanc habentes facultatem. His meditatis , licet animo capere quid fortè reipsâ sit *regimen* organorum de quo jam pluries locuti fuimus ; quod à Medicis veteribus optimè perspectum fuit per effectus suos , quamvis minùs cognitum ; sed quod gratius est admittere , quandò aliquatenus concipitur.

Quia verò nullum physicis in rebus factum sit, quod alteri natales non præbeat. Ubi regimen illud organorum debilius evadit, prout fibrarum mobilitas deletur ab accedente rigiditate senili: tunc necesse est proportionaliter imminui salu- tiferam illius reactionem. Propterea senum morbi sunt magis chronici, seu partes eorum, ut ita dixerim, magis tolerantes: ideòque, nec morbi eorum febriles sunt æquè vividi ac in junioribus. Sed heu! in hoc ipso fiunt minùs sanabiles magisque lethales; vel &, si fortè curentur, ea curatio difficillimè ob- tinetur mediante perfectâ coctione & depuratione. Conse- quenter, quædam sæpiùs remanent post eos morbos reliquæ, ut plurimum singulares, à quibus recidivæ quandòque nascuntur, aut variæ ægritudines chronicæ, quibus sæpè commoriendum.

Prædictis omnibus de statu partium pathologico ita se haben- tibus, quid mirum actionem cordis variâ sympathicâ modifi- catione mutari occasione stimulorum variis partibus illatorum? Quid etiam mirum, si partes ipsæ corporis ægrotantis (tunc varium stimulum topicum aut sympathicum experientes, ideòque sensibilatæ & animatæ præter sanitatis consuetudinem), valeant vitali cordis motui peculiariter resistere simul & imperitare? Undè intelligere est, quare pulsationes arteriarum quæ sunt in sanitate *molles, æquis intervallis distantes, liberæ, nec frequentes, nec lentæ*, & tamen *fortes*: fiant è contrà *citatiores, acriores, duriores, veluti formicantes*, (& idcirco nimiam sensibilitatem redoleant sicut proprium est *pulsui irritationis*): quotiescumque viget pathologica stimulatio reciproca inter cor, variasque cor- poris partes? Quæ *pulsus irritationis* qualitates, conamen vitæ laceffitæ ac reagentis indicantes, tandiù igitur duraturæ sunt cum æquali perturbatione, quandiù tanta dabitur irritatio.

Ex his vitæ phænomenis attentè ponderatis nonnè licet colligere,

colligere, cur vivens natura quandòque exhausta succumbat sub nimis irritamentis post conatus æquè inutiles ac enormes? Cur aliàs hæc dimicatio vitæ longior sit, tandiù nutante victoriâ? Cur demùm vitalis reactio, tam in solidis quàm in fluidis diversimodè motis considerata, aliquandò tandem superior evadat, ideòque paulò fatiscant phœnomena bellicosa quæ ab irritatione producebantur? Non aliâ enim de causâ contingit urgentis febrilis impetûs relaxatio, quæ ipsa est optandum felicitis *coctionis* seu *pepasmis* inchoamentum, quo sponte adducitur *pulsus coctionis* mox considerandus.

Pulsus ergò *coctionis* dictus, id est pulsus magis extensus, simul & mollior factus, nihil aliud est quàm justa indicatio minoris vitæ perturbationis, ejusque tranquillitatis jam jam advenientis; quândòquidem tunc jam minùs degeneres sunt arteriarum pulsationes. Quæ jucunda resurgentis tranquillitatis vitæ aurora citiùs elucet aut tardiùs, prout facilior est aut difficilior mutatio instrumenti irritantis; ideòque illa prima lux maturiori ortusuo indicat sanationem maturiorem: tardiori tardiozem, tardissimo difficillimam fortèque nullam.

Hæc pulsûs *coctionis* significatio indubia est. Quêmadmodum enim cordis & arteriarum pulsationes characterem irritationis induerant eò quòd humorum qualitates mutatæ fuissent, indèque fuisset perturbata generalis viscerum animalium concordia: ita & character ille irritatus deleri debet seu magnoperè mitigari, ut veriùs loquar, quandò motus vitæ jam non nihil accedit ad tenorem sanitatis, vel saltem ab illo jam tantoperè non recedit: quia scilicet humores jam paulò meliores facti sunt, jamque imminutus sensus organorum pathologicus, & consequenter mitigata febrilis irritatio. Antè illas inducias pulsus erat *nervosus*, *formicans*, irritatus, talemque eum deprehendebamus

per initia morbi, ut & per augmentum ejus. Nunc verò apparet *extensus & mollis*, illeque verus factus est *pulsus coctionis*; qui dùm ita percutit tactum observatoris, ipsi pollicetur majorem rerum progressionem in melius; quatenùs nempè crisis quædam abhinc expectetur, quin tamen adhuc assignari liceat quânam viâ obtineri possit.

Cavendum tamen est, nè quælibet pulsûs arteriarum emollitio accipiatur pro signo coctionis. Illa ut sit bona, aliundè fulciri debet cæteris signis pro ratione melioribus. Deciperetur ille qui laudaret hanc perfidam pulsûs mollitiem, seu potius flacciditatem ac veluti inanitatem, qualis accidit aliquandò dùm omnia desperata sunt; dùm nempè, omni propemodùm sensibilitate & irritabilitate deletâ, deletoque proindè omnium partium regimine, jam nullus percipitur stimulus pathologicus, nullaque amplius exercetur actio ab illâ perceptione dependens. Tunc enim, omnibus partibus jam penè mortuis, supersunt mechanicæ duntaxat cordis contractiones, quas longè tardiùs deferit, quia illud ab irritabilitate suâ longè tardiùs deferitur. Pulsus verò tunc temporis mollem esse & flaccidum, nihil est cur demiremur. Sanguis enim tunc à corde projicitur in canales omni reactione destitutos, sicut & omni sensu: proindèque nullam sympathicam in pulsu mutationem ille facere potest. Hujus pulsûs mollis ac mortiferi frequentissimum habetur exemplum in febribus continuis desperatis. Sed frequentius observatur in hominibus graviore apoplexiâ tentatis, dùm mox mox morituri sunt. In eis enim, ob syderationem generalem sensûs & motûs, flaccescunt pariter arteriosi tubuli; iique ideò capaces duntaxat fiunt pati mechanicam distensionem tunc facillimè inducendam à corde, utpotè quod potentem adhuc actionem mechanicam exerceat, dùm partes cæteræ sunt prorsùs inertes.

Non omnis ergò pulsus mollis extensus & æqualis spectandus venit tanquàm pulsus coctionis; sed ille duntaxat qui simul in se ipso aliquod præbet robur & qui, ut jam monitum est, aliundè fulcitur signis quibusdam utilibus. Hoc itaque solo pulsu perseverante fas est bonam humorum elaborationem sperare, ab eoque indicatur generalis quædam dispositio ad aliquam evacuationem utilem. Sed illud ita apparet quin tamen cognosci adhuc possit quânam viâ hæc evacuatio sit expectanda. Ea incertitudo tollitur duntaxat, quandò prædicta mollis æqualitas pulsûs tandem abit in aliquam inæqualitatem determinatam & constantem. Nunc ergò videamus utrùm aliquatenus concipi possit, quare & quomodò pulsus coctionis criticus fiat evadendo inæqualis.

Abstrusa quidem ratio theoretica pulsûs critici: id est, ratio cur molli & æquali pulsui coctionis superaccidat varia inæqualitas, mox ergà magnitudinem pulsationum ejus, mox ergà earum pulsationum intervalla; neque magis patet cur inæqualitas aliqua determinata, aliquam determinatam evacuationem criticam infallibiliter indicet. Sed illa observatio non indè minùs certa & comprobata habetur. Quinimò, pariter liquet unum genus inæqualitatum pulsûs pertinere ad evacuationes criticas per superiora exequendas: alterum, ad evacuationes infernas; quæ partitio optimè convenit cùm spontaneâ naturæ curatricis tendentiâ. Morbi enim partium suprâ diaphragma positarum, naturâ duce curantur per sputa, excreationes, vomitiones, aut hæmorrhagias supernas; & vicissim, partes infrâ diaphragma positæ sanantur per evacuationes infernas. Non aliâ de causâ sancitum est aph. 18 sect. 4, viam supernam eligendam esse aut infernam in evacuationibus artificialibus instituendis, dùm partes affectæ illis indigent; huicque dogmati, ut opinor, nullus Medicus attentus refragatur.

Prædictæ igitur duplici naturali tendentiæ congruit duplicem in genere pulsum criticum dari, unum nempe *superiorem* dictum: alterum *inferiorem*; quia nimirum prior dicatur renunciandis moliminibus criticis partium suprâ diaphragma sitarum: dùm posterior pertinet ad partes diaphragmate inferiores. Quomodò illi duo pulsus cognoscantur, nunc quærendum.

Secundùm observationes accurati Medici de Bordeu, tales sunt eorum duorum pulsum proprii characteres. Pulsus *superior* dictus notatur imprimis quâdam reduplicatione præcipitatâ quæ advertitur in quibusdam arteriæ pulsationibus, & quæ revertitur per intervalla longiora aut breviora. Ea pulsantis arteriæ reduplicatio nihil esse videtur, præter unam pulsationem in duas veluti pulsationes divisam; quæ scilicet fieri concipitur, quasi daretur quædam morula in medio pulsationis unius, quæ ideò fit per duos ictus distinctos & distributè contingentes in eâdem cordis contractione. Pulsus verò *inferior* characterem suum generalem desumit ex inæqualitate alterius generis; nempe ex inæqualitate sensibili pulsationum inter se quoad robur, simul & quoad earumdem media intervalla, quibus veræ quandòque constituuntur intermissiones, tactu etiam minùs erudito percipiendæ. Prætereà in eodem pulsu aliquandò persentiscitur quidam subsubtus, gallicè *sautillement* apud Medicum de Bordeu; qui subsubtus arteriæ multùm juvat in distinguendo characterem *pulsûs inferioris*: aliundè quoque dignoscendi, ex eo quòd nunquam ille sit adeò explicatus (*aussi développé*) adeò mollis, adeò sibiimetipsi similis ac pulsus superior.

Si quis quæsierit quomodò, adventante crisi, producaturs pulsus *superior* dictus, tùm pulsus *inferior*? & quomodò ab invicem ii differre possint, quamvis ambo pariter critici sint? Respondemus nihil quidem certum haberi circà illud phænomenon,

nisi ipsiusmet phœnomeni certitudinem. Quia verò juvatur intellectus quandò mens valet percipiendarum rerum aliquas sibi facere imagines: hanc meam opinionem lubens referam. Etiam si minimè demonstrata sit, ea saltem vero videbitur similis; eaque prætereà incapax erit tyronibus dare ansas errorum, quoniam nititur aliis ideis practicis quas, me herclè, rationales dixerim, aut ego fallor.

Cùm nempè semper existat aliqua morbifera materies omnibus in febribus terminationum criticarum capacibus, quæ materies magis vel minùs copiosa sit, magisque vel minùs inepta ad contrahendam unionem cùm humoribus diversa cola perlustrantibus, quandiù cruda est: cùm materies hæc tandem mutetur, seu coquatur ut aiunt, mediante calore febrili simul & beneficio propriæ causticitatis suæ: cùm ideò materies sic mutata, jam queat admisceri variis determinatis humoribus vel & ipsimet duntaxat sanguini rubro variis partibus destinato, pro adeptâ quâdam cùm illis similitudine: & cùm eadem materies, prædicto modo præparata & disposita, forsan colligatur non nihil circà cloacam ipsi destinatam, id est circà idoneum emunctorium, antequàm eliminetur; nonnè ex illis factis licet sequentia resolvere? 1º. Quòd peculiaria organa, variis excretionibus faciendis dicata, debeant magis vel minùs titillari, quoties incipiunt frequentari aut constanter frequentantur à materie febrili concoctâ, quæ accedit unà cùm excrementitio humore illis organis proprio cùm quo illa expellitur: tùm quoties sanguinis portio distincta quæ ad varias partes corporis appellit, referta est miasmate quodam febrili, beneficio mutuæ affinitatis per ipsam febrem acquisitæ; 2º. Quòd illa organa hoc ipso facto debeant diversimodè sensificari & animari, adeòque peculiare producere pulsûs modificationes; quæ sint naturalia eorum

organorum emunctoriorum vexilla , quoties humori peregrino transitum concedunt : aut quoties aliquam expellendi humoris stationem circa se patiuntur.

Sed restat ut dicamus , quare pulsus criticus in genere evadat inæqualis ; tum quare pulsus criticus *superior*, ut ut inæqualis sit, discrepet tamen à pulsu critico *inferiori*: quare inquam, inæqualitas unius differat ab inæqualitate alterius.

Secundum ea quæ proposita sunt de adventu humoris cocti ad excretoria organa diversa (quæ sunt totidem animati corporis cloacæ), facile concipere est quod hic affluxus & transitus valeat diversimodè afficere cor propter ejus consensum cum cloacis illis : quod proindè illud diversimodè affectum , diversimodè etiam agere seu contrahere sese debeat : atque ita *inæquales* exequi *contractiones* , à quibus variæ pulsuum criticorum *inæqualitates* necessariò producantur. Sed ad hoc ut aliquatenus quoque concipiatur , quare pulsus tunc temporis sensibilem contrahat inæqualitatem diversam prout cloacæ suprà diaphragma sedent , aut infrà , attendere ad sequentia oportet.

Nempè , quandò ex gr. cloacæ supernæ titillantur ab humore critico ad eas appellente , tunc necesse est partes viciniores , (aliasque omnes ejusdem corporis regionis), aliquo modo per consensum affici , sensificari , mutari : dum infernæ partes è contrà quiescunt ; sicut vicissim quiescunt partes superiores , dum infernæ laborant. Exindè fit , ut non solum tota superior corporis regio majorem tonum acquirat reagendo , magisque ideò animetur , sicut id apparet ex majori vultûs rubore tunc temporis contingente ; sed & accidit , ut partes illæ corporis superiores (magis resistentes sanguini à corde propulso , prout major copia critici humoris ad illas appellit) , eâ in proportionem quamdam producant sanguinis restagnationem versùs cor , ad quod proindè sanguis

redux solitâ cùm facilitate nequit etiam appellere. Cùm verò his de causis cor nequeat ventriculos suos solito modo exonerare per singulas suas contractiones, sæpè accidit ut ii ventriculi, (tunc impotente nisu suo velut semi-vacuati), cogantur reliquâ suâ contractione reagere ad hoc ut sufficienter depleantur. Adeòque, cùm in hoc casu columna arteriosi sanguinis sæpissimè percutiatur duplici ictu, necessum est contractiones cordis ita modificatas notari totidem *reduplicatis* arteriarum pulsationibus, in quibus consistit character *pulsûs superioris*. Haud aliter canales flexiles vulgaris antliæ reduplicato pulsu ferirent manum observatoris : si hujus antliæ embolus in unâ suâ vibratione pelle-retur impetu diviso per mediam morulam, instanti vel minimo minorem.

Quoad pulsum criticum *inferiorem*, ille inæqualis est, sicut pulsus *superior*. Sed illius inæqualitatis hic est character, quòd aliquæ pulsationes aliis debiliores sint, imò & sæpè intermittentes : dùm pulsationes *pulsûs superioris* sunt inæqualiter *reduplicatæ*. Hæc inæqualitas *pulsûs inferioris* pendet quidem ab aliquâ singulari motûs cordis interpolatione, sicut & ea inæqualitas quæ *pulsui inferiori* propria est. Sed illa diversa fit propter diversitatem adjunctorum quæ hæc sunt, & quorum influxus sic concipitur. Nempè pulsationum inæqualis vigor & intermissio *pulsûs inferioris*, videtur procedere ex eo quòd tunc non fiat æqualis ac sufficiens regressus sanguinis ad cor per venam cavam, quo valeant proritari æquales & constantes cordis contractiones.

Dùm itaque viscerum inferiorum cola jam incipiunt accipere febrilem materiem coctam excrementitio suo humori unitam aut adhærentem sanguini ipsis proprio secundùm diversas motûs projectilis leges : à fortiori, quandò illam materiem urceatim

affluentem transmittunt : necessariò contingit in illis visceribus singularis & nova sensificatio & titillatio, singularisque ibidem expergiscitur irritabilitas, sicut dictum est de visceribus supernis. Qui novus modus sentiendi & agendi, non solùm spectat & erigit viscera criticam transmittentia materiem, sed & pariter ad reagendum allicit cætera ejusdem regionis organa; nam cum illis omnibus focia est malorum ut & bonorum communitas, seu propter vicinitatem aut continuitatem, seu propter analogiam officii, seu propter consensum pathologicum. Quapropter omnes & singulæ hujus regionis inferioris partes (sic occupatæ quodam communi eventu & officio), debent incallescere ac turgere non nihil, haud secùs ac notatur turgescere & incallescere vultum, quandò imminet & absolvitur quædam crisis superior. Proindè per hæc communia molimina naturali viscerum inferiorum *regimini* propria, necessariò offeruntur varia sanguini venæ cavæ inferioris remoramenta, præsertimque sanguini abdominali; quinimò quædam fortè creantur hinc indè constrictiones automaticæ diaphragmatis, propter impressiones quas experitur propè transitum venæ cavæ, tum propter communionem peritonei quo subtùs investitur: dùm simul fit prætereà notabilis derivatio versùs cola quæ irritantur à materiebus per hæc inferna loca affatim transfretantibus.

Porro facilè intelligere datur, his in circumstantiis retardari ascensum sanguinis venæ cavæ, eumque variâ modulatione affici, ut ita dixerim: magis fortè quàm primo conceptu putaretur; adeòquè iisdem de causis deficere solitam sanguinis copiam in auriculâ dextrâ cordis, quæ foveat solitas & æquabiles vitalis hujus musculi contractiones. Datâ igitur aliquâ imminutione in aliquibus cordis actionibus, nonnè pulsationes arteriarum inæquales fieri necesse erit quoad robur earum? Nonnè & aliquot

aliquot intermittentes erunt, quandò sufficiens erit sanguinis imminutio in auriculâ prædictâ, ad hoc ut silere cogatur una cordis contractio, vel ut aliqua saltem fugiat sensum tangentis digiti, præ nimîâ suâ debilitate? Consequenter, in hoc adjunctorum statu aliquot exploratarum arteriarum pulsationes hinc inde debiliores erunt interdum, imò & varia per intervalla intermittentes: sicut de facto requiritur ad constituendum *pulsus criticum inferiorem*, cui explicando incumbibamus. Nec aliter accidit pulsus inæqualis roboris esse aut sensibilibiter intermittentem, quandò sanguis versùs partem quamdam potenti dolore alligitur; ut & quandò fit alicubi constans aliqua sanguinis effusio: quæ, quantumvis levis fuerit, valet tandem adducere deliquium animi, quia tandem sanguinis penuriam facit in auriculâ dextrâ cordis. Quotiès accidit, hoc simplici artificio magnam hæmorrhagiam sistitam fuisse!

Sed quidquid sit de allatâ explicatione theoretico-practicâ pulsus critici, tam *superioris* quàm *inferioris*: eam, ut spero, æqui bonique consulent quicumque ab omni præjudicatione vacui erunt. Nunc superest ut moneamus quòd pulsus criticus *superior*, non sit unus in suo genere, sicut nec *inferior*; sed quòd plures uterque agnoscat species. Itaque in *pulsu superiori* distinguitur pulsus *pectoralis*, *gutturalis*, & *nasalis*: quatenus pertinet ad criticas evacuationes futuras ex naribus, ex gutture, ex pectore; pariterque in *pulsu inferiore* discriminatur pulsus *stomachalis*, *intestinalis*, *hepaticus*, *uterinus*, *hæmorrhoidalis*: tum ille qui crisin per urinarias vias futuram indicat, &c.

Quinimò annotandum est omnes prædictas *pulsus superioris* species inter se mutuò componi posse: sicut pariter variæ *pulsus inferioris* species mutuò quandoquè complicantur; prætereàque pulsus unum *superiorem* quandoquè immisceri cum aliquo ex

pulsibus inferioribus : & vicissim. Quæ pulsum criticorum complicatio toties accidit, quoties duplex ejusdem corporis regionis cloaca uno eodem tempore pervaditur; vel cloaca unius regionis, perindè ac alterius. Adeò ut his in casibus non facili sit, nisi digitis admodum eruditis, distinguere illas variorum pulsum conjunctiones & certò judicare quænam teneat dominationem : quænam proindè crìsim sibi propriam productura sit, necnè.

Quoniam verò minimè aggredimur tractatum de pulsibus, & quia duntaxat connitimur indicare utilitatem hujus doctrinæ, supersedebimus descriptioni variarum pulsûs specierum; quam in operibus Doctoris Parisiensis de Bordeu reperire datur exactissimè depictam, & quidem methodo, ni fallor, aliis longè anteponendâ. Hanc ex scriptis Galeni extorsam dicent forsan aliqui : esto. Sed Herculeum sanè opus erat in dilucidandis Pergameni Medici dissertationibus.

Hic tamen juvabit addidisse delineationem pulsûs sudorem criticum indicantis, utpotè qui peculiarem mereatur attentionem. Ille enim est quidam veluti pulsus generalis, saltem respectu pulsum *superiorum* cum quibus sæpenumerò conjungitur, dum ferè nusquam concomitatur ullos pulsus inferiores: illeque semper ab omnibus Medicis attentis cognitus fuit, qualis à Galeno distinctus fuerat & descriptus. Hic est pulsus, quem *undosum* vel & *incidium* vocavêre Medici Veteres, & qui sequentibus characteribus sese declarat.

Nempè *sudoris* pulsus adesse dicitur, semperque sudor expectandus est, quandò arteriæ pulsatio est *plena*, *admodum mollis*, *explicata* & *fortis*, prætereàque his modificationibus simul adjungitur singularis hæc inæqualitas, quòd scilicet aliquot hinc indè pulsationes eleventur seu amplientur ultrà ordinarios arteriæ ictus : & quòd, dum ita elevantur, successivè augecant, usque

ad tertiam vel quartam, quæ dilatationem mollitiemque præbeat majorem quàm præcedentes. Solano tres tantummodò pulsationes ita adauctas agnovisse se scripsit : de Bordeu duas vel tres : alter, Solanone recentior, admitit quinque. Observatio litem dirimet. Sed, ut mihi apparet, hic numerus variat.

Pulsus sudoris non solum observatur in fine acutarum febrium, verum etiam in fine morborum pectoris inflammatoriorum ; necnon & quandoquæ in ultimis febrium intermittentium paroxysmis, quando febres istæ mox mox abituræ sunt.

Si quærat ratio cur pulsus sudoris sæpenumerò incidat cum pulsu quolibet superiori : dum ille cum pulsu inferiore nequaquam ferè concurrit? Respondemus id præsertim feri, quia crises superiores nequaquam conveniunt cum crisis inferioribus. Tendentia humorum centripeta crisis inferiorum, nequit concurrere cum tendentiâ centrifugâ crisis superiorum, ut & crisis per sudores patratæ. Prætereà, cum pulsus sudoris apprimè criticus, constanter sit *plenus, mollis, explicatus & fortis* : dum pulsus inferiores nusquam sunt adeò *molles*, nec adeò *explicati*, neque sibimetipsis adeò similes quoad pulsationum intervalla ; facile datur concipere discrepantiam, quæ sedet inter pulsum sudoris & pulsus quoslibet inferiores. Hincquæ patet ratio cur pulsus sudoris non incidat cum ullo pulsu inferiori : dum è contrà pulsus sudoris sæpiùs cum pulsibus superioribus concurrit, præsertimque cum pulsu pectorali. Idcirco, ægros plerumquæ sudoribus diffuentes videmus, quando critica sputa rejiciunt : dum contrarium observari solet respectu crisis infernarum. Exceptâ solâ evacuatione uterinâ (quæ quidem non nihil cutanea est), non memini me vidisse criticum sudorem reverà concurrentem cum crisi alterâ ejusdem infernæ corporis partitionis.

De cætero, ex iis quæ mox dicta sunt in genere, (tùm de variâ affinitate humoris critici cùm excremento vario necnon cùm cruore variis partibus specificè destinato, tum de humoris illius qualitate magis vel minùs irritante), hæc conclusio quoque generalis eruenda est circà quemcumque pulsum criticum. Nempè 1^o. quòd difficillimum sit advertere quampiam mutationem in pulsu coctionis, etiamsi crisis immineat, ubi paucus humor criticus, isque valdè benignus expellendus est. 2^o. Quòd natura quandoquè inter duas species pulsûs critici velut hæsitabunda aliquandiù maneat, mox hunc affectando pulsum, mox alterum; quandò scilicet febrilis humor jàm ferè coctus, mox illam cloacam affectat, mox alteram: eò quòd ille mox affinis sit cùm uno humore excrementitio, mox cùm altero: vel & mox cùm hac sanguinis portione, mox cùm alterà. Adeò ut ea naturæ hæsitatio appareat, quousquè humoris affinitas, per febrem determinata, adduxerit determinatam illius unionem cùm uno singulari excremento vel cùm peculiari rivo cruoris: ideòque effecerit distinctum criticum pulsum quo designetur determinata quædam evacuatio critica, seu humoralis, seu sanguinea. 3^o. Demùm ex iisdem resolvitur ratio, cur nulla quandoquè contingat perfecta crisis, etiamsi plura criseos indicia apparuerint: quoties nempè febrilis humor indocilis est sufficientem pati elaborationem, ad hoc ut huic vel illi cruoris portioni aut excremento affinis fiat, & cùm eo possit eliminari: tum imprimis, quoties febris turbatur præposterâ medicatione. Undè intelligitur quare quædam febres veluti æternentur, nec extinguantur nisi modo admodum insensibili; sicut plerumquè videre est, quandò natura catharticiis fatigata fuit tempore vigoris morbi. Tunc itaque æger sæpè plures successivas veluti metastases patitur: quatenùs nempè, dùm natura sese accingit ad parandam crisin quamdam, aut dùm

humor jam fortè aliquam petere incipit cloacam, mutatur ejus cloacæ sensificatio, mediante impressione purgantium medicaminum suprà viscera abdominalia. Nam viscera hæc, regimine suo generaliter patienti, valent afficere sensum & motum superioribus organis quibuscvis proprium: sicut vicissim viscera inferiora affici possunt, à superioribus inopportunè laceffit.

At regeret forsan quis, usum saltem cathartorum non esse nociturum feбри deindè fortean curabili per evacuationes alvinas. Sed præterquàm non adeò frequentes sint illæ intestinales crises, respondetur quòd, quamvis talis crisis sperari posset, nihilominùs viscera abdominalia (sæpiùs irritata & emuncta per prædictas evacuationes), proprium suum *erethismum* opponerent expectatæ crisi. Tunc enim inopportuna hæc irritatio cloacas illas stringere capax est; sicut aliundè ex illis cloacis millies emunctis, ac veluti expressis, tollitur vehiculum quoddam amicum, juvandæ coctioni quàm aptissimum; quâ ratione partes quæ sunt ad umbilicum amittunt congruam crassitudinem: quod sanè tunc malum est, ex aph. 35 sect. 2.

§. II.

S U N T - N E dies critici, & quinam secundum Hippocratem?

CRISIS apud Medicos vocatur subita mutatio morbi in melius aut in pejus, qualis febrilibus in morbis tam sæpè observatur. Fit mutatio hæc in melius, quandò natura victrix est: ubi nimirum absoluta est febrilis humoris coctio, illeque per aliquam corporis viventis cloacam eliminatur. In pejus verò, quoties natura suscepto huic operi impar est; ideòque vel alter morbus, vel mors subsequatur.

In primo casu, si febrilis materies copiosa non fuerit, crisis

salutifera affulget sub auspicio notabilis levamenti, simul & pulsûs coctionis confirmati; sed si copiosa materies expellenda sit, tunc præter signa prædicta, suboritur pulsus verè criticus, quem brevè excipit sensibilis quædam evacuatio abundè salutifera. In casu verò mutationis morbi in pejus, quamvis signa quædam coctionis fortè præcessissent, nedùm confirmentur, ea evanescunt, imò & pejoribus signis natales præbent; nempè pullulascunt symptomata nova, si morbus secundarius impenderit: pulsus verò evadit irritatissimus, formicans, ac miserrimus, si adventura sit mors. Similia in praxi quotidianâ observantur.

Quamvis illi eventus critici sat subitò superveniant, ii tamen non accidunt fulguris ad instar. Sed eos adventuros esse paulò antea apparet mediantibus quibusdam signis, quæ oriuntur prout malum ineluctabile evadit, aut illud è contrà incipit cicurari ac depelli. Hoc præsertim advertere est in hominibus vel acutissimè ægrotantibus, qui scilicet curantur nullo adhibito auxilio, præter temperantiam ab instinctu solo naturæ inspiratam. Porro, si natura quidpiam tale per se solam faciat, quis dicere ausus erit, non dari in morbis potentiam curatricem spontè operantem, quæ statis quibusdam temporibus curationem absolvat, vel & secundarium accersat morbum aut mortem ipsam, si morbus nequeat priori modo fugari. Quemadmodum enim res naturales suum habent exordium, ita & suum habere finem necesse est.

Enim verò naturam filere in chronicis morbis nè resolvas, ex eo quòd in iis tam debili ter agat ut quiescere videatur. Sed agnosce illius duntaxat conatus plerumquè nimis imbelles tunc esse: indèque satage scrutari quousquè valeat artis peritia supplere naturam impotentem, & communes reportare victorias. Nonnè & mutationes subitæ observantur in chronicis morbis, quæ veræ sunt crises, & quæ pariter accidunt quando delecte-

rium latens mutatum tandem est? five natura id boni præstiterit sola, five id fecerit auxilio artis. Hæ quidem mutationes non adeò apertè prævidentur ac in acutis, præsertim ex pulsu critico, (quia illæ non tantâ cum perturbatione accidunt, sed eæ nihilo- minùs innotescunt per signa sua, quorum princeps habetur in levamine evidenti, cui socius adjungitur pulsus magis accedens ad statum sanitatis.

Ne tamen quis crediderit Medico semper otiaandum esse atque contemplandum, in crisum expectatione. Ipsi quidem agendum incumbit, tum in chronicis, tum in acutis morbis. Quinimò in acutis præsertim agendum sine cunctatione sub eorum initiis, certâ cum latitudine intellectis; quandiù nimirum tolli potest materies eorum augmenti, unâ cum occasionibus nimix irritationis.

Verum enim verò finenda ac consulenda natura est ipsique serviendum, ubi semel motus febrilis satis attemperatus est in morbis inflammatoriis; tum ubi in iisdem, præsertimque in aliis, evacuatum est id quod primis viis hæret, & cujus irritatio localis, nec non trajectio ad sanguinem, potuisset præsentem ingravare morbum. Sola siquidem natura callet artem corrigendi & ad exitum disponendi, id quod in decubitu quocumque sedet, eaque sola capax est funditus emendare & purgare massam humorum aliquo deleterio contaminatam. Valet tantum ars paucis uti auxiliis quæ naturæ operanti faveant, nocua nempè abigendo simul & adhibendo proficua: in hisque adhibendis sapienter sese gerere debet. Medico talia facienti, nec ullo modo naturam turbanti apparebit, morbos acutos dato quodam lapsu temporis curari, diebusque satis determinatis: alios citius, tardius alios.

Dies de sorte ægrorum ita decernentes quadamtenus fixas esse vix crederet quispiam, nisi longâ innumerorum Medicorum observatione id probaretur. Attamen, si illud naturæ phænomenon

philosophicè consideratum fuerit, nihil exhibebit mirabilius, quàm id quod perhibet regularis transitorium avium reditus & abitus, tùm fixus incubationis terminus aliique eventus naturæ innumeri, quorum regularitas pendet à causis perindè reconditis.

Fatemur rem aliter visam fuisse à pluribus Medicis. Sed quid ex hâc singulari opinione probatur adversus turbam Sectatorum antiquitatis? Nisi quòd multi quidem nomine & famâ sint Medici, re autem & opere perpauci, sicut jam dolebat bonus Hippocrates: & quòd imaginaria medicatio in acutis valeat ordinem crifum naturalem magnoperè interturbare & occultare. Medici enim qui domesticâ observatione suâ freti adverfantur diebus criticis, ii sunt duntaxat qui, systemate quodam imbuti & ab aliis nihil mutuari sese gloriantes, nunquàm in decursu acutorum abstinere à pharmacis vacuantibus, aliisve mediis valdè moventibus pro arbitrio adhibitis: quasi liceret indefinenter imperare Naturæ, faustasque ab illâ invitâ extorquere crifes.

Si è contrà audiverimus Hippocratem, dabitur colligere motus criticos naturæ medicatricis reipsâ existere, imò & ab illis ordinem affectari satis constantem, cujus ordinis accuratæ observationi debetur crifum doctrina, quæ nullo modo innixa est scientiæ numerorum Pythagoræorum, ut quidam censores passim reputârunt. Ea quæ leguntur in epistolâ Hippocratis ad Theffalum filium suum, nequaquàm sufficiunt ad hunc observatorem collocandum inter ignavos Sectatores Philosophi Samii. Hæc epistola vario modo scripta & extensa reperitur variis in editionibus; ideoquè illa dubiæ fidei meritò existimanda est. Prætereà, quamvis legitima foret, ea sensu obvio potius esset spectanda tanquàm brevis invitatio ad colendam criticorum dierum cognitionem & numerum; ad quam *experientiæ facultatem* acquirendam, valdè contendendum esse ibi præcipitur.

Videamus.

Videamus ergò quinam sint dies crisibus à naturâ consecrati in acutis morbis, & quid præcisè censuerit Hippocrates de quæstione tanti momenti. Non ibi aggredimur dirimere variorum scriptorum controversias. Hanc non invidemus gloriam Viris magis eruditis. Desideramus duntaxat exponere tyronibus res magis positivas, magisque utiles.

Secundùm Hippocratem, duplex agnoscenda est series criticorum dierum, seu dierum in quibus morbi judicantur. Prima series complectitur judicationes quæ contingunt diebus morborum septenariis; altera, judicationes diebus paribus & imparibus accidentes. Ne credatis tamen morbum nullum terminari nisi in die critico dicto. Aliqui etiam desinunt aliis diebus. Sed quamvis isti dies hoc ipso evadant critici seu judicatorii, non adscribuntur numero criticorum dierum, quia nimis rarò decernunt. Ad hæc notari meretur tutiores esse, ut & frequentiores, terminationes diebus plerumquè criticis accidentes, quàm quæ contingunt diebus rarissimè decernentibus. Nam, ut docetur libro de diebus decretoriis, quamvis omnibus diebus morborum crises quandoquè fiant, tamen non in omnibus diebus æquales numero observantur, neque pares fide.

Judicationes diebus septenariis contingentes frequentiores sunt aliis, & pertinent ad febres quarum exacerbationes singulis diebus incidunt. Judicationes verò accidentes diebus paribus & imparibus, pertinent ad morbos rariores, quorum exacerbationes contingunt diebus paribus aut imparibus. Hæ duæ judicationum series omninò distinctæ reperiuntur in operibus Hippocratis.

Judicationes diebus septenariis accidentes, sequenti modo determinatæ habentur lib. de prænotionibus, sect. 2. Foëf. pag. 11, lig. 21 & seq. : » febrium judicationes iisdem numerantur

» diebus, quibus & evadunt, & moriuntur homines. Nam &
 » mitissimæ febres, & quæ securissimis fulciuntur signis, die
 » *quarto* aut antè desinunt. Maximè verò malignæ, & quæ cùm
 » gravissimis signis fiunt, *quarto* vel priùs interficiunt. Primus
 » itaque earum insultus ad hunc modum desinit, secundus ad
 » *septimum* deducitur, tertius ad *undecimum*, quartus ad *decimum-*
 » *quartum*, quintus ad *decimum-septimum*, sextus ad *vigesimum*. Hi
 » igitur circuitus ex acutissimis morbis per quatuor factâ acces-
 » sione, ad vigesimum terminantur. Neque verò horum quic-
 » quam integris diebus exactè numerari potest, cùm neque annus
 » etiam, neque menses integris diebus exactè numerari soleant.
 » Post hæc autem, eâdem ratione juxtâ eandem adjectionem
 » primus circuitus est *quatuor & triginta* dierum, secundus *qua-*
 » *draginta*, tertius *sexaginta*.

Prædictus criticorum dierum index apertissimè designat dupli-
 cem esse eorum seriem. Prima series complectitur criticos dies
 morborum *acutiorum*, qui nempè terminantur spatio trium sep-
 timanarum, imò & maturius. Altera comprehendit dies criticos
 morborum qui dicuntur *acuti ex decidentiâ*, qui prorogantur ad
 usque diem quadragesimum, imò & ad sexagesimum.

Ad hoc ut intelligatur computatio & adjectio dierum ad
 constituendas morbosas septimanas in prænotatione suprâ relatâ
 memoratas, ut & ad cognoscendos criticos earum dies : con-
 sulendus est aph. 24. sect. 2, qui sic se habet : *Quartus septe-*
nariorum index est. Octavus alterius septimanæ est principium. Un-
decimus etiâ spectandus dies, ipse enim secundæ septimanæ quartus
est. Rursus quoque spectandus decimus-septimus, hic enim est quartus
à decimo-quarto, septimus verò ab undecimo. In hoc equidem apho-
 rismo reperitur duntaxat computatio trium priorum septimana-
 rum, (quæ pertinent ad morbos *acutiores*, seu acutos per excel-

lentiam), unà cū enumeratione omnium dierum *indicatorum*, necnon & *criticorum* his tribus septimanis priorum. Sed ex his intellectis, facilè elucescet id quod respicit sex alias septimanas quæ attinent ad morbos intrà novem septimanas terminandos, id est ad morbos qui *acuti ex decidentia* appellantur. Prætereaquè ex eodem aphorismo apparebit, quantum ii decipiantur qui contendunt diem vigesimum-primum ab Hippocrate designari tanquàm criticum & ultimum tertiæ septimanæ. Equidem, dicendo quòd dies decimus-septimus sit quartus dies tertiæ morbi septimanæ : nonnè dicere est, diem ejus septimum haberi in die vigesimo?

Non minùs decepti mihi videntur qui objiciunt aphorismum 36. sect. 4 tanquàm contradictorium, eò quòd designet dies diversos à prædictâ enumeratione. Nūm jure, vel injuriâ id faciant, videndum. Ideòque citabimus hunc aphorismum sicut legitur in editionibus magis exactis, qualis est imprimis illa quam nuperrimè curavit peritus D. Bosquillon Med. Parisiensis. Nempè, *sudores febricitantibus boni, qui incipiunt tertio die, quinto, septimo, nono, undecimo, decimo-quarto, decimo-septimo, vigesimo-primo, vigesimo-septimo, trigesimo-primo & trigesimo-quarto, ii enim sudores morbos judicant. Qui verò aliter contingunt (1), vel mortem, vel dolores, vel morbi longitudinem, vel recidivas significant.* Porro advertatis dies hoc in aphorismo designatos, minimè ibidem declarari criticos. Tantummodò ibi notatur sudores diebus duntaxat designatis *incipientes*, bonos esse; id est, ab illis promitti crisin deindè absolvendam. Non verò ibi statuitur eos sudores ideò bonos tunc esse, quia iisdem diebus morbum terminant : sed quia his diebus *incipiunt*. Quæro ab omnibus Medicis ut candidè dicant, nūm viderint unquàm morbum quem-

(1) Confer. aph. 37, 38, 41, 42 & 56 sect. 4.

piam terminari per sudores, eo ipso die quo ii sudores incoeperunt? Eo quidem die quo morbus tandem desinit favore sudoris critici, sudor semper erit multò copiosior; sed ille quoque sudor semper antea incoepit paululus perspirare: die scilicet 3^o. aut 5^o., &c. Hoc sudoris critici genium apprimè comprobare est in inflammatoriis morbis pectoris, utpotè qui semper judicentur per sudores criticos, sputis coctis adjunctos. Consequenter, nedùm hic aphorismus absurdus sit, ut quidam exclamant, ille è contrà veracissimè indicat epocham sudorum, ex quibus liceat deindè sperare crisin quæ à febre perfectè liberet. Ea enim à febre liberatio per sudores, nequit intelligi de eo ipsomet die in quo sudores *incipiunt*, sed de diebus duntaxat criticis subsequentibus. Nec aliter interpretanda sunt ea quæ leguntur lib. prænotationum, pag. 5. Foës, lin. 16 & seq., ubi non solum fit mentio originis bonæ sudorum, sed & designantur tum bonæ tum prævæ eorum qualitates, quocumque die & modo scaturierint. Notum est prætereà sudores quoque pessimos ipsismet diebus criticis efflorescere, sicut fertur aph. 4 sect. 8. his verbis: *sudores diebus judicatoriis vehementes & spissi suborti, periculosi, & qui ex fronte, guttarum & scaturiginum instar, propelluntur, quique valdè frigidi sunt & copiosi. Ejusmodi namque sudores cum vi, & summo dolore, expressioneque diuturnâ prodire necesse est.*

Si de prædictis Medici Coi sententiis aliter judicârunt quidam Censores, id processit ex eorum pravo adversandi studio in favorem cujusdam systematis; vel ex eo quòd maluerint errores Hippocrati tribuere, quàm ejus explorare accurationem. Non veremur affirmare dies criticos septenarios morborum acutiorum & frequentiorum optimè ab illo Medico fuisse distinctos, absquè ullo vestigio contradictionis ipsi adscribendæ. Videndum restat, nùm pariter stabilitæ sint crises diebus paribus & imparibus

contingentes, quæ sunt altera series crîsum ab illo quoque observatarum.

Crises diebus paribus aut imparibus accidentes pertinent ad morbos acutos rariores, quorum exacerbationes contingunt diebus paribus aut imparibus. Nempè, ut inquit Hippocrates lib. 1. de morb. vulg., qui diebus paribus invasiones habent, ii diebus paribus decernunt. Quorum verò accessiones imparibus diebus fiunt, ii imparibus judicantur. Talium crîsum aliquot exempla prostant in historiis ægrotorum libri ejusdem & aliis; eaque faciunt quamdam veluti exceptionem in lege crîsum naturali. Sic autem recensetur earum ordo in fine sectionis tertiæ libri ejusdem, pag. 40 Fœs. : » Circuituum autem qui diebus pa-
 » ribus judicant, primus est decretorius quartus, sextus, octavus,
 » decimus-quartus, vigesimus-octavus, trigesimus, quadragesi-
 » mus-octavus, sexagesimus, octogesimus & centesimus. Cir-
 » cuituum verò qui diebus imparibus judicant, primus est ter-
 » tius, quintus, septimus, nonus, undecimus, decimus-septi-
 » mus, primus & vigesimus, septimus & vigesimus, & trigesi-
 » mus-primus. Considerandum autem est quòd si quid aliter
 » extrà hos præscriptos dies, decernat, recidivas fore, perni-
 » ciemque portendi. Animumquè advertere & nosse oportet,
 » his in temporibus futuras judicationes ad salutem aut perni-
 » ciem tendere, vel momenta in melius aut deterius facere. Præ-
 » tereaque videndum est, quibusnam circuitibus febres errantes,
 » quartanæ, quintanæ, septimanæ, judicationes subeant.

Verùm, ex eo quòd nihil de similibus morborum terminationibus habeatur in aphorismis, in quibus celebrantur crises septenariæ, apparet terminationes diebus paribus & imparibus accidentes non fuisse ab Hippocrate comprobatas observationibus sat numerosis. Hic equidem fecit mentionem febrium tertio

quoque die exacerbescentium, dùm scripsit aph. 43 sect. 4 ; *febres quæcumque non intermittentes tertio die vehementiores redduntur, periculosiores. Quocumque autem modo (deindè) intermiserint, securitatem inesse significatur* ; sed non loquitur de terminationibus earum criticis. Ibi agit duntaxat de periculo his febribus annexo quandiù exacerbescent tertio quocumque die, ut & de securitate quæ accedit ubi illæ acquirunt typum febris tertianæ, ideòque fiunt intermittentes. Ex ipsæ sunt febres quæ ab ipso vocatæ fuerunt *semi-tertiænæ*, *tritheophiæ* verò seu *tertianariæ* à Galeno, & *hemitriteæ* apud Celsum aliosque varios scriptores ; sed quæ non sunt satis frequentes ut apertius innotuerint terminationes earum criticæ, & ut amplior de illis doctrina tradita fuerit. Tales itaque febres nihil aliud sunt quàm rarissimæ illæ tertianæ degeneres quæ evaserunt continuæ, & quæ solent denuò fieri tertianæ quandò mitescunt, sicut Medicis exercitatis notum est : quæ verò remanent periculosissimæ, si hoc modo non mutantur ; adeò ut illæ præ aliis lethales dicantur, lib. I. de morb. vulg. , pag. 36.

Quoad febres diebus paribus exacerbescentes & decernendas, ex adhuc prioribus rariores observantur, perfectumque de illis silentium servatur in aphorismis. Pro meâ sententiâ, febres illæ reipsâ sunt quartanæ degeneres, maligniores & continuæ factæ ; quales aliquandò observare est in turbâ quartanarum autumnalium mali moris, aut provectarum & neglectarum. Talis est etiam febris illa rarò observabilis quam *tetartophiam* variis epithetis insignitam vocare placuit Sauvagesio, id est *quartanam continuam*. Quæ igitur in ordine febrium idem præstat, ac præstatur ab aliquo monstro acephalo in ordine animantùm.

Quid verò mirum febres *hemitriteas* seu semi-tertianas judicari diebus imparibus, paribus autem *tetartophias* seu quartanas con-

tinuas ? Cùm febres illæ exacerbentur diebus illis , nonnè iisdem natura debet vincere aut devinci ? quandòquidem iis præsertim diebus decertandum habeat , in hâc assertione nihil absurdum est. Neque etiam licet ab hinc quidpiam concludere adversus doctrinam criticorum dierum qui observabiles sunt in acutis morbis febrilibus ordinariis. Qui ordinarii morbi febriles , cùm singulis diebus exacerbescant magis vel minùs , singulis quidem diebus aliquandò quoque judicantur , sed multò frequentius judicantur diebus septenariis , aliter criticis vocatis ob excellentiam , sicut experienciâ Medicorum innotuit. Ideò de diebus illis Hippocrates pluribus in locis locutus est ex professo , ob frequentiam & certitudinem observationis : nempè in prænotionibus , in lib. 1 de morb. vulg. , tùm præsertim in aphorismis suis qui ultimò conscripti fuerunt , & doctrinam generaliore ac probatissimam profitentur.

Sed quidquid sit de meâ opinione circa terminationes febrilium morborum contingentes diebus paribus aut imparibus , saltem demonstratur ex dictis quantum allucinentur qui aph. 61 sect. 4 legunt : *febricitanti nisi diebus imparibus dimiserit febris , reverti solet*. Quomodò Hippocrates hæc scripsisset ? Quippè qui memoraverit non solum plurimas recidivas morborum diebus imparibus judicatorum , sed & plurimas tutissimas judicationes diebus paribus factas. Ibi ergò secundùm nuperiores aphorismorum editores legi debet : *febricitantem , nisi die critico febris dimiserit , reverti solet*. Quod idem sibi vult , ac si diceretur febrem sine crisi terminatam solere revertere ; quia cùm probaverit observatio crises adæquatas præprimis contingere diebus illis qui critici audiunt , periculum est nè judicatio facta die altero reliquerit aliquod residuum , à quo iteratos in morbum lapsus produci nôrunt Medici , sicut notatur aph. 12 sect. 2.

Quoad criticas terminationes febrium intermittentium, quamvis ex textu lib. 1 epid. suprâ relato, indubitanter appareat Hippocratem occupatum fuisse in quærendis illis crisibus, nihilominus certum est, quòd multùm in hâc parte non profecerit. Nam alibi de illis nihil habet nisi aph. 59 sect. 4, ubi dicit: *tertiana exquisita septem circuitibus, ut longissime, judicatur.* Qui & aphorismus valdè incertus habendus est ex ipso ejus auctore; quoniam coacâ 148 scripserit, tertianam exactam *quinto, aut septimo, aut summum nono circuitu* terminari. Adde quòd prorsus ignoretur, quid auctor intellexerit per eos febrium intermittentium circuitus.

Sed è contrâ crises septenariis diebus contingentes ipsi valdè cognitæ & familiares fuisse liquet ex prælibato criticorum dierum examine; eæque ipsæ magis celebratæ fuerunt à veteribus Medicis qui sanctiùs adhæserunt huic doctrinæ post Galenum. Nunc breviter exponendum quænam fuerit eorum disciplina circa dies criticos.

Juxtâ priscos Medicos, dies critici *septenarii* distinguuntur in duos ordines, sicut jam suprâ innuimus. Primus respicit morbos acutiores qui nempè judicantur spatio trium septimanarum. Alter pertinet ad morbos *acutos ex decidentia* dictos; id est ad morbos acutos qui extenduntur usque ad diem quadagesimum, quandoquè & ad sexagesimum.

In priori ordine, alii critici dies dicuntur *primarii* seu principes, alii *secundarii*. Primarii sunt septimus, decimus-quartus, & vigesimus. Secundarii, nonus, undecimus, & decimus-septimus. Quibus addi etiam possunt tertius, quartus & quintus, qui quandoquè decernunt, sed imperfectiùs; itemque sextus, qui sæpè quoque decernit, sed malè & imperfectè; tum octavus & decimus, qui perversè etiam, sed rarò judicant; at verò
duodecimus,

duodecimus, decimus-sextus, & decimus-octavus nunquam.

In posteriori criticorum dierum ordine numerantur vigesimus-septimus, trigessimus-quartus, & quadragesimus; quos ultra, solus dies sexagesimus habetur tanquam criticus. Adeò ut, sicut labitur septimana integra, à die vigesimo ad vigesimum-septimum; à vigesimo-septimo ad trigessimum-quartum; tùm à trigesimo-quarto ad quadragesimum: ita & tres septimanæ requiruntur ad efficiendam crisim quæ non facta est die quadragesimo, quia tunc debilior est natura.

In prædicto itaque numerabili ordine dierum criticorum attendere oportet, quòd critici dies secundi ordinis (ii nempè qui pertinent ad morbos acutos ex decidentiâ dictos), sint tantummodò *septenarii*, nempè vigesimus-septimus, trigessimus-quartus, & quadragesimus, imò & unus *terseptenarius* duntaxat, scilicet sexagesimus; dùm critici dies ordinis primi (morborum nempè acutiorum), sunt & *septenarii*, & *quartanarii* seu *semi-septenarii*, ut aiunt. *Septenarii* videlicet, septimus, decimus-quartus, & vigesimus; *quartanarii* verò seu *semi-septenarii*, quartus, septimus, undecimus, decimus-quartus, decimus-septimus, & vigesimus; qui dies omnes eo modo recognoscuntur in textu prænotationum suprà relato. Sed ad hanc computationem intelligendam, attendatur diem ultimum cujusvis prædicti numeri *quartanarii*, primum quoque esse diem *quartanarii* numeri sequentis: sicut ultimus dies secundæ septimanæ est quoque primus septimanæ tertiæ: & similiter, dies ultimus septimanæ quintæ, primus est septimanæ sextæ. Hoc patet ex aph. 24 sect. 2, necnon & ex prænotationum textu suprà relato.

Sic distinctis diebus criticis, Veteres Medici docebant tres duntaxat ex illis verè criticos esse per excellentiam, seu *radicales*; nempè septimum, decimum-quartum, & vigesimum: eò quòd

ii tres dies multò frequentius ac tutius morbos judicarent. Imò hanc inter illos diversitatem annotabant, quòd dies septimus frequentia judiciorum suorum præcelleret diei decimo-quarto, ut & vigesimo: sicut dies decimus-quartus præeminet diei vigesimo.

Reliqui omnes dies, inquiebant, magis vel minus sunt periculosi. Horum quidem plurimi morbos aliquandò decernunt, ut suprà monitum est; sed eorum decreta longè minus frequentia obtinentur, necnon multò minus tuta. Quapropter, ad hoc ut sua quibuscvis hisce diebus jura assignarentur, ii divisi sunt in tres classes à priscis Medicis; nempe in dies *indicatores* dictos, in *intercalares*, & in *vacuos*.

Indicatores vel & *contemplatores* dies ii vocabantur, quibus indicaretur perfectam crism futuram esse die aliquo critico *radicali*. Proindèque eorum indicatorum numero adscribebantur, dies quartus, undecimus, & decimus-septimus; quatenus videlicet dies quartus indicaret eventum diei septimi: undecimus, eventum decimi-quarti: decimus-septimus, vigesimi. Quinimò, sicut dies septimus habebatur tanquàm princeps criticorum, ita & dies quartus inter alios *indicatores* dicebatur præcipuus, quo nempe prænuntiaretur perfectam crism die septimo futuram esse: secus verò, non perfectam. Quibus *septimo die judicatur morbus, iis urina rubram die quarto nubeculam habet, aliaque pro ratione*, inquit Hippocrates, aph. 71 sect. 4, qui & coacâ 586 monuit celerem quoque judicationem indicari, si illæ subsidentiae fuerint albæ. Præterea dies ille quartus quandoquè etiam criticus fit, sicut declaratur in textu prænotationum suprà citato; verumtamen ille aliquandò quoque nihil indicat. Hoc ultimum fit, vel propter malignitatem morbi, vel propter præposteram ejus medicationem, tuncque mortem non rarò denunciat; quandò

nimirum illæ mutationes quas invehit , excedunt solitum naturæ tenorem. Quoad secundum *indicatorem* diem , nempè undecimum , hic minùs regularis est , minùsque fidus quàm dies quartus ; sed ille etiam quandòque criticus est : imò & frequentius judicat quàm quartus , si Galenum audiverimus. Deniquè , tertius *indicatorum* seu decimus-septimus , merus est indicator eventuum diei vigesimi. Quod ad me , non affirmaverim quidem me observavisse hæc omnia adeò regulariter fieri , sed frequentissimè ; saltemque nullam crìsim bonam aut malam notavisse , quin ejus aliquot veluti primitias paulò antea viderim.

Intercalares dies , aliter etiam dicti *provocatores* , sunt tertius , quintus , nonus , decimus-tertius , & decimus-nonus. Illi dies sunt quidam velut vicarii criticorum , sed eorum efficacitatem nunquàm attingunt. Quinimò metuenda est recidiva , quandò dies illi critici evaserunt , sicut Hippocrates , à quinto præfertim die in plurimis ægrotantibus vidisse se narrat in epidemiis suis. Quoad diem nonum , quandoquè hic faustus est , quatenùs perficit crìsim die septimo incoëptam , vel & quatenùs incipit crìsim absolvendam die decimo-quarto. Debilissimus verò dies decimus-tertius ; imò & decimus-nonus adhuc debilior.

Vacui demùm dies , sic appellati fuerunt quia ii plerumquè nihil indicant , nec solent unquàm judicare morbos nisi ægrotantes occidendo. Tales sunt , sextus , octavus , decimus , duodecimus , decimus-sextus , & decimus-octavus , qui vocati etiam fuerunt *medicinales* à pluribus Medicis. Putabant nimirum usurpari non licere medicamenta ulla nisi diebus vacuis , per quos credebant naturam quiescere ; imò multi , post Galenum , habebant diem sextum tanquàm magis formidandum inter alios ejusdem seriei : ideòque statuebant nihil prorsùs hâc die agendum esse. Verùm similes assertiones omninò erroneas esse ac syste-

maticas , quis non viderit ? Sed juvabit nonnulla hîc protulisse quoad fatalitatem diei sexti , sicut & de exclusivâ administratione medicaminum per alios dies *vacuos* appellatos.

Quod pertinet ad diem sextum , de quo Galenus tantâ cum acerbitate & contumeliâ objurgavit propter frequentissima ejus infortunia , mihi videtur assignari posse naturalem hujus infortunitatis originem , absquè quòd utendum sit allegationibus adeò commentitiis , nè dixerim ridiculis. Nempè stupendam hanc diei sextæ infortunitatem non aliundè trahendam esse , quàm ex eo quòd dies sextus proximior sit diei septimo , qui omnium magis discriminofus est. Cum enim dies septimus adducat crises infinitè numerosiores quàm ullus aliorum dierum magis criticorum : & cum tam sæpè vita victrix sit hoc die septimo : quid mirum , si vita non rarò quoque devincatur die sexto , per quem sæpiùs pugna decretoria pugnatur ? Quamobrem infelicitas diei sexti spectanda venit tanquàm aliqua veluti mensura felicitatis diei septimi : hâc tamen cum differentiâ , quòd septimus dies frequentius fanet , quàm sextus occidit.

Præterea , cum dies septimus sæpiùs decernat quàm decimus : quartus & quàm vigesimus : cum etiàm possibilitas prima salutis vel interitûs in acutis rarò videatur antè diem quartum , nisi in casibus valdè extraordinariis : exindè quoque advertitur , majus versari periculum circà diem sextum , quàm circà quolibet dies qui labuntur à septimo ad decimum-quartum : tum à decimo-quarto ad vigesimum. In priore siquidem septimanâ periculum versatur à quarto duntaxat morbi die ad septimum : dùm , in sequentibus quinque septimanis , illud idem periculum dividitur inter dies septem : vel & demùm inter dies viginti , quandò scilicet morbus prorogatur à die quadagesimo , ad sexagesimum.

Quod deniquè spectat consilium non usurpandi medicamenta nisi diebus *vacuis*, illud valdè erroneum est, systematicumque redolet abusum doctrinæ aliundè utilissimæ. His quidem diebus medicamenta sæpè adhibentur; sed & alia aliis pariter exhiberi fas est, præsertim tempore *augmenti*; non quia natura tunc quiescit sicut Veteres opinabantur: sed quia illis magnoperè indiget. Damnanda omninò foret expectatio quæ tunc arceret necessariam venæ sectionem, vel vomitorium apprimè indicatum, &c.: damnandaque imprimis cunctatio hæc, quandò curatio neglecta fuisset sub initiis morbi. At cavendum est, nè labor ille qui crisin præcedere solet quondam accipiatur pro *epiphænomenis* præstissima auxilia petentibus; cùm enim, ex aph. 13 sect. 2. *Quibus judicatio instat, iis nox accessionem præcedens, gravis: quæ verò sequitur, plerumquè levior*; hinc nonnulli fortè Medici raperentur in errorem, nisi attentis daretur recognoscere, prædictum laborem nihil esse nisi genuinum instantis crisis prodromum. Id autem præsertim judicatur, considerando nùm aliqua crisis paulò antea prænuntiata fuerit, necne; seu ab apparente rubellâ nubeculâ in urinis die quarto, ideòque crisin septimâ die futuram designante; seu mediante constanti *pulsu coctionis*, aliisque signis pro ratione existentibus.

A R T I C U L U S I I I.

F E B R I U M G E N E R A E T S P E C I E S.

DIXIMUS in præcedentibus articulis, quid nobis censendum videretur de naturâ febris, tum de generalibus illius causis, symptomatibus & moribus. Nunc nobis ultrà progredientibus inquirenda sunt varia febrium genera, variæque species in utroque genere observabiles.

Febris quoad essentiam una est. Sed quia febris mox ab exordio suo ad usquè finem perdurat absque interruptione ullâ, mox verò per vices sævit, datâ plenâ apyrexia inter duas accessiones : indè spontè emergit generica distinctio febrium in continuas & in intermittentes. Quæ utræque febres dicuntur *endemicæ*, si producantur à causis alicui loco constanter hærentibus : *epidemicæ* seu populares, quandò pendent ab aliquâ determinatâ constitutione multitudinis hominum alicujus ætatis aut temperiei, aut alicujus loci ; quam induxit causa quædam communis, pendens ex vivendi ratione communi aut ex peculiaribus tempestatum anomaliis. *Sporadicæ* demùm seu dispersæ febres vocantur, quandò illæ aliquot hinc indè homines variæ ætatis aut temperiei aggrediuntur, propter peculiare eorumdem dispositiones accidentales ipsis proprias.

Non ampliùs immorabimur in illis febrium qualitatibus considerandis, quoniàm explicatæ fuerunt articulo secundo hujus capituli. Tantummodò agemus, distinctis paragraphis, de febribus continuis & de intermittentibus. Quia verò inter continuas aliquæ naturâ suâ variis terminantur eruptionibus, congruum est de illis particulari paragrapho differtare.

§. I.

FEBRES CONTINUÆ.

VULGO in scholis febres quælibet continuæ dicuntur continentes, vel remittentes. Nempè *continuae continentes*, quandò illæ motum febrilem semel excitatum perducunt ad finem uno impetu : *continuae verò remittentes*, quandò impetum suum per vices remittunt ac denuò excitant, quin tamen ulla unquàm intermissio in illis adsit. Sed difficile & rarum est, ut opinor,

videri febrem continuam reipsâ continentem , nisi fortè illa sic denominetur , cujus quotidiana remissio minùs sensibilis est.

Aliæ continuarum febrium differentiæ magis reales repetendæ sunt ex earum duratione variâ , nec non & ex varietate causæ.

Ratione durationis , distinguuntur 1^o. febris *ephemera* seu diaria , quia viginti-quatuor horarum spatio illa absolvitur ut plurimùm & desinit absque regressu ; quæ si paulò ultrà diem duraverit , *ephemera* extensa appellatur. 2^o. Continua acuta per excellentiam , si extendatur ad dies septem , quatuordecim , aut viginti. 3^o. Continua acuta per decidentiam , si ea superato die vigesimo prorogetur ad diem quadragessimum vel & ad sexagesimum. 4^o. Febris longa , si ad dies centum perstiterit , qualis frequenter accidit in tempestatibus pluviosis , ex aph. 16 sect. 3. 5^o. Febris chronica seu habitualis , quandò scilicet plures per menses durat , imò & per annum. 6^o. Demùm febris lenta seu tabida , quandò marasimum invehit & crescit eundo , quousquè produxerit consumptionem perfectam , inevitabili morte terminandam.

Ratione diversitatis causarum , febris alia est inflammatoria , alia catharralis , humoralis alia , alia demùm eruptiva.

Febris inflammatoria ea est quæ accidit homini plethorico , dùm popularis constitutio inflammatoria viget , vel dùm ille hoc modo constitutus est ob causas ipsi proprias ; quo in duplici casu febris hæc inflammatoria essentialis est. Sed si febris comitetur quamdam inflammationem formatam , qualis est pleuritis aut peripneumonia (prædictis in circumstantiis haud infrequens) , tunc febris inflammatoria symptomatrica dicenda est.

Febris catharralis vocatur febris acuta continua nonnihil inflammatoria sed mitior , qualis præsertim occurrit à fine

autumni ad usquè veris finem, tùm alio tempore anni, propter maximas & crebras coeli mutationes. Quæ ideò febris præcipuè aggreditur homines aliquatenùs plethoricos sed delicates, & simul donatos constitutione debiliori, quàm ut eorum sanguis maximè dives sit, maximèque pronus ad contrahendam veram inflammationem: undè febris hæc variis in hominum ætatibus reperit victimas, & aliquandò ferè indiscriminatim popularis evadit. Præterea eadem febris aliquotiès nonnihil biliosi & putridi adjunctum habet, præsertim quandò frigoris anomalix certant cùm ventis australibus. Febris catharralis sæpissimè essentialis est, sed sæpiùs symptomatica, in quantum nempè accidit cùm gravibus omnibus catharris tussiculosis, sicut & cùm levibus peripneumoniis ac pleuritidibus spuris, quæ & quandoquè aliquem putriditatis characterem habent.

Humoralis dicenda est ea febris continua quæ producitur ab humoribus degeneribus. Quandò hæc degeneratio levis datur, adest febris illa quæ apud veteres audit *typhus* vel *synochus* simplex. Si verò humorum degeneratio major adsit, tunc datur febris putrida, seu *causus* aut febris ardens veterum, quæ quandoquè contagiosa est, imò & aliquandò evadit pestilens, quantum saltem pestilentia competit temperatis nostris regionibus.

Deniquè febris eruptiva appellatur ea febris continua quæ fit ab aliquo peculiari seminio, cujus mos est producere eruptionem quamdam criticam sui generis, qualis est variola & rubéola, aliæque rariores febres eruptivæ, de quibus distincto paragrapho sumus acturi. Nunc indicare incumbit præcedentium continuarum febrium causas & symptomata, tùm diagnosim & prognosim.

CAUSÆ.

PRODUCITUR febris ephemera à statu plethorico , absque quòd præludium ullum morbosum observetur. Ea plerumquè adoritur antè diluculum , eaque statim viget cum dolore capitis , pulsu pleno , libero & expedito , respiratione frequenti , sudore halituofo , urinâ vix mutatâ : & desinit cum pulsu ut plurimum undoso. Addamus febrem ephemeram non esse periculofam , & sufficiens ejusdem habebitur tabella ; nam in dictis patet ejusdem aitiologia & symptomatologia , tum diagnosi.

Causa inflammatoriæ febris essentialis reperitur in sanguine copiosiori & denso , qualis existit in constitutione inflammatoriâ , sub finem regularis hyemis & veris , apud homines ætatis juvenilis & mediæ : qualis etiam passim habetur in aliquibus individuis , propter causas ipsis proprias. Quæ sanguinis constitutio sic irritare valet sensibilitatem ut indè febris exoriat , cum metu decubitûs cujusdam inflammatorii in parte magis pronâ ad suscipiendam inflammationem , seu per se hoc modo disposita sit , seu per sympathicam sensificationem ; undè fit ut in hâc febre pars aliqua corporis semper doleat magis vel minùs , & ut inibi semper oriatur aliquis infarctus inflammatorius , nisi subito tollatur ejus febris stimulus ; qui infarctus seu decubitus inflammatorius diversa symptomata creat pro diversitate partis affectæ , deindèque capax fit terminationum inflammationi propriarum.

Si verò in simili constitutione inflammatoriâ statim creetur localis aliqua inflammatio , cui febris accedat (ut naturale est) : hoc in casu febris dicenda est inflammatoria symptomatica , ejusque causa habetur in ipsâmet materiâ prædictum decubitum inflammatorium constituenti , quæ similiter subigi ac elaborari

exigit, similitumque eventuum capax est ac inflammatio externa.

Causa febris catharralis consistit in sanguine quidem satis plerumquè copioso, sed paulò nimis seroso ac pituitoso, tùm peculiariter alterato occasione subitanei frigoris. Qui sanguis, ob mutationem in solidis inductam à frigore, valet pariter excitare febrem, cùm metu decubitûs in iis præsertim partibus quæ frigoris actioni magis exponuntur, tùm aliis in partibus quæ cùm prioribus consentiunt, ratione mutui regiminis. Sæpè etiam huic humori catharrali adjungitur non nihil biliosi, eoque in casu datur materies veluti erysipelatofo - œdematosa simul & putridula; sicut in casu merè catharrali, seu nequaquam bilioso, habetur imago quædam materiei phlegmonodeo-œdematosæ. Ast ubi alterutra materies excitavit febrem, opus est ut emendetur mediante elaboratione febrili, & ut resolvantur decubitus si quidam adfuerint, perindè ac elaborari & resolvi debet quæcumque inflammatio.

Humoralis febris causa consistit in pravâ aliquâ sanguinis qualitate, sæpiùsque biliosâ, quam invexit æstiva constitutio aut quoddam accidentale contagium vel & retentio alicujus excrementi, tùm sæpiùs prava primarum viarum saburra variis de causis inducta. Quibus in circumstantiis nascuntur variæ variorum humorum peculiarium alterationes, proindèque diversæ diversorum viscerum sensificationes atque irritationes, à quibus impendent multifarii infarctus febriles, secundùm varietatem partis ab aliquâ specificâ humorum maculâ irritatæ & oppugnatae. Quæ sanguinis & humorum alteratio, si fuerit mitior, *typhum* duntaxat aut *synochum* adducit, ut jam innuimus; quæ verò si magis degener & alterata fuerit, creat ipsam febrem putridam & ardentem (*causum* scilicet), ex quâ impendent symptomata magis vel minùs numerosa & maligna, pro numero & nobi-

litate viscerum infarctu febrili tentatorum, simul & pro variâ ejusdem infarctûs tendentiâ ad gangrænam, aut ad benignam resolutionem criticam aliasque decubituum calidorum terminationes.

Quod spectat febres longas, chronicas, ut & lentas seu tabidas, earum causæ sic concipiendæ sunt. Longa febris pendet ab humore difficilioris elaborationis, aut cujus emendationem naturalem impedivit prava ratio victûs aut medelæ, nedùm ipsi opitulata fuerit. Febris chronica agnoscit varias variorum viscerum affectiones ab aliis morbis fortè residuas, aut pedetentim creatas vitio nutritionis vel excretionum habitualium; quæ affectiones magis vel minùs graves sunt, sed quibus adhuc cùm fructu mederi licet. Lenta demùm seu tabida febris producitur 1°. à quocumque gravi & constanti impedimento nutritionis, quod in certo gradu tandem perfanari nequit; 2°. ab interiori quâlibet ulceratione, cujus deterfio & curatio impossibilis est. Sed de his singulis febribus sæpènumerò agendum erit, ubi de variis variorum morborum pravis terminationibus & earum sequelis.

S Y M P T O M A T A.

Non putamus quidpiam esse addendum iis quæ articulo primo & secundo hujus capituli superiùs dicta fuerunt de generalibus febris symptomatibus. Sed ex theoreticis principiis ibi propositis facile resolvere est, diversa febrium continuarum symptomata distinguenda occurrere, secundùm diversa tempora & epochas in earum decursu observabilia, quæ nimirum contingunt ratione mutationum vi febris inductarum.

Hæc tempora febrium continuarum numero quinque, imò & sex absolutè possent admitti; quibus singulis sua diversitas competeret; nempe præludium, initium, augmentum, status, terminatio, & tandem sequelæ. Sed medicè loquendo, juxtà

regulas clinicæ praxeos, utilius mihi videtur tria duntaxat tempora seu stadia agnoscere in febribus continuis quibuscumque: cruditatem scilicet, coctionem, & crîsim seu terminationem, sicut loco citato jam indicatum est. In hâc enim temporum consideratione comprehenduntur, aut saltêm prælibantur, quæcumque pertinent ad sex epochas mox designatas; videturque exindè obtineri lucidiorem febris conspectum, tùm curativum ergà ægrotantes, tùm præservativum ergà eos qui adhuc benè valent. Quæ cognitio breviori indice contenta, tyrones magis refert & recreat (si nimium sit dixisse eos magis doceri), quàm longissima de phœnomenis febrilibus philosophemata, vel & numerosissima varietatum nomenclatura, scholasticusque luxus. Jam ergò properemus ad continuarum febrium diagnosim.

D I A G N O S I S.

CONTINUARUM febrium diagnosim ibi quoque, quantum potuero, præcisa erit. Periculosius enim est nè, minutissimas distinctiones confectando, tot credantur agnoscendas esse individuas febrium species in uno genere, quot leves observari queunt discrepantiæ variis in febricitantibus, exemplo Botanistarum vegetantia in classes distribuentium. Ex his subtilicribus distinctionibus quoad nomina (vel ipso sono suo ingrata), nascitur idearum confusio, potius capax memoriam gravare, quàm cognitionibus medico-practicis tuta & firma construere fundamenta.

Proptereà generales duntaxat diagnoses ibi determinabimus respectu essentialium febris continuæ specierum, quarum aliæ varietates sat superque intelligi queunt, considerando quòd illæ tantummodò consistant in majore vel minori numero aut gravitate accidentalium symptomatum, ab eodem fonte oriundorum.

Nonnè iis in mente subactis quoad varias febrium species, Medicus spontè ducitur ad cognitionem congruentiorum auxiliorum, absquè quòd indigeat scivisse quodnam imponendum sit nomen curandæ febris, secundùm nomenclaturam hujus vel alterius Scriptoris? His de rationibus nobis placuit redigere specialem febrium continuarum diagnosim, ad distinguendas acutas febres inflammatorias, catharrales & humorales, abstractione factâ ab eruptivis quæ non sunt hujus loci.

Dicimus ergò diagnosim febris inflammatoriæ essentialis obtineri, si sequentia considerentur: 1^o. constitutio popularis inflammatoria; 2^o. ætas, ratio vivendi & constitutio ægrotantis; 3^o. symptomata huic febris propria, quæ sunt calor intensus, sitis, tussis sæpè magna, pulsus durus & fortis, cutis ut plurimùm humida, somnus laboriosus, dolor gravativus artuum quo tandem aliqua pars præprimis occupari videtur, mox nempe caput, mox pectus, &c. Quæ omnia fiunt absquè magnâ prostratione virium, absquè nauseis, imò absquè inappetentiâ, saltem sub initiis; quibus signis adde, quòd perfecta plerumquè sanitas solum sit hujus febris præludium, & quòd illa ab horrore sensibili incipiat. Undè patet quantum symptomata diagnostica inflammatoriæ febris conveniant cùm diagnosi inflammationum legitimarum.

Si verò febris inflammatoria symptomatica fuerit, id est si ea sit effectus cujusdam inflammationis essentialis, sedentis in aliquo viscere, aut in parte quâdam externâ: tunc dignoscenda sunt signa pathognomonica affectionis inflammatoriæ præsentis, v. g. pleuritidis, peripneumonix, hepatitidis &c: vel & phlegmonis externæ aut erysipelatis, de quibus alibi dictum est.

Consequenter in febre inflammatoriâ, tam essentiali quàm symptomatâ, oportet attendere ad multitudinem & gravitatem

symptomatum inflammationi propriorum, simul & ad illa quæ inflammato organo propria sunt, in hisque diagnosis quæsitæ obtinebitur.

Catharralis febris dignoscitur 1^o. ex constitutione humidâ & boreali tempestatis, aut dierum eodem modo sæpiùs constitutorum; 2^o. ex constitutione laxâ & plethoricâ ægrotantis; 3^o. ex symptomatibus quæ solent comitari hanc febrem, qualia sunt coryza, dolor in dorso, tussis, rauco, difficultas respirandi; quæ omnia incipiunt à refrigeratione, horroribusque longis & vagis, quæ vespertinis horis graviora sunt.

Si verò constitutio tempestatis humida sit frigida & australis, simulque ægrotans plethoricus inclinât versùs constitutionem biliosam, tunc cavendum à febre catharrali putridâ, cujus initium & symptomata satis quidem similia sunt symptomatibus catharralis febris simplicis; sed in cujus progressionem præterea concurrunt nausæ, inappetentia, linguæ sordities, magna prostratio virium, magnaue debilitas & irritatio pulsûs; aliis demùm signis sensim prodeuntibus, prout aliqua pars decubitu quodam catharrali bilioso & putrido correpta laborat, velut contingit in febre putridâ, cujus diagnosis mox sumus exposituri.

Febris humoralis dicta, qualis nullo non tempore accidit apud intemperantes, tùm imprimis inter calores æstivos, quo tempore biliosam ut plurimùm naturam habet, sic dignoscitur. Præter signa communia quæ observantur in pulsu dùm febris formata est, attendatur 1^o. ad constitutionem tempestatis; 2^o. ad constitutionem ægrotantis, tùm ad ejus ætatem & rationem vivendi; 3^o. ad contagionem, si quædam adsit, sed quod rarum est; 4^o. denique attendere oportet ad præludium morbi quod plerumquæ insignitur aliquâ debilitate & lassitudine, ut monitum est aph. 5 sect. 2, & quod præci-

puè stipatur inappetentiâ, nausêâ, sæpèque vomitu, tùm linguâ fordidâ & ore amaro. Quinimò dignoscitur hanc febrem esse magis vel minùs putridam, si relatis signis accesserint sequentia symptomata magis vel minùs gravia. 1°. Scilicet dolor inquietus aut gravitas capitis; 2°. summa pulsûs irritatio, notabilisque aliquandò debilitas & tarditas ejusdem; 3°. varii locales dolores, velut pleuritici aut alium morbum mentientes, sed sæpiùs afficientes caput aut pectus: qui dolores existunt cùm signis inflammationis spurix, secundùm diversitatem partis in quâ datur febrilis quædam stasis. Nempè si caput afficiatur, adsunt 1°. dolores capitis lacerantes, præprimis sedentes suprâ frontem & supercilia; 2°. delirationes leves, magnique subsultus in linguâ & manibus observabiles; 3°. summa virium voluntariarum prostratio; 4°. pervigilium, tandemque coma aut delirium apertum & continuum, nec non aliquandò convulsiones. Si verò pectus occupetur, accidunt 1°. dolores lateris cùm sputationibus cruentatis & coloris biliosi; 2°. respiratio densa, anhelosa & cita; 3°. sæpè tussicula sicca, cùm clangosâ voce. At prætereà, in quocumque casu febris putridæ majorem ad gradum evectæ, solent generaliter adjungi 1°. calor ad tactum fermè deurens, inæqualis diversis in partibus, sæpèque ardentissimus circà vitalia organa; 2°. siccitas in naribus, in ore, & in linguâ quæ prætereà quandoquè nigra est, quasi exusta, valdèque aspera; 3°. urinæ sæpè sanorum urinis similes; 4°. diarrhææ fetidissimæ, quæ & aliquandò verminosæ sunt, præsertim autumno & initio hyemis, quibus sæpè superaccidunt tubercula ad aures; 5°. maxima siccitas cutis, quæ & aliquandò maculis petechialibus inficitur; 6°. deniquè pessimus meteorismus.

Talis est natura symptomatum in febribus putridis accidentium; quorum numerus, gravitas & varia combinatio constituunt febres

malignas aut benignas appellatas, tùm singulares earum febrium varietates accidentales variis nominibus passim designatas, à quibus tyrones tantoperè occupantur; quasi indè varias febres cognoscendas haberent, easque arte omninò diversâ curandas. Si iverimus in sententiam veterum, ibi apparebit eos noluisse designare febres naturâ diversas, sed aliquo duntaxat accidente insignes, febrem vocando *epialam*, quandò sub eâ calor & horror eodem ferè instanti absquè violentiâ sibi mutuò succedunt: aut *lypiriam*, quandò per eam algent extrema, dùm viscera ardent: aut *assodem*, quandò æger tantâ anxietate ac implaciditate stipatur ut nullum situm servare possit: aut *syncopalem*, quandò febricitans syncope afficitur ubi primùm movetur, sive potando, sive mutando situm: aut *helodem*, quandò à primâ statim die ægrotañtes sudant; &c. Alioquì tot diversa hominum genera admittenda forent, quot dantur diversi colores in uveâ oculorum, aut in capillis. Sed hæc satìs de diagnosi generali febrium continuarum, jam veniamus ad earumdem prognosim.

P R O G N O S I S.

PROGNOSIS febris in genere non solùm respicit proprias ejus terminationes felices aut infelices, sed & ejusdem utilitatem adversùs graviora plurima mala quorum naturalis est aliqua antidotus; & ut à jucundiori parte exordiamur, præter casus metastaticos benè plures in quibus febris præsentissimam præbet Medicinam (& præter plurimas affectiones habituales quæ per quamdam febrem formatam tolluntur), *convulsione aut distensione nervorum detento, febris si succedat, morbum solvit*, ut notatur aph. 57 sect. 4, quia scilicet febris est vitæ conamen capax discutere ac expellere materiem convellendis nervis idoneam, aliisque partibus infensam. Quapropter, ex aph. 26 sect. 2, *convulsioni febrem supervenire melius est, quàm convulsionem febre;*
nam

nam in casu convulsionis febris accedentis, evidens est causam mali superiorem esse viribus antidoti, dùm in casu contrario, antidotus sese superiorem demonstrat. Pariter nota est efficacia febris adversus convulsiones ebrietati graviori accidentes, ex aph. 5 sect. 5; nec ignoratur ipsius quartanæ virtus ad fugandam epilepsiam, ex aph. 70 sect. ejusdem.

Quoad propriam febris terminationem, ea videtur maximam habere analogiam cùm variis inflammationis terminationibus, non solum ergà modum abeundi, sed & ergà varias ejus sequelas. In omni itaque febre acutâ datur deleteria materies quæ tùm in sanguine quem alterat, tùm variis in locis ubi decubuit, mutari atque emendari debet, deindèque criticâ evacuatione eliminari, perindè ac materies inflammationis. Quinimò prædicta materiei febrilis coctio, simul & critica eliminatio, perficitur ope eorundem naturæ instrumentorum, cùm spe & periculo eorundem eventuum & fortunarum. Nonnè enim in febribus acutis accidit resolutio, suppuratio, gangræna, metastasis, imò & quandoquè induratio?

Dùm ita coquitur febrilis materies, sicut dùm jam cocta est, & dùm ea insuper jam eliminari incipit, variæ excitantur perturbationes pro vario gradu & pro specie irritationis, quæ totidem signa sunt diverso febris tempore diversa, quibus res præsentis & futuræ indicantur, & quibus proindè signis Medicus uti debet ad instituendas febrium prognoses. Consequenter, ad hoc ut Medicus sibimetipsi consequens sit, ut & Naturæ, atque ideò cùm aliquâ certitudine ac fructu operetur, ipsi prognosticandum incumbit secundùm phænomena contingentia tempore cruditatis, coctionis & criseos febris; adeòque licet generaliter dicere quòd febris eò pejor sit, quò sævior est & longior cruditas ejus, quò tardior est & inconstantioribus signis notata.

ejus coctio, quò imperfectior ejusdem evacuatio critica : & vicissim. Undè iterùm intelligitur quid sit reipsà censendum de febris malignitate aut benignitate.

Verùm enim verò quoad eventus faustos vel infaustos præcisè designandos, illud altâ mente reponi debet; nempe quòd *acutorum morborum non omninò tutæ sint prædictiones, neque salutis, neque mortis*, sicut peritissimus omnium Medicorum modestè fatetur, aph. 19 sect. 2; quòd proindè febrium acutarum paulò sæviorum prognoses cautè admodùm pronunciari debeant. Cavendum tamen nè prognosibus continuò desperantibus deterreantur unà cùm ægrotante adstantes. Hæc consuetudo (prorsus indigna viri Philosophi) nunquàm arridebit homini cordato, qui vocali suâ sensibilitate atque honestate noverit, quàm acerbum & injucundum sit terrorem incutere, vel inimicis, eventusque funestos perpetuò vaticinari timentibus. Humanitas saltem requirit ut humaniter foveatur adstantium spes simul & ægrotantium. Sed ad hanc experientiæ prognosium facultatem acquirendam, non parùm valent prognosticæ sententiæ quas longissimo usu probatas reliquit Princeps Medicorum, præsertimque suis in aphorismis. Quapropter utilissimum futurum esse ergà tyrones putavimus, si præcipuas earum hìc retulerimus, juxtà memorabiliore febrium epochas, cruditatem nempe, coctionem & crìsim earum.

PROGNOSTICA Hippocratis ergà epocham cruditatis febrilis.

PER siccitates febres acutæ fiunt; & siquidem annus magnâ ex parte talis extiterit, qualem constitutionem effecerit, tales ut plurimùm quoque morbos exspectare oportet, inquit Hippocrates, aph. 7 sect. 3, qui & statuit lib. de humoribus, pag. 18. Foëf., siccitates & austrinas esse & aquilonares, cæteraque alia ad hunc

modum differre, ibi addendo : *Nam & hoc magnum est*. Maximam itaque considerationem merentur duæ illæ oppositæ constitutiones respectu naturæ morborum ab illis oriundorum, proindeque respectu eorundem eventûs. Nam cùm siccitates austrinæ (naturâ suâ minùs electricæ) relaxent solida & dissipationi subtiliorum excrementorum obstant, dùm contraria producuntur ab aquilonaribus, sequentes effectus licet expectare in utrâque hypothese. Nempè si utrique assignatæ siccitati adjungatur frigus dominationem tenens, gignitur constitutio inflammatoria apud homines mediæ ætatis : pituitosa verò apud senes, quorum insensibiles excretiones tunc penè annihilantur. Si è contrà siccitati accesserit dominatrix caliditas, ideò creatur bilis magis vel minùs copiosa & acer. Consequenter, si annus pro maximâ suâ parte foret siccus & aquilonaris, constitutio hæc annua produceret permultos inflammatorios morbos, qui materiem citiùs coquendam perhiberent; sicut in constitutione annuâ siccâ & australi orirentur frequentes morbi biliosi febriles & acuti, quorum terminatio nec æquè cita nec æquè tuta est ac terminatio præcedentium morborum, sed qui sunt semper minùs longi, minùs exitiales, quàm morbi qui per imbres fiunt. Confer aph. 15 & 16 sect. 3. At verò in constitutione siccâ & australi quandoquè nascuntur febres intermittentes malignæ, quales hâc in Provinciâ grassatæ præsertim fuerunt, anno 1783, ab ipso vere usque ad hibernale solsticiû. Quibus citati anni febribus intendendis non parùm forsan conduxerant vapores illi terreo-electrici, seu quasi volcanici, quibus atmosphaera constanter obnubilata fuit à medio circiter mense junio, usque ad extremum mensem julium. Qui vapores sicci & velut fumosi (solem totâ die obscurantes, lunam totâ nocte) comitem habuerunt calorem plerumquè austrinum maximum, interimque fulgura plurima.

Ex bubonibus febres omnes malæ, præter diarias, aph. 55 sect. 4. Hoc equidem est genium febris ephemeræ ut comites habeat bubones inguinales vel & auriculares facillimè solvendos, præsertim apud adolescentes ac juvenes. Sed quandò bubones erumpunt aliis in febribus, vel ii sunt symptomatici, (tuncquè indicant materiem tenacem lymphæ admistam, cujus elaboratio indiget majori febre, quæ ideò periculosa est); vel & ii sunt critici, quo in casu periculum est nè corripiantur pravâ suppuratione aut gangrænâ, aut funestissimâ metastasi.

Ad hæc, si fortè glandibus antea scirrhis accidat febris, metus est nè evadant carcinomatosæ; quod ita fieri non valeret occasione febris ephemeræ.

Quibus, per febres, ad dentes viscosa circumnascuntur, iis vehementiores fiunt febres, aph. 53 sect. 4. Squalor ille dentium plerumquè niger, vehementiores quidem febres comitari solet. Sed mihi visum est eas utplurimum terminari solutione citâ & salutari.

Sudor copiosus, modò calidus, modò frigidus, assidue fluens, frigidus majorem, calidus minorem morbum significat, aph. 42 sect. 4. Sanè quidem multus sudor significat humiditatem multam multumque febrilem laborem. Sed si dominetur frigidus sudor, indè habetur signum maximæ irritationis, tum alicujus statûs spasmodici ab illâ irritatione oriundi, quæ omnia indicant morbum majorem. E contrâ, dominante sudore calido indicatur genium morbi magis ordinarium, ideòque morbus minùs gravis. Quodcumque symptoma extraordinarium, semper magis formidabile est quàm ordinarium.

Sudores frigidi cum febre quidem acutâ oborti, mortem; cum mitiori autem, morbi longitudinem significant, aph. 37 sect. 4. Nam quandò calor abest à febre acutâ, id fit quia vitæ vires jam fa-

tiscunt ob insignem humorum degenerationem, tum propter stases gangrænosas & spirituum defectum. In mitiori verò febre, hæc sudoris frigiditas minorem tantummodò naturæ nisum indicat quia minor fit ejus irritatio, quam minor proindè reactio sequitur : undè laboris longitudo.

Cùm æstas veri similis fuerit, in febribus copiosos sudores exspecta, aph. 6 sect. 3. Equidem sicut constitutio humida propria est veri, ita & sicca æstati. Propterea ubi æstas veri similis est, corpora humidiora manent, nedùm siccitatem æstivam contrahant : imò ea humiditas corporum major adhuc aderit, si æstas fuerit quoque veri similis quoad gradum caloris. Hinc ideò habetur materies multorum sudorum qui in febribus hujusce constitutionis plerumquè contingunt.

Quâ parte corporis sudor inest, ibi morbum esse significatur, aph. 38 sect. 4. Sanè quidem locale malum quodlibet magis commovet partes proximas quàm remotas. Ideòque non mirum si sudor erumpat ex vicinitate partis laborantis, sicut suprà pectus tam sæpè observatur in febricitantibus quorum respiratio valdè laboriosa est. Pariter, & *quâ corporis parte calor inest aut frigus, ibi morbus est,* sicut legitur aph. 39 sect. ejusdem, qui videtur esse continuatio præcedentis. Desumptâ scilicet frigoris significatione ex statu spasmodico partis laborantis, sicut significatio caloris deducitur ex fortioribus oscillationibus vasorum stases febriles patientium.

Quin etiam, *si pars quæpiam antè morbum laboraverit, in eam se morbus obfirmat,* sicut observatur aph. 33 sect. 4. Quod ita fit, tum propter laborantis partis debilitatem, quâ humores huc derivantur; tum propter ejusdem partis irritationes, quibus mediantibus attrahuntur humores ad eam, in quâ ideò stasis quædam febrilis generatur.

In febribus acutis circa ventriculum æstus vehemens, & oris ventriculi morsus, malum. aph. 65 sect. 4, his siquidem signis indicatur saburra acerrima difficillimè corrigenda; prætereàque imminent febriles stases his in organis, funestam necrosim facillimè admit- tentes; adde quòd non solum ventriculo malum illud tunc im- pendat, sed & ipsimet diaphragmati. *Febris ardens ex laborioso ventris dolore, perniciem minatur,* ex coacâ 130.

In febribus acutis convulsiones & circa viscera dolores vehementes malum, aph. 66 sect. 4; hìc, ut opinor, intelligendi sunt illi motus spasmodici partium musculosarum, gallicè dicti *soubresauts*, qui observantur magnis in febribus & indicant nervos atque cere- brum ipsum nonnihil tentari. Qui sanè motus malum omen portendunt, sicut & portenditur à vehementibus circa viscera laboribus; proindèque designant statum magis complicatum & graviolem, quàm ille de quo aph. 65.

Pari de causâ, *febribus à somno pavores, aut convulsiones, malo sunt,* ex aph. 67 sect. ejusdem; tunc enim, nedùm corrigatur febrilis materies, ea è contrario capax fit cerebrum petere & ideò creare convulsiones aut pavores, etiam per somnos, qui destinati sunt ad inducendam tranquillitatem. Proindè ex his habetur signum febrilem materiem pejorem evadere, nedùm meliorem. Attamen in infantibus ac pueris (quibus præsertim familiare est symptoma illud dùm febricitant), id non ita peri- culosum est. Ii enim levissimâ de causâ convelluntur in casu dentitionis, tùm etiam propter saburram acidam aut vermí- nosam, quæ facilè ut plurimùm emendatur. In hoc ergò apho- rismo, sicut & in præcedenti, minimè sermo fit de veris con- vulsionibus adnascentibus feбри, de quibus mentio habetur, aph. 26 sect. 2, suprâ memorato.

In febribus spiratio offensans malo est, convulsionem enim signi-

ficat, aph. 68 sect. 4, fit respiratio offensans, id est cùm concussione, quandò in mediâ inspiratione aut expiratione contingit altera parva inspiratio aut expiratio: tùm etiam quandò fit alterutrius actionis aliqua interruptio. Porro id fieri nequit, quin potentiæ respirantes irritentur & inordinatè agant, quin proindè spasmus aliquo laborent, atque adeò vita afficiatur in proprio sanctuario. Eâdem ratione, *in morbis acutis qui cùm febre sunt, gemebundæ spirationes malæ*, ex aph. 56 sect. 6, quatenus eæ magnum pulmonis infarctum denotant, simul indicando aliquam subesse diaphragmatis convulsionem.

Quibus tusses siccæ, plurimæ & modicæ, irritantur, in febris ardentibus, ii non multum siti vexantur, aph. 54 sect. 4. Quia scilicet succussio faucium per tussim inducta, allicit earum partium humiditatem; sitis enim ab earum siccitate præsertim intenditur.

PROGNOSTICA Hippocratis ergà coctionis epocham.

QUIBUS septimo die judicatur morbus, iis urina rubram die quarto nubeculam habet, aliaque signa pro ratione, aph. 71 sect. 4. Jam trita est hujus observationis explicatio. Si pepasmus incoëptus jam sit quartâ die, docuit observatio coctionem absolutum iri die septimâ, & crîsim tunc faustam adventuram esse. Videantur quæ dicta sunt, pag. 169.

Ubi toto corpore mutationes contingunt, & corpus frigescit, rursumque calefit, vel colorem alium ab alio recipit, morbi longitudo significatur, aph. 40 sect. 4. Nam quandò non fit constans irritatio naturæ, simulque inconstans est ejus reactio, id indicat humorem subigendum quasi per partes objici potentiis coquentibus, vel & affectionem quamdam nerveam regnare quæ identidem excitatur ab eodem humore.

Febres quæcumque non intermittentes (quæ) tertio die vehementiores redduntur , periculosiores. Quocumque autem modo (deindè) intermiserint , securitatem inesse significatur , aph. 43 sect. 4 , qui errore librariorum legitur adhuc n^o. 64 , in septimâ aphorismorum sectione. Evidenter agitur in hoc aphorismo de febribus tertianis continuas mentientibus , quæ apud Hippocratem vocantur semitertianæ , tritheophiæ aut tertianariæ apud Galenum , apud Celsum hemitriteæ. Videantur quæ dicta sunt , pag. 262.

In febribus non intermittentibus excreationes lividæ , aut cruentæ , aut graveolentes , aut biliosæ , omnes malæ ; bene autem si prodeant , bonæ ; eadem etiam ratione dejectiones & urinæ juvant. At si nihil eorum quæ juvant per hæc loca excernatur , malum , aph. 47 sect. 4 : tales namque excreationes in gene recedunt à statu sano & indicant pectus infarctum esse ; sed quando illæ accidunt cum aliquâ facilitate & cum levamine , tunc bonæ sunt , quia incipit concoqui materies infarctûs , ideòque sensim liberatur organum infarctum. Quod pariter censendum de aliis quibuscumque evacuationibus , sicut generali dogmate præceptum est , aph. 2 sect. 1.

Quibus biliosæ sunt dejectiones , hæc obortâ surditate cessant ; & quibus præcesserit surditas , exortis biliosis dejectionibus , desinit : aph. 28 sect. 4. Id fieri videtur hoc modo , propter maximam relationem quæ apparet inter mixtionem bilis & ceruminis aurium.

Corpus eorum qui non omninò leviter febricitant , in eodem consistere , & nihil remittere , vel etiam magis quàm ratio postulat extenuari , grave est. Illud siquidem morbi diuturnitatem , hoc verò imbecillitatem significat , aph. 28 sect. 2 ; in priori casu non fit subactio nec dissipatio ulla humoris morbiferi sicut nec aliorum , irritâ febre sat potenti ; undè apparet coctionis difficultas , sive quia

quia humor tenacior existit, sive quia forsan ille partim aufugit cellularem in textum. In casu verò nimiae extenuationis, nimius è contrà detritus accidit nimiaque dissipatio, quibus indicatur major acrimonia humoris peccantis, tùm major teneritudo sanguinis; undè affertur nimia prostratio virium, adeoque magna coctionis bonæ incertitudo.

Quibus per febres rigores contingunt sexto die, difficulter judicantur, aph. 29 sect. 4. Docente observatione, dies sextus plerumquè malè judicat. Undè rigor contingens hoc die, præbet signum judicationis incertæ, sicut experientiâ compertum est, aliundèque difficillimè explicaretur. De die sexto, vid. pag. 268.

• *Quibus paroxysmi fiunt, quânamcumque horâ febris dimiserit, si horâ eâdem postero die prehenderit, judicatio difficilis est, aph. 30 sect. 4.* Hic intelligendi sunt paroxysmi contingentes in febribus continuis more febrium intermittentium. Proindè ibi agitur de febre tertianâ continuâ quam semi-tertianam vocabat Hippocrates, & quam difficillimè sanari observaverat, sicut hodiè observatur. Quarè verò ea paroxysmorum regularitas absoluta designet judicationem difficilem fore, intelligitur ex eo quòd ea renunciet constantem humoris tenacitatem, quæ ideò mutationem ullam haud facilè recipit, atque ita resistit coctioni.

Quartus septenariorum index est: octavus alterius septimanæ est principium. Undecimus etiam spectandus dies, ipse enim secundæ septimanæ quartus est. Rursus quoque spectandus decimus-septimus, hic enim est quartus à decimo-quarto, septimus verò ab undecimo, aph. 24 sect. 2. Hic designantur dies indicadores cresium ergà morbos acutiores, qui nempè judicantur spatio trium septimanarum, & diebus quidem septenariis aut semi-septenariis. Designantur inquam dies in quibus aliqua coctionis jam incoeptæ signa apparent, quæ crisin certo die determinato fu-

turam pollicentur. Videantur quæ dicta sunt ubi de diebus criticis , pag. 234 & 258.

Quoniam verò Hippocrates usu longo compererat crises sudorum viâ eventuras prænunciari diebus indicatoribus sibi propriis , non solum in morbis acutioribus intrâ tres septimanas terminandis , sed & in acutis *ex decidentia* dictis ; eos dies indicadores crisisum per sudores faciendarum refert aph. 34 sect. 4 , ubi legitur : *sudores febricitantibus boni , qui cæperint tertio die , quinto , septimo , nono , undecimo , decimo-quarto , decimo-septimo , vigesimo-primo , vigesimo-septimo , trigesimo-primo , & trigesimo-quarto : ii enim sudores morbos judicant. Qui verò aliter contingunt , vel mortem , vel dolores , vel morbi longitudinem , vel recidivas significant. Videantur ea quæ ubi de criticis diebus , pag. 259.*

Datur & aliqua exceptio ergà diem quartum , tanquàm indicatorem respectu hæmorrhagiæ per nares , quæ refertur his verbis coacâ 133 : *sanguinis ex naribus fluxus in febre ardente quarto die superveniens , malo est , nisi aliud quidpiam bene acciderit. Quòd si die quinto contingat , minùs adfert periculi.* Notatur itaque crises sanguineas plerumquè tardiores esse. Si ergò narium hæmorrhagia prænuntietur tali fluxu jam contingente per diem quartum , metus est nè omninò symptomatrica sit , procedens scilicèt à dissolutione partis rubræ sanguinis ob summum putrorem. Quia verò ea hæmorrhagia quandoquè die quarto criticè prænuntiatur , dicitur eam malam tunc esse , *nisi aliud quidpiam bene acciderit* ; quod aliud quidpiam præsertim quærendum in qualitate pulsûs coctionis , aliisque signis pepasum indicantibus & experienciâ cognitis.

Prætereà , aliud adhuc egregium factum observationis notatur coacâ 128. Nempè , *si venæ temporum in febribus pulsent , & facies bene habita fuerit , absquè præcordiorum mollitie , longum*

fore morbum sperare oportet, qui nec sine liberali sanguinis ex naribus profusione, aut singultu, aut convulsione, aut coxendicum dolore, desinet. Postea legitur, coacâ 131, in febre ardente laborantibus, si aurium sonitus cum visus hebetudine & ad nares gravitate accedant, nisi sanguis ex naribus profluat, furiosa & vehemens mentis motio metuenda est; quia scilicet ea phœnomena circa caput contingentia oriuntur, vel à sanguine qui ad cerebrum symptomaticè fertur impetu febrili, vel à statione sanguinis critici circa easdem partes. Si casus primus, expectanda & præcavenda phrenitis: si secundus, narium hæmorrhagia critica, quam & prævidere licet alio quopiam benè accidente, nempe signis pepasmi tunc præsertim observandis in pulsu nasali, quâ notitiâ carebant veteres Medici omnes antè Galenum.

Febricitanti si sudor contingat, febre non deficiente, malum. Prorogatur enim morbus, & multam significat humiditatem, aph. 56 sect. 4. Talis itaque sudor minimè criticus est, sed omninò crudus, qualis præsertim fit per initia aut per decursum febris in constitutione inflammatoriâ, absquè ullis signis pepasmi. Proindè talis sudor magnum indicat laborem, sanguinem siccat, peragendæ nocet coctioni, atque ita malus est. Quod idem dicendum de sudore similiter erumpente in febribus humoralibus simplicibus aut putridis. Verùmtamen quandò sudores perindè crudi accidunt, quin adfuerit febris magna, aut si adsit febris duntaxat catharralis; cùm ii sudores nequaquàm procedant ab impetu febrili nimio, non aliam incusant causam præter majorem catharralem humiditatem crudam, qualis etiam solet esse quandò æstas fit veri similis, ex aph. 6 sect. 3. At verò talis humiditas difficiliùs admittit pepasum, atque ita tardio rem judicationem pollicetur.

Quibus per febres morbus regius antè diem septimum accidit,

malum, aph. 62 sect. 4 : observatio itaque docuit icterum tunc supervenientem esse symptomaticum, proindèque malum, quatenùs designat ingentem bilis copiam. Verumtamen icterus antè septimam diem contingens quandoquè non ita malus est, nempè si fiat simul humorum confluxus per alvum aut vesicam, vel & si cùm ipso incidat larga narium hæmorrhagia, quibus in casibus icterus criticus fit. Hunc felicem illius eventum plurimâ observatione confirmat Hippocrates, lib. 1 de morb. vulg. sect. 3, constitutione tertiâ. *Quibusdam, inquit, febre scilicet ardente laborantibus, morbus regius accidit sextâ die; verùm his purgatio per vesicam, aut alvus exonerata profuit, aut larga sanguinis eruptio. Quibus autem non accidebant hæc, peribant. Prætereà idem observator declaravit, lib. de victu acutorum, criticum characterem icteri antè diem septimum accidentis desumendum quoque esse ex rigore concomitante. In febre biliosâ, antè septimum diem, inquit, cùm rigore morbus regius accedens, solvit febrem. Verùm sine rigore si accedat, extrâ temporis occasiones, periculosus est.*

Si febre vexato, nullo existente in faucibus tumore, subito accidat strangulatio, lethale, aph. 34 sect. 4. Tunc equidem timenda est metastasis suprâ laryngem & pulmones, sicut illa perindè verenda est suprâ organa deglutitionis & musculos colli, in casu aph. 35 sect. ejusdem qui hic est : *si febricitanti collum pervertitur, ac vix deglutire possit, nullo existente tumore, lethale*. Talis enim tumor designaret humores foràs verti, adeòque bonum eventum portenderet, sicut de anginâ docetur, aph. 37 sect. 6.

Ubi in febre non intermittente difficultas spirandi cùm delirio contingit, lethale, aph. 50 sect. 4. Cùm enim respirationis integritas magnam vim habeat ad salutem in morbis acutis qui cùm febre sunt, quatenùs illâ spirandi facilitate designetur benè se

habere vitalia organa: ità è contrario spirandi difficultas tunc mala est, quandòquidem denunciat difficilem sanguinis trajectum vitalem per pulmones. Verùm si delirium ipsum advenerit, tùm si illud superveniat factâ priùs difficultate spirandi (sicut sæpè fit), illud utrumque pejus est, majusque abhinc imminet periculum. Similia enim accidentia testificantur vasa cerebrosa infarcta esse simul & pulmonica.

In febribus non intermittentibus, si partes externæ sint frigidaë, internæ verò urantur & siti vexentur, lethale est, aph. 48 sect. 4, quod repetitum legitur n°. 74 sect. 7. Quandò ventriculus inflammatur solet vigere febris *lypiria* dicta, ob concomitantem algorem, calore tunc veluti deficiente in externis, dùm interna uruntur, siticulosi interim arescentibus faucibus; hoc idem quoque fit quandò præcordiales partes inflammatae sunt, vel & cor ipsum, occasione vulneris aut peripneumoniæ gravissimæ. Porrò id lethale esse patet, sed & dantur alii casus in quibus calor deurens mordet interiora, nec sine mortis periculo; quandò nempè febriles materiæ summè acres & putridæ viscera veluti erodunt, viribus simul ita exhaustis ut impares sint calorem in peripheriâ corporis producere ac fovere: tunc enim gangræna exspectanda.

Quibus in febribus ardentibus tremores contingunt, his delirium solutionem affert, aph. 26 sect. 6: hocque repetitum legitur coacâ 132. Tremores de quibus hìc agitur, ii sunt subsultus verè convulsivi quibus delirium sæpè succedit, quandò nempè adaugetur cerebri infarctus à quo prædicti oriebantur tremores. Illud quidem delirium solvit eos, id est, cessant tremores adoriente delirio; sed ii duntaxat delentur ob supervenientiam gravioris alterius accidentis. Anilem profectò observationem fecisset Hippocrates, si talem tremorum solutionem aliter intellexisset.

Verùm eam memorasse apparet, nè aliqua fides adhiberetur simili eorum tremorum cessationi.

PROGNOSTICA HIPPOCRATIS ergà epocham criseos.

SI rigor, febre non intermittente, incidat, ægro jam debili, lethale est, aph. 46 sect. 4. Instante continuæ febris terminatione faustâ, rigor aliquandò accidit inter alia signa critica, & paulò post supervenit critica evacuatio salutaris. Verùm si ægrotans jam multum debilitatus à febre rigeat sine signis criticis aut cùm signis malè expressis & inconstantibus, eo rigore designatur quòd natura quidem invitet calorem beneficum quo indiget, & quòd crism moliatur quantum ipsi per residuas vires licitum est; sed his in circumstantiis vita nimiooperè debilitata, ac subacta propemodum, nonnisi incassum tentat expulsionem criticam humoris à quo opprimitur. Undè magnum tunc habetur periculum nè, post tantum laborem, cor tandem fileat & mortali frigori tradatur corpus humoribus mirabiliter degeneratis turgidum, factò sæpiùs effluxu ichoris sanguinei per nares, eo instanti quo vita aufugit.

In febre non intermittente, si labrum, aut supercilium, aut oculus, aut nasus pervertatur; si visus, si auditus defecerit, ægro jam debili, quidquid ex his evenierit, in propinquo mors est, aph. 49 sect. 4. Id enim indicat sphacelofam gangrænam alicubi partium nobilium latere, vel & insigni degeneratione putridâ infectum esse sanguinem & nervos. Quibus ita se habentibus, accidit ut miasma gangrænosum vel putridum producat maximam spirituum alterationem, atque perturbationem seu *ataxiam*; hincque non solum succedant convulsivi motus, sed & ipsummet cerebrum evadat incapax percipiendis sonitibus, sicut nec impressionibus luminis.

Similem quoque faciei & physiognomiæ totius perturbationem tanquàm signum proximæ mortis notabimus, aut dicemus saltem valdè ominosum quidpiam subesse, si palpebris non commissis per somnum aliquid ex albo subappareat.

Spektare verò oportet quæ etiam ex oculis per somnum apparent, inquit Hippocrates aph. 52 sect. 6. Etenim si quid ex albo, non exactè commissis palpebris, subappareat, neque id ex alvi profluvio, aut potione purgante contingat, prævum signum est, & lethale admodum. Hoc enim observatione dignum est, quòd impressiones saburræ intestinalis pravæ ac præsertim cholericæ, sicut & punctiunculæ acrium cathartorum resinoforum suprâ intestina, capaces sint hanc faciei humanæ stupendam inducere mutationem: quæ quidem in cholerâ deleri docilis est affuso potu aquoso copiosiori, tùm adhibito medio quodam sedante ubi superpurgatio adest; sed si talis faciei perversio contigerit in febricitante cujus cerebrum infarctum apparuit, habetur signum lethalissimum. Hinc enim renunciatur summa virium exolutio, putridaque infectio cerebri maximè funesta, contrà quas non datur medicamen.

Quibus in febribus, aut aliis morbis, oculi ex voluntate illacrymant, nullum est malum. At quibus præter voluntatem, periculosius est, aph. 52 sect. 4. Nam mechanica & involuntaria lacrymatio designat irritari atquè obrui lacrymales glandulas, ob impetum sanguinis appellentis; proindèque magnum esse periculum nè cerebrum valdè vicinum & affine pariter obruatur, vel & nè jam deliris ludatur imaginibus.

In febribus abscessus, nisi primis judicationibus solvantur, morbi longitudinem significant, aph. 51 sect. 4. Ubi apparent quidam abscessus circà prima tempora critica, iique tunc completâ & judicatoriâ suppuratione non solvuntur, satis ex eo ipso constat

eas febres diuturnas futuras esse, vel quia humor ægrè subigendus existit, vel quia natura imbecillior est.

Febre ardente detento, rigore superveniente, solutio fit, aph. 58 sect. 4. Hic rigor nihil aliud est quàm succussio & tensio systematis irritabilis, nata tempore critico ob conamen naturæ coctam materiem febrilem mox expulsuræ. Qui rigor stipatus est pulsu coctionis & critico, ideòque differt ab eo rigore qui cùm frigore & irritato pulsu contingit febricitanti jam debilitato, aut qui sextâ die accidit, de quibus aph. 46 & 29 sect. ejusdem. Quanta in utroque concomitantis pulsûs diversitas! Cùm rigore critico criticus pulsus est : irritatus verò cùm aliis.

Quibus per febres aures obsurduerint, sanguis ex naribus profluens, aut alvus exturbata, morbum solvit, aph. 60 sect. 4. Aures in febricitantibus obsurdescunt duplici de causâ: quæ utraque surditas statim accidit si symptomatica sit, tardè verò si ad crîsim tendat. Nempè obsurdescunt aures, vel idiopathicè propter sanguinis stationem circâ basim cranii, vel symptomaticè propter humoris biliosi stationem in propriis organis suis, aut illius admixtionem cùm cerumine aurium. Prior autem spontè solvitur sanguine ex naribus profluente cùm pulsu nasali; posterior verò per diarrhæam criticis quoque suis notis insignitam. Undè luculenter etiam affulget explicatio aph. 28 sect. 4, data pag. 288, in quo notatur cessare dejectiones biliosas suboriente surditate, desinere verò surditatem præexistentem supervenientibus dejectionibus biliosis. Eâdemque ratione observatur alvum evadere pigriorem apud homines ultràvirilem ætatem agentes, quandò eorum aures hebetantur.

Alvus in febre ardente affatim prorumpens, mortis periculum adfert, coacâ 129. Crises equidem intestinales non sic cùm impetu accidunt, nec affatim prorumpunt. Solent eæ prænunciari

ciari à molli quâdam abdominis renitentiâ borborygmis stipatâ, ut & humiditate linguæ, præsertimque à pulsu intestinali paulò antea observabili. Sed in casu hujus Coacæ, fluxus alvi affatim prorumpens, liquidior & foetens admodum, indicat lethalem colliquationem putridam, quæ & pulsu parvo debili & formicante stipatur, nedum sit magnus, satis fortis mollisque & intermittens, sicut datur in diarrhæâ criticâ salutari.

Quibus sublata hypocondria murmurant, lumborum succedente dolore, iis alvi admodum humectantur, nisi flatus erumpant, aut urinæ copia prodeat. Hæc verò in febribus contingunt, aph. 73 sect. 4. Tunc habetur hæsitatio inter crisim urinariam & intestinalem, quam alterutram datur præcognoscere ex pulsu coctionis præcedente, cui succedit pulsus criticus alterutrius cloacæ.

Quibus per febres, die septimo, aut nono, aut undecimo, aut decimo-quarto, morbus regius supervenerit, bonum, nisi hypocondrium dextrum obduruerit: alioqui, non bene est, aph. 64 sect. 4. His quidem febris diebus superaccidens icterus, fit à bile copiosâ sed coctâ. Quæ certè quidem biliares ductus excretorios obruit per modum torrentis cujusdam; sed quæ præ fluxilitate benignâ quam obtinuit à febre, valet successivè, continuò & cum levamine eliminari petendo intestina: undè tollatur tota febrilis materies biliosa, atque ideò sanetur ægrotans. Verùm si in ictero tunc contingente durum evadat dextrum hypocondrium, ille icterus tanquàm malum maximè anceps è contrà habendus est. Durities enim hæc denotat quòd magna portio bilis morbiferæ adhuc spissa & tenax hæreat in finibus venæ portarum; quæ materies, si huc usquè servaverit viscosam qualitatem suam (irritâ coctione alterius portionis bilis), forsan illa non poterit deindè attenuari, emendari, concoqui: ideòque nec scandere biliosos hepatis poros, nec in ejus parenchymate

resolvi, sicut necessum est ad solutionem duritiei hepatis. Quinimò ipsa febris quæ manet superstes, movendo nimis hanc materiem indurata, capax est ibi creare abscessum pessimum, aut potius scirrhum adducere cùm periculo subsecuturi in posterum carcinomatis. Undè etiam patet quàm meritò doceatur, aph. 42 sect. 6, *morbo regio laborantibus jecur durum fieri, malum.* Cùm enim his in circumstantiis totus curationis cardo vertatur in adhibitis diluentibus & aperientibus, valdè timendum est nè hæc omnia incassum administrentur, præ nimia materiei obstruentis induratione, aut majori saltem illius pronitate ad concrendum. Neque ipsa febris unà cùm prædictis mediis capax esset talem hepatis duritiem solvere, propter dispositionem quamdam inflammatoriam adjunctam: eaque de causâ noceret potius, quatenus valeret ibi determinare suppurationem pravi moris, aut reddere hepar gangrænosum vel carcinomatodeum. Tamen verò si daretur simplex hepatis vel lienis infarctus, seu in ictero levi, seu extrà icteri occasionem (dummodò ii forent absquè duritie & inflammatione), febris ardens tunc suborta hunc forsan infarctum resolveret, bonamque adduceret crism. In hunc sensum videtur conscriptus aph. 40 sect. 6, qui hic est: *quibus ad hypocondrium dolor citrà inflammationem oritur, iis febris succedens dolorem solvit*; qui eventus etiam annumerandus est inter emolumenta ex febre obtinenda, quorum levis habetur mentio, pag. 280.

Quibus spes est ad articulos abscessurum, ab abscessu liberat urina copiosa, valdè crassa, & alba reddita, qualis in febribus cùm lassitudinis sensu quarto die quibusdam fieri incipit. Quòd si ex naribus etiam sanguis effluxerit, tùm brevi admodum levatur æger, aph. 74 sect. 4. Tunc enim materies productura abscessum articulorum resorbetur ex textu cellulari, in quo delitescibat &

coquebatur, eaque deindè eliminatur per cloacam renalem, vel & admixta sanguini naribus destinato, viam sibi facit & producit criticam hæmorrhagiam.

Quibus per febres lassitudinis sensus inest, iis ad articulos, & circa maxillas potissimum abscessus decumbunt, aph. 31 sect. 4. Putare fas est humores febriles lentos quosdam præprimis admisceri cum humoribus synovialibus, ob quamdam affinitatem mutuam, hinc laborare organa synovialia, & oriri hunc sensum lassitudinis per febres. Propterea tandem eos decumbere humores in articulis, sed potissimum circa maxillas quibus vicinæ sunt glandulæ plurimæ, ab humoribus quoque lentis haud difficulter ingurgitandæ.

Quibus adsunt febres longæ, iis vel abscessus, vel dolores ad articulos oriuntur, aph. 44 sect. 4 : saltem id plerumquè accidit in ægrotantibus cum febre longâ conflictantibus absquè ullâ ferè medicatione. Ne credatis tamen hunc aphorismum ratione desertum esse. Quandò ægrotans diù lectulo suo immotus ferè affigitur, (naturâ sibi ipsi præsertim relictâ), tunc defectu motûs, synovialia organa viru febrili conspurcata facillimè affici haud ita absonum, quia inviscantur synoviali humore ob quietem non detricto, ideòque inspissato. Quin etiam, ut scribitur aph. 45 sect. ejusdem, *quibus aut abscessus, aut ad articulos dolores post febres longas oriuntur, ii copiosissimis cibis utuntur*; nempè quia cibis copiosioribus assumptis à corpore nondum instaurato, accidit ut eorum animalisationis pensum malè absolvatur. Quâ ratione articuli per febrem debilitati, & ob quietem infarcti viscoso naturali suo unguine, obruuntur ab adveniente suâ portione alimenti copiosioris, ideòque malè elaborati : undè decubitus inflammatorius succedente suppuratione depurandus supervenit, vel dolens saltem synovialis quidam infarctus.

Quibus verò convalescentibus ex quovis morbo, pars aliqua dolore vexatur, illic abcessus fiunt, aph. 32 sect. 4; quando propter imperfectam crîsim aliquid retentum est, illud deponitur suprà debiliorem partem, qualis est pars tunc dolens, quæ ideo præ aliis afficitur. Quâ ratione apparet, secundum membrum aphorismi trigesimi secundi dissiliisse in unam distinctam sententiam errore Librariorum, hincque factum esse aphorismum 33um. qui sic se habet: quin & si pars antè morbum laboraverit in eam se morbus obfirmat; quod quidem pariter evenit in morbo essentiali, perindè ac in secundario.

Febricitantem, nisi die critico febris dimiserit, reverti solet, aph. 61 sect. 4. Videantur quæ dicta sunt de hâc sententiâ, ubi de diebus criticis, pag. 263.

Quibus per febres sanguinis copia alicundè profluxerit, iis cùm reficiuntur alvi perhumectantur, aph. 27 sect. 4. Penuriâ boni sanguinis debilitantur recrementa omnia, proindequè digestionem evadunt crudiores; undè fit diathesis plùs quàm justo humida, quæ expellenda incumbit prout vita invigoratur.

Hùc demùm revocandus quoque aphorismus 12us. sect. 2, jam multoties repetitus & facilè intelligendus, qui hic est: *quæ in morbis post judicationem intùs relinquuntur, recidivam faciunt.* Nihil enim morbose impunè retinetur, illudque recidivam aliumve morbum sæpè extraordinarium facit, nisi favente corporis robore, aut optimâ saltem ratione vivendi, illud pedetentim eliminetur.

Prælibatæ sufficiant annotationes circà præcipuas prognoses in febribus faciendas, ad hoc ut demonstretur quantum fructûs colligendus sit in lectione operum Hippocratis. Qui enim vellet omnes ejus Medici sententias insignes memorare in hunc sensum,

plures ejusdem libros de verbo ad verbum conscribendos haberet.
Deveniamus ad examen febrium intermittentium.

§. II.

FEBRES INTERMITTENTES.

FEBRIS intermittens dicitur ea quæ per vices sævit, datâ plenâ apyrexîâ seu infebrecitatione inter duos paroxismos.

Distinguitur multiplex. Nempè quotidiana, tertiana & quartana, prout nimirum febris quotidie invadit ac desinit, vel tertiâ tantum aut quartâ quâcumque die. Tertianas præsertim æstate oriri notatur aph. 21 sect. 3, quartanas autumnno, ex aph. 22 ejusd. sect.

Ordo secundum quem accessiones seu paroxismi recurrunt, vocatur typus seu modus; intermissio autem, spatium febre vacuum inter duas accessiones.

Quæcumque febres intermittentes aliæ aliis sunt magis regulares. Omnium magis regularis quartana: tertiana minus: adhuc minus quotidiana, quæ de die in diem sic variare solet ut brevî abeat in continuam plerumquè pessimam. Undè ipse ego lubenter spectaverim quotidianam febrem tanquàm febrem continuam larvatam, cujus remissio statim quidem sensibilis est admodum, sed quæ statim etiam corripitur ac evanescit. Febris verò continua præsertim abdita latet in eâ febre quotidianâ putatâ, quæ subintrans appellatur.

Medici nonnulli crediderunt agnoscendas quoque esse febres intermittentes quintanas, septimanas, imò & nonanas, quas ipse Hippocrates appellat, lib. 1. de morb. vulg., pag. 36 Foës. Sed omninò dubium mihi videtur eas febres spectandas esse tanquàm totidem reales & constantes febrium differentias. Ex

enim potius sunt febres tertianæ personatæ, imò & forsan quandoquæ febres quartanæ. Febris itaque quintana nihil unquam mihi apparuit, nisi febris tertiana valdè irregularis & degenerata apud ægros intemperantes, (aut perperam tractatos, aut plurimas recidivas passos), cujus nempè paroxismus unus non fuit sensibilis. Imò eadem febris tertiana videbitur septimana, si duo insultus siluerint: si tres, nonana.

Quantum saltem licet domesticas observationes suas allegare, asseveranter dixero me hinc inde aliquot quidem vidisse inconstantes paroxismos febriles apparenter quintanos, aut septimanos: sed eos me tantummodò vidisse in decursu tertianæ febris protractæ, potissimum recidivæ, admodumque degeneratæ & irregularis: qui paroxismi hunc characterem quintanæ aut septimanæ febris nunquam servarent ultrà unam aut alteram accessionem, quæ elapsâ, febris iterum appareat tertiana magis vel minus irregularis: vel & sæpius febris lenta singulis diebus exacerbescens & pessimam cachexiam concomitans.

Quod diximus de quintanâ & septimanâ febre, illud pariter intelligendum est de nonanâ; quæ tamen, ut & septimana, posset quoque forsan apparere ubi unus vel duo quartanæ febris paroxismi successivi paterentur eclipsim. Enim verò non multum interest de hac distinctione nimis seriò occupari; quoniam ea non sunt artis, quæ tam rarò observantur ut ipse Medicorum Princeps de illis nonnisi per transennam locutus sit. Eas ideò observationes censemus admodum incertas imò inutiles, sed meliora doceri sumus paratissimi.

Realis verò & ab omnibus accepta est intermittentium febrium distinctio in endemicas, epidemicas & sporadicas, in vernas & autumnales, tum in simplices & compositas. Priores noscuntur ex ipsâ denominatione, vernæ audiunt quæ à mense februario

in augustum dominantur, autumnales quæ ab augusto in februario. Simples demum vocantur quæ sunt constanter quotidianæ, aut tertianæ, aut quartanæ. Compositæ verò, si duæ febres ejusdem speciei invicem complicatæ fuerint. Ex. gr. ex duabus quotidianis febribus eodem die invadentibus fit quotidiana duplicata, quæ valdè rara est, si possit saltem dici illam aliquandò constanter observari. Ex duabus tertianis invicem incatenatis componitur tertiana duplicata, in quâ paroxismus unus singulâ die accidit, sed ita ut qui similes sunt alternis diebus revertantur. Deniquè ex duabus aut ex tribus quartanis complicatis fit quartana duplicata aut triplicata, sic ut paroxismi similes & sibi mutuò respondentes, quartis quibuscumque diebus recurrant.

Complicari quoque febrem intermittentem cum febre continuâ plurimi contendêrunt Medici. Sed, ut opinor, verius est febrem tertianam aut quartanam non rarò continuam fieri, nempe quandò earum paroxismi continuantur quousquè nulla ampliùs remaneat intermissio, continuatâ nempe irritatione febrili.

Tertiana sic continuata constituit febrem semi-tertianam Hippocratis, de quâ dixit morbos acutos in eâ accidere, tum eam præ cæteris esse lethalem; quæ ipsa est *tritheophia* seu *tertianaria* Galeni, tum *hemitritea* Celsi. Quartana verò continua conficit *tetartophiam* Sauvagesii. Quæ febres semi-tertianæ, tritheophiæve aut hemitritiæ dictæ exacerbescunt diebus imparibus, sicut tetartophiæ exacerbescunt diebus paribus; eæque constituunt eas febres quarum dies critici (diebus paribus & imparibus accidentes) meritò distinguendi sunt à diebus criticis septenariis, sicut notavimus, pag. 261 & seq.: cum hac observatione, quòd crises diebus paribus aut imparibus accidentes non videantur ab ipsomet Hippocrate comprobatas fuisse observationibus fatis numerosis & explicitis.

Plurimas hemitriteas febres diebus alternis seu imparibus exacerbescences in hâc Provinciâ vidimus æstate & autumnò anni 1782 , quæ mox per initia apparebant continuæ , deindèque alterno quoque die exacerbescabant : mox verò fingeant tertianam quæ brevì postea in continuam abibat. Quæ omnes febres erant maligni moris , biliosumque putrorem valdè lethalem recondebant.

Similiter , ab æstate 1783 tales febres adhuc maligniores grafsatæ fuerunt apud nos , imprimis apud Graïacenses , quæ efficiabant paroxismos apoplecticos , mox singulâ , mox tertiâ quâque die revertentes , eosque lethales admodum ; ad quos reprimendos & delendos aliquoties profuit cortex Peruvianus , exhibitus ad duas uncias & amplius in unâ die.

His prælibatis de febrium intermittantium variâ specie , moribusque variis , deveniendum ad earundem causas & symptomata , tum ad diagnosim & prognosim.

C A U S Æ.

CAUSA febrium intermittantium in genere videtur esse peculiaris cacochylia primis viis hærens , quæ ad sanguinem delata inficit flavam potissimum partem ejus , ideòque speciatim aggreditur viscera præparandæ ac secernendæ bili dicata , in quibus stases sui generis facit : quæ & prætereà generi nerveo singulariter nocet præsertimque nervis vitalibus.

Solemne est hanc cacochyliam peculiarem in omni ætate aliquandò produci ab intemperantiâ pravisque digestionibus ; eâque de causâ omni tempore passim enasci febres intermittentes sporadicæ. Verùm etiam notatur eandem dispositionem aliquandò endemicam fieri certo anni tempore , imprimisque vere & autumnò , apud populos aquis statariis utentes , paludosa habitantes

habitantes loca quorum stationariæ arefactiones suppeditant multum inflammabilem aërem aliasve emanationes singulares ; quæ omnia efficacitatem majorem obtinent quandò tales exhalationes accipiuntur à ventis borealibus. Sæpè quoque similis dispositio febrifera alicubi popularis fit , occasione tempestatis borealis , sicut & propter vitiatam communem annonam aut susceptum frigus nocturnum (sicut non rarò fit in castris) : vel & propter alias causas abditas. Quibus causis communibus in actum ducendis aliundè favent quædam circumstantiæ locorum, respectu sitûs eorum ergà montes planitiesque aut valles , sicut & ergà solis aspectum.

Quibuscumque verò de causis cacochylia hæc singularis generata fuerit, ubi ea sufficienter penetravit viscera bili præparandæ consecrata , tunc viscera hæc mediante regimine suo valent gignere singularem generis nervei sensum erethysmalem , atque ideò febrilem reactionem exstimulare , ab horrore magno incipientem & deindè valdè æstuantem ; cujus reactionis beneficio diluatur dissolvaturque & expellatur principium febriferum priùs susceptum ; adeò ut post æstum febrilem qui labitur spatio temporis quod à 6 horis ad 12 extenditur , soleat contingere evacuatio veluti critica per copiosos sudores , quibus effusis desinat febrilis paroxysmus , liberatis hoc pacto visceribus ipsoque sanguine : & consequenter restituatur vitæ tranquillitas magis vel minùs lucida , prout depuratio hæc magis vel minùs perfecta fuit : ad quam absolvendam non parùm quoque conferunt urinæ copiosæ , valdè rubræ , turbidæ , jumentosæ , multum sedimentum deponentes , dùm ex initio paroxysmi ut plurimùm crudæ & tenues sunt.

Sed quia depuratio vi febris inducta nequit delere vitium primis viis adhærens , ibique perpetuò folum ac reproductum (præsertim

si faveat intemperantia) : hinc evenit ut , terminatâ febrili accessione , sanguis ejusque portio flava iterum inficiantur , quousque accidat alterius paroxismi occasio priori similis , simili etiam labore & eventu recessuri. Qui paroxismus alter , citiore vel tardiori passu adveniando , breviorē aut longiorē infebrecitationem permittit.

Prout nimirum febrilis primarum viarum materies , vel & simplex forsan ejus aura , gaudet majore vel minori mobilitate , acrimoniâ & penetrabilitate : tum prout nervis citius restituitur major minorve sensus erethysmalis , diversum requiritur temporis spatium ad hoc ut inducatur apparatus paroxismi subsequendi. Consequenter , ubi omnia hæc regulariter procedunt , spatium inter accessiones febriles liberum servatur idem , ut & idem typus in paroxismis. Unde si febris v. g. tertiana fuerit aut quartana , ea utraque regularis manet : id est , post horas aliquot in æstu febrili elapsas desinit tertiana , quæ reditura erit exhaustis deinde horis circiter triginta-sex absque febre. Pariter quartana , exhaustato accessu caloris qui viget 5 vel 6 horis cum gravitate capitis , cessat ut plurimum sine evacuatione sensibili ; eaque regulariter redit post intermissionem horarum circiter sexaginta-sex & quandoque paulò amplius.

Verum si humor febrilis evadat copiosior aut penetrabilior : si nervi facilius fiant participes sensibilitatis majoris , aut si sanguis affectaque cum eo viscera minus perfecte liberata fuerint auxilio paroxismi præcedentis : his in circumstantiis citius contingente complemento febrilis apparatus , citior redit accessio nova , & vice versa tardior. Unde , v. gr. , febris tertiana quæ meridiè primitus invadebat , nunc invadit decimâ horâ , vel & è contrario horâ tantummodo secundâ pomeridianâ , si nempe circumstantiæ prædictis contrariæ fuerint. Adeo ut si febrilis

dispositio perrexerit fieri magis prona, febris tertiana haud tardè abitura fit in continuam: sicut vicissim abit in quartanam, ubi eadem dispositio constanter segnior evadit.

Pari ratione, quandò febris quartanæ principium majorem acquirit mobilitatem, simulquè pars nervea viscerum erigitur magis quàm fieri solet in hoc affectu: tunc quartana sensim accelerata degenerat in tertianam, imò & quandoquè in continuam febrem: sicut contrariis de causis ea sæpiùs videtur abire in febrem chronicam & cachecticam, hinc indè levibus quibusdam & irregularibus paroxysmis veluti scintillantibus; ex quo statu sobolescit atrabiliosa hypocondriorum induratio cùm leucophlegmaciâ pessimâ, undè non rarò ipsemet oritur hydrops ascites dictus.

Præterea verò, quamvis febriles accessiones singulæ soleant quamdam adducere speciem criseos, præsertim in febre tertianâ, sæpiùs depuratio hæc minimè perfecta est quotiès febris cessavit, seu spontè, seu ope medicamentorum. Ideò sæpè contingit ut irritis magnis induciis (quæ plerumquè procedunt ex hebetatione sensûs viscerum) nihilominus sanguis ut & ejus pars flava maculam febriferam residuam conservent, sicut & ea quoque remanet superstes in nervis: & ut ab hinc recidiva accidat, cujus paroxysmi incidant iisdem diebus, ac illi incidissent si febris nequaquàm fuisset interrupta.

Ea autem recidivarum occasio nascitur 1°. ex defectu diluentium & purgationum sufficientium; 2°. ex vitio diætæ; 3°. imprimis, ex præpostero usu Peruviani corticis; qui cùm mirabiliter valeat suspendere vitalem reactionem febrilem, capax est obstare depurationi necessariæ: nec ideò exhibendus est quandiù datur impuritas febrilis, nisi fortè malum majus timeatur ab ipsâ febre quàm à Peruviano cortice, ut sæpè fit.

Non aliis de causis tam frequenter evenit ut nervi simul & biliosa viscera magis magisque intingantur febrili deleterio altius incocto, & ut suboriantur pessimæ recidivæ, tum obstructiones difficillimè vel nunquam tollendæ, atque ideò mala ab hinc pendentia.

Sæpè etiam tertianæ febris simplici superaccidit altera febris pariter tertiana, cujus nempè accessiones alternè quoque fiunt diebus à priore febre vacuis: & similiter febris quartanæ primordiali altera quartana supervenit, imò & quandoquè duplex, quarum quartanarum de novo adnatarum accessiones sæviunt quartis quibuscvis diebus, mediis inter accessiones quartanæ febris primogenitæ. Quo in casu complicationis, tertiana duplicata dicitur, tum quartana duplicata imò & aliquandò triplicata: earumque complicatarum febrium accessiones invicem incatenantur & sibi multò respondent, sicut unicuique febris proprium est & ab attendente facilè intelligitur.

Eam febrium intermittentium complicationem generari censemus, eò quòd post accessionem antecedentem citius renascatur dispositio nervosa febrilis, singularem erethysmum redolens: tum eò forsan quòd fomes febrilis simul fiat copiosior & fecundior. Undè, maturius suppeditatâ materie febrili novâ, nervisque citius aptis evadentibus ad patiendam irritationem febrilem, contingit extraordinaria febris accessio omninò independens ab antecedente, quæ sævit ipso tempore intermissionis. Quæ materies de novo distributa ad novam febrem creandam (etiamsi fota & præparata fuerit dum præcedens vigeat paroxismus), non potuit tunc temporis intususcipi nec obtinere effectum suum: quia eo tempore quo natura jam occupatur in actuali paroxismo regulari, illa minimè capax est novæ modificationis febrilis; ad hanc enim suscipiendam requiritur idem

nervorum sensus tùm eadem viscerum sensificatio & irritatio, ac illa quæ necessaria fuerunt ad primam accessionem inducendam. Sed ubi modificatio nervorum ac viscerum restituitur, accessionem novam nasci necesse est, perindè ac aliæ accessiones primordiales renascuntur. Hoc verò notari meretur circà febriles accessiones novas quibus febris duplicatur, quòd illæ nunquàm eâdem horâ accidant, nec eundem unquàm habeant typum ac solitæ accessiones primordialis febris: quòd illæ prætereà sint mitiores quàm pristinæ, & quòd faciliùs ac maturiùs ut plurimùm dissipentur, aliquandiù adhuc posthâc vigentibus paroxismissis febris primogeniæ.

Prædictis de causâ febrium intermittantium propositis, jam veniamus ad expositionem symptomatum.

S Y M P T O M A T A .

IN symptomatibus febrium intermittantium quadruplex distinguenda est epocha. Prima respicit invasionem: secunda æstum febrilem: tertia declinationem accessionis: quarta tempus intermissionis. Optima & brevis descriptio trium priorum habetur apud Boerrhaavium, à §. 749 ad 751 inclusivè.

» *Febres intermittentes* incipiunt, *inquit*, cùm oscitatione,
 » pandiculatione, lassitudine, debilitate, frigore, horrore,
 » rigore, tremore, pallore extremorum, respiratione diffi-
 » cillimâ, anxietate, nausæâ, vomitu, pulsu citato, debili,
 » parvo, siti maximâ. Hæc prout majora, pluraque simul, eò
 » febris pejor, atque in subsequente tempore calor & cætera
 » symptomata pejora: & hîc gradus febris primus, incremento
 » respondens continuarum, & reliquorum maximè periculosus;
 » urina tùm ut plurimùm & cruda & tenuis. Incidens cadavera
 » mortuorum in primo hoc stadio febris intermittens, post

» anhelitus , suspiria , ignaviam , inveni sanguinem crassum ;
 » impactum pulmonibus , semper tùm fuerant pulsus parvi , fre-
 » quentes , inordinati. Harv. exercit. anat. cap. 16.

Quæ prædicta symptomata indicant statum erithysmalem & valdè spasmodicum organis ipsismet vitalibus conciliatum, quo sensibilibiter mutatur conditio motûs sanguinis ejusque consistèntia , & quem debiles , senesque imprimis aliquandò superare nequeunt.

» Hunc statum excipit alter , incipiens cùm calore , rubore ,
 » respiratione forti , magnâ , liberiore , anxietate minori , pulsu
 » majori , robustioreque , siti magnâ , dolore artuum & capitis
 » magno , urinâ plerumquè rubrâ , respondet *statui* febrium
 » continuarum.

Quæ phœnomena procedunt ex concitato valido motu sanguinis , humores vehementer conquassante & terente , quandiù sufficiens febrilis stimulus non extinguitur.

» Tùm ultimò ingens plerumquè sudor , remissio omnium
 » symptomatum , urina crassa , sedimentum lateri contuso simile ,
 » somnus , *apyrexia* , lassitudo , debilitas.

In his ultimis phœnomenis habetur quidem specimen terminationis criticæ cujusdam. Nihilominus verò plurima subindè notanda incumbunt & hæc erit quarta symptomatum epocha.

Hoc itaque tempore quod pertinet ad intermissionem , sat citò pulsus fit sanorum similis , perfectaque videtur infebricitatio , si febris fuerit benigna & valdè regularis. Sed sæpiùs variis angoribus turbatur æger , pulsûsque levia irritationis vestigia ferè perpetuò præbet , potissimùm quandò febris est maligni moris & versùs continuam inclinat.

Imò sat generaliter observatur ægrotantes tempore intermissionis plerumquè experiri varias inquietudines majores minoresvè ,

eos carere appetitu , debiles esse , tùm variè agitari eam imprimis per noctem quæ paroxysmum antecedit. Quæ symptomata adhuc graviora apparent in intervallis febrium omninò degeneratarum & erraticarum , adeò ut paucissimum tunc supereffe videatur sanitatis residuum. Tunc enim prædicti angores adhuc fiunt majores , variaque regnant symptomata pro varietate viscerum infarctorum : imò varietas etiàm maxima datur in paroxysmis , tàm respectu invasionis eorum quàm ergà modum & durationem. Ubi verò jam febris frangitur , intervalla accessionum evadunt magis lucida , sensim redit appetitus , cæteræquè facultates corporis sensim accedunt ad sanitatem , & tandem paroxysmi fiunt multò mitiores.

D I A G N O S I S.

DIAGNOSIS intermittentium ergà continuas facilè resolvitur ex intellectis suprà dictis , nequè arduum est tertianam à quartanâ discriminare. Si quædam daretur difficultas , ea occurreret in diagnosi febrium intermittentium complicatarum , sed facilis est solutio hujus difficultatis. Distinguitur febris duplex tertiana à quotidianâ in eo quòd paroxysmi tertianæ duplicis sibi respondeant diebus alternis quoad horam invasionis , tùm quoad typum & terminationem eorundem : dùm ea omnia similia sunt quâlibet die , si febris quotidiana fuerit. Distinguitur verò tertiana duplicata à triplicatâ quartanâ , in eo quòd sicut prioris accessiones sibi respondent alternis diebus quoad omnia : ita & illæ in posteriori sibi respondeant diebus quartariis. Sic , v. gr. , in duplici tertianâ paroxysmus diei lunæ est imago paroxysmi diei mercurii , paroxysmusque diei martis repræsentat paroxysmum diei jovis , & sic porrò : dùm in triplici quartanâ paroxysmus diei lunæ convenit cùm paroxismo diei jovis , paroxysmus

diei martis cùm die veneris, & diei mercurii cùm die sabattî.

Quod spectat diagnosim febrium intermittantium malignarum dictarum, ea reperitur in gravitate & anomaliâ accidentium, simul & in majori duratione paroxysmorum, prout illi magis accedunt ad febrem continuam. Neque operosum est febres intermittentes endemicas epidemicasque & sporadicas secernere.

Dignoscitur deniquè febris intermittens latens sub larvâ febris continuæ, ex convenientiâ exacerbationum hujus cùm invasione paroxysmorum febris intermittens, sicut & ex plurimis aliis signis quæ ad typum spectant. Nempè si exacerbatio incipiat à pandiculationibus & horrore: si in exacerbationis fine profundantur sudores copiosi: si posthâc urinæ fuerint rubræ & lateritiæ (quæ tunc vix decipiunt): si exacerbationes diebus accidant singulis aut alternis, more febris tertianæ simplicis aut duplicatæ; vel & diebus paribus quartariis more febris quartanæ duplicatæ & triplicatæ: & deniquè si valdè sensibiles concedantur remissiones.

His etiam adde aliquandò observari alia accidentia benè diversa, quæ more febrium invadunt & remittunt, & in quibus non rarò latet larvatus febris intermittens character.

P R O G N O S I S.

FEBRIS intermittens benigna & regularis in genere sat brevè curatur, imò & quandoquè per se sola desinit, si modò æger valdè temperans fuerit paucisvè utatur medicamentis, nisi diluentibus & levissimis ad summum aperientibus catharticis.

Febris intermittens vernâ præsertim spectari potest tanquàm medicamen aptissimum ad movendos expellendosque humores hyeme collectos, illaque inter cæteras facilioris curationis est. Paulò longiores sunt autumnales; eæ tamen, si nec malignæ
nec

nec epidemicæ fuerint , nunquàm funestum habent existum nisi culpâ ægrotantis aut medelæ. Propterâ Medici ab omni ævo putârunt quòd febres intermittentes benignæ disponderent corpus ad longævitatē sæpèque illud depurarent ab inveteratis malis , sicut jam suprâ innuimus in prognosi febrium generali , pag. 280 ; idque de quartanâ febre præsertim sancitur , lib. I de morb. pag. 36 , Foës. his verbis : *ast omnium (febrium) est tutissima quartana , placidissima & longissima. Non enim solùm per se ipsa talis est , verùm etiam ab aliis magnis morbis vindicat.* Confer. aph. 70 sect. 5 , paulò infrâ relatum.

Enim verò si febres intermittentes negligantur præcipuèque autumnales , si ægrotantes temperanter non vivant , si medicamentis nimium acribus permoveantur (præsertim absquè vehiculo diluente) , iique imprimis citius utantur cortice Peruviano : tunc eæ febres maturius suppressæ solent multas facere recidivas & mirabiliter degenerare in recidivis paroxysmis : sæpiusquè accersunt tenacem cachexiam obstructionibus plerumquè stipatam , ideòque valdè periculosam. Tunc etiam phænomena quædam morbosa singularia ac pertinacissima oriuntur non rarò , sub quibus larvatum manet id quod ex febre suspensâ restiterat ; quod residuum febrile nusquàm potest in posterum depurari perfectius , quàm ab eâdem febre iterum adveniente , dummodò ea soli propemodum naturæ committatur , servato simul regimine velut in febre continuâ , usurpatisque multis duntaxat diluentibus & aperientibus , nec nisi levibus catharticis : corticem deniquè febrifugum non ministrando , si opus sit , nisi quando videtur integram depurationem factam esse.

Prædicta sufficiant de prognosi febrium intermittentium generali. Verùm nonnulla peculiariora Hippocratis prognostica hîc addere juvabit.

PROGNOSTICA HIPPOCRATIS ergà febres intermittentes.

TERTIANA exquisita septem circuitibus , ut longissimè judicatur , aph. 59 sect. 4. Quoniam valdè incertum sit quid debeamus intelligere de circuitibus illis , sicut jam notavimus pag. 264 ; & cùm nihil simile observaverimus unquàm , censemus eam sententiam interpretandam esse per coacam 148 , tùm per sententiam aliam quæ prostat lib. 1 de morb. vul. pag. 39 , Foëf. quæ sic habet : *tertiana exacta celerem habet judicationem , nequè lethalis est.*

De febribus tertianis continuis , quæ semi-tertianæ vocabantur ab ipso Hippocrate , agitur aph. 64 sect. 7 , cujus mentio facta fuit , pag. 288.

Quibus per febres quartanas sanguis ex naribus fluxerit , malo est , aph. 3 sect. 8. Hoc non fit nisi in quartanis valdè degeneratis , valdè proVectis , recidivis sæpè factis , neglectis , malè tractatis , pessimâque cachexiâ & hypocondriorum infarctu stipatis , in quibus apparet potius febris lenta quàm formatus ullus accessus quartanæ febris. Tunc verò sanguis faciliùs appellit ad superiora corporis loca propter majores inferiorum partium infarctus ; illequè ex naribus facillimè tunc exstillat quia non solum sanguis summoperè aquosus est , sed & quia pulpofa ac naturaliter tenerrima narium membrana (veluti macerata per assiduam cachexiam) nequit sanguinem transudaturum retinere. Porro hæc omnia mala esse quis dubitaverit ?

Qui quartanâ corripuntur , non admodùm convulsione tentantur. Quòd si priùs corripiantur & quartana succedat , liberantur , aph. 70 sect. 5. Sicut febris tertiana saluberrima habetur , ita & præsertim quartana ; eæque febres rarò funestæ sunt nisi summè degeneraverint acciderintvè decrepitis senibus vel hominibus aliâ de

causâ debilitatissimis ; imò quartana , teste Hippocrate , ab aliis magnis malis liberat , sicut jam suprâ notavimus. Quod pertinet ad epilepsiam mediante quartanâ curandam , nihil simile unquàm me observasse fateor. Sed mihi videtur facile concipere homines quartanâ tentatos donari fibrarum laxitate nimia , quàm ut convulsionibus tunc corripiantur ; eâquè non solum ratione epilepticos superveniente quartanâ liberari posse , sed & quia febrilis actio capax est diruere illius morbi causam humoralem nervis adhærentem. Propterea de hoc eventu nullus dubito , tùm imprimis propter fidem quæ debetur Hippocrati , cui & plurimi Medici domesticis observationibus suis ducti adhæserunt post Celsum & Galenum. Mihi tamen apparet similem curationem nequaquàm accidere posse , si epilepsia penderet à vitio quodam cerebri topico , qualis v. gr. foret ossificatio falciformis processûs duræ menynge , aut aliud quidpiam vitium ejusdem naturæ. Undè ut opinor , talis curatio spectat ad epilepticos qui ita afficiuntur propter lentam atrabiliaremquè humorum qualitatem , sicut ipsemet Galenus scripsit in commentario ad hunc aphorismum. Tunc enim valet coctio & excretio febrilis resolvere hos humores , ideòque nervos ab eorum irritatione tenaciori liberare. De cætero plures passim leguntur historię malorum aliorum chronicorum sæpè mirabilium quæ fugata fuerunt mediante febre quartanâ. Plures casus referuntur in commentariis Gerardi Wanswieten ad § 754 , quorum duos sequentes exempli causâ hîc retulisse non displicebit. Prior respicit dolorem humeri dextri inveteratissimum quem ipse viderat superveniente quartanâ evasisse ; qui dolor redierat curatâ febre per corticem Peruvianum , sed qui deindè sanatus fuit à quartanâ de novo superaccidente & patienter toleratâ. Alter casus spectat celeberrimum olim de la Hire , de quo in actis Parisinis anni 1728 ,

qui mediante quartanâ exantlatâ curatus est palpitationibus cordis molestissimis, ab illisque deindè immunis vixit ad usquè septuagesimum-octavum ætatis suæ annum.

§. III.

FEBRES ERUPTIVÆ.

FEBRES eruptivæ dicuntur eæ febres continuæ quarum naturalis est ut semper producant quamdam criticam eruptionem sui generis, quâ mediante contingat sanguinis depuratio singularis & necessaria: deindequè altera nonminùs necessaria depuratio, veriùs appellata nomine *expulsionis*.

Non ibi examinabimus omnigenam speciem eruptionum febrilium. Omittimus eas quæ nihil aliud sunt nisi accidentale febrium phænomenon symptomaticum, ut adhæreamus brevè duntaxat expositioni præcipuarum febrium eruptivarum quæ perennem & sibimetipsi semper similem crîsim faciunt; quarum aliæ producuntur à seminio indigeno: qualis est porcellana, scarlatina, rubeola, pemphigus, &c. aliæ verò pendent à miasmate exotico & nunquàm apud nos spontaneo: qualis est pestis & variola.

In omnibus illis febribus eruptivis videtur adesse deleterium quoddam miasma capax excitare febrilem reactionem, tandiù duraturam quandiù illud mutatum non est & separatum. Mediante itaque reactione illâ febrili miasma illud (seu sponte gignitum sit, seu insitum per viam contagionis), sic subigitur & præparatur ut deindè valeat unionem subire cùm aliquo humore gerente vices alicujus ut ita dixerim involucris, posteaquè critico vitæ nisu separari à sanguine, & exportari unà cùm eodem humore à quo involvitur. Quæ dùm fit prædicta mias-

matris eruptiva separatio , notandum est ab unocumque semper affectari viam eandem quasi per selectum ; quia illud unitum est peculiari humori viam sibi propriam transgredienti & properanti ad congruum emunctorium , in quo deponitur secundariam aliam subactionem ibi passurum.

In his ergò febribus quibuscumque duplex distinguenda est epocha specialis. Alia nempe quæ respicit tempus febrilis laboris quo mediante deleterium existens debet præparari ad separationem & reipsâ separatur : alia verò , tempus per quod eadem materies , vi febris separata & criticè erupta , debet disponi ad expulsionem & reipsâ expellitur. Quorum duorum temporum prius à sydenhamo congruenter vocatum est in variolis nomine *separationis* , posterius verò nomine *expulsionis* : quæ denominatio singulis perindè eruptionibus sic congrua est , ut nulla congruentior.

Cùm enim in omni febre eruptivâ materies non decidat è corpore viventi per ipsammet eruptionem criticam , sicut evenit in criticis humorum evacuationibus , sed ea duntaxat deponatur alicubi , de novo ibidem elaboranda : abhinc spontè resolvitur mediam tantummodò partem naturalis operis factam esse ubi eruptio seu separatio peracta est , aliamque deindè partem absolutum iri per ipsammet humoris erupti expulsionem ; & consequenter , sicut in febribus quibuscumque eruptivis agnoscitur labor duplex , ita & duplicem in illis morbum agnoscendum esse : primum unum , alterum secundarium.

Attendatur ad quamcumque eruptionem febrilem , v. gr. , ad variolas. Nonnè , sicut eruptio pustularum est vera crisis primarii laboris febrilis , ita & earum suppuratio (posthàc absolvenda) constituit crism febrilis laboris secundi , proindèque alterum circuitum morbosum propriis symptomatibus suis desig-

natum? Undè apparet quòd in utroque bifidi hujus morbi circuitu sit quoque distinguenda triplex epocha, sicut in aliis febribus, cruditas videlicet, coctio & crisis; quæ singulæ propriis suis signis instruantur, ex quibus liceat eruere singularum diagnosim & prognosim.

In faciendâ autem consideratione diagnosticâ febrium eruptivarum in utroque earum circuitu, sicut & in quocumque stadio circuitûs alterutrius, attendere oportet quòd, præter generalia febris signa sicut & illa quæ cuilibet eruptivæ febri propria sunt, semper distinguendus sit character constitutionis ægroti ut & constitutionis popularis; aliquid enim semper diversum magisque vel minùs notabile subapparet prout constitutio datur catharralis, vel inflammatoria, vel biliosa, vel atrabiliosa, vel pituitosa: proindèque aliud quid est eruptivâ febre tentari vere vel autumnò, aliudque pariter in ætate variâ. Habent siquidem diversæ aliæ febres diversam relationem cum diversis constitutionibus & ætatibus, quæ diversorum symptomatum insolitorum capax est atque ideò diversorum pravorum eventuum. Nam, ut legitur aph. 34 sect. 2, *in morbis minùs periclitantur, quorum naturæ, & ætati, & habitui, & anni tempestati, morbus cognatus fuerit, quàm quibus in horum aliquo non cognatus fuerit.* Non aliâ de causâ, præter hanc cognitionem ejusve defectum, sæpè contingit ut in morbis eruptivis effervescentibus contingant petechiæ aut hæmorrhagiæ pessimæ, & ut saltem tantoperè laboriosa sit & imperfecta separandi miasmatis eruptio, sicut & expulsio erupti: ex quibus duâbus naturæ operis bona prognosis vel mala dependet; bona nimirum si facilè absolvantur, mala si difficulter.

His principiis generalibus delibatis de naturâ & genio febrium eruptivarum, nunc restat ut quædam exempla tyronibus expo-

nantur, ad hoc ut eorum principiorum applicatio ipsis elucescat. Ibi ergò brevis detur notitia febrium eruptivarum apud nos frequentiorum, incipiendo ab iis quæ agnoscunt miasma indigenum, prætereàque à mitioribus inter illas.

P O R C E L L A N A.

PORCELLANA, gallicè *porcelaine*, est affectus eruptivus in quo fiunt efflorescentiæ lenticulares pollicaresve aut majoris diametri suprà thoracem & brachia aliasque partes tectas, colore roseo donatæ, vix eminentes nec pruriginosæ, magis vel minùs copiosæ, febrili motu vix percipiendo ut plurimùm productæ & facili promptâque exhalatione delendæ intrà paucos dies. Quæ efflorescentiæ verno præsertim tempore solent enasci apud florentes & biliosos, imprimisque apud juvenes qui, ex aph. 20 sect. 3, sunt magis tunc obnoxii cutaneis affectibus.

Eæ maculæ eruptivæ diætâ tenui ac refrigerante facilè ut plurimùm tolluntur, nec ullo modo sunt periculosæ. Undè patet eas non procedere à principio valdè acri nec copioso, sed facilè regenerando si victus paulò calidior fuerit.

Quandoquè etiàm similes propemodùm maculæ efflorescunt sine febre sensibili apud quosdam homines occasione peculiarium corporum in stomacho receptorum, qualia sunt chelæ cancrorum aliave animalcula testacea. Quæ efflorescentiæ spontè evanescunt peractâ eorum assumptorum subactione, & quæ fortè non pendent nisi à punctiunculis quas stomachus experitur à tenuissimis testaceorum spinis.

Non rarò quoque observantur efflorescentiæ similem formam referentes, sed parumper tumentes & variegatæ, quasi ab aculeis urticarum productæ, valdèque pruriginosæ & in apice aliquandò rubentes. Quæ, sicut præcedentes, gignuntur à materie

perspirabili acriore, ideòque periculosa sunt si repercutiantur: sed quæ brevi ut plurimum tempore solent deleri.

Huc etiam licet revocare sudamina, gallicè dicta *échaubou-lures*. Ea sunt exanthemata milii granis non majora & phlictae-noidea, subito in cute efflorescentia, conferta, & ut plurimum fugacia, quibus sæpius occupantur dorsum, pectus, brachia & crura, præcipuè apud infantes & juvenes: tum apud natu majores sed temperie delicatâ & fervidâ donatos; & quæ verno æstivoque tempore præ aliis accidunt, non sine dolore cutis aliquandò satis acri & pungente, verum sine periculo.

P E T E C H I Æ.

PETECHIÆ seu peticulæ, gallicè *pourpre*, sunt maculæ subro-tundæ, pulicum moribus similes, coloris purpurei, quandoquæ coloris lividi aut atrii, sine tumore & pruritu aliquandò appa-rentes in decursu febrium continuarum. Quæ maculæ faciei ut plurimum parcent, maximèque aggredi solent dorsum, pectus, brachia & crura.

Eæ maculæ creantur à fragmentis rubri sanguinis per febrim fortiter acti, & ad corporis peripheriam explosis, quæ aliquandò sunt oneratae miasmate quodam critico; sed quæ sæpius produ-cuntur à febre valdè putridâ & fortiter sæviente, vel à mitiori febre in casu calidioris regiminis & medicationis.

Idcirco aliæ petechiæ distinguuntur benignæ & criticæ, quæ scilicet erumpunt in fine febrium putridarum ideòque cum signis criticis bonis, & quæ indicant naturam victricem esse. Aliæ verò accidentales appellandæ sunt & merè symptomaticæ, quales nascuntur tempore incrementi febrium putridarum, sæ-pèque in ipsismet variolis & morbillis cum labe biliosâ & putridâ concurrentibus, & quæ manifestò indicant magnam sanguinis teneritudinem,

teneritudinem, naturamque sub putrore maligno & gangrænofo fatifcentem.

M I L I U M.

MILIUM, purpura etiam miliaris dictum, gallicè *le millet*, *le pourpre blanc*, cognoscitur pustulis parvulis, rubellis, milii granis formâ similibus & per cutem sparsis, quæ citò abeunt in pustulas phlictænoideas sero repletas, grano milii æquales, mox pellucidas, mox opacas; quæ febribus superaccidunt tum in earum augmento, tum in declinatione, sæpiùsque in priori casu; & quæ videntur præsertim accidere apud ægrotantes calidiori medicatione & diætâ utentes, nimis tegumentis coopertos, coactisque sudoribus diffuentes, sicut præcipuè observatur apud pauperes, imprimisque apud puerperas.

Raritas vestigiorum milii apud præscos scriptores videtur indicare eos in febribus curandis sapientiùs se gessisse, quàm sæpè factum est temporibus ab Harveio ad nos elapsis.

P E M P H I G U S.

PEMPHIGUS seu febris pemphigoidea, febris vesicularis Neotericorum, gallicè *fièvre vésiculaire*, est affectus febrilis eruptivus, in quo post aliquot dies efflorescunt bullæ seu vesiculæ magis vel minùs latæ, per cutem dispersæ præsertim suprâ truncum, & sero flavo turgidæ, aliquandò valdè numerosæ & latæ, tum hærentes basi rubræ ac dolenti: & quarum pelliculæ, facile decidentes, relinquunt post se nudas cutis plagas, dolentes, ulcerosas quibus succedunt crustæ haud absimiles à crustis scabiosis.

Prædictæ vesiculæ creantur à materiâ acri, subtili & ferosâ, vi febris explosâ ultrâ cutem sub epidermide quam in bullas attollit, non nihil inflammando cutem subjectam, sicut ali-

quandò observavi, sed præsertim tempore æstivo, in constitutione biliosâ anni 1782.

Satis dolens & longus mihi visus est ille affectus in secundâ suâ stasi, seu tempore expulsionis dicato, sed minimè periculosus. Rarus quidem observatur, sed nequaquàm novus est ut aliqui putârunt. Nam, lib. 6 de morb. vulg. sect. 1 n^o. 17, memorantur febres *pemphigoides* dictæ, quas flatulentas latinè vocaverunt traductores sicut & varii commentatores, huc forsan adducti & inclinantes propter subtilitatem quæ in his vesiculis objicitur dùm erumpunt. Quæ febres pemphigoides, si non fuerunt sufficienter descriptæ à veteribus, ut congruant cum allatâ descriptione factâ de visu, nihilominus apparent ipsi valdè affines propter subtilitatem effluvii vesiculas elevantis, quod aëreum & flatulentum esse dixêrunt veteres Medici. Galenus tamen, notante Foëssio in notis ad numerum citatum lib. 1 epid., plurimique alii scriptores (ex Gorræo in definit. med. ad verbum *tò pemphigodes* febres), incerti manserunt circa febres illas. Sed hæsitatio hæc forsàn exindè orta est, quòd rarus fuerit hic morbus in praxi eorum Medicorum, & quòd bullæ non sint semper æquè frequentes, æquè latæ, æquè serosæ, æquè dolentes & ulcerosæ in stadio suo secundo, nec semper æquè crustosæ omnibus in ægrotis. Hæc saltem ita mihi apparuerunt, quantum discere potui per domesticas observationes. De cætero, non vidi gravia symptomata in hoc affectu, præter dolores pruritufque acres & incommoditatem squaloris purulenti, quæ disruptis vesiculis accidunt & quæ ultrâ hebdomadem unam & alteram aliquandò durare observavi.

R U B E O L A.

RUBEOLA, aliter vocata nomine morbillorum, gallicè *la*

rougeole, cognoscitur papulis pulicum morsus æmulantibus, nonnihil asperis, suprâ totum corpus disseminatis, quæ in squammulas furfuraceas abeunt tempore expulsionis, & quarum separationi seu eruptioni antecedit febris catharralis, cùm tussi valdè raucâ & siccâ, necnon sternutatione frequenti, pruriginosâque lacrymatione.

Hic morbus eruptivus infantes præsertim impetit, quandoquæ adultos & his seniores. Ille ut plurimum epidemicè grassatur, tempore præsertim verno ut & autumnali; eoque omnes fermè homines semel in vitâ suâ laborant, sicut de variolâ notum est.

Singulares papulæ quibus cognoscitur rubeola non videntur federe in corpore reticuloso cutis sicut postea dicemus federe variolosas pustulas, sed in ipsâmet cute circâ fines vasculorum exhalantium, undè olim reponebantur in glandulis miliaribus dictis & merè imaginariis.

Earum eruptio peculiarem meretur descriptionem sicut & expulsio. Quæ ut habeatur, attendendum est ad earumdem ortum & progressionem quousquè dispareant. Sic autem procedunt.

Primo die ægrotantes rigent horrentque, aut calent & frigent alternatim, insensibiliter febricitando sicut sæpè fit in catharrois affectibus dùm incipiunt.

Secundo die febris est stabilita, hancque concomitantur ægritudo vehemens, sitis, inappetentia, lingua alba & humida, tussicula sicca & singulariter rauca sonoraque, gravedo capitis & oculorum, somnolentia perpetua, constans humoris aquei stillicidium ex naribus oculisque, quæ lacrymæ certissimum sunt signum rubeolæ futuræ. Prædictis accedunt sternutatio frequens, tumor palpebrarum paulò antè eruptionem apparens, tum sæpè vomitus, vel & diarrhæa quæ apud dentientes infantulos plerumquè viridis est.

Diei tertiæ decursu , omnia hæc symptomata sæviunt , imò & ingravescent usquè ad eruptionem , quæ die quartâ tandem contingit & absolvitur intrâ diem sequentem.

Hâc quartâ die (quandoquè & tantùm quintâ) prodeunt suprà frontem & faciem maculæ parvæ , rubræ , pulicum morsibus similes , numero ut & magnitudine sensim augescences. Eæ conflantur ex parvulis papulis suprà cutem elevatis , quarum protuberantiam digito levi potius deprehendere licet quàm acie oculorum. A facie quam solam statim occupant , maculæ illæ propagantur ad pectus , ventrem , crura & brachia , ubi tandem conspiciuntur latæ rubræque , nequaquam superantes cutis superficiem. At notandum est quòd eæ maculæ in adultis calidiori regimine utentibus soleant primò livescere , deindèque nigrescant.

Factâ eruptione , symptomata non perindè deliniuntur ac in variolis. Proptereà , etiamsi die quinto peracta sit separatio illa , nullusque tunc vomitus jam supersit , nihilominùs tussis intenditur ut & febris , tùm spirandi difficultas , simul perseverante defluxione in oculos , somnolentiâque & inappetentiâ.

Die sextâ , aut circiter , incipit expulsio. Ideòque frons & facies aprescunt emorientibus papulis ruptâque cuticulâ ; sed in reliquo corpore supersunt maculæ adhuc latissimæ , rubentesque admodùm.

Septimâ die sensim papulæ ubiquè delentur ; adeò ut die circiter octavâ evanescant in facie , vixquè reliquo in corpore quædam permaneant.

Die nono , maculæ evanidæ facescunt in farinam quamdam & squammulas , eoque tempore febris , difficultas spirandi nec non tussicula augescunt pro tempore , secundùm expulsionis celeritatem & complementum , magis vel minùs longo.

De cætero, quamvis rubeolæ progressio soleat esse cõformis præcedenti descriptioni, imò & quandoquæ sævior, observandum tamen est dari rubeolas aliquot benignas quæ nonnisi paucos per dies lecto accingant infantes, quæ tantum maculis rubris sese produnt ferè sine febre & tussiculâ siccâ, & quæ brevi tempore sanantur per vim naturæ solius; quod præsertim sporadicis rubeolis competit.

Periculumnè reprehensionis mihi fecerim, dicendo quæ mihi apparent quoad causam materiale rubeolæ? Ea mihi videtur consistere in seminio quodam subtili quod apud Europeos, aliasque multas gentes, spontè gignitur in constitutionibus præsertim sanguineis aut catharralibus, forsan occasione humoris perspirabilis retenti. Quod deleterium (mediate febre quam accendere valet in homine rubeolam minimè passo), sic subigitur & præparatur ut tandem uniatur subtilissimæ portioni cruoris, deindèque nisu critico naturæ depellatur ad cutem unà cùm humore perspirabili. Sed illud quamdam ibi stationem experiri, quia (leviter irritando cutem ut & varias ejus propagationes gutturales, laryngeas & pharyngeas), ibidem parvulas efficit stases veluti erysipelatosas ex quibus deindè expellitur mediante secundo labore; & demùm eo superato labore illud abire in miasma contagiosum, naturæque fixæ ut opinor & acerrimæ, capax eandem omninò affectionem producere apud prædispositos, dùm ab aliis impunè accipitur, impunè quoque eliminandum unà cùm variis excrementitiis humoribus. Sequens observatio mihi videtur hanc firmare opinionem. A viginti annis in hâc urbe vidi quamdam Dominam, tunc proximè parturam, cujus septem infantes epidemicâ rubeolâ tentati erant, in quibus tractandis illa omnem curam & diligentiam suam diu noctuque adhibebat. Inter eos labores ea Domina felici partu

enixa est infantulum maculis rubeolæ omninò interstinctum, qui hoc in statu remansit sicut ordinarium est in rubeolâ, & qui hûc usque benè valens vixit omninò immunis ab hoc morbo, quamvis plures frequentaverit eâ labe infectos. Undè judicare licet hunc foetum rubeolam contraxisse in utero matris suæ, proindèque sanguinem maternum fuisse imbutum miasmate morbilloso, quin tamen mater illa exindè quidpiam mali experta fuerit.

Prædictis de naturâ & genio rubeolæ delibatis, facile est ejus diagnosim instituere. Quoad prognosim, satis erit dixisse hunc morbum rarò exitialem esse, nisi quandò gravissimis turbatur symptomatibus & eruptio bellè non procedit; tùm quandò varii subsequuntur affectus ob defectum congruæ expulsionis.

S C A R L A T I N A.

SCARLATINA, seu febris rubra aut febris scarlatina, gallicè *fièvre scarlatine*, *fièvre rouge*, est morbus febrilis pueros præsertim infestans autumnò, ut & in fine hyemis, qui sæpè nuncius est variolæ paulò postea subsequaturæ.

Cognoscitur hic morbus eruptivus exanthematibus rubris, ad rubeolam approximantibus, sed crebrioribus latioribusque & majori rubore donatis, nec perindè uniformibus; sed quæ in squammulas farinosas abeunt sicut rubeola, & prætereà integram manuum epidermidem aliquandò evellunt, quasi serpentum exuviae.

Talia exanthemata succedunt febri continuæ satis vehementi, secundâ aut tertiâ morbi die. Interim, dùm effervescent, nonnulla apparent rubeolæ symptomata, qualis est tussis sicca oculorumque lacrymatio; eorumque genium tale est ut ea quandoquè bis aut ter erumpant successivè, & toties successivè evanescant.

Plerumquè hic morbus epidemicè grassatur unà cùm morbis catharralibus, imò sæpè concomitatur anginas catharrales adultorum, illeque videtur esse signum correctæ biliosæ constitutionis, simul & ineuntis inflammatoriæ.

Causa ejus materialis consistit in miasmate aliquo peculiari quod in sanguine ad inflammationem inclinante generatur, ex quo separatur & exportatur ad cutem motu febris critico, undè posthâc exhalatur. Miasma illud videtur esse contagiosum, nisi forsan congruentiùs dixerim morbum hunc eruptivum epidemicè aliquandò potiùs grassari propter generalem dispositionem hominum, quàm propter aliquam contagionem. De cætero, contagium illud non est æquè certum ac variolosum aut morbillosum, nec morbus ab eo natus funestus esse solet, nisi in casu metastasis materiæ expellendæ; tunc enim eadem ferè mala suboriuntur, ac si retrocessisset rubeolosum miasma.

His expositis de causâ & moribus frequentiorum febrium eruptivarum Nostratum, nunc agendum superest de febribus eruptivis exoticis & apud Europeos per contagionem grassantibus.

P E S T I S.

PESTIS inter febres eruptivas annumeratur, quia ejus character desumitur ex bubonibus qui in eâ æquè necessariò erumpunt ac pustulæ in variolis. Nulla verò alia febris nomen pestis meretur eò quòd valdè maligna & lethalis sit; nam observârunt Medici pestibus curandis addicti, ipsammet pestem quandoquè benignam esse.

Dicimus verò pestem esse febrem eruptivam exoticam, eò quòd causa ejus tantummodò habeatur in miasmate peregrino, ab Arabibus ad nos importato. In nostrâ quidem Europâ aliquandò nascuntur febres epidemicæ (imò & sporadicæ) tam

malignæ, ut pestilentes dicantur propter maximam mortium crebritatem. Sed ii morbi pestilentes nuncupati semper differunt à peste propriè dictâ, in quantum unica tantummodò pestis fit, designata scilicet bubonibus necessariò erumpentibus, dùm totidem vocantur pestilentes morbi apud nos, quot sunt morbi epidemici, adeò maligni, ut ægrotantes plures è medio tollantur, quàm sani evadunt.

De miasmate pestifero alibi pauca dicentur ubi de inhalatione. Non ampliùs immorabimur circà morbum, quem nunquàm vidimus & quem, ut speramus, nunquàm sumus visuri. Jam ergò agamus de variolâ quæ, quamvis exotica apud nos, nihilominùs ibi frequentissimè grassatur.

V A R I O L A.

VARIOLA seu variolæ, gallicè *petite vérole*, minimè cognita fuit ab antiquis. Novus morbus est de genere eruptivorum, quì vigentibus bellis *Croisades* dictis, sæculo Mahometi allatus est ex Asiâ in Europam, ubi exindè variola regnavit nunquàm desitura, quia venenum à quo pendet in ipsâmet ejus propagatione regeneratur.

Commenta varia varii scriptores somniati sunt circà venenum variolosum, quibus enarrandis tempus non terendum est. Dicimus illud esse quoddam virus tenuissimum (non tamen volatile, propter ejus adhæSIONem intimam cùm humore admodum fixo), communicatione duntaxat immediatâ contagiosum, ferèque tantum ergà eos homines qui nondum fuerunt eo morbo tentati. Quod virus in homine contagionis suscipiendæ capaci variè pullulascit febrem depuratoriam excitando, cujus effectù miscetur cùm humoribus demittendis ad cutem ubi criticè deponitur, ibidem secundo labore febrili mutandum, deindequè ab inc expellendum.

Falsum

Falsum est homines omnes nasci cùm eo veneno. Illud, ut diximus, omninò peregrinum est. Sed novit ipsemet vulgus omnes homines (vigesimâ eorum parte ad summum exceptâ), eo morbo semel in vitâ suâ tentari; eosque per ipsummet hunc morbum sic purgari dispositionibus quibuscvis ad eum de novo contrahendum requisitis, ut diù dubitatum fuerit utrùm aliquis iterùm variolis laboraverit.

Tutamen continuò quæsitum adversùs hanc calamitatem haberetur in exactâ fugâ infectorum, si ea possibilis foret sicut ergà pestem. Sed melius ac tutius antidotum consistit in ipsis variolis per insitionem contractis. Sic censendum, quia semper morbus ille multò mitior indè generatur, illeque recidivam perindè avertit, ac variolæ per contagionem accidentalem susceptæ.

Definienda videtur variola febris exanthematica seu eruptiva, plerumquè epidemica, sæpè tamen sporadica, quæ verno tempore præsertim familiaris est, & cujus character consistit in eruptione pustularum inflammatarum deindèque necessariò suppuratarum, & æquantium unius circiter pisi magnitudinem.

Agnoscentur differentiæ plures. Aliæ variolæ discretæ vocantur, aliæ confluentes: malignæ aliæ, aliæ benignæ. Sunt discretæ quandò pustulæ rariores, valdèque distinctæ ab invicem. Confluentes verò, si ita proximæ ut duæ vel tres simul unitæ confluant, saltem in facie, quæ hoc malo præsertim excrucietur. Et hæc distinctio solemnis est apud Medicos, propter diversitatem symptomatum necnon & prognosis, sicut mox annotabitur. Benignæ demùm aut malignæ variolæ appellantur, ratione symptomatum in utrâque specie supradictâ pejoribus aut benignioribus.

Quocumque tempore anni grassantur sporadicæ variolæ earum-

que beneficio germen illud perenne fit; nunquàm enim defunt homines apti ad eam contagionem hìnc indè fufcipiendam. Verùm quandò constitutio popularis fanguineo-inflammatoria aut faltem catharralis regnat, tunc folent variolæ graffari populariter; tuncque præ majori numero ægrotantium, ficut & propter nimiam aliquot individuorum aptitudinem, videre eft plurimas malignas variolas, dùm in præcedenti cafu benignæ funt ut plurimùm.

Pari ratione, quandò viget biliofa constitutio (qualis hìc fuit æftiva & autumnalis, anno 1783), variolæ tunc graffantes benigniores exiftunt, ficut reipsâ accidiffe Bisuntii notavimus. Quæ fcilicèt variolæ eos dumtaxat oppugnabant qui peculiari de causâ erant ad inflammationem proni; dùm homines temperamento biliofo gaudentes laborabant febribus biliofis. Sed prout confirmata fuit hyems & constitutio inflammatoria generalius diffeminata, variolæ incœperunt effe & frequentiores & minùs benignæ. Dispositionem inflammatoriam requifitam effe ad contrahendum morbum qui reipsâ eft inflammatorius, & qui in fuppurationem criticam terminari debet, nequaquàm mirum eft. Sed facilè quoque intelligitur nimium gradum dispositionis inflammatoriæ infenfum effe utrique charaèteri variolarum, nempè ergà earum qualitatem inflammatoriam, ut & ergà fuppuratoriam. Nec aliundè accidit, ut omnis dispositio capax gignere inflammationem vulgarem spuriam noceat variolis, nifi quia metuenda eft pufthularum spuria inflammatio, fuppuratioque spuria & gangrænofa: vel & earumdem charaèter crudiffimus, vixque fuppurandus. Primus cafus refpicit eos ægrotos qui verfùs inflammationem putridam vergunt: pofterior verò eos qui tendunt ad inflammationem œdematofam. Quâ ratione etiam obfervavi fcrophulofos femper laborare variolis pigerrimè erum-

pentibus & suppurantibus. His de naturâ morbi variolosi debatis, nunc ejus progressio sermone brevi adumbranda incumbit.

Tres veluti phasēs licet distinguere in progressu morbi variolosi 1°. præludium seu ebullitio; 2°. eruptio seu separatio; 3°. suppuratio seu expulsio, quæ & exsiccationem pustularum comprehendit. Vel secundum Sydenhamum agnoscenda sunt duo dumtaxat tempora, separationis nempe & expulsionis. Prius excurrit ab invasionē febris usquē ad pustularum elevationem inclusivē: posterius, ab ipsâ suppuratione usquē ad finem morbi. Distinctio Sydenhami sanē quidem medica est; sed mihi apparet facilius vobis distinguenda esse symptomata, si variolas consideraveritis sub aspectu triplicis epochæ mox assignatæ.

Præludii seu ebullitionis symptomata hæc sunt; nempe lassitudines, febris, dolor capitis somnolentus, lumbago, vomitio, imò quandòque in infantibus convulsiones, sed quæ non sunt ominosæ. Hæc symptomata vigent per tres dies, aut ferè ad quatuor: eaque futuras præsertim variolas indicant si talis morbus grassetur, nec ægrotans unquàm eo morbo laboraverit.

Eruptio pustularum seu altera variolosi morbi epocha, spectari potest tanquàm ejus crisis prima, quandòquidem illa invehit separationem principii morbiferi. Ea inchoatur abeunte ut plurimùm die tertio, quo tempore cutis omninò erysipelatosæ videtur si futuræ sint copiosæ pustulæ; dùm in casu contrario, ea ex albo variegata apparet. Eruptio complectitur tres dies. Primâ die facies præprimis occupatur: secundâ, truncus: tertiâ, extremitates. Eâ mediante credimus variolosum miasma paucò sanguini critico admixtum deponi in reticulo cutaneo sub epidermide, (non parcendo internæ ductus cibarii), quandoquē & hinc indè factis malignis eruptionibus in superficie

viscerum. Dùm hæc fiunt, solent ægrotantes habere alvum adstrictam, si variolæ discretæ fuerint; sed in confluentibus eruptio solet stipari magno ptyalismo apud adultos: diarrhæa autem apud infantes.

Prout procedit eruptio, (& prout competit non solum peripaso sed & crisi jamjam inchoatæ), solent symptomata omnia mitescere. Adeò ut in benignis variolis febris omninò desinat eruptione absolutâ; dùm in malignis paulisper dumtaxat tunc ut plurimum relaxatur.

Erumpentes pustulæ apparent sub formâ punctiuncularum rubrarum & pyramidalium quæ sunt verissima inchoamenta totidem parvularum veluti phlegmonum criticarum: eæque sensim inflammantur & augescunt usquè ad diem septimum, computando ab invasione. Per id tempus, dolor interim fauces infestat, illeque augetur unâ cùm pustulis grandescentibus, quæ tunc incipiunt albescere circa apicem, dùm basis & intervalla earum tinguntur colore roseo. Et hic est terminus perfectæ separationis, in quâ licet conspiciari proxima dispositio ad futuram suppurationem.

Suppuratio itaque, seu tertia epocha variolarum incipit ab eruptione peractâ, septimo circiter die morbi totius; primum in facie, sicut eruptio: deindè in trunco: postea in artubus; & tunc facies ut & artus mirabiliter intumescunt, alioquì pessimum signum foret. Suppuratio ita procedens absolvitur spatio trium dierum si discreta & benigna variola sit, tuncque faciei tumor sensim recedere incipit, decimo nimirum die vel undecimo. Sed suppuratio tardior est ut & faciei detumescentia in variolis confluentibus, in quibus labor suppurationis sæpè ad vigesimum usquè diem prorogatur.

Dùm fit pustularum suppuratio, eæ magis magisque albescunt

pedetentim , sensim simul exsurgente vesiculâ liquore diaphano & subrufo repletâ , quæ die nono vel undecimo pus verum jam continet in genere discreto : tardiùs in confluente. Interim, prout pure replentur pustulæ , basis earum inflammata tensa & tumens albescit sensim ac tandem resolvitur , eaque detumescit ubi suppuratio peracta est ; primò nempè in facie , deindè in artubus , in quibus prædicta intumescencia diutiùs manere solet quàm alibi. Quæ phœnomena suppurationis vigent cùm febre majori , sicut proprium est unicuique suppurationi copiosiori ; & durat hæc febris usquè ad pustularum exsiccationem.

Itaquè exsiccatio seu ultima expulsionis pars, (quæ & pro quartâ epochâ variolarum spectari posset) , stipatur febre multò minori , quandoquè nullâ. Illa incipit statim ab absolutâ suppuratione , decimò scilicet vel undecimo die in variolis benignis : tardiùs in malignis. Ut naturale est , ea primò apparet in pustulis primùm suppuratis , videlicet in facie (quæ hoc tempore sicut in aliis , habenda est pro variolæ thermometro) ; eaque decimo-quarto die terminatur , sic ut sæpiùs pustulæ faciei jam hoc die funditùs pereant , dùm pustulæ manuum suaptè pertinaciores , albæ adhuc & recentes manent per unum alterumve diem, nec antea rumpuntur. Ita procedente exsiccatione generali pustularum , urinæ purulento copioso sedimento refertæ sunt , & aperitur alvus hucusquè ut plurimùm dura , interimquè prædicta exsiccatio sæpiùs fit absquè puris effluvio sensibili & quidem utiliter ; sed quandò res aliter se habet , solet febris diutiùs sævire , majusque impendet foveolarum vultûs periculum. Tandem verò elapsis squammis crustosis siccatarum pustularum , remanent aliquandiù maculæ rubræ quæ ut plurimùm elevatæ sunt si nullæ successuræ sint foveolæ ; sed si planæ fuerint , foveolas relinquunt magis vel minùs numerosas & notabiles.

Benignæ variolæ, seu discretæ seu confluentes, procedere solent cùm signis suprâ memoratis, eæque tunc satis feliciter terminantur dicunturque regulares. Sed si eæ malignæ fuerint, alia signa & quidem pejora caput extollunt. Primò quidem sæpè contingit post variolas copiosiores ut varii decubitus, (iique aliquandò multiplices) enascantur variis in partibus ex residuo pure varioloso, quo in casu adest non rarò febris magna & inflammatoria. Sed pejora adhuc mala oriuntur ab ipso tempore ebullitionis, nempè delirium, eruptio nimis præcox & tumultuosa, petechiæ malignæ, hæmorrhagia per nares aut pulmones, mictus cruentus, urinæ suppressio, diarrhæa in genere discreto, cessatio ptyalismî in confluentibus, nigrescentia pustularum, tùm earumdem terribilis delitescencia quæ mortem plerumquè citissimam accersit, vel & quandoquè tardius supervientem. Hoc ultimum observavi anno 1783, in fine hyemis, apud juniorem puellam septennem cujus historia hîc fortè non displicebit. Nempè duodecimo die morbi, quo jam valdè progressa erat pustularum suppuratio, pustulæ omnes momento citiùs evanidæ factæ sunt & funditùs deletæ, adeò ut cutis omninò plana remanserit, eaque duntaxat ex albo & flavo variegata. Insuper, facies simul planè detumuit unà cùm artubus, & illicò incoepit copiosissimus fluxus urinarum turbidularum, incredibiliter foetentium. Tùm primis subindè diebus repentinæ factæ sunt collectiones metastatici puris ferè circà omnes artuum conjunctiones, haud mutato colore cutis: sed sæviente febre maximâ, doloribusque acerrimis. Quamvis ii recessus purulenti quantociùs aperti fuerint, nihilominùs evenit ut omnia & singula ossa articulationum sic affectarum, consumpta & erosa fuerint à sphacelo carioso ac nigerrimo; adeò ut quotiès exerceretur vel levis motus artuum (etiam per simplicem eorum

transpositionem manu custodum factam) , toties membra illa penitus luxarentur. Quod mirum , irritis tot malis non perit misella , nisi sexagesimo die horrendi hujus morbi !

Quod pertinet ad prognosim variolarum sanè illa admodum ominosa est , præsertim quandò epidemicæ sunt , tum imprimis apud adultos ; imò adhuc periculosior apud divites & urbanos , propter causas ex eorum vivendi ratione desumptas. Secundum æstimationem observatorum comperitur septimam circiter partem ægrotorum hoc morbo perire , quæ maxima quidem est calamitas. Notavitque Sydenhamus majorem eorum numerum interire octavâ die in variolis discretis , undecimo in confluentibus. In primo casu , plerumquè mors debetur delitescentiæ , ex quâ oriuntur deliria & agitationes enormes , à quibus mors accersitur paucissimarum horarum spatio ; in secundo autem , videtur mors procedere ex suppuratis pustulis interioribus ; undè sæpiùs ægrotans derepentè emigrat ad plures , eo instanti quo amici ejus jam de salute futurâ minùs sunt solliciti.

Cùm igitur tam exitiales sint variolæ vulgares , dolendum est quòd non ubiquè accepta sit earum insitio , quandoquidem vix perit millesimus eorum qui hâc arte variolis laborant. Succedit præsertim hæc praxis in infantibus sanis ad minimum triennibus , & qui emolliente tantùm victu præparati fuerunt per aliquot duntaxat hebdomades , si roseus color vultûs eorum indicaverit eos inclinare versùs inflammationem , quantum saltem inclinare possunt ; si verò pallidi viderentur , paululumque vergentes ad constitutionem cachecticam , tunc forent leviter purgandi paulò antea , tum nonnihil alterandi mediante victu euchymo & anticachectico. Melior enim actualis sanitatis conditio ad subeundam variolarum insitionem mihi videtur esse media inter inflammatoriam & pituitosam. Qui autem forent

exactè pituitosi, non contraherent variolas nisi frigidiores, difficiliùsque proindè expellendas: dùm è contrà variolis atrocioribus corriperentur, qui essent donati sanguineo temperamento calidiore, præsertim si insertio iis fieret tempore verno.

Quia autem ab ipso Medicinæ limine bonum est novisse praxim hominum generi adeò utilem, operæprecium est hìc tradere quomodò in eà procedendum sit. Porro inter varias methodos variolas inferendi præstat illa quæ Suttoniana dicitur. Ea consistit in levibus puncturis intrà cutem & epidermidem factis ope lanceolæ leviter intinctæ pure varioloso, quantum fieri potest recenti. Summa hujus acûs pars intruditur horizontaliter sub epidermide, ad usquè unam lineam cùm dimidiâ, propè musculi deltoïdis insertionem, tuncque ibi movetur leviter, quasi sub cuticulâ eam detergere foret intentio; lanceolâ deindè eductâ, juvat puncturam aliquantisper fricari mediante pollice, ad hoc ut virus exactiùs incutiatur. Idem pungendi processus bis, imò & ter repetitur in quolibet brachio, totidem usurpatis lanceolis diversis similiter venenatis: ita ut tres illæ puncturæ contineantur spatio pollicis unius quadrati in loco indicato brachii utriusque. Vixque una sanguinis guttula exstillat, si puncturæ debito modo inflictæ fuerint: nec ullo ligamento opus est.

Non remanet cujusvis puncturæ vestigium sensibile post duodecim circiter horas: imò nec tardiùs videretur ullum, si illæ irritæ futuræ forent. Sed si virus contractum fuit, paulò post apparet levis macula rubra cui brevè succedit pustula acuminata, in apice suo albida, subrubra verò ad basim. Subindè, circà hanc pustulam sensim nascitur sensibilis inflammatoria rubedo parvulam ibi phlegmonem creatura, cujus ope ibidem stabilitur localis aliqua irritatio, quæ ad hanc imprimis partem
allicit

allicit impetum veneni erupturi & postea expellendi.

His ita se habentibus, tandem supervenit rigor febrilis septimo vel octavo die revoluto post insitionem, & succedit febris continua magno capitis dolore stipata, quæ exacerbatur calore lecti, mitigatur verò liberaliori in aurâ.

Tertiâ demùm die post febris invasionem, erumpunt variolæ pustulæ, facili plerùmque calculo numerandæ aut saltem valdè benignæ (quandòque tamen, sed rarò admodùm, malignæ & confluentes); quâ eruptione ut variolis mos est contingente, absolvitur virûs inditi ac reproducti critica separatio.

Deindè separatum illud virus jam excoquendum est in pustulis suppurantibus, ejusque posthâc expulsio critica requirit cautelas easdem ac in variolis vulgaribus; sed hâc cum differentiâ, quòd quantitas materie variolosæ per insitionem creatæ, minorem plerumquè laborem postulet. De cætero, illud variolosum pus, quantumvis febrefactum in officinâ tam benignâ & beneficâ, perindè contagiosum est ac pus variolæ vulgaris, illudque pariter aptum ad insertiones in infinitum successivè multiplicandas.

Olim factitabatur hæc insitio mediante vulnuscule cutis necnon & textûs cellulosi, in quo introducebatur unum & alterum filum sex vel octo lineas longum, & tabo varioloso imbutum. Sed merito jure antiquata est damnanda hæc praxis; quandoquidem non solum maxima oriri queunt mala propter irritationem sauciata & inflammata cutis, (utpotè quæ sensu fruatur exquisitissimo): sed & propter irritationem ipsius textûs cellulosi, pariter & vulnerati & inflammati; qui quantumvis videatur sensu carere in animantibus vivis dùm sanus est, nihilominus capax fit maximæ irritationis dùm inflammatur; proindèque aptus ad strages exitiales excitandas. Hoc miserâ plurimarum victimarum sorte plus quàm satis comprobatum manet.

VARIOLA VOLATILIS DICTA.

FEURIUM eruptivarum adumbrandarum finem faciemus, pauca hîc dicendo de volatili variolâ propter nominis convenientiam, quamvis quoad rem maxima intersit diversitas. Nempè variolâ volatilis dicta, aut fatua, gallicè *vérolette*, *petite vérole volante*, sunt pustulæ crassiora milii grana mole æquantes, quandoque & multò majores, eæque albæ & fero turgidæ. Eæ in vultu præsertim erumpunt intrâ viginti-quatuor horas, præcedente quodam pruritu simul & aliquo febrili paroxismo horarum duodecim, quindecimve aut viginti; quo cessato insultu, nulla alia febris plerumquè recurrit. Sic eruptæ pustulæ prædictæ rumpuntur elapsis triginta-octo vel quadraginta horis post eruptionem; eæque subindè in squammulas farinosas citò facescunt.

Causa variolæ volatilis est virus quoddam omninò indigenum & spontaneum, quod tamen contagiosum est, & quod in superficie cutanei reticuli criticè deponitur; sed illud est nimis benignum ut ibi creet inflammationem, quâ mediante magis coquatur & involvatur: illudque deindè facilè expellitur. Undè aliqua tantùm quoad sedem pustularum affinitas habetur inter variolas volatiles & veram variolam.

Discrepantia præsertim maxima est inter utrasque, quòd à variolâ volatili nihil timendum impendeat nisi, fortè defectu expulsionis perfectæ, quædam accidentia superveniant, ut sit aliquandò: eæque pectori imprimis inimica.



